

Atre **Jejus nhỹ hã mẽ ahkre ho mẽ pa** **xwỳnhjaja kot tanhmã amnhĩ** **nhĩpêx to ho pa hã mẽ harênh**

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwỳnh pê Pawre kôt pa ho pa. Hãmri nê hamaxpêr nê hkràmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwỳnh maatiijaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwỳ pê Parijew nhõ xwỳnhjaja nê mẽ hkwỳ pê Satusew nhõ xwỳnhjaja kot Tĩrtũm kapêr ã kagà htũm kamã harênh nê mar nê hkôt amnhĩ nhĩpêx tã Tĩrtũm Kra Jejus kôt amnhĩ nhĩpêx kêt ã mẽ harê. Mẽ kot kêp Tĩrtũm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwỳnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ uràk nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tĩrtũm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhũm Rukre ã mẽ kot amnhĩ nhĩpêx anhỹrja piitã hã kagà nê Teopre hwỳr kumê. Nê kãm mẽ harênh o:

Tirtũm Karõ jarẽnh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awÿr kagà nhĩpêx nẽ kumẽ. Nà wam ixte awÿr kagà nhĩpêx nẽ mênhta kamã na pa pre amã Jejus kot tanhmã amnhĩ nhĩpêx to hã harẽ nẽ hã kagà. Kot tanhmã amnhĩ nhĩpêx to ho pa nẽ tanhmã mẽ ahkre hto ho paja krax rũm pa pre piitã hã kagà hpa nẽ awÿr kumẽ.

²⁻⁴ Kormã akupÿm kaxkwa hwÿr àpir xwÿj ri na pre ÿ hã mẽ ahkre ho pa kaxyw hkõt mẽ pa xwÿnh kwÿjê rê. Tã nhũm mẽ kãm hkurê xwÿnhjaja kupĩ nhũm amnhĩ xà htÿx kãm hamak rax kãm ty. Hãmri nhũm Tirtũm akupÿm ho htĩr. Nom nhũm ma akupÿm kaxkwa hwÿr àpir kurê kumrêx kêt nẽ. Na pre xatã mẽ kot ÿ hã mẽ ahkre ho mẽ pa xwÿnh maatijê hwÿr hapôj nhũm mẽ akupÿm htĩr kãm omu. Na pre hte nhÿri mẽ hwÿr hapôj nẽ tanhmã mẽ ahkre hto nẽ mẽ kãm:

—Na pre Tirtũm mẽ ato hkra nẽ tãm mẽ ate amnhĩ nhĩpêx o apa kaxyw mẽ axunhwÿ.

Anhÿr o mẽ ahkre hã arĩgro ho 40. Hãmri nẽ kormã mẽ kamã pa ri axte tanhmã mẽ kãm kapêr to. Tirtũm Karõ nhÿ hã mẽ kãm kapêr nẽ mẽ kãm:

—E kêr ka mẽ krĩ ja kamã ri apa nẽ tokyx ma nhÿhÿm apa hkêt nẽ. Kê Inhĩpêêxà Tirtũm mẽ awÿr amnhĩ Karõ rê mãn. Ra ixte mẽ amã harẽnh xà hkõt koja mẽ awÿr kurê nhũm mẽ awÿr wrÿ nẽ mẽ akarõ mã agjê ka mẽ rĩ kormã anhgrà nẽ ma nhÿhÿm krĩ hkõt ri mẽ kãm kapêr jarẽnh o ri mẽ hkõt apa.

⁵ —Juãw Paxis na pre hte Tirtũm mã gôx kãm mẽ hkrã kumrãr o pa. Tã koja Tirtũm tokyx mẽ awÿr amnhĩ Karõ rē. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awÿr kurē. Koja hã apkati grēre nhũm mẽ awÿr kurē nhũm ixpãnhã mẽ awÿr wrÿ nē mẽ amã agjê nē mẽ akamã mẽ akôt pa ho pa. Ka mẽ rĩ kormã Jerujarē rũm ajapôj nē ma mẽ kãm Tirtũm kapēr jarēnh o ri mẽ hkôt apa. Anē.

*Jejus akupÿm kaxkwa hwÿr àpir ã harēnh
Makre 16.19; Rukre 24.50*

⁶ Tã nhũm mẽ axte akuprõ. Jejus nē ÿ hã mẽ ahkre ho mẽ pa xwÿnh maatijaja nhũm mẽ hixêt pê Oriwēhti nhĩmõk ã axte axpēn wÿr akuprõ. Hãmri nhũm mẽ amnhĩ tã Jejus kukja nē kãm:

—Kwa Pahihti mẽ inhmã mẽmoj jarē. Xà kot kaj tokyx apē Tirtũm kot mẽ ixwÿr amēnh xwÿnh ã amnhĩ jarē nē Rõm nhõ xwÿnhjê nē mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anē.

⁷ Hãmri nhũm mẽ kãm:

—Nà Inhĩpêêxà pix na ã mẽmoj kot anhÿrja kukamã àhpumunh. Tapxipix na kot mẽmoj tanhmã ho hã arĩgro nē mẽmoj tanhmã ho hã mytwrÿ pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarēnh ma?

⁸ Nà kot paj ãm mẽ amã mẽmoj to pyxire nē hkukamã harē. Koja Tirtũm tokyx mẽ awÿr amnhĩ Karõ rē nhũm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkôt anhgrà nē ma mẽ kãm ixkapēr jarēnh o ri mẽ hkôt apa. Jar Jerujarē kamã nē pika pê Jutej kôt

ně nhām pika pê Samar kamā ně pika piitā hkôt mē kām ijarēnh o ri mē hkôt apa. Ā mē ate amnhī nhīpêx anhÿr pix kukamā kot paj mē amā harē. Anē.

⁹ Nhūm pre ā Jejus mē kām kapēr anē hāmri ně mē kēp kànhmā àpir o tē ně mē noo mā ma kaxkwa hwÿr àpir o tē ně kakrām axà ně mē kēp akunok.

¹⁰ Hāmri nhūm mē tee ri hapēr o kuhē rāhā nhūm mēhō myja wa axkrut ně mē hwÿr wrÿ ně mē kutā wa xa. Wa ê hakaj ně wa xa.

¹¹ Hāmri ně mē kām:

—Pa Garirej nhō xwÿnhjaja? Kwa mo kaxyw na ka mē tee ri kaxkwa pumunh o akuhê? Tīrtūm na akupÿm amnhī wÿr Kra Jejus o api ka mē àpir kām omu. E mē tee ri hkukamā ajamaxpēr kēt ně. Kojā nhÿrmā man akupÿn mē awÿr wrÿ. Te mē arūm kaxkwa hwÿr àpirja pyrā ně akupÿn mē awÿr wrÿ ka mē omu. Anē.

*Akupÿm Jerujarē hwÿr mē mrar ā mē harēnh
Rukre 24.52*

¹² Tā nhūm Jejus nhÿ hā mē ahkre ho mē pa xwÿnh maatijaja wa kuma ně awjanā ně ma akupÿm krīm mra. Hixêt pê Oriwēhti rūm ma akupÿm Jerujarē hwÿr mra. Wÿr jawÿ nhūm mē akupÿm hpôx tokyx anē.

¹³ Hāmri ně akupÿm kÿx pê ixkreja wÿr api ně agjê. Na pre

Simāw Pêtre ně

Juāw ně

Xiakre ně

Andrehti ně

Firipti ně

Tomas ně

Patoromew nê
 Matêwre nê
 Xiakre hô pê Apew kraja nê
 Simãw Jerox nê
 Jut pê Xiakre hkraja.

Mê piitã Jejus nhỹ hã mẽ ahkre ho mẽ pa xwýnh maatiyaja na pre mẽ.

¹⁴ Nê mãânên mẽ hkôt mẽ hkwýjaja. Jejus katorxà Marir nê Jejus tøjaja nê Jejus kot tanhmã mẽni ho mex to xwýnh kwýjaja nhũm prem kýt pê ixkreja wýr Jejus nhỹ hã mẽ ahkre ho mẽ pa xwýnh maatiyê hkôt gjêx pa. Hãmri nê xatã axpên wýr akuprô nê Tirtũm mã amnhĩ jarênh o hkrĩ.

*Tirtũm kot Jut Kariot pãnhã mēhõ xãm ã harênh
 Matêwre 27.3-10; Juãw 15.27*

¹⁵⁻¹⁹ Tã nhũm mẽ kot Jejus kôt amnhĩ xunhwýr xwýnhjaja ra kêp 120. Jakamã nhũm mẽmo arĩgro hã axpên wýr akuprô nê hkrĩ. Nhũm Simãw Pêtre kãnhmã xa nê tanhmã mẽ kãm Jut Kariot jarênh to nê mẽ kãm:

—E Jejus kôt ixtõ nê ixtõxjaja. Pa mẽ amã tanhmã finat Jut Kariot jarênh to ka mẽ inhma. Na pre axtem nê mẽ pahkwýjê mã Jejus ã amýnê nê hpãnhã kàxpore hkwý jamý nê o tẽ nê ho amnhĩm pyka hkwý japrô. Tã tanhmã amnhĩ to nê nhỹri õ pyka kamã tẽm nê amnhĩ tu katõk nê hkrêx kato nê ty nê hkamrô ho õ pyka xy hpa. Jakamã nhũm Jerujarê nhõ xwýnhjaja harênh ma nê pykaja ã hixi mẽ nhũm kêp “pyka kamrôhti.” No mẽ pahpê Ijaew kapêr kãm kêp “Ajetãm.” Amnepêm na pre Tirtũm Karõ finat Tawi mã Jut Kariot kukamã tanhmã harênh to. Kormã kator nê kot tanhmã amnhĩ to hkêt tã nhũm ra hkukamã omu nê Tawi mã

harê. Kot axtem nê mē kām Jejus ã àmnênhja nhũm hkukamã omu nê Tawi mǎ harê nhũm kuma nê ô ri hã kagà. Tã nhũm kot hkukamã hã kagà hkôt nhũm ã Jejus nhĩpêx anê. Jut Kariotja mē panhĩõ na pre. Na pre Jejus mē pahpyrà nê amnhĩm kuta. Mē pahpyrà nê ý hã kapêr jarênh o pa kaxyw. Tã nhũm axtem nê ã hipêx anê.

²⁰ Nom na pre Tawi kot Tĩrtũm mex ã grer ã kagà kot ra hkukamã tanhmã harênh to. Kagà hkwyè pè Sam kamã kot harênh kot:

Kot amnhĩ tomnuj xwýnhhta nhõrkwỹ koja hkaprýn kuhê ho kuhê nhũm mēhõj mýr pè kamã pa hkêt kumrêx. Koja ãm arĩ hkaprýn kuhê ho kuhê.

Nom kot Jejus mǎ tanhmã amnhĩ nhĩpêx to ho paja kê mēhõ mýr pè ho amnhĩptà nê hpãnhã Jejus nhỹ hã mē ahkre ho pa. Anê.

Ã Tĩrtũm kapêr ã kagà htũm kot Jut Kariot kukamã harênh kot anhỹr.

²¹ Jakamã e ixkwýjaja. Kot puj mē hpãnhã mē atõ xãm ka Jut mýr pè mē pahpê Jejus nhỹ hã mē ahkre ho ixpa xwýnhjê hkôt Jejus akupým htĩr ã harênh o apa.

²² E mē atõ na ka pre mē ixpyràn finat Juãw Paxis kot Jejus hkrã kumrãr ã omu? Nê Jejus kot ri tanhmã amnhĩ nhĩpêx to ho pa xà hkrax rũm ka mē ixkôt ri omunh o ri apa? Nê htyk kãm omu nê akupým htĩr kãm omu nê ma akupým kaxkwa hwýr àpir kãm omu? E mē atõ na ka pre mē ixpyràn ã kot amnhĩ nhĩpêx anhỹr ã omunh par o ri hkôt apa? ã mē ate kot amnhĩ nhĩpêx anhỹr ã omunh o apa xwýnhjê hõ kot paj mē ata ka Jut Kariot mýr pè

mě ixpyràn ma mẽ kãm Jejus akupỹm htĩr ã harěnh o ri apa. Aně.

²³ Nhũm pre ã Simãw Pêtre mẽ kãm kapěr aně. Hãmri nhũm mẽ kuma ně axpẽn pumunh o hkrĩ hãmri ně Maxitre mẽ Jujere wa kãm hamaxpěr. Jujere na pre hixi axkruněpxi. Na pre kệp Jujere ně kệp Pasapas ně kệp Justi.

²⁴⁻²⁵ Hãmri nhũm mẽ wa hã Tĩrtũm kukja ně kãm:

—Pa Tĩrtũm? Nà na pre finat Jut Kariotja Jejus kaga ně ty ně kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma mỗ. Tã ot pa mẽ ixte mễhỗ kot mỳr pê mẽ ixpyrà ně Jejus nhỹ hã mẽ ahkre ho pa kaxyw mễhỗ hã akujêr kaxyw akuprỗ. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tĩrtũm. Ate mẽ ijamaxpěr kôt mẽ ixpumunh par ně mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kěn pijakrutja ã wa hixi xi ně ho àk ně hỡ py. Hãmri ka amã hprãm xwỳnhta ta. Kêr pa mẽ kěn pumunh kêt rãhã hỡ py ně hã hixi pumu ně amã hprãm xwỳnh kôt omunh kurê kumrêx. Aně.

²⁶ Nhũm prem ã Tĩrtũm mã kapěr aně hãmri ně kějja o axkamur ně ho àk ně omunh kêt rãhã ja py ně omu nhũm hã Maxitre nhĩxi nỡ. Jakamã nhũm Jejus nhỹ hã mẽ ahkre ho mẽ pa xwỳnh maatijaja amnhĩ kôt kumê nhũm mẽ akupỹm kệp 12.

2

*Tĩrtũm Karỗ kot mẽ hwỳr wryk ã harěnh
Rukre 24.49; Atre 4.31, 8.15, 10.44, 19.2*

¹ Tã nhũm mẽ hkĩnh pê Pētekos kato nhũm mẽ kot Jejus kôt amnhĩ xunhwỳr xwỳnhjaja nhỹri axpẽn wỳr akuprõ nẽ hã hkĩnh. Pētekosja ã na pre hte Ijaew mẽ hpur kãm mẽõ rũnh ã hkĩnh kaxyw axpẽn wỳr akuprõ nẽ hã hkĩnh. Jakamã nhũm mẽ kot Jejus kôt amnhĩ xunhwỳr xwỳnhjaja haxwỳja axpẽn wỳr akuprõ.

² Hãmri nẽ kaxkwa kamã mẽmoj ma. Nhũm mẽmoj te kôk xàpêr tỳx krihkrit pyràk o mẽ hwỳr wrỳk o mỗ nẽ mẽ pikuprõnh xà hã ixkreja wỳr axà nhũm mẽ piitã kuma.

³ Hãmri nhũm mẽmoj te kuwy jakrax pyràkja ahpỹnhã mẽ hwỳr anhrà nẽ mẽ hkrã nhĩmõk ã hikwỹ.

⁴⁻¹³ Tĩrtũm Karõ na pre. Tãm mẽ hwỳr wrỳk jakamã ã ri mẽ hipêx anẽ. Hãmri nẽ kot mẽ ho amnhĩptàr kaxyw mẽ hkarõm gjêx pa nhũm mẽ ỹ hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwỳ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwỳ ho kapêr. Jao ahpỹnhã mẽ kapêr kwỳ ho Tĩrtũm mã mex o mex ã harẽ. Na pre Ijaew kwỳjaja ahpỹnhã pyka hõ kamã ri mẽ hkôt pa nẽ mẽ kapêr ma nẽ ho kapêr o pa. Tã akupỹm Jerujarẽ hwỳr pan pøj nẽ kamã ri pa ho pa. Hãmri nẽ mẽmojta ma nẽ ma Jejus kwỳjê hwỳr hprõt nẽ ahpỹnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pê mẽ kuma nẽ tanhmã axpẽn mã mẽ harênh to ho:

—Kokỹỹ. Garirej nhõ xwỳnhjaja kot mẽ pakapêr mar kêt tã ra tanhmã amnhĩ to nẽ ahpỹnhã ri mẽ pakapêr o kapêr. Ahpỹnhã mẽ pakapêr nẽ ahpỹnhã mẽ panhõ pyka htã nhũm mẽ ã ri mẽ pakapêr o

kapêr anê.

Na pika pê Pat

nê Met

nê Erâw

nê Mêsopotâm

nê Jutej

nê Kapatos

nê Pôt

nê As

nê Prik

nê Pâpir

nê Ejit

nê Sirên wÿr Ripja

nê krī pê Rôm

nê gô hipôk pê Kret

nê Arap.

Nê mẽ pahkwÿjaja mẽ pahpê Ijaew kumrêx

nê mẽ pahkwÿjaja amarĩ ri amnhĩ to Ijaew.

Ãm ahpÿnhã mẽ panhõ pyka nê ahpÿnhã ri mẽ pakapêr.

—Tã pu mẽ ahpÿnhã mẽ pakapêr kãm mẽ kapêr ma. Tĩrtũm mex ã mẽ kot axpên mã harênhja pu mẽ hã mẽ mar mex nê. Anê.

Nhũm prem ã axpên mã mẽ harênh anê nê tee ri mẽ omunh o kuhê. Amnhĩ jaêr pê amnhĩ kapêr kãm mẽ kapêr ma nê tee ri hamaxpêr nê axpên mã:

—Kokÿÿ. Tanhmã mãn pre wem amnhĩ to nê ra mẽ pakapêr ma nê mẽ pakapêr o kapêr? Anê.

Nhũm mẽ hkwÿjaja axtem nê ri mẽ hã hpêr o axkê nê axpên mã:

—Tk. Ãm mẽ pipãnh ã ã ri mẽ kot amnhĩ nhĩpêx anhÿr kênã. Anê.

*Simãw Pêtre kot mẽ kãm ujarênh
Atre 3.12-26*

14 Hãmri nhũm Simãw Pêtre ã mẽ kapêr anhÿrja ma hãmri nê kÿx pê mẽ kãm kapêr nê mẽ kãm:

—E Jerujarê nhõ xwÿnhjaja nê mẽ apê ixkwÿ Ijaew. Pa mẽ amã mẽmoj jarê ka mẽ inhma nê inhmar tÿx nê.

15 Na ka mẽ atÿx ri mẽ ixpipãnh ã mẽ ixkamnhÿx. Mẽ ixkrã pipãnh kêt. Kormã myt kaxkwa nhÿpôk wÿr htêm kênã. Na hte Ijaew kwÿhtã kagôxÿhti ho hkôm kêt nê.

16 Ja na pre Tÿrtũm amnepê mã ã mẽ ixte amnhÿ nhÿpêx anhÿrja kukamã mẽ ijarê nhũm ÿ hã kapêr o pa xwÿnh finat Joew mẽ ixkukamã hã kagã. Nê hã kagã ho:

17 Koja nhÿrmã mẽmoj piitã hapêx kaxyw pa mẽ piitã mẽ hwÿr Ixkarõ rê nhũm ma mẽ hwÿr wrÿ nê mẽ hkarõ mã agjê. Hãmri nhũm mẽ hkanrêhã mẽ hkra xaptàr nywjaja ma mẽ kãm ixkapêr jarênh o ri mẽ hkôt pa. Koja mẽ hpimtir kãm amnhÿ kukamã mẽmoj pumu. Nê mẽhpigêjtaja haxwÿja. Kot paj mẽ hpimtir kãm tanhmã mẽ kãm ixkapêr to.

18 Nê kot paj mẽ kot ixkôt ri tanhmã amnhÿ nhÿpêx to ho mẽ pa xwÿnhjê hwÿr Ixkarõ rê nhũm mẽ ÿ hã ma mẽ kãm tanhmã ixkapêr jarênh to ho ri mẽ hkôt pa.

19 Kot paj kaxkwa kamã nê pyka kamã aa mẽ kot mẽmoj pumunh kêt kwÿ ho anê nhũm mẽ amnhÿ jaêr pê omu. Jao nhÿri mẽ hkamrô pumu nê kuwy pumu nê kuwy hkũm pumu hãmri nê tee ri amnhÿ kukamã hamaxpêr.

²⁰ Nē koja myyti ahtyk nhũm mytwrÿre haxwÿja te mry kamrô pyræk. Pahihti Jejus akupÿn hpôx xà hã arĩgro xwÿj ri koja mẽmoj ã amnhĩ nhĩpêx anê. Akupÿn hpôx xà hã arĩgro koja mex kumrêx.

²¹ Tã koja mēhō mẽmoj kot ã amnhĩ nhĩpêx anhÿr ã omu nē amnhĩ kaxyw inhmã hamaxpêr nē amnhĩ to ixwÿ pa kuma nē ho ixkra nē mẽmoj punujta pé utà. Anê.

Na pre ã Tĩrtũm kapêr anê nhũm finat Joewja mẽ pamã hã kagà.

²² E pa mẽ amã tanhmã Jejus jarēnh to ka mẽ inhma. Nà Najare nhõ xwÿnh na pre. Mẽ pahte Tĩrtũm nhÿ hã kot tanhmã amnhĩ nhĩpêx to ho pa hã omunh kaxyw na pre Tĩrtũm mẽ pahwÿr kumē nhũm ÿ hã mẽ panoo mã tanhmã amnhĩ nhĩpêx to ho pa. Nē aa mẽ pahte mẽmoj pumunh kêt kwÿ ho anhÿr o pa pu prem hã omu.

²³ –Tã ka prem tanhmã kaxyw ajamaxpêr punuj to nē apĩ. Tĩrtũm ra kot amnepê mã ja kukamã ja hã mẽ apumunh mex tã mẽ pahwÿr kumē ka mẽ axtem nē apĩ. Jao mẽ kot htÿx ri amnhĩ nhĩpêx o mẽ pa xwÿnhjê mã agõ nhũm mẽ kupĩ. Pĩ kahpa hã kunhõ nhũm ty. No ãm mẽ kajaja na ka prem mẽ kãm hã amÿné nhũm mẽ ã mẽ amã hprãm xà hkôt hipêx anê nē mẽ amã kupĩ.

²⁴ –Tã nhũm Tĩrtũm akupÿm ho htĩr nhũm akupÿm htĩr o htĩr nhũm mẽ htykja tee ri kot amnhĩ kôt mēnh prãm kaprÿ.

²⁵ Amnepêm na pre finat Tawija Jejus akupÿm htĩr kukamã harê. Te Jejus tãm kapêr pyræk o kapêr nē kapêr o:

Na hte Pahi Maati ixkôt pa ho pa rãhã nê. Kot inhĩhkô hã ixtãnopxar o pa jakamã kot paj inhmã ma hkêt nê ri ixãmnhĩx ijamakêtkati nê ri ixpa.

26-27 Pa Tĩrtũm? Nà kot paj nhỹrmã ixtyk tã arĩ amnhĩ wỳr akãm ama. Kot kaj mẽ htykjê kamã ixkarõ rer kêt nê. Ixte akapêr kôt amnhĩ nhĩpêx mex o ri ixpa jakamã koja inhĩkormã omnu nê hkro hkêt ri ka akupỹm ixto ixtĩr. Jakamã na pa inhmã ixtyk pyma hkêt nê ixkĩnh nê ijamakêtkati nê ri ixpa. Nê amnhĩ kĩnh jarênh rãhã ho ri ixpa.

28 Na ka pre akupỹm ixto ixtĩr ã amnhĩ jarê pa ixtĩr tũm nê ixpa ho ixpa kaxyw. Tã ate ixkôt ri apa rãhã jakamã pa ixkĩnh nê ri ixpa. Anê.

29 ã na pre mẽ panhĩgêt finat Pahi Tawija Jejus htyk nê akupỹm htĩr kukamã harênh anê. No tãm amnhĩ jarênh kêt nê. Tawija na pre ty nhũm mẽ haxà nhũm htem arĩ haxàr xà hã pika ho mex o pa. Tã tãm ã kot amnhĩ jarênh anhỹr ro nhỹx akupỹm htĩr nhũm mẽ arĩ haxàr xà kaprỳ ho mex o pa hkêt nê.

30 Pahi Tawi kêp Tĩrtũm nhỹ hã kapêr jarênh o pa xwỳnh jakamã nhũm Tĩrtũm kãm hkanrêhã htãmnhwỳ Jejusja kukamã harê nê kãm:

Koja nhỹrmã akanrêhã atãmnhwỳjê hõ amỳr pê apyrà nê mẽ ho amnhĩptàr o pa. ãm hãmri na pa amã ja jarê. Anê.

31 Nhũm pre ã Tĩrtũm Tawi mã mẽ pakaxyw ãm mã xwỳnhhta jarênh anê nhũm kuma. Nê mar tỳx jakamã hkukamã htyk nê akupỹm htĩr ã harê nê hã kagà. Nê hã kagà ho:

Koja Tĩrtũm mẽ htykjê kamã hkarõ rer kêt nẽ
nhũm aa ĩ omnu nẽ hkro kêt. Anẽ.

Ã na pre finat Tawija Jejus Kris kukamã harẽ nẽ hã
kagà anẽ.

³² Kot harẽnh xwỳnh Jejusja tãm na pre Tĩrtũm
akupỹm ho htĩr pa mẽ pamjaja akupỹm htĩr kãm
omu. Hãmri nẽ mẽ ixte omunh xà hkôt ã mẽ amã
harẽnh anẽ. Anẽ.

Nhũm pre ã Simãw Pêtre mẽ kãm Jejus jarẽnh
anẽ. Hãmri nẽ mẽ kãm:

³³ —Na pre Tĩrtũm akupỹm amnhĩ wỳr Kra Jejus
o api. Hãmri nẽ kãm anẽ nhũm ĩhkô hã mẽmoj
piitã ho amnhĩptàr o hkrĩ. Hãmri nhũm Tĩrtũm kot
kãm amnhĩ jarẽnh xà hkôt kãm amnhĩ Karõ gõ.
Tã nhũm ra amnhĩ pyrà nẽ mẽ ixwỳr kurẽ nhũm
jarãhã mẽ ixwỳr te kuwy jakrax pyrà nẽ mẽ ixwỳr
wrỳ nẽ mẽ ixkarõ hwỳr gjêx pa. Hãmri pa mẽ ã hã
ahpỹnhã mẽ akapêr o ixkapêr ka mẽ inhma. Tã mẽ
akwỳjaja axtem nẽ mẽ xpipãnh ã mẽ ixkamnhĩx.

³⁴ No finat Tawija na pre tãm kaxkwa hwỳr àpir
ã amnhĩ jarẽnh kêt nẽ. Jejus kot ĩ ho kaxkwa hwỳr
àpirja na pre harẽ nẽ harẽnh o:

Na pre Tĩrtũm inhõ Pahihti mã kapêr nẽ kãm:

³⁵ “E jar inhĩhkô hã nhỹ.

Pa amã mẽ kãm akurê xwỳnhjê gõ ka mẽ ho
amnhĩptàr o akrĩ.” Anẽ.

Ã na pre finat Tawija Tĩrtũm kapêr jarẽnh anẽ.
Nom tãm ĩ rãhã kaxkwa hwỳr àpir ã amnhĩ jarẽnh
kêt nẽ. Pahihti Jejus na pre ã hã harẽnh anẽ.

³⁶ Jakamã kwa ixkwỳ Ijaew. Mẽ inhma nẽ inhmar
tỳx nẽ. Mẽ ate Jejus ã axàmnhên nhũm mẽ kot
mẽ amã pĩ kahpa hã hpĩr xwỳnhhta. Tãm na pre

Tĩrtũmja kēp mē panhõ Pahihti kaxyw ãm. Nē kēp mē papytār xwỳnh kaxyw mē pakaxyw ãm. Anē.

³⁷ Nhũm pre ã Simãw Pêtre mē kãm ujarēnh anhỹr o xa. Hãmri nhũm mē tee ri ujarēnhja ma nē hkaprĩ nē. Nē tee ri amnhĩ kukamã hamaxpēr nē hamaxpēr o:

—Hêxta waa nē. Pēr ãm hãmri na pre Jejus mē pamã amnhĩ jarēnh tã pu prem amnhĩ kaxyw hkõt pajamaxpēr kêt nē axtem nē kupĩ. Anē.

Hãmri nē amnhĩ tã mē hkukja nē Simãw Pêtre mã:

—Kwa ã kot anhỹr jakamã tanhmã kot paj mē amnhĩ nhĩpêx to? Anē.

³⁸ Hãmri nhũm mē kãm:

—Nà kēr ka mē tee ri ate amnhĩ tomnuj mã ajamaxpēr nē akaprĩ nē. Hãmri nē Jejus Kris kõt amnhĩ xunhwỳ. Pa mē ja hã mē apumu nē Jejus nhỹ hã mē akrã kumrã. Hãmri nhũm Tĩrtũm ja hã mē apumu nē te amnhĩ katut kõt mē ate amnhĩ tomnuj piitã rēnh par pyrã nē axte kãm hamaxpēr kêt nē. Hãmri nē mē ixkuxwar mē awỳr amnhĩ Karõ rē.

³⁹ Kãm mē awỳr rēnh prãm. Mē amã nē mē akanrēhã mē akra nē mē atãmnhwỳjê mã nē mē kot kormã Tĩrtũm kapēr mar kêt xwỳnhjê mã. ãm mē kot amnhĩ to hwỳr xwỳnh piitã nhũm kãm mē hwỳr rēnh prãm. Anē.

⁴⁰ Nhũm pre ã Simãw Pêtre mē kãm ujarēnh anē. Mē kãm kapēr xihýt̄x o kapēr ry nē. Hãmri nē mē kãm:

—Koja nhỹrmã Tĩrtũm mē kot tanhmã amnhĩ tomnuj to ho mē pa xwỳnhjaja tanhmã mē homnuj

tỳx to. Jakamã kwa mẽ tokyx mẽ ate amnhĩ tom-nuj kaga kê tanhmã mẽ ato hkêt nẽ. Anẽ.

⁴¹ Hãmri nhũm mẽ hkwyjaja kapër mar tỳx nẽ amnhĩ kaxyw Jejus kôt hamaxpër nẽ hkôt amnhĩ xunhwỳ. Mẽ ohtô rax nẽ hkôt amnhĩ xunhwỳ. Mẽ kêp 3.000 nẽ hkôt amnhĩ xunhwỳ. Hãmri nhũm mẽ kot Jejus nhỹ hã kapër jarēnh o mẽ pa xwỳnhjaja mẽ hkrã kumrãr pa. Mẽ kêp Jejus kwỳ hã amnhĩ to amnhĩrĩt kaxyw mẽ hkrã kumrãr pa.

⁴² Hãmri nhũm mẽ ra mẽ kot Jejus kôt amnhĩ nhĩpêx xwỳnhjê hkôt amnhĩ nhĩpêx o pa nhũm Jejus nhỹ hã mẽ ahkre xwỳnh maatiijaja apkati mẽ Jejus kapër o mẽ ahkre nhũm mẽ mar tỳx nẽ ra Jejus kôt amnhĩ nhĩpêx mex o mō. Nẽ gaa nẽ hkôt amnhĩ nhĩpêx mex o pa. Mẽ kãm kapër mar prãm tỳx jakamã na pre htem axpēn wỳr akuprō nẽ axpēn kutã apku nẽ Tĩrtũm mã amnhĩ jarēnh o hkrĩ. Nẽ mẽ kãm axpēn to mex pix prãm o axpēn kôt pa ho pa.

Jejus kwỳ kot tanhmã amnhĩ nhĩpêx to hã mẽ harēnh

Atre 4.32-35

⁴³ Tã nhũm Jejus nhỹ hã mẽ ahkre ho mẽ pa xwỳnh maatiijaja xatã Tĩrtũm nhỹ hã aa mẽ kot mẽmoj pumunh kêt kwỳ ho anhỹr o ri krĩ nhõ xwỳnhjê hkôt pa nhũm mẽ piitã ja hã mẽ omu. Amnhĩ jaer pê mẽ omu nẽ mẽ kamã no pyma ho tee ri tanhmã Tĩrtũm mã hamaxpër to.

⁴⁴ Nhũm mẽ kot Jejus kôt amnhĩ xunhwỳr xwỳnh piitã mẽmoj to axpēn kutã nojarêt o pa. Jao axpēn pê ri mẽmoj to õxy hkêt nẽ pa.

⁴⁵ Jakamã nhũm mēhō kēp amrakati nhũm mē ja hã omu hāmri nē ò pyka hkwỳ ho wēnê rỳ mē hikukrêx kwỳ ho wēnê nē kàxpore jamỳ nē ma o mra nē mē kām kugō. Na pre hte ã mē kot Jejus kôt amnhĩ xunhwỳr xwỳnhjaja axpēn nhĩpêx anhỹr o pa.

⁴⁶ Hāmri nē apkati mē Tĩrtũm mã amnhĩ jarēnh xà hã ixkre hwỳr mra nē kām mex o mex ã harē. Nē hamakêtkati nē àmnhĩx ri hkĩnh kām axpēn nhōrkwỹ hkôt ri apkur o pa.

⁴⁷ Pê Tĩrtũm mã mex o mex ã harēnh o ri axpēn kôt pa. ã mē kot amnhĩ nhĩpêx anhỹr o pa jakamã nhũm krĩ nhō xwỳnh piitã kām mē hkĩnh nē. Nē mē hkwỳjaja apkati mē mē hwỳr mra nē mē hkôt axkamē nē mē uràk nē Jejus kôt amnhĩ xunhwỳ nhũm Tĩrtũm ja hã mē omu nē mē ho hkra. Jakamã nhũm mē ra ohtô rax kumrêx o mō.

3

Te grà xwỳnh jarēnh

Juãw 14.12-14; Atre 14.8-10

¹ Tã nhũm apkati hō hã nhũm Simãw Pêtre mē Juãw wa ma Tĩrtũm mã amnhĩ jarēnh xà hã ixkre hwỳr wa tē. Na pre hte myt àhpanh grire nhũm mē piitã kot Tĩrtũm mã amnhĩ jarēnh kaxyw hwỳr mra. Jakamã nhũm Simãw Pêtre mē Juãw wa haxwỳja ma hwỳr wa mra.

² Nhũm mēhōja hakwakrem hkrĩ. Katorxà nhōxà hkre rũm hte grà nē kator xwỳnhhta. Nē arĩ hkrĩ ho hkrĩ nē aa kànhmã âm nē ri pa hkêt nē. Nhũm hte hkràmnhwỳjaja apkati mē hamỳ nē ma o pa nē Tĩrtũm mã amnhĩ jarēnh xà hã ixkre jakwakrem hkrĩ nhũm mē hwỳr o hkrĩ. Hakwakreja

mě kot kãm: “Mě gjêx xà mex” anhÿr xwÿnh̄ta kapem hwÿr mẽ mrar xwÿnh̄jê hwÿr o hkrĩ.

³ Tã nhũm Simãw Pêtre mẽ Juãw wa tẽ nẽ ixkreja wÿr wa àr o tẽ nhũm hte grã xwÿnh̄ta wa omu nẽ kàxpore hã wa kuwÿ

⁴ nhũm Simãw Pêtre omu nẽ kãm:

—E amnẽ wa ixpumu. Anẽ.

⁵ Hãmri nhũm kuma nẽ htÿx ho wa kot kãm kàxpore hkwÿ nhõr ã wa hkamnhĩx nẽ wa omu

⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pẽ Najare nhõ xwÿnh̄ta nhÿ hã amã ixkapêr jakamã tokyx kãnhmã xa nẽ ri mra. Anẽ.

⁷ Hãmri nẽ upôk rũm hpa hã kupy nẽ kãnhmã ãm nhũm hte mex nẽ kãnhmã xa nẽ amnhĩ te karo ho ri mra.

⁸ Hãmri nẽ hte mex ã amnhĩ pumu nẽ hkĩnh tÿx nẽ. Nẽ hkĩnh xàj ma wa hkôt harĩ ho tẽ nẽ wa hkôt ixkrem axà. Tĩrtũm mã mex o mex ã harẽnh pẽ harĩ ho wa hkôt tẽn axà.

⁹ Hãmri nhũm mẽ piitã amnhĩ jaêr pẽ akupÿm mex ã omu nẽ kamã no pyma nẽ.

¹⁰ Nẽ axpên mã:

—Kokÿÿ mũjti na pre hte mẽ gjêx xà mex kamã mẽ hwÿr rãhã ho hkrĩ htã nhũm Tĩrtũm tanhmã ho nhũm kãnhmã xa nẽ ri mrar mex kurê kumrêx. Hêxta waa nẽ. Anẽ.

Simãw Pêtre kot mẽ kãm ujarẽnh

Rukre 24.46-47; Atre 2.14-36

¹¹ Hãmri nhũm hte mex xwÿnh̄ja Simãw Pêtre mẽ Juãw wa hkôt ixkre hwÿr axà nẽ wa kuri xa. Nhũm mẽ piitã amnhĩ jaêr pẽ harẽnh ma nẽ hwÿr hprôt

nē agiê nē omu. Mē kot ixkre nhĩkjê jarēnh o: “Pahi Sarumāw nhõ” anhỹr xwýnh jarēnhja wýr nhũm mē hprõt nē hte mex xwýnhhta kamã no pyma ho kuhê. Nē kuri Simāw Pêtre mē Juāw wa omu nē axpēn mã wa harēnh o:

—Hêxta waa nē. Tanhmã na we wa amnhĩ to nē akupým kãm hte ho mex nhũm ri mra?

Anē nē wa kamã no pyma nē.

¹² Hãmri nhũm Simāw Pêtre mē kuma nē mē kãm:

—Pa ixkwýjaja. Kwa mēmo na ka mē ri mē ixkamã ano pyma ho akuhê? Xà wa ixàhpumunh týt xà ho na pa wa ho mex? Nà ja kot anhỹr kêt. Rýt xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nà mããnēn ja kot anhỹr kêt.

¹³⁻¹⁷ Mē ate omunh xwýnhhta Jejus tãm kot ho mex kênã. Kot amnhĩ kaxyw kãm hamaxpēr týt jakamã nhũm akupým ho mex ka mē omu.

—Finat Apraāw nē Ijak nē Jako mē hkwyjaja kot hkôt amnhĩ nhĩpêx o pa xwýnh pê Tĩrtũmja. Tãm na pre akupým Kra Jejus o htĩr nē mex o mex ã harê. Mē ate hã axàmnēnh nhũm mē kot hpĩr xwýnhhta. Pahihti Pirat kot kãm urer kaxyw tã ka mē nē kãm akapēr kãm axihtýt nē. Nom Jejus tãm kot amnhĩ nhĩpêx o pa xwýnh na pre. Na pre hte amnhĩ nhĩpêx mex rãhã ho pa htã ka mē axtem nē hkaga. Nhũm pahihti Pirat mē ate kot kãm urer kêt ã axihtýt nhũm kãm urer kêt nē õ pôristi mã kugõ nhũm mē amã kupĩ. Mē kajaja mē amã hprãm xà hkôt mē amã kupĩ. Tĩrtũm kot mē pahwýr mēnh tã ka mē axtem nē apĩ.

—Nom mē ate kêp Tĩrtũm Kra hã omunh kêt jakamã na ka prem ã hipêx anē. Mē kot mē ato amnhĩptàr xwýnhjê mē na ka prem amarĩ apĩ. Na

prem mẽ axàmnhênh xà hkôt mẽ amã pĩ kahpa hã kunhò nê ã hpĩr anê. Kêp akupỹm mẽ pahto mẽ pahtĩr xwỳnh tã ka prem axtem nê apĩ. No nhũm Tĩrtũm akupỹm ho htĩr pa prem akupỹm htĩr kãm omu.

18 —Amnepê m Tĩrtũm nhỹ hã kapêr jarênh o mẽ pa xwỳnhjaja na prem Tĩrtũm kot mẽ pakaxyw ãm xwỳnhja kukamã tanhmã harênh to nê hã kagà nê mẽ kãm harênh o pa. Kot amnhĩ xà htỳx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhỹr xàja kôt ka mẽ ã hipêx anê nê apĩ.

19 —Jakamã kwa mẽ tee ri mẽ ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wỳ kê mẽ anê mẽ ate amnhĩ tomnuj piitã amnhĩ katut kôt rênh pa.

20 Hãmri nê mẽ atò mex nê ka mẽ kukwak ri akĩnh nê ajamakêtkati nê axàmnhĩx ri apa. Kojã nhỹrmã akupỹn mẽ pahwỳr Jejus mẽ. Ra kot mẽ pakaxyw ãm kênã.

21 —Nom kojã tokyx akupỹn wrỳk kêt nê. Kojã kormã kaxkwa kamã pa rãhã nhũm Tĩrtũm akupỹm kot mẽmoj piitã ho mex par mẽ nhũm rĩ kormã akupỹn mẽ pahwỳr wrỳ. Amnepê m Tĩrtũm nhỹ hã kapêr jarênh o pa xwỳnhjaja kot ja kukamã harênh nê hã kagà xà hkôt.

22 —Na pre finat Mojes haxwỳja Tĩrtũm nhỹ hã mẽ pahpãmjê mã tanhmã ja jarênh to nê harênh o: Kojã nhỹrmã mẽ panhõ Pahi Maati Tĩrtũmja te kot ra mẽ akaxyw pa ixãmja pyrà nê axte mẽ panhĩõ xãm. Mẽ panhĩõ kojã. Kojã nhỹrmã inhmỳr pê mơn pøj nê mẽ amã Tĩrtũm kapêr

jarēnh o pa. Ka mẽ kapēr ma nē mar tỳx nē kapēr kôt amnhĩ nhĩpêx o ri apa.

23 Koja mẽhõ kuma nē ãm kuma nē hkôt amnhĩ nhĩpêx kêt nē nhũm Tĩrtũm tee ri ja hã omu nē kêp hkra hkêt ã harēnh kurê kumrêx. Anē.

24 ã na pre finat Mojesja mẽ kãm Jejus kukamã ujarēnh anē. No ãm tapxipix na pre ã harēnh anhỹr kêt nē. Tĩrtũm nhỹ hã mẽ kapēr o mẽ pa xwỳnh piitã na prem ã mẽ kãm harēnh anhỹr o pa. Kot harēnh o pa xwỳnh kot wa finat Sãmuewja nē hkôt mẽ hkwỳjê piitã ã Jejus kukamã hkwỳjê mã harēnh anhỹr o pa.

25 –Tã mẽ pahpê mẽ hkamrô hkwỳ na pu mẽ. Mẽ pahpê mẽ hkanrêhã mẽ htãmnhwỳy. Mẽ pakaxyw na pre Tĩrtũm ã mẽ kãm kapēr anē. Nē Kraja kukamã finat Apraãw mã kãm:

Koja nhỹrmã akanrêhã atãmnhwỳjê hõ pyka piitã hkôt mẽ piitã mẽ ho mex o pa nhũm mẽ kukwak ri mex kumrêx nē ri pa. Anē.

26 ã kot Kra hkukamã harēnh anhỹr tã mẽ pakumrêxjê hwỳr na pre kumẽ. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrêxjê hwỳr kumẽ. Anē.

Nhũm pre ã Simãw Pêtreja hte grã xwỳnh pumunh o mẽ kuhê xwỳnhjê mã ujarēnh anē.

4

Simãw Pêtre mẽ Juãw wa kot mẽ àptàr tũmjê mã kapēr ã wa harēnh

Rukre 21.12-13

1-4 Nhũm Simãw Pêtre mẽ Juãw wa arĩ mẽ kãm Tĩrtũm kapēr jarēnh o wa xa nē mẽ kãm:

—Nà na pre Jejus ty nhũm Tĩrtũm akupỹm ho htĩr. Tã kot akupỹm ho htĩr jakamã koja nhỹrmã uràk nẽ akupỹm mẽ htyk xwỳnh piitã mẽ ho htĩr pa. Anẽ.

Hãmri nhũm mẽ kot wa mar o kuhê xwỳnh kwỳjaja wa kuma nẽ wa hkôt hamaxpẽr nẽ wa urà nẽ Jejus kôt amnhĩ xunhwỳ. Jakamã nhũm ra mẽ kot Jejus kôt amnhĩ xunhwỳr xwỳnhjaja ohtô rax kumrẽx. Ra mẽ kêp 5.000.

Hãmri nhũm axtem mẽ hkwỳjaja wa hwỳr mra nẽ wa mar o kuhê. Mẽ õ patre nhõ pôristi krãhtũm mẽ Satusew nhõ xwỳnh kwỳjê mẽ nhũm mẽ ma Simãw Pêtre mẽ Juãw wa hwỳr mra nẽ tee ri wa kot mẽ ahkre hã wa mar o kuhê. Nẽ mẽ kãm akupỹm mẽ htĩr jarẽnhja ma nẽ wa kamã gryk nẽ. Satusew nhõ xwỳnhjaja na pre htem akupỹm mẽ htĩr kôt hamaxpẽr kêt jakamã nhũm wa akupỹm mẽ htĩr jarẽ nhũm mẽ tee ri wa kuma nẽ hamaxpẽr punuj nẽ wa kamã gryk kato. Hãmri nẽ wa hã amỹné nhũm mẽ wa unê nẽ ma wa o tẽ nẽ mẽ hagiênh xà kamã wa haxà. Ra myt grire nhũm mẽ wa haxà. Wa kot mẽ hagiênh xà kamã hã apkati nhũm rĩ kormã mẽ kot ujarẽnh ã tanhmã wa ho kaxyw.

⁵⁻⁶ Tã nhũm apkati nhũm mẽ ohtô nẽ wa ujarẽnh ã wa mar kaxyw Jerujarẽ kamã axpẽn wỳr akuprõ. Ijaew pigêtjaja nẽ mẽ àptàr tũm kwỳjaja. Nẽ mẽ kot finat Mojes kapẽr o mẽ ahkre ho mẽ pa xwỳnhjaja. Nẽ mẽ õ patre maati Anas mẽ hkwỳja. Nẽ Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpẽn wỳr akuprõ.

⁷ Hãmri nẽ wa hã karõ nhũm pôristi wa hwỳr tẽ nẽ wa haprô nẽ ma mẽ hwỳr wa o tẽ nẽ wa ho axà

ně mẽ kutã wa ÿr nhũm wa nhỹ. Hãmri nhũm mẽ wa omu ně wa kãm:

—E mẽ inhmã amnhĩ jarẽ. Měhõ xàhpumunh xà ho na ka pre wa hte grà xwỳnhta ho mex? Měhõ na pre hwỳr war amẽ ka wa ho mex? Anẽ.

⁸ Hãmri nhũm Simãw Pêtre mẽ kãm awjarẽ. Tĩrtũm Karõ kot kãm hamaxpěr o hihtỳx jakamã nhũm ÿ hã Ijaew pigêtjê mẽ mẽ àptàr tũmjê mã awjarẽ ně mẽ kãm:

⁹ —Tôe mẽhõ kot ho mex xwỳnhja ã mẽ ate wa ixkukjêr

¹⁰ jakamã kot paj mẽ amã harẽ ka mẽ ixte harẽnhja ma. Wa ixpyrà ně mẽ apê Ijaew kêr ka mẽ wa ixkapěr mar tỳx ně. Jejus Kris pê Najare nhõ xwỳnhta. Mẽ ate hpĩr nhũm Tĩrtũm kot akupỹm ho htĩr xwỳnhta. Tãm na pre àhpumunh tỳx o akupỹm hte grà xwỳnhta o mex. ÿ hã ixte kaxyw kãm ixkapěr nhũm tãm akupỹm ho mex.

¹¹ Tĩrtũm kot mex o mex ã harẽnh ně mẽ pakaxyw ãm tã ka prem axtem ně hkaga. Nom Tĩrtũm kapěr ã kagà htũm kot ra mẽ akukamã ã mẽ ate amnhĩ nhĩpêx anhỹr ã mẽ ajarẽnh ně mẽ ajarẽnh kot:

Mẽ kot kẽn o amnhĩm òrkwỹ nhĩpêx kaxyw ně nhỹri kẽn maati pumu ně htỳx omnuj ã hkamnhĩx ně hkaga. Mẽ kot hkaga htã nhũm Tĩrtũm mẽ kurom mex o kot kẽn piitã hakrenh par ã omunh kurê kumrêx.

Anhỹr o kot mẽ ajarẽnh. Te mẽ ate kẽn maati kaga xwỳnh ã mẽ ajarẽnh pyræk. Tã ka mẽ ã mẽ kot mẽ akukamã mẽ ajarẽnh anhỹrja kôt te mẽ ate kẽn maati kaga pyrà ně Jejus kaga ně apĩ. Tĩrtũm kot

amnhĩm mex o mex ã omunh nẽ harẽnh tã ka prem axtem nẽ hkaga.

¹² Tapxipix na hte mẽ panê mẽ pahte amnhĩ tom-nuj rê. Mẽhõ koja uràk nẽ àhpumunh tỳx o mẽ panê kurê? Mẽhõ koja ahpỳnhã pyka piitã hkôt uràk nẽ ã mẽ panhĩpêx mex anẽ? Nà ãm amrakati kumrêx. ãm Jesus pix. Tapxipix na pre Tĩrtũm ja kaxyw ãm jakamã tapxipix na kêp mẽ pahkaprĩ xwỳnh maati. Anẽ.

¹³ Nhũm pre ã Simãw Pêtreja mẽ kãm kapêr anẽ. Hãmri nhũm mẽ amnhĩ jaêr pê kuma nẽ axpẽn mã:

–Kwa wa kãm mẽ pahpyma wa hã hkwỳ jêt kêt kumrêx. Te ri wa htỳx ri wa pa pyràk tã wa hamaxpêr tỳx kumrêx. Mãn wa kêp Jesus kôt mẽ pa ho mẽ pa xwỳnh kwỳ jakamã na wa ã kapêr anẽ nà? Anẽ.

¹⁴ Hãmri nẽ tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nẽ Simãw Pêtre wa kuri mex nẽ ãm nhũm mẽ kot no ho omunh jakamã wa kãm àkjêr kêt nẽ.

¹⁵ Hãmri nẽ wa kãm anẽ nhũm wa mẽ kêp kato nẽ kapôt ã xa nhũm mẽ tanhmã wa kãm nẽ kaxyw wa hã axpẽn ma nẽ axpẽn mã:

¹⁶ –Kwa tanhmã kot puj mẽ wa ho? Ra jar Jerujarẽ kamã mẽ piitã mẽ kot akupỳm hte grà xwỳnh ta mex ã wa omunh kênã kot puj kêt mẽ kãm wa kot ho mex hkêt ã wa harẽ.

¹⁷ Tã mẽ kot harẽnh o hprôt pymaj kot puj mẽ axte Jesus jarẽnh o pa nê wa hkurê. Kê hte grà xwỳnh jarẽnhja ãm jar mẽ pakamã hapêx. Nà kot puj mẽ ã wa kãm karõ anẽ. Anẽ.

¹⁸ Nhũm mẽ wa hã axpẽn mar pa hãmri nẽ akupỹn wa hã karõ nhũm wa akupỹn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nẽ. ãm kwarĩ ho kwarĩ. Anẽ.

¹⁹ Hãmri nhũm wa tee ri mẽ kuma nẽ mẽ kãm:

—Nà Tĩrtũm tãm kot ja hã wa inhmã karõ kênã kot pa kêt wa mẽ akapêr ma nẽ harênh o ixpa hkêt nẽ.

²⁰ Na pa pre wa Jejus kôt ri ixpa nẽ xatã kot tanhmã amnhĩ nhĩpêx to hã omunh o hkôt ixpa. Nẽ xatã tanhmã mẽ ahkre hto hã mar o hkôt ixpa. Nẽ akupỹm htĩr kãm omu. Jakamã tanhmã kot pa wa amnhĩ to nẽ mẽ kãm ja jarênh kêt nẽ? Nà kot pa wa mẽ akapêr mar xà hkôt ã amnhĩ nhĩpêx anhỹr hkêt nẽ. Anẽ.

²¹⁻²² Hãmri nhũm mẽ kuma nẽ tee ri mẽ kot tanhmã wa ho kaxyw. Te grã xwỳnhhta hte grã nẽ hkrĩ ho hã amgrã pẽ 40 tã ra akupỹm mex nhũm mẽ piitã ja hã omu nẽ hã axpẽn mã Tĩrtũm mex o mex ã harênh o ri pa. Jakamã nhũm mẽ utàr xwỳnhjaja mẽ kuma nẽ kãm mẽ uma nẽ. Hãmri nẽ mẽ umaj tanhmã Simãw Pêtre mẽ Juãw wa ho hkêt nẽ. ãm axte wa kot Jejus jarênh o pa nẽ wa kãm kapêr kãm hihtỳx nẽ wa hano nhũm wa ma tẽ.

Mẽ kot amnhĩ to Tĩrtũm wỳr ã mẽ harênh

Matêwre 18.19-20

²³ Tã nhũm Simãw Pêtre mẽ Juãw wa ma akupỹm Jejus kôt htõ nẽ htõxjê hwỳr wa tẽ nẽ mẽ kãm amnhĩ jarẽ. Nẽ patre krãhtũmjê mẽ mẽ àptàr

tũmjaja kot Jejus kapěr jarėnh nê wa hkurê kamã hihtỳxja nhũm amnhĩ tã mẽ kãm mẽ harẽ.

²⁴ Hãmri nhũm mẽ wa kuma nê amnhĩ to Tĩrtũm wỳr kurê kumrẽx nê kãm:

—Pa Pahi Maati? Nà mẽmoj piitã ho akator xwỳnhhta na ka. Na ka pre kaxkwa ho akato nê pyka ho akato nê gô xujanãr o akato. Hãmri nê kamã mẽmoj piitã ho akator pa.

²⁵⁻²⁶ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarõ nhỹ hã akapěr kwỳ jarẽ nê hã kagà. Nê kagàja kamã mẽ kot Pahihti Jejus kutã amnhĩ xunhwỳr xwỳnhjê jarẽ nê mẽ hã kagà. Mẽ hkukamã mẽ hã kagà nê mẽ hã kagà ho:

Mẽmo mỳrapê na prem Ijaew kêt xwỳnhjaja Tĩrtũm kutã amnhĩ xunhwỳ?

Nê Ijaew haxwỳja. Mẽmo mỳrapê na prem htỳx ri hamaxpěr o ri pa?

Nê pyka piitã hkôt pahijaja na prem Pahi Maati kutã amnhĩ xunhwỳr pa.

Nê kot mẽ pakaxyw ãm xwỳnh Jejus Krisja nhũm mẽ mããnẽn kutã amnhĩ xunhwỳr pa.

Nê mẽ kot hpĩr kaxyw mẽ kãm hã amỹnê.

Kwa mẽmo mỳrapê na prem axtem nê ã amnhĩ nhĩpêx anê? Anê.

Ã na pre finat Tawija Akarõ nhỹ hã mẽ harẽ nê hã kagà anê Tĩrtũm.

²⁷ ãm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhỹr kênã. Krĩ ja kamã na prem ã amnhĩ nhĩpêx anhỹr kaxyw axpẽn wỳr akuprõ. Pahi Eroxo nê pahi Põn Pirat nê mẽ ixkwỳjaja nê mẽ kêp Ijaew kêt xwỳnhjaja axpẽn wỳr

akuprõ nẽ Akra Jejus kutã amnhĩ xunhwỳ nẽ mẽ kot hpĩr kaxyw hã amỹnẽ. Kot tãm amnhĩ nhĩpêx o pa nhũm ate mẽ ixkaxyw ãm xwỳnhja nhũm mẽ axtem nẽ kutã amnhĩ xunhwỳ.

28 —Nom amnepê̄m kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhỹr ã mẽ omu. Mẽ kot tanhmã apê Akra Jejus to nẽ hpĩrta kukamã ka pre hã mẽ omu. Tã mẽ ixwỳr amẽ nhũm prem kupĩ. No ãm ajamaxpêr xà hkôt.

29 —Tã ka mẽ omu. Na mẽ Jejus ã mẽ ixkamã gryk tỳx nẽ tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwỳnhjaja ka tanhmã mẽ ixkrã hto pa mẽ inhmã mẽ uma hkêt nẽ mẽ hkôt ixpa ho ixpa. Mẽ kot tanhmã mẽ ixto hã mẽ ixkagrôn̄h tã pa mẽ inhmã mẽ uma hkêt nẽ ixãmnhĩx ri ixkĩnh nẽ ri ixpa. Nẽ anhỹ hã mẽ kutã amnhĩ to htỳx nẽ arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

30 —Akra Jejus mex o mex jakamã kot paj mẽ àhpumunh tỳx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwỳnhjaja akupỹm mẽ o mex. Nẽ mẽ kot aa mẽmoj pumunh kêt kwỳ ho anẽ. Kê mẽ omu nẽ axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anẽ.

31 Nhũm prem ã amnhĩ to Tĩrtũm wỳr anẽ. Puh nhũm ixkreja mẽ kãm htertet tỳx nẽ nhũm Tĩrtũm Karõ axte tanhmã mẽ hkrã hto nhũm mẽ ỹ hã kãm mẽ uma hkêt nẽ. ãm amnhĩ to htỳx nẽ mẽ kãm Tĩrtũm kapêr jarênh rãhã ho ri mẽ hkôt pa.

Jejus kwỳjaja tanhmã kot axpẽn nhĩpêx to hã mẽ harẽnh

Atre 2.42-47

³²⁻³³ Nhũm Jejus nhỹ hã mẽ ahkre ho mẽ pa xwỳnh maati jaja. Na pre Tĩrtũmja mẽ ho mẽ kãm ma hkêt jakamã nhũm pre htem akupỹm Jejus htĩr kôt mẽ kãm harẽnh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwỳr xwỳnh piitã mẽ kutã nojarêt rãhã ho pa nhũm mẽ ra ohtô rax nẽ. Nẽ mẽ kãm axpẽn to mex pix prãm o ri axpẽn kôt pa. Mẽ ohtô htã te mẽ tipxi pyræk. Nẽ axpẽn pẽ mẽmoj to õxy hkêt nẽ. Na pre htem axpẽn mã mẽ hikukrêx nẽ mẽ apkur xà jarẽnh o: “Inhõ pix kêt mẽ pahpiitã mẽ panhõ na.” Anhỹr o ri mẽmoj tã axpẽn kutã nojarêt o ri pa. No kêt axpẽn mã mẽmoj jarẽnh o: “Tk. Nà ãm inhõ pix na.” Anhỹr o harẽnh kêt nẽ.

³⁴⁻³⁵ Na pre htem tõhã õ ixkre hõ ho wẽnê. Rỳ õ pyka hkwy ho wẽnê nẽ kàxpore jamỳ nẽ ma o mra nẽ Jejus nhỹ hã mẽ ahkre ho mẽ pa xwỳnhjê mã kugõ nhũm mẽ hamỳ nẽ mẽ kêp amrakati xwỳnhjê mã ho anghrà. Hãmri nhũm mẽ amnhĩm hamỳ nẽ ho amnhĩm awjaprô. Jakamã na pre hte mẽ hkwyjaja kãm prãm nẽ ri pa rỳ ê hkêt nẽ ri pa hkêt nẽ.

³⁶⁻³⁷ Jujere na pre ã amnhĩ nhĩpêx anẽ nẽ mẽ kaxyw õ pika hkwy ho wẽnê. Hãmri nẽ kàxpore py nẽ o tẽ nẽ Jejus nhỹ hã mẽ ahkre xwỳnh maati jê mã kugõ. Jujereja Ijaew nhõ patre ho ajuta xwỳnh na pre. Gô hipôk pẽ Sipre kamã na pre kato. Kêp Jujere htã no nhũm Jejus nhỹ hã mẽ ahkre ho mẽ pa xwỳnhjaja na prem kãm: “Panãpe” Anẽ. Mẽ kapêr kãm Panãpeja te kêp “mẽ hamaxpêr o mẽ

hihtỳx o pa xwỳnh” anhỹr pyràk. Jakamã nhũm ò pika hkwy ho wẽnê nẽ kàxpore py nẽ o tẽ nẽ Jejus nhỹ hã mẽ ahkre xwỳnhjê mã kugõ nhũm mẽ kupy nẽ mẽ kêp amrakati xwỳnhjê mã ho anhgrà.

5

Ananĩs mẽ Sapire wa kot amnhĩ to hêx ã wa harẽnh

Karatas 6.7; Eprêw 10.26-31

¹ Tã nhũm Ananĩs mẽ hprõ Sapire wa Jujere jarẽnh ma nẽ uràk nẽ ò pyka hkwy ho wẽnê.

² Hãmri nẽ kàxpore py. Nom na pre wa ra hã axpên ma. Jakamã nhũm Ananĩs Jujere kĩnhã kàxpore hkwy pix py nẽ o tẽ nẽ Jejus nhỹ hã mẽ ahkre xwỳnh maatijê mã kugõ. Nom katàt kôt mẽ kãm òr ã amnhĩ jarẽnh kêt nẽ. Kot kàxpore ho pikjêr nẽ amnhĩm hkwy ho àrĩk ã amnhĩ jarẽnh kêt nẽ. ãm mẽ kãm amnhĩ jarẽnh o hêx. Te piitã òr par pyràk o amnhĩ nhĩpêx nẽ mẽ kãm:

—E ota ixkàxporeta. Na pa wa inhõ pika hkwy ho wẽnê nẽ kàxpore hpy nẽ hpãnhã Jujere pyrà nẽ man mẽ awỳr piitã o tẽ. Anẽ.

³ Hãmri nhũm Simãw Pêtre ra ã kot amnhĩ nhĩpêx anhỹr ã omu hãmri nẽ kãm:

—Tk. Kwa mon ka axtem nẽ Satanasti kapêr ma nẽ hkôt amnhĩ nhĩpêx nẽ te akàxpore piitã òr pyràk ã amnhĩ to axêx anẽ? Te ate piitã òr pyràk tã no ãm hkwy pix gõ. Hêxta waa nẽ. Na ka axtem nẽ Tĩrtũm Karõ mã akàxpore nhõr par o axêx.

⁴ Anhõ pyka kênã. Nẽ hpãnhã kàxporeja anhõ kênã. Kot kaj amã tanhmã ho hprãm xà hkôt mãmrĩ tanhmã ho. Amã piitã ho axàrĩk prãm nẽ

mãmrĩ piitã ho arĩk. Rỳ amã hkwỳ hpix nhõr prãm nẽ mãmrĩ hkwỳ pix gõ. No ri ate õr par pyræk o amnhĩ to axêx kêt nẽ. Te ate mẽ inhmã pix mã axêx pyræk nom mẽ inhmã pix mã hkêt. Na ka mãânẽn te Tĩrtũm mã axêx pyræk. Anẽ.

⁵⁻⁶Nhũm pre ã Simãw Pêtre Ananĩs mã kapêr anẽ nhũm kuma nẽ pykap tẽm nẽ htyk kurê kumrêx. Hãmri nhũm mẽ àptàr nywjaja hwỳr tẽ nẽ kupêxê ho hkupu nẽ kumỳ nẽ ma o tẽ nẽ haxà. Hãmri nhũm mẽ kot ã kot amnhĩ nhĩpêx anhỹr ã harênh mar xwỳnhjaja tee ri harênh ma nẽ kãm ma htỳx nẽ.

⁷Tã nhũm ra hã ahtũm nẽ. Ra hã 3 ore nẽ hapêx nhũm Ananĩs prõ Sapireja htỳx hamakêtkati nẽ mẽ hwỳr tẽ nẽ axà. Kormã mjên htyk ã harênh mar kêt nẽ hamakêtkati nẽ hkĩnh nẽ mẽ hwỳr tẽ nẽ axà.

⁸Hãmri nhũm Simãw Pêtre omu nẽ hêx rom hkukja nẽ kãm:

—Pa? E kwa inhmã mẽmoj jarẽ. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harẽ nà? Anẽ.

Hãmri nhũm kuma nẽ mjên pyrà nẽ kãm ho hêx nẽ kãm:

—Ỹỹ. ãm hãmri kot amã harênh kênã. Anẽ.

⁹Hãmri nhũm Simãw Pêtre tee ri kuma nẽ kãm:

—Tk. Hêxta waa nẽ. Kwa mon ka war ajamẽ war akàxpore ho te Tĩrtũm mã axêx pyræk? Mãn ka wa ajamaxpêr o: “Koja Tĩrtũm ja hã wa ixpumu nẽ ãm hã wa ixpumu nẽ tanhmã hã wa ixto hkêt nẽ.” Anhỹr o mãn ka wa ajamaxpêr nà? Nom na ka wa ãm kãm axêx kaprỳ. Oněj ra mẽ kot amjên jaxàr xwỳnhjaja akupỹn hpôx o mra. Koja mẽ anhĩpêx o te hipêx pyrà nẽ mãânẽn ato tẽ nẽ ajaxà ka rĩ amnhĩ pumu.

¹⁰ Aně nhũm kuma nẽ mjên pyrà nẽ pykap tẽm nẽ htyk kurê kumrẽx. Hãmri nhũm mẽ kot mjên jaxàr xwỳnhjaja mra nẽ mẽ hwỳr agjê nẽ omu nhũm ra htyk mex nẽ nō nhũm mẽ kumỳ nẽ ma o tẽ nẽ mjên nhĩhkô hã haxà.

¹¹ Hãmri nhũm mẽ piitã wa harẽnh ma nẽ kãm ma htỳx nẽ. Mẽ kot Jejus kôt amnhĩ xunhwỳr xwỳnhjê mẽ amarĩ ri mẽ pa xwỳnhjaja nhũm mẽ tee ri wa hkukamã hamaxpẽr o kãm ma htỳx kumrẽx.

Mẽ kot aa mẽmoj pumunh kêt kwỳ ho anhỳr ã mẽ harẽnh

Makre 16.17-20; Atre 19.11-12

¹²⁻¹⁴ Na pre hte Jejus kôt mẽ kot amnhĩ xunhwỳr xwỳnhjaja xatã Tĩrtũm mã amnhĩ jarẽnh xà hã ixkre hwỳr akuprõ. Mẽ kot ixkre nhĩkjê mã: “Pahi Sarumãw nhõ” anhỳr xwỳnh jarẽnhja wỳr nhũm pre htem akuprõ. Nhũm mẽ piitã kãm mẽ hkĩnh nẽ mẽ ohtô nẽ mẽ hkôt akuprõ nẽ mẽ uràk nẽ Jejus kôt amnhĩ xunhwỳ. Mẽnijaja nẽ mẽmyjaja. No nhũm mẽ hkwỳja Ananĩs mẽ Sapire wa kot amnhĩ nhĩpêxja mã hamaxpẽr nẽ kãm mẽ hkôt mrar pyma nẽ. Kãm mẽ hkĩnh tã kãm mẽ hkôt mrar pyma nẽ.

Nhũm pre hte Jejus nhỹ hã mẽ ahkre ho mẽ pa xwỳnhjaja aa mẽ kot mẽmoj pumunh kêt kwỳ ho anhỳr o ri mẽ piitã mẽ hkôt pa.

¹⁵ Jakamã nhũm pre htem mẽ à xwỳnhjê jamỳ nẽ ma mẽ hwỳr mẽ o mra nẽ Simãw Pêtre kutêp pry kamã mẽ haxwỳ nẽ mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tẽ nẽ mẽ akupênh o akupỹm mẽ ato mex rỳ nhũm hkarõ pix mẽ atã harir ka mẽ akupỹm amex japêr.

Anhÿr o mẽ kãm kapêr hãmri nhũm mẽ kupĩp kãm kutêp hikwÿ.

16 Nê Jerujarê pu hã krĩ hkwy kamã. Mẽ à xwÿnhjaja nê mẽkarõmnuti kot tanhmã mẽ ho xwÿnhjaja nhũm pre htem mẽ hamÿ nê ma mẽ ãhkrep mẽ o mra nhũm mẽ piitã akupÿm mex pa.

Mẽ kot Jejus kwÿjê jagjênh ã mẽ harênh

Rukre 21.12-15; Juãw 15.26-27; Atre 4.1-22

17 Tã nhũm mẽ õ patre maati mẽ hkrãmnhwÿ Satusew nhõ xwÿnhjaja tee ri akupÿm mẽ mex ã mẽ harênh ma nê axpên mã:

—Tk. Kwa na mẽ ra ohtô nê Jejus gryk ã mẽ pahte mẽ ahkre kaga nê ãm hkôt pix mã ri amnhĩ nhĩpêx o pa. Anê.

Hãmri nê Jejus nhÿ hã mẽ ahkre maati xwÿnhjê kamã gryk nê ra tanhmã mẽ ho kaxyw.

18 Hãmri mẽ unê nê mẽ hagjê nhũm mẽ hagjênh xà kamã hkrĩ hpa.

19 Tã nhũm kamàt nhũm Tĩrtũm kapêr o mẽ wrÿk xwÿnhja ma mẽ hagjênh xà hwÿr mẽ hwÿr wrÿ nê mẽ hwÿr axà nê mẽ kãm hakwakre kahê xà mẽ nê mẽ kator pa. Hãmri nê mẽ kãm:

20 —E mẽ ma akupÿm Tĩrtũm mã amnhĩ jarênh xà hã ixkre hwÿr mra nê axte mẽ kãm awjarê. Tanhmã mẽ kot amnhĩ nhĩpêx to nê Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anê.

21 Hãmri nhũm mẽ kuma nê ma akupÿm hwÿr hapêx kurê kumrêx. Nhũm myt kator o mör mẽ nhũm mẽ hwÿr agjê nê mẽ kãm Tĩrtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwỳnhjaja amnhĩ wỳr mẽ àptàr tũm xwỳnhjê hwỳ nhũm mẽ piitã axpẽn wỳr pikuprõnh pa. Hãmri nê htỳx arĩ Jejus kwỳjaja mẽ hagjênh xà kamã mẽ hkrĩ hã mẽ hkamnhĩx nê amnhĩ wỳr mẽ hã karõ.

²² Nhũm pòristijaja ma kot mẽ haprôr kaxyw mẽ hagjênh xà hã ixkre hwỳr mra nê tee ri kamã mẽ hapêr nhũm mẽ kamã amrakati. Hãmri nhũm mẽ akupỳm mẽ pikuprõnh xwỳnhjê hwỳr hprôt nê mẽ kãm:

²³ —Nà na pòristi hkwỳjaja arĩ hakwakrem ixkre jamãr mex nhũm hakwakre arĩ kahê htỳx nê xa. Tã pa mẽ hwỳr agjê nê tee ri hkre kamã mẽ hapêr nhũm mẽ kamã amrakati kumrêx. Anê.

²⁴ Hãmri nhũm mẽ kuma nê tee ri hamaxpêr.

²⁵ Rôm nhũm ja mẽ hwỳr tẽn axàn mẽ kãm:

—Kwa jãã mẽ ate mẽ hagjênh xwỳnhjaja na mẽ axte Tirtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nê mẽ kurũm tẽ. Anê.

²⁶ Hãmri nhũm patre nhõ pòristi krãhtũmja kuma nê mẽ hwỳr pòristi hkwỳr rê nhũm mẽ ma mẽ hwỳr mra nê mẽ hwỳr agjê nê kê axte mẽ unê nê akupỳm mẽ o mra. Nom tanhmã mẽ ho hkêt nê. Mẽ kot hkôt ri mẽ pikamênh xwỳnhjê pymaj mẽ ho mex nê mẽ o mõ. Nê mẽ hã axpẽn mã:

—Nà kot puj mẽ tanhmã mẽ ho nhũm mẽ ja hã mẽ pahpumu nê kẽn o mẽ pahkapê nê tanhmã amnhĩ to nê hã mẽ panhĩmex. Anê.

²⁷ Hãmri nê mẽ ho mex nê akupỳm mẽ o mõn mẽ hwỳr mẽ ho agjê nê mẽ pikuprõnh xwỳnhjê kutã mẽ hkrĩ. Hãmri nhũm mẽõ patre maatija mẽ kãm:

28 –Kwa ra mẽ ixte Jejus kapër jarēnh nê mẽ akurê htã ka xep mẽ ãm mẽ inhma nê arĩ mẽ kãm harēnh o ri apa. Nê jar Jerujarē kamã mẽ piitã mẽ kãm harē. Nê mẽ pajaja mẽ ixte Jejus pĩr ã ka mẽ ri mẽ kãm mẽ ijarēnh o apa. Anē.

29 Hãmri nhũm Simãw Pêtre mẽ kuma nê mẽ amnhĩ tã mẽ kãm kapër nê mẽ kãm:

–Tỳ kot kaj mẽ Tĩrtũm kapër kuhpa hã mẽ inhmã mẽmoj tã karõ pa mẽ ama nê ãm mẽ ama nê ãm Tĩrtũm kapër pix ma nê hkõt ri amnhĩ nhĩpêx.

30 Amnepêm mẽ panhĩgêjtaja na prem Tĩrtũm kõt pix mã amnhĩ nhĩpêx o pa. Tã ka prem axtem nê kêp mẽ kãm Kra Jejus ã amỹnê nhũm mẽ pĩ kahpa hã kunhõ nê kupĩ. Nom nhũm Tĩrtũm akupỹm ho htĩr

31 nê kêp mẽ panhõ Pahihti hã harē. Nê kêp mẽ pahkaprĩ xwỳnh mex ã harē. Hãmri nê ra amnhĩ ri ỹr nhũm ãhkõ hã mẽmoj piitã ho amnhĩptar o hkrĩ. Nhũm kãm: “Koja Ijaew mẽ kot amnhĩ tomnuj kaga nê akõt amnhĩ xunhwỳ pa ja hã mẽ omu nê amnhĩ katut kõt mẽ kot amnhĩ tomnuj rēnh pa nê mẽ ho ixkra.” Anē.

32 Tã mẽ pajaja mẽ ixte Jejus htyk nê akupỹm htĩr ã omunh mex jakamã na pa hte Tĩrtũm Karõ nhỹ hã ã mẽ amã harēnh anē. Karõja na pre Tĩrtũm mẽ ixte hkõt amnhĩ nhĩpêx xwỳnhjê hwỳr kurē nhũm mẽ ixwỳr wrỳ nê mẽ ixkarõ mã agjê. Tã ỹ hã na pa htem ri ã harēnh anhỹr o ri mẽ akõt ixpa. Anē.

33 Hãmri nhũm mẽ kuma nê mẽ kamã gryk tỳx nê. Nê mẽ kãm mẽ himex prãm nê mẽ kãm mẽ hã amỹnê.

34 Hãmri nhũm Kamariewtija tee ri ja hã mẽ omu hãmri nê kànhmã xa nê Jejus nhỹ hã mẽ ahkre

xwỳnh maatiĵê xyr pê hkwỳĵê mǎ kapêr. Parijew nhõ xwỳnh na pre. Nê kêp Tĩrtũm kapêr ǎ kagà htũm o mē ahkre ho pa xwỳnhĵê hõ na pre. Nhũm mē piitǎ kǎm hkĩnh nē. Jakamǎ nhũm kǎnhmǎ xa nē pōristi mǎ anē nhũm mē amnhĩ nē Jejus nhỹ hǎ mē ahkre ho mē pa xwỳnhĵê kator nhũm mē kapôt ǎ kuhê.

³⁵ Hǎmri nhũm Kamariewtija mē nē tanhmǎ mē kǎm kapêr to nē mē kǎm:

—E ixkwỳĵaja. Kwa kêr pu mē tanhmǎ mē ho hkukamǎ pajamaxpêr mex nē.

³⁶ Mǎn arĩ mē ate finat Tetastija jarênh ǎ anohtỳx nē ho apa japêr. Mytwrỳ hõ hǎ na pre mē kǎm amnhĩ to rax ǎ amnhĩ jarênh o pa. Hǎmri nhũm hkôt ri mē pa xwỳnhĵaja ohtô nē. Mē kêp 400. Tǎ nhũm prem mē kêp Tetasti pĩ nhũm hkôt ri mē pa xwỳnhĵaja axpên pê anhrà nē ma hapêx.

³⁷ —Tǎ nhũm mē kot mē piitǎ mē ho kōta xà hǎ arĩgroja ǎ nhũm Garirej nhõ xwỳnh pê finat Jut haxwỳĵa hkôt mē pa xwỳnhĵaja ohtô nē. Tǎ nhũm mē mǎǎnên mē kêp kupĩ nhũm hkôt ri mē pa xwỳnhĵaja haxwỳĵa axpên pê anhrà nē ma hapêx.

³⁸ —Jakamǎ kwa pu mē tanhmǎ jajê ho hkêt nē. Pu mē ǎm mē omu. Koja mē amnhĩ krǎ hkôt ǎ ujarênh anhỹr o pa japêr hǎ koja Tetasti mē Jut wa hkôt pa xwỳnhĵê pyrǎ nē tokyx axpên pê anhrà nhũm Jejus jarênh o paja hapêx o hapêx.

³⁹ Nom koja mē ǎm hǎmri Tĩrtũm nhỹ hǎ ǎ mē ahkre ho pa anhỹr japêr hǎ kot puj mē tee ri ja ho pajapêx mǎ. Jakamǎ kwarĩ. Kot puj mē tanhmǎ mē ho nē te mē pahte Tĩrtũm kutǎ amnhĩ xunhwỳr pyrǎk. Anē.

Nhũm pre ã Kamariewti Jejus nhỹ hã mẽ ahkre ho mẽ pa xwỳnh maatijê xyr pê hkwỳjê mã kapêr anê.

⁴⁰ Hãmri nhũm mẽ kuma nê kãm:

—Tỳ nà ãm hãmri na ka ã akapêr anê. Kot puj xep mẽ tanhmã mẽ ho hkêr nê. Anê.

Hãmri nê akupỹn mẽ hã karõ nhũm mẽ akupỹn mẽ hwỳr agjê. Hãmri nhũm mẽ pôristi mã mẽ hã amỹnê nhũm mẽ htak. Hãmri nhũm mẽ àptàr tũmrejaja mẽ kãm:

—E mẽ mãmrĩ ma akupỹm mra. Nom kêr ka mẽ axte mẽ kãm Jejus kapêr jarênh o ri apa hkêr kumrêx. Anê.

⁴¹ Hãmri nhũm mẽ kãm ure nhũm mẽ ma mra. Kĩnh nê ma mra nê axpêr mã:

—Nà kwâr mẽ Jejus ã mẽ pahtak nê tanhmã hã mẽ pahto. Kwâr mẽ mãmrĩ ã hã mẽ pahto anê. Kot pu mẽ hkaga hkêr nê. Ra Tĩrtũm kot ja hã mẽ pahpumunh mex kênã.

Anhỹr o axpêr mã kapêr o axpêr jamaxpêr o hihtỳx mex o pa.

⁴² Hãmri nê arĩ apkati mẽ hkwỳjê mã Jejus kapêr jarênh o mẽ ahkre ho mẽ hkôt pa. Tĩrtũm mã amnhĩ jarênh xà hã ixkre kamã nê nhãm mẽ õrkwỹ kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kãm harênh o ri mẽ hkôt pa.

6

Mẽ kêp mẽ mjên htyk xwỳnhjê jarênh

Wam Ximotre 3.8-9

¹ Tã nhũm mẽ kot Jejus kôt amnhĩ xunhwỳr xwỳnhjaja ohtô rax kumrêx o mỗ. Mẽ piitã kêp Ijaew no nhũm mẽ hkwỳjaja axtem Gres kapêr o

kapër nhùm mẽ hkwyjaja Ijaew kapër o kapër. Na pre hte Ijaew kapër o kapër xwýnhjaja apkati mẽ mẽ kêp mẽ mjên htyk xwýnhjê mã mẽõ ho pa. No ãm mẽ piitã mẽ hipêx o axpên pyræk kêt jakamã nhùm Gres kapër o mẽ kapër xwýnhjaja tee ri ã mẽ kot amnhĩ nhĩpêx anhỹr ã mẽ omu nẽ mẽ kamã gryk nẽ. Hãmri nẽ mẽ kãm:

—Kwa na ka htem amnhĩ kamã mẽ kêp mẽ mjên htyk xwýnhjê mã mẽõ ho rũnh nẽ agõ. No mẽ ixkamã jajê mã na ka htem ãm ho hkryre nẽ agõ. Kwa mẽ ri ã mẽ hipêx anhỹr kêt nẽ. Mẽ hipêx o axpên pyræk nà. Anẽ.

² Hãmri nhùm Jesus nhỹ hã mẽ ahkre xwýnh maatiijaja mẽ hã mẽ kapër ma hãmri nẽ mẽ piitã mẽ ho akuprõ nẽ mẽ kãm:

—Kwa kêr ka mẽ ja hã axpên mã axàkjêr kêt nẽ. E pu mẽ kot mẽ kêp mẽ mjên htyk xwýnhjê mã õ ho pa kaxyw mẽ akwýjê rê. No mẽ pajaja kot paj ja ho anhỹr o ri ixpa hkêt nẽ. Kot pa mẽ anẽ nẽ Jesus kapër o ri mẽ ajahkre hkêt nẽ nhùm ja mex kêt nẽ. Jakamã mẽ atõ kot kaj mẽ akatàt kôt mẽ kãm mẽ õ ho apa?

³ E mẽ amnhĩ kamã mẽ ho 7 nẽ mẽ arê pu mẽ kêp mẽ mjên tyk xwýnhjê mã õ ho pa kaxyw mẽ unhwý.

Tãm mẽ hamaxpêr xwýnhjaja.

Nẽ mẽ ate axpên mã mẽ mex ã mẽ harênh xwýnhjaja.

Nẽ Tĩrtũm Karõ nhỹ hã mẽ kot amnhĩ nhĩpêx o mẽ pa xwýnhjaja.

Ã mẽ kot amnhĩ nhĩpêx anhỹr xwýnhjaja ka mẽ ho 7 nẽ arê pu mẽ kaxyw mẽ unhwý.

⁴ Nom mẽ pajaja kot paj mẽ akôt arĩ mẽ amã Tĩrtũm kapěr jarėnh o ri mẽ ajahkre pix tãnopxar o ri ixpa. Aně.

⁵ Hãmri nhũm mẽ kuma nhũm ja mẽ kãm mex ně. Nhũm mẽ ma mra ně axpěn mã hkwỳjê nhĩxi jarě hãmri ně mẽ ho 7 ně mẽ kurê. Ā mẽ hixi kot anhỹr. Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwỳnh mã àr ně ho amnhĩptàr jakamã nhũm pre hte tãm ri amnhĩ nhĩpêx o pa.

Ně kaxyw Firipti

ně Prokot

ně Nĩkanõ

ně Timã

ně Parměnti

ně Nĩkoraw. Nĩkorawja krĩ pê ãxiok nhõ xwỳnh na pre. Kêp Ijaew kêt tã kãm Tĩrtũm kĩnh o pa. Tã ra mããněn Kra Jejus kôt amnhĩ xãm.

⁶ Jakamã nhũm mẽ mẽ kêp 7tajê rê ně Jejus nhỹ hã mẽ ahkre xwỳnh maati jê hwỳr mẽ o mra. Hãmri nhũm mẽ omu ně mẽ àpênh ã mẽ unhwỳr kaxyw mẽ hã ìhkra jaxwỳ ně mẽ ho Tĩrtũm wỳ. Hãmri nhũm mẽ kêp mẽ mjên htyk xwỳnhjê mã mẽ õ ho pa ně mẽ piitã mẽ hipêx o axpěn pyræk.

⁷ Tã nhũm mẽ ra ohtô rax ně Tĩrtũm kapěr ma ně hkôt amnhĩ nhĩpêx o pa. Jakamã nhũm Jerujarě kamã mẽ kot Jejus kôt amnhĩ xunhwỳr xwỳnhjaja ra ohtô rax kumrêx. Ně mẽ õ patre hkwỳ haxwỳja ohtô ně mẽ uræk ně amnhĩ kaxyw hkôt hamaxpěr ně hkôt amnhĩ xunhwỳ.

*Mě kot Estewãw pynênh ã mẽ harėnh
Rukre 21.14-15*

⁸ Tã nhũm Estewãwja. Kot mẽ kêp mẽ mjên htyk xwỳnhjê mã mẽ õ ho pa xwỳnhjê hõja. Tĩrtũm kot kutã nojarêt mex jakamã na pre hte ý hã àhpumunh tỳx o aa mẽmoj pumunh kêt kwỳ ho anhỹr o ri mẽ hkõt pa.

⁹ Hãmri nhũm Ijaew kwỳjaja tee ri ja hã omu nhũm ja mẽ kêp omnuj tỳx nẽ nhũm mẽ hã kãm akir. Urak nẽ mẽ kêp Ijaew nẽ Jerujarê kamã ri mẽ hkõt pa htã ahpỳnhã mẽ õ pyka. Mẽ kot kãm “Ripetat” xwỳnh kwỳ na pre mẽ. Nẽ ahpỳnhã mẽ õ krĩ.

Mẽ hkwỳjaja kêp Sirẽn nhõ xwỳnh.

Nẽ mẽ hkwỳjaja kêp Aresãn nhõ xwỳnh.

Nẽ mẽ hkwỳjaja kêp Siris nhõ xwỳnh.

Nẽ mẽ hkwỳjaja kêp As nhõ xwỳnh.

Ahpỳnhã mẽõ pika nẽ mẽ õ krĩ htã na prem Jerujarê kamã ri axpẽn kõt pa ho pa. Tã Estewãw kot ã amnhĩ nhĩpêx anhỹr o pa hã omu nhũm ja mẽ kêp omnuj tỳx nẽ nhũm mẽ hã kãm akir.

¹⁰ No nhũm Tĩrtũm Karõ nhỹ hã hamaxpěr tỳx o mẽ kãm kapěr nhũm mẽ kuma nẽ tee ri kutã tanhmã kãm nẽ hprãm kaprỳ.

¹¹ Hãmri nẽ ma mra nẽ tanhmã ho hêx to kaxyw amnhĩ kwỳjê rê nẽ mẽ kãm hã amỹnê nẽ mẽ kãm:

—E kêr ka mẽ krĩ nhõ xwỳnhjê mã Estewãw o axêx nẽ tanhmã mẽ kãm ho akapěr punuj to ho ri mẽ hkõt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anẽ pa mẽ hpãnã mẽ amã amnhĩre. Anẽ.

Hãmri nhũm mẽ kuma nẽ ma mra nẽ hapôj nẽ ma krĩ nhõ xwỳnhjê mã tanhmã ho hêx to ho ri mẽ hkõt pa nẽ mẽ kãm:

—E mẽ amně akuprõ nẽ mẽ inhma. Kwa kêt ka mẽ Estewãwti kapêr mar kêt nẽ. Na hte finat Mojes mẽ Tĩrtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anẽ.

¹² Hãmri nhũm mẽ kuma. Krĩ nhõ xwỳnhjê mẽ nẽ mẽ àptàr tũmrejê mẽ Tĩrtũm kapêr tũm o mẽ ahkre ho mẽ pa xwỳnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỳr mra nẽ unê nẽ ma mẽ õ juisti hwỳr o tẽ.

¹³ Hãmri nhũm mẽ kãm ho hêx xwỳnhjaja mẽ hkõt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tĩrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tĩrtũm mã amnhĩ jarênh xà hã ixkreja nhũm tanhmã ho hêx to pa mẽ kuma.

¹⁴ Na hte mẽ kãm: “Koja nhỹrmã Jejus pẽ Najare nhõ xwỳnh Tĩrtũm mã amnhĩ jarênh xà hã ixkreja grành pa kãm ga.” Anhỹr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wỳr rĩt nẽ hkuk pumu nhũm te kot Tĩrtũm kapêr o mẽ wrỳk xwỳnhjê kuk nhĩrã rax pyrà nẽ xa nhũm mẽ tee ri omu nẽ kamã no pyma nẽ.

7

Estewãw kot juistijê mã ujarênh

¹ Hãmri nhũm mẽ õ patre maatija Estewãw mã kapêr nẽ kãm:

—E mẽ inhmã amnhĩ jarê. Xà ãm hãmri na mẽ ri ã ajarênh anẽ nà? Anẽ.

² Hāmri nhũm kuma nẽ mẽ piitã mẽ kãm kapěr. Mẽ kãm kapěr ryy nẽ mẽ kãm:

—Tõe kot paj mẽ amã mẽ panhīgêť finat Apraãw tanhmã harēnh to ka mẽ inhma. Amnepēm na pre Tĩrtũm maatija Apraãw wỳr kato. Kormã pyka pê Mēsopotãm kamã pa ri. Kormã kot ma krĩ pê Arã hwỳr mõi rĩ nhũm hwỳr kato nẽ kãm:

³ “E kêr ka mẽ anhõ krĩ pê akato nẽ akwỳjê re nẽ ma mõi. Kot paj ma nhỹhỹm hpãnhã pyka hõ hwỳr mẽ ato mõi.” Anẽ.

⁴—Hāmri nhũm kuma nẽ amnhĩ to akuprõ nẽ ma mõi. Õ pyka pê Katej pê kato nẽ ma krĩ pê Arã hwỳr mõi nẽ hpãnhã kamã pa. Tã nhũm hipêêxà Terahti kêp ty nhũm Tĩrtũm amnẽ jar mẽ panhõ pyka hwỳr kumẽ. Jar mẽ papapxà hwỳr kumẽ.

⁵—Nom nhũm kormã kãm pykaja nhõr kêť nẽ. Kormã kãm hkwy ho grire nẽ õr kêť nẽ. Na pre ãm kãm:

E kot paj nhỹrmã amã pykaja gõ. Amã nẽ akanrêhã akra nẽ atãmnhwỳjê mã kugõ ka mẽ kamã ri apa ho apa.

Anhỹr o kãm mẽ panhõ pika pê Kanaãja jarẽ. Apraãw kormã hkra hkêť rĩ nhũm ã kãm kapěr anẽ.

⁶ Hāmri nẽ kãm:

Koja akanrêhã atãmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêť tã nhãm pyka hõ kamã pa hāmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêť nẽ. ãm mẽ homnuj o pa hã amgrà xohtô rax kumrêx. Nhũm mẽ hã amgrà pê 400.

⁷ Nom kot paj mẽ hã mẽ homnuj tỳx nẽ. Akanrẽhã atàmnhwỳjê hã mẽ homnuj tỳx nẽ nhũm mẽ rĩ kormã mẽ kurũm kato nẽ man akupỹn pa nẽ jar pỏj. Hãmri nẽ jar inhmã inhmex o inhmex ã ijarẽnh rãhã ho pa. Anẽ.

⁸ Hãmri nẽ kãm:

E pu axpẽn ma. Koja ka nẽ akanrẽhã akra nẽ atàmnhwỳjaja ka mẽ ixkỏt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêr ka mẽ amnhĩ my kwryt kà hkwỳ jakà. Nẽ koja mẽ akrajaja hapỏj nẽ my ka mẽ mã mẽ ho anẽ nẽ mẽ kêp mẽmy kwryt kà hkwỳ jakà. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ.

Anhỹr o Apraãw mã kapêr nhũm kuma nẽ mar xà hkỏt hkra Ijak my kwryt kà hkwỳ krãhta. Kormã hkaràre ri. Kormã hã arĩgro pê 8 pix ri nhũm kêp hkwỳ krãhta.

—Tã nhũm Ijak hprêk nẽ hprỏ nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pê 12jê ho anẽ nẽ mẽ piitã mẽmy kwryt kà hkwỳ jakàr pa. ã na pre mẽ pahpàr kraxjaja amnhĩ nhĩpêx anhỹr o pa.

⁹ —Jako hkrajê hỏ na pre kêp Juje. Nhũm Juje htỏjaja hipêêxà hkỏt kamã gryk nẽ axtem nẽ mẽ urojê mã ho wẽnê nhũm mẽ kêp haprỏ nẽ ma pyka pê Ejit wỳr o mỏ. Amarĩ Ejit nhỏ xwỳnhjê mã àpênh o pa kaxyw. Tã no nhũm Tĩrtũm arĩ tãnopxar rãhã ho hkỏt pa.

¹⁰ Hãmri nẽ Ejit kãm mẽ kot homnuj xwỳnhjê nhĩhkra rũm hkapa nẽ tanhmã hkrã hto nhũm àhpumunh tỳx nẽ hamaxpêr mex nẽ. Jakamã nhũm

Ejit nhõ xwýnhjê nhõ pahi Paraohtija omu nê kãm hkĩnh nê. Kot tãm amnhĩ nhĩpêx nê àhpumunh týx kôt omu nê kãm hkĩnh nê. Hãmri nê amnhĩ ri kumê nhũm ìhkô hã àpênh o pa. Kãm òrkwỹ pumu nê Ejit nhõ xwýnhjê ho amnhĩptàr o pa.

11 —Rôm nhũm mẽ hpur kãm mẽmoj nhĩgrôt mex kêt nê nhũm mẽ kêp mẽ apkur xà hã mẽ òja ra ri mẽ kêp kryre. Ejit kamã nê jar Kanaã kamã nhũm mẽ apkur xà hã mẽ òja mẽ kêp hapêx par o mō. Nhũm mẽ piitã prãm xàj ra hiire nê kãm prãm týx o pa nhũm mẽ panhĩgêjtaja hãmri prãm xàj tee ri amnhĩ xàpkur xà hã mẽmoj japêr.

12 —Tã nhũm Jakoja Ejit kãm arĩ mẽ apkur xà hã mẽ ò rax ã harênh ma nê ma hwýr hkra hkwýjê rê. Mẽ panhĩgêjtaja nhũm ma mẽ hwýr mẽ kurê nhũm mẽ ma mẽ hwýr mra. Hãmri nê mẽ hwýr pøj nê mẽ kêp mẽmo hy hkwý japrô nê ma akupỹm o mra. Wam mẽ mōrta ã mẽ kêp mẽmoj japrô nê ma akupỹm o mra.

13 —Tã nhũm mẽ kêp mẽmo hy japrôr xwýnhja hapêx nhũm mẽ axte akupỹm mẽ hwýr mra. Hãmri nhũm mẽ htõ Juje mẽ kãm amnhĩ to amnhĩrīt nê kêp mẽ htõ hã mẽ kãm amnhĩ jarê. Mẽ kot ra htyk ã hkamnhĩx tã nhũm mẽ kãm amnhĩ jarê. Hãmri nhũm Paraohti mẽ kêp Juje htõ hã mẽ harênh ma.

14 —Tã nhũm Juje amnhĩ wýr hipêêxà Jako mẽ htãmnhwýjaja mẽ hã karõ nhũm mẽ piitã ma Ejit wýr hapêx. Mẽ kêp 75 nê ma Ejit kamã Juje hwýr hapêx hãmri nê kamã pa ho pa.

15 —Ã kot anhýr jakamã nhũm Jakoja ma Ejit wýr mō nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa.

16 Hāmri nhũm mẽ hkanrêhã mẽ hkrajaja mẽ hamỳ nẽ ma akupỹm Kanaã hwỳr krĩ pẽ Sikẽ hwỳr mẽ o pa nẽ kamã mẽ hagjê. Na pre mẽ hkukamã finat Apraãw kot Amõr krajê pẽ kênkre japrô nẽ kamã hprõ jaxà. Jakamã nhũm prem mỳr pẽ ma hwỳr mẽ o pa nẽ kamã mẽ hagjê hāmri nẽ ma akupỹm Ejit wỳr pa.

17 –Tã gaa nẽ rĩ ohtô rax kumrêx o mỗ. Mẽ panhĩgêjtaja ohtô rax kumrêx o mỗ. Hāmri nhũm Tĩrtũm kot Apraãw mã mẽ õ pyka jarênh xwỳnhja nhũm kot mẽ kãm õr kaxyw.

18 No nhũm Ejit nhõ pahi kot Juje ho mex xwỳnhta na pre ra ty nhũm axtem hpãnã hõja mẽ ho amnhĩptar o pa. Nẽ aa Juje jarênh mar kêt nẽ. Kormã pahi xar nyw kêt ri htyk jakamã nhũm mỳr pẽ harênh mar kêt nẽ.

19 Hāmri nẽ hkwỳjê homnuj o pa. Tanhmã mẽ panhĩgêjtê nhĩpêx to ho pa. Nẽ mẽ kãm mẽ hkra my hapôx xwỳnhjê hã amỳnê. Mẽ hapôx nhũm mẽ kot pikap mẽ rênh nhũm mẽ htyk kaxyw nhũm mẽ kãm mẽ hã amỳnê.

20 –Rôm nhũm finat Mojesja kato. Nẽ mexre. Hāmri nhũm katorxà Ejit nhõ xwỳnhjê kot kêp hpĩr pymaj õrkwỹ kamã ri mẽ kêp ho hpimxur o pa hã mytwrỳ axkrunêpxi.

21 –Tã nhũm ra htỳxre nhũm katorxà mẽ hipêêxà wa tee ri hkukamã hamaxpêr hāmri nẽ mẽ kot wa kêp hpĩr pymaj kumỳ nẽ ma o tẽ nẽ kaxyw à nhĩpêx nẽ nhỹri gô nhĩpôk ri põ kamã ho amũxu. Tã nhũm Paraohti hkra nija ra gôx mã wỳr mã tẽ nẽ ra omu hāmri nẽ amnhĩm kumỳ nẽ ma o tẽ nẽ ho hkra.

22 Jakamã nhũm Mojes Ejit nhõ xwỳnhjê kamã

hprêk. Hāmri nē mē àhpumunh xà hã kagà pumunh pa. Nē hihtỳx nē mē kãm kapêr kãm hihtỳx mex o pa.

²³ –Tã hāmri ra hã amgrà pê 40 nē hapêx nhũm Mojes hamaxpêr nē ra kãm amnhĩ kwỳ pê Ijaewjê pumunh prãm nē ma mē hwỳr tẽ.

²⁴⁻²⁵ Hāmri nē htêm kôt ja wa omu. Nhũm Ejit nhõ xwỳnhja Ijaewja homnuj o xa nhũm Mojes tẽn tee ri hã omu nē hamaxpêr o: “E pa ma wa hwỳr tẽ nē ixkwỳ mũj ã Ejit nhõ xwỳnhta pĩ kê ixkwỳjaja ja hã ixpumu nē Tĩrtũm kot mē hwỳr inhmẽnh ã ixpumu. Ixte Ejit nhõ xwỳnhjê nē mē kator kaxyw mē ja hã ixpumunh kurê kumrêx.”

–Anhỳr o hamaxpêr hāmri nē wa hwỳr tẽ nē amnhĩõja nê Ejit nhõ xwỳnh pĩ. Tã no nhũm hkwyjaja kot hpĩr ã harẽnh mar tã tanhmã amnhĩ kaxyw kãm hamaxpêr to hkêt nẽ.

²⁶ Nhũm apkati nhũm mẽhõja war axkrut nẽ axte pijapu ho wa xa. Hamẽ wa kêp Ijaew. Jakamã nhũm Mojes akupỹm mē hwỳr tẽ nē tee ri axpẽn tã wa omu nhũm ja kêp omnuj nẽ. Hāmri nhũm wa hwỳr tẽ nē axpẽn nê wa kãm kapêr nê wa kãm: “Pa? Kwa war ajamẽ war apê Ijaew kênã na ka wa ri axtem nẽ ã axpẽn nhĩpêx anẽ.” Anẽ.

²⁷ Hāmri nhũm kot amnhĩ kaxyw hkryx xwỳnhja kuma nẽ nhãm amnhĩ nê hkujate nẽ kãm: “Tk. Kwa xà apê mē inhõ pahi hã na ka ã wa inhmã akapêr anẽ? Nà apê mē inhõ pahi hkêt kênã.

²⁸ Kot kaj inhĩpêx o te ate Ejit nhõ xwỳnhta nhĩpêx pyrã nẽ wa ixtõ hpĩr kêt nẽ.” Anẽ.

²⁹ –Hāmri nhũm tee ri kuma nẽ ra kãm ma nẽ Ejit rũm kator kurê kumrêx nẽ ma pyka pê Mijiã

hwÿr mō nē kamã hpãnhã pa. Kamã hprō nē hkra. Nhũm hkra myja wa hamẽxkrut.

³⁰ —Tã nhũm Mijiã kamã pa hã axte hã amgrà pē 40. Hãmri nē mēmo arıgro hã kapôt ã krã hakÿx pē Sinai kape hã ri pa nhũm Tırtũm kãm kapēr. Nom nhũm Mojes omunh kêt nē. ãm utı kaôk kamã kuwy hpôk pix pumu.

³¹ Amnhı jaér pē ã kot amnhı nhıpêx anhÿr ã omu hãmri nē amnhı tã hprı hã omunh kaxyw hwÿr tē nhũm Tırtũm kãm:

³² Pa Mojes? E ixpê Tırtũm na pa. Ixpê akukamã anhıgêt Apraãw nhō Tırtũm na pa. Nē ixpê Apraãw kra Ijak mē htãmnhwÿ Jako wa õ Tırtũm na pa. Anē.

Hãmri nhũm tee ri kuma nē kãm ma xàj htertet tÿx nē. Hãmri nē umaj axte pı hpôkja wÿr rıt kêt nē. ãm nhãm hkrã nē rıt o xa.

³³ Hãmri nhũm Tırtũm kãm:

E kwa ixpê Tırtũm maati hã ixtã apijaãm ã aparkà kapa nē apar kênh nē xa.

³⁴ Na pa ra ixkra Ijaewjaja Ejit kãm mē omu. Na ra Ejit nhō xwÿnhjaja ixpê mē homnuj tÿx kumrêx rãhã ho pa nhũm mē amnhı xà hã maj tee ri amnhı nhıpêx. Pa ja hã mē omu nē inhmã mē hkaprı nē. Jakamã kot paj Ejit nhō xwÿnhjê nhıhkra rũm mē kator pa. E ka kot paj mē hwÿr amē ka ma akupÿm mē hwÿr mō nē mē kurũm mē kator.

Anhÿr o kãm mē kaxyw karõ.

³⁵ Ra Ijaew kot Mojes hkaga tã nhũm mē kaxyw ãm nē ma akupÿm kot mē hwÿr mēnh kaxyw. Na prem ra omu nē hkaga. Te mē ate Jejus kagaja pyrã nē hkaga. Jakamã nhũm pijapu xwÿnhhta tee ri amnhı

tã omu nê kamã gryk nê amnhĩ nê kãm kapêr nê kãm: “Tk. Kwa xã apê mẽ inhõ pahi hã na ka ã wa inhmã akapêr anê? Nà apê mẽ inhõ pahi kêt.” Anhÿr tã nhũm Tĩrtũm mẽ kaxyw tãm xãm. Kot mẽ ho amnhĩptàr nê Ejit nhõ xwÿnhjê rũm mẽ kator kaxyw. Ja kaxyw na pre pĩ hpôk kamã kãm kapêr nê mẽ kaxyw ãm.

³⁶—Jakamã nhũm Mojes ma akupÿm Ejit wÿr mõi nê mẽ kurũm hkwyjê kator nê ma mẽ o pa. Na pre mẽ ho mex nê Tĩrtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ o pa. Ejit kamã nê mãânên mẽ kot gô xujanãr mã: “Gô kamrêk” anhÿr xwÿnhhta kamã. Nê kapôt ã mẽ kãm ã amnhĩ nhĩpêx anhÿr o mẽ o pa. Nê kapôt ã ri mẽ o pa ho ra hã amgrà pê 40.

³⁷—Tã tãm na pre mẽ panhĩgêjtê mã mẽhõ hkukamã mẽ kãm tanhmã harênh to nê mẽ kãm harênh o: “Koja Tĩrtũm nhÿrmã te ra mẽ akaxyw pa ixãm pyrã nê inhmÿr pê mẽ panhĩõ xãm. ÿ hã mẽ amã kapêr jarênh o pa kaxyw nhũm nhÿrmã mẽ akaxyw ãm ka mẽ omu.”

—Anhÿr o ã Jejus kukamã harênh anê.

³⁸ Na pre Mojes kapôt ã mẽ panhĩgêjtê ho pa nhũm mẽ krã hakÿx pê Sinaija wÿr pa. Mẽ panhĩgêjtêja hãmri hwÿr pa nhũm Tĩrtũm kapêr o mẽ wryk xwÿnhja mẽ kaxyw Mojes mã kapêr nhũm ô ri mẽ kãm awjarê nê hã kagà. Mẽ kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarênh o pa. Nê mẽ pajaxwÿja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà.

39 Tã no nhũm mẽ panhĩgêtjaja Mojes ma nẽ ãm kuma nẽ hkaga kumrẽx nẽ akupỹm Ejit wỳr hkrà.

40 Jakamã nhũm Mojes kormã nhỹri mẽ kaxyw Tĩrtũm mã kapẽr o ãm rôm nhũm mẽ wakre kamã htõ Arãw wỳr mra nẽ kãm: “Kwa Mojes ra kot tanhmã amnhĩ to kênã. Kot Ejit rũm mẽ pakator nẽ mẽ pahto mõi tã ra nhỹri arĩk nẽ tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỹm Ejit wỳr mẽ pahto pa.” Anẽ.

41 —Hãmri nhũm mẽ kuma nẽ mẽ kãm kàx o môx krare karõ ho sãnti nhĩpêx nẽ mẽ kãm ãm. Hãmri nhũm mẽ axtem nẽ te ho Tĩrtũm nhĩpêx pyræk o hipêx nẽ kãm ôwêhti hkwy pa nẽ kãm haxwy nẽ hã apku. Hãmri nẽ ã amnhĩ nhĩpêx anhỹr ã amnhĩ pumu nẽ hkĩnh nẽ.

42 Hãmri nhũm Tĩrtũm tee ri ja hã mẽ omu nhũm ja kêp omnuj tỳx nẽ nhũm mẽ hkaga hpa. Jakamã nhũm prem amnhĩ krã hkõt ri myyti nẽ mytwrỳre nẽ kanhêti karõ nhĩpêx nẽ te mẽ kot Tĩrtũm nhĩpêx pyræk o hipêx o pa. Hãmri nẽ amnhĩ kaxyw kumã pix mã hamaxpẽr o pa hã amgrà xohtõ nẽ. Tã nhũm Tĩrtũm nhỹ hã kapẽr jarênh o mẽ pa xwỳnhjaja tanhmã mẽ kãm kapẽr to nẽ mẽ hã kagà. Te Tĩrtũm tãm mẽ kãm kapẽr pyræk o mẽ kãm kapẽr nẽ hã kagà kot:

Pa mẽ apê Ijaewjaja? E mẽ inhma. Amnepêm mẽ ate kapõt ã ri mẽ apa hã amgrà pê 40ta ã. Xà we inhmã na ka prem akrit kwỳ hpar o apa?

43 Nà inhmã hkêt. Na ka prem axtem nẽ ri amnhĩ krã hkõt amnhĩm mẽmo karõ nhĩpêx nẽ hipêx o te mẽ ate pa inhĩpêx pyræk. Pê kãm akrit kwỳ hpar nẽ õr o ri apa.

Mě anhõ mẽmo karõ nhĩpêxta mẽ ate amnhĩm hã hixi pê Mõrok mẽnh xwỳnhja ka pre htem à kamã amnhĩ kôt ho apa.

Ně amnhĩm kanhêti karõ nhĩpêx nẽ hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harẽnh o ri apa.

Tã ã mẽ ate amnhĩ nhĩpêx anhỹrja mỳrapê kot paj pãnhã nhỹhỹm mẽ arẽ.

Koja mẽ akutã amnhĩ xunhwỳr xwỳnhjaja mẽ apynê nẽ ma pyka pê Papirõn rũm hamũ mẽ ato hapêx ka mẽ amarĩ mẽ kãm axàpênh rũnh o ri apa kãm ga. Anẽ.

Ã na pre Tĩrtũm mẽ panhĩgêjtê mã kapêr anẽ nhũm ỹ hã kapêr jarẽnh o pa xwỳnhja mẽ kãm hã kagà.

⁴⁴ –Tã nhũm mẽ panhĩgêjtaja kormã kapôt ã ri pa ri amnhĩ kôt mry kà ho ixkre ho pa. Tĩrtũm mã kapêr xà hã ixkreja nhũm prem amnhĩ kôt ri o pa. Mẽ kot kãm “Tĩrtũm nhõrkwỹ kaàkre” anhỹr xwỳnhja. Tĩrtũm kot mẽ kãm hã karõ xà hkôt nhũm mẽ hipêx nẽ amnhĩ kôt ri o pa. Na pre Tĩrtũm hprĩ hã Mojes mã tanhmã kot hipêx to hã karõ nhũm mẽ hkôt hipêx nẽ amnhĩ kôt ri o pa.

⁴⁵ –Tã nhũm Mojes ty nhũm hpãnhã Jojueja amnhĩ kôt mẽ o pa. Ma Tĩrtũm kot mẽ kãm pyka mex nhõrta wỳr Mojes mỳr pê mẽ o pa. Hãmri nẽ hwỳr mẽ o pøj nhũm Tĩrtũm mẽ nê mẽ kot ra kamã mẽ pa ho mẽ pa xwỳnhjê japøj nhũm mẽ pãnhã kamã pa ho pa. Nẽ amnhĩ kôt Tĩrtũm nhõrkwỹ kaàkreta o pa. Rãhã nhũm finat Tawija mẽ hpãnhã mẽ ho amnhĩptã.

⁴⁶ Na pre Tĩrtũm Tawi kot tanhmã amnhĩ nhĩpêx to ho pa hã omu nẽ kãm hapê nẽ. Jakamã nhũm

Tawi kãm kapër nẽ kãm: “Pa Tĩrtũm? Kwa xà kot paj amã ixkre mex õ nhĩpêx nà? Mẽ ixpê Ijaewjaja mẽ ixte kamã amã amex o amex ã ajarẽnh o ixkrĩ kaxyw pa hipêx. Xà kot paj amã hipêx?” Anhỹr tã no nhũm Tĩrtũm kormã kãm ja prãm kêt nẽ.

⁴⁷ Jakamã nhũm Tawi hkra Sarumãwja hipêêxà mỳr pẽ hpãnhã kêp mẽ õ pahi nẽ kãm hipêx.

⁴⁸ Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwỳnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhỹ hã kapër jarẽnh o pa xwỳnhja Tĩrtũm kot tanhmã mẽ pajamãr to ho pa hã kagà nẽ hã kagà ho:

⁴⁹ Na pa hte kaxkwa rũm pyka hkõt mẽ piitã mẽ hamãr mex o ixkrĩ.

Tã tanhmã kot paj amnhĩ to nẽ mẽ ãhkra ho mẽ kot inhmã ixkre nhĩpêxta wỳr axà nẽ kamã ixpa ho ixpa?

⁵⁰ Nà ixte mẽmoj piitã ho ixkator xwỳnh kênã kot pa kêt ã amnhĩ nhĩpêx anẽ. Anẽ.

Nhũm pre ã Tĩrtũm amnhĩ tã mẽ kãm kapër anẽ nhũm ỹ hã kapër jarẽnh xwỳnhja ô ri mẽ pamã hã kagà.

⁵¹ —E kwa mẽ inhma ixkwỳjaja. Mẽ akrã hihtỳx kumrẽx jakamã mẽ amã Tĩrtũm kapër mar prãm kêt. Na ka htem mẽ panhĩgêtjê pyrã nẽ amnhĩ nẽ Tĩrtũm Karõ kaga nẽ kapër mar kêt nẽ.

⁵² Na pre hte Tĩrtũm nhỹ hã kapër o mẽ pa xwỳnhjaja mẽ panhĩgêtjê hwỳr mra nẽ mẽ kãm kapër jarẽnh o ri mẽ hkõt pa. Tã nhũm mẽ hkaga nẽ mẽ hipêx kati ho pa. Na pre htem Jejus wrỳk kukamã mẽ kãm: “E koja nhỹrmã kot Tĩrtũm kapër mar nẽ hkõt amnhĩ nhĩpêx mex rãhã xwỳnh maatija mẽ pahwỳr wrỳ.” Anhỹr o mẽ kãm harẽnh

o pa. Tã no nhũm mẽ kãm ja mar prãm kêt jakamã axtem nê hã mẽ hpar o pa. Mẽ kot mẽ kãm Jejus jarẽnh o mẽ pa xwỳnhjê hpar o pa. Tã nhũm tãm mẽ pahwỳr wrỳ ka mẽ omu nê mẽ kot amnhĩ nhĩpêxta pyrà nê hã amỳnê nhũm prem mẽ amã kupĩ.

⁵³ –Tĩrtũm kapêr o mẽ wrỳk xwỳnhjaja kot Tĩrtũm nhỹ hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nê ama nê ãm ama nê hkôt amnhĩ nhĩpêx o ri apa hkêt nê. Anê.

Mẽ kot Estewãw pĩr ã mẽ harẽnh

Rukre 21.16-19, 23.34; Atre 22.20

⁵⁴ Hãmri nhũm juistijaja tee ri Estewãw xujarẽnh ma nê kamã gryk tỳx nê kãm kapêr punuj nê.

⁵⁵ Nom nhũm Tĩrtũm Karõja tanhmã hkrã hto nhũm kãm mẽ uma hkêt nê. Hãmri nê kànhmã rĩt nê kaxkwa pumunh o xa nê kamã Tĩrtũm rũm hirã rax pumu. Nhũm Jejus Tĩrtũm nhĩhkô hã xa nhũm omu nê hkĩnh nê mẽ kãm:

⁵⁶ –Kokỹỹ. Na kaxkwa axkjê nhũm kamã Tĩrtũm nhỹ pa omu. Nhũm kuri kot mẽ pahwỳr mẽn h xwỳnh Jejusja xa. Hêxta waa nê. Nà na pa jarãhã wa omu nê ixkĩnh tỳx kumrêx. Anê.

⁵⁷ Hãmri nhũm mẽ kuma nê kamã gryk tỳx nê. Hãmri nê kãm mar prãm kêt nê kêp amnhĩ jamak pro. Hãmri nê gryk xàj àmra htỳx nê hwỳr hprõt

⁵⁸ nê unê nê krĩ pê ho kato nê ma o tẽ nê nhỹri o xa. Hãmri nê kên o htak o hpĩr kaxyw amnhĩ nhĩnòkà hkwrỳ nê mēhō my pê Sawti mã kugō nhũm mẽ kãm hamỳ. Hãmri nhũm mẽ kên rũnh kwỳ jamỳ nê o mra nê Estewãw wỳr rẽn h prêprêk o kuhê. Nê ho ã kamã htak nê hkrãx pê htak.

59 Hāmri nhũm ra htyk kaxyw nē Jejus mā amnhĩ jarē nē kām:

—Pa Pahihti Jejus? E koja ixkarō awỳr api ka ixto amnhĩptà. Anē.

60 Hāmri nē hkõn krã ho tēm nē nhỹ nē axte kãm amnhĩ jarē nē mẽ kot hpĩr xwỳnhjê nê kãm kapēr nē kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nē.

Anhỳr o mẽ nê Jejus mā kapērja kôt ra ty.

8

Mẽ kot Estewãw jaxàr ã mẽ harēnh

Atre 22.4, 26.9-11

1-2 Hāmri nhũm mẽ kot Jejus kôt amnhĩ nhĩpêx xwỳnhjaja Estewãw wỳr mra nē htyk kãm omu nē hkaprĩ nē. Nē mur nē kumỳ nē ma o mō nē haxà. Nom nhũm Sawtija mẽ kot hpĩr ã omu nhũm ja kãm mex nē.

Sawti kot Jejus kwỳjê nhĩpêx kati ho pa hã harēnh

Atre 1.8

Tã nhũm Jerujarē kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hāmri nhũm mẽ tee ri amnhĩ kukamã hamaxpēr nē mẽ hkwyjaja mẽ umaj hapôj nē ma pika hkwy hkôt hpigrành pa. Mẽ hkwyjaja Jutej wỳr ma pa nhũm mẽ hkwyjaja Samar hwỳr ma pa. ã na prem mẽ umaj nhỹhỹm hpigrành par anē. ãm Jejus nhỹ hã mẽ ahkre xwỳnh maati pixjaja na prem Jerujarē kamã arĩk nē nhỹhỹm mōr kêt nē. Simãw Pêtre nē Juãw nē Xiakre nē Andre nē Firipti nē Patoromew nē Matêwre nē Makre nē Tomas nē

Xiakre hōja nē Simāw ō nē Maxitreja. Ām jajaja pix na prem arīk.

³ Nhūm Sawti haxwỳja Jejus kōt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprām xàj tanhmã mẽ hipêx to ho pa. Na pre hte mẽ òrkwỹ hwỳr agjê nē mẽ unê. Měmyjê pynê nē mēnijê pynê nē ma mẽ o mra nē mẽ haggjênh xà kamã mẽ haggjê. Mẽ uràk nē kêp Ijaew tã ã mẽ hipêx anhỹr o pa.

⁴ Tã nhūm mẽ umaj Jerujarẽ rūm pika hō hwỳr mẽ hpigrành xwỳnhhtaja amarĩ pika hkwỳ hkōt ri pa hkēt nē. Na prem ma mẽ piitã mẽ kãm Jejus kapêr jarênh o ri mẽ hkōt pa. Kêp Tĩrtũm kot mẽ pakaxyw ãm xwỳnh ã harênh rãhã ho ri mẽ hkōt pa.

*Wajaga kot amnhĩ tã Firipti mar ã harênh
Juãw 2.23-24*

⁵⁻¹² Tã nhūm Firipti haxwỳja ma mō. Ma krĩ pê Samar hwỳr mō nē kamã mẽ kãm Tĩrtũm kot mẽ pakaxyw ãm xwỳnhhta jarênh o pa. Samar kamã na pre wajaga Simãwti ri Samar nhō xwỳnhjê hkōt mẽ no kupyrrãhã ho ri mẽ hkōt pa. Nē àhpumunh tỳx ã amnhĩ to jarkrar o ri pa. Jakamã nhūm mẽ kot amnhĩ nhĩpêx ã omu nē kamã no pyma nē. Nē htỳx ho ãm hãmri kot amnhĩ jarênh ã hkamnhĩx. Jakamã nhūm pre mẽ kãm tanhmã ri amnhĩ to hêx to ho pa pê mẽ no kupyrrãhã ho ri pa nhūm mẽ amnhĩ jaêr pê omu. Mẽ kot amnhĩ to hkryre xwỳnhhjaja nē mẽ kot amnhĩ to rũnh xwỳnhhjaja nhūm mẽ amnhĩ jaêr pê kot tanhmã amnhĩ nhĩpêx to hã omunh o hkōt pa. Nē ri axpên mã harênh o:

–Kokỹỹ. Wajagaja àhpumunh tỳx kumrêx. Tĩrtũm nhỹ hã mãn te ã amnhĩ nhĩpêx anhỹr o

pa nà? Mãn pre Tĩrtũm kãm àhpumunh xà hkwỳ gō nhũm ỹ hã ã amnhĩ nhĩpêx anhỹr o pa. Anẽ.

Hãmri nẽ hkôt hamaxpěr o ri hkôt amnhĩ nhĩpêx o pa.

Tã nhũm Firipti mẽ õ krĩ hwỳr mō nẽ mẽ kãm Jejus Kris jarēnh o ri mẽ hkôt pa nẽ mẽ kãm:

—Jejus kęp Tĩrtũm kot mẽ pahwỳr mēnh xwỳnh jakamã kot kaj mẽ amnhĩ kaxyw hkôt ajamaxpěr nẽ hkôt amnhĩ xunhwỳ nhũm Tĩrtũm hã mẽ apumu nẽ mẽ ato hkra. Anẽ.

Hãmri nẽ Tĩrtũm nhỹ hã akupỹm tanhmã mẽ kute xwỳnhjê ho mex to ho pa. Mẽ ĩ kamã mẽ htyk xwỳnhjaja nẽ mẽ hyk o mẽ pa xwỳnhjaja nhũm mẽ ohtô nẽ akupỹm mẽ ho mex o pa. Nẽ mẽ hkwỳjê nẽ mẽkarōmnuti hkwỳ jano nhũm mẽ àmra htỳx o mẽ hkaga nẽ ma mẽ kurũm hapôx nẽ mra. Ā Firiptija Jejus nhỹ hã mẽ ho mex o pa anẽ nhũm mẽ piitã ja hã omu nẽ kapěr ma nẽ hkĩnh nẽ. Nẽ kapěr mar tỳx nẽ hkôt hamaxpěr. Jao wajaga Simãwti kaga nẽ hpãnhã amnhĩ kaxyw Jejus kôt pix mã hamaxpěr nẽ hkôt amnhĩ xunhwỳ. Hãmri nhũm Firipti ja hã mẽ omu nẽ mẽ hkrã kumrã. Měmyjaja nẽ mėnijaja nẽ mẽ piitã mẽ hkrã kumrã. Ra mẽ kot Jejus kôt amnhĩ xunhwỳr ã mẽ piitã mẽ kãm amnhĩ to amnhĩrĩt kaxyw nhũm mẽ hkrã kumrãr pa.

¹³ Hãmri nhũm wajaga Simãwti haxwỳja Jejus kapěr ma nẽ mẽ uràk nẽ amnhĩ kaxyw hkôt hamaxpěr nẽ hkôt amnhĩ xãm nhũm Firipti hkrã kumrã. Hãmri nhũm hkĩnh nẽ Firipti hkôt ri pa. Nẽ aa mẽ kot mẽmoj pumunh kêt kwỳ ho anhỹr o ri pa hã omu nẽ kamã no pyma ho hkôt ri pa. Nẽ kot

Tĩrtũm nhỹ hã akupỹm mẽ ho mex ã omu nẽ tee ri hamaxpẽr.

14 Tã hãmri nhũm Jerujarẽ kamã Jejus nhỹ hã mẽ ahkre xwỳnh maatijaja Samar nhõ xwỳnhjê jarẽnh ma. Ra mẽ kot Tĩrtũm kapẽr kôt amnhĩ nhĩpêx ã mẽ harẽnh ma nẽ hkĩnh nẽ. Hãmri nẽ ma mẽ hwỳr Simãw Pêtre mẽ Juãw wa kumẽ.

15-17 Hãmri nhũm wa ma mẽ hwỳr wa mỗ nẽ pøj. Hãmri nhũm Firipti wa omu nẽ wa kãm krĩ nhõ xwỳnhjê jarẽ nẽ wa kãm:

—Nà na pa pre mẽ kãm Jejus kapẽr jarẽ nhũm mẽ inhma nẽ hkôt amnhĩ xunhwỳ. Jakamã pa pre mẽ hkrã kumrã. Nom na kormã Tĩrtũm Karõja mẽ hkarõ mã gjêx kêt nẽ. Anẽ.

Hãmri nhũm wa mẽ harẽnh ma nẽ mẽ himõk ã wa ìhkra jaxwỳr o ri mẽ hkôt mra. Ja kôt nhũm Tĩrtũm Karõ mẽ hwỳr wrỳ nẽ mẽ hkarõ mã gjêx pa.

18-19 Hãmri nhũm wajaga Simãwja mẽ amnhĩ tã wa omunh o xa nẽ hamaxpẽr o:

—Kokỹỹ. Kwa wa kot mẽ hã ìhkra jaxwỳrja kôt na hte Tĩrtũm Karõ mẽ hkarõ mã agjê. Hêxta waa nẽ. Inhmã ã mẽ hipêx anhỹr o ri ixpa hprãm tỳx. E pa ixkàxpore hkwỳ jamỳ nẽ o tẽ nẽ wa kãm kugõ kê wa tanhmã ixto pa wa uràk nẽ ã mẽ hipêx anhỹr o ri ixpa. Nà kot paj anẽ. Anẽ.

Hãmri nẽ wa hwỳr tẽ nẽ wa kãm:

—E ota ixkàxporeta. Kwa amnhĩm apy nẽ hpãnhã tanhmã ixto pa war apyrà nẽ mẽ hã inhìhkra jaxwỳr o ri mẽ hkôt ixpa kê Tĩrtũm Karõja mẽ hkarõ mã agjê. Inhmã ja ho anhỹr prãm tỳx. Anẽ.

20-23 Hãmri nhũm wa tee ri ã kapẽr anhỹrja ã omu nhũm Pêtre kãm:

—Tk. Kwa ajamxpērja mex kêt. Xà na htem kàxpore ho Tĩrtũm mã amnhĩrer pê ÿ hã mẽ ho hwỳr o pa nhũm Karõ mẽ hwỳr agjê? Nà na htem kàxpore ho Tĩrtũm Karõ japrôr kêt nẽ. Kot kaj wa ixpyrà nẽ ã mẽ hipêx anhỹr kêt nẽ. Ajamxpērja mexre hã. Kormã ate Tĩrtũm kôt amnhĩ xãm tỳx kêt jakamã na ka atỳx ã ri ajamxpēr anẽ.

—Na ka ã wa ixte Tĩrtũm nhỹ hã mẽ hipêx anhỹr ã wa ixpumu nẽ amã wa ixpyrà nẽ ã mẽ hipêx anhỹr o ri apa hprãm xaj ajamxpēr punuj nẽ. Nhũm ajamxpēr punuj te kot apa hã apyr ka tee ate kệp amnhĩ kjênh pyræk. Kwa tokyx ajamxpēr punuj ã amnhĩ pumu nẽ akaprĩ nẽ tokyx hkaga. Hãmri nẽ amnhĩ to Tĩrtũm wỳ kê amnhĩ katut kôt ajamxpēr punujja mẽ ka axte ã ajamxpēr anhỹr kêt nẽ. ã mẽ hamxpēr punuj anhỹr xwỳnhjaja koja mẽ nhỹrmã ma kuwy hwỳr pa. Anẽ.

²⁴ Hãmri nhũm tee ri amnhĩ tã kuma nẽ hkaprĩ nẽ wa kãm:

—Kwa xà wehe? Tô tokyx ixto Tĩrtũm wỳ kê ã ijamxpēr anhỹrja mỳrapê hwỳr inhmênh kêt nẽ. Anẽ.

²⁵ Tã nhũm Simãw Pêtre mẽ Juãw wa Samar nhõ xwỳnhjê mã Pahihti Jejus kapêr jarênh pê ho mẽ ahkre hãmri nẽ ma akupỹm Jerujarê hwỳr mỗ. Ma pyka pê Samar hkôt mẽ kãm Jejus kapêr jarênh o ma akupỹm mỗ.

*Firipti mẽ Exiop nhõ xwỳnh wa harênh
Ijais 53.7-8*

²⁶ Hãmri nhũm Firipti arĩ Samar kamã arĩk. Hãmri nhũm Tĩrtũm kapêr o mẽ wrỳk xwỳnhja hwỳr wrỳ nẽ kãm:

—Pa? E ot pa awỳr wỳr nễ tễ. Nà kêt ka tokyx akato nễ ma mỗ nễ Jerujarễ rữm kànhmã Kas wỳr pry kahpêr ta nễ hã juk nễ ma hã mỗ. Kapôt ã pry nờta kahpêr ta nễ hã mỗ. E kwa tokyj.

Anhỳr o kãm kapêr hãmri nễ ma akupỹm tễ nễ kaxkwa hwỳr api.

²⁷ Hãmri nhữm Firipti kuma nễ kato nễ ma hwỳr mờr kurê kumrêx. Mỗo hãmri nễ pryja kahpêr ta nễ hã mỗ.

Hãmri nhữm ra mễhỗ myja mỗ. Exiop nhỗ xwỳnh na pre. Exiop kamã mễo pahi na pre niti. Hixi pê na pre Kãtatre. Nhữm pry hã mờr xwỳnhja kêp kãm kàxpore jamãr o pa xwỳnh. Exiop kamã te kêp mễ ỗ kôwenatô pyràk. Tã kot Tĩrtũm mã mex o mex ã harênh kaxyw ma Jerujarễ hwỳr mỗ.

²⁸ Hãmri nễ akupỹm Exiop wỳr kormã mỗ. Ỗ pàr kãm nhỹ nễ Tĩrtũm kapêr ã kagà htũm kamã kapêr o mỗ. Tĩrtũm nhỹ hã kapêr o pa xwỳnh pê Ijais kot Tĩrtũm kapêr ã kagà htũmja nhữm kamã kapêr o mỗ.

²⁹ Hãmri nhữm Tĩrtũm Karõ Firipti mã harê nễ kãm:

—E mễhỗ mũj wỳr aprõt nễ tễ nễ hã ajêt nễ ma hkôt tễ. Anễ.

³⁰ Hãmri nhữm kuma nễ ma hwỳr hprõt nễ hã ajêt nễ kot kagà kamã kapêr ã kuma. Ijais kot Tĩrtũm kapêr ã kagà htũm kamã kapêr ã kuma nễ kãm:

—Pa? Mãn ka aprĩ hã ate kamã akapêr xwỳnhhta ma nà? Anễ.

³¹ Hãmri nhữm kãm:

—Nà ixte maare hã. Mễhỗ kot hprĩ hã inhmã harê pa ixprĩ hã kuma? Xàt ka ixwỳr api nễ ixri nhỹ nễ aprĩ hã inhmã harênh o ixkôt mỗ nà? Anễ.

Hāmri nhũm kuma nẽ hwỳr api nẽ ìhkô hã nhỹ
nẽ kagàta pumunh o nhỹ.

³² Nhũm hã kagà kot:

Na htem ôwêhti par kaxyw nhũm amarĩ mẽ kãm
akryk kuhê.

Nẽ mẽ kot kêp hkĩ jakàr kaxyw nhũm ma anẽ nẽ
amarĩ mẽ kãm akryk kuhê.

Tã na pre mēhōja ôwêhti kot amnhĩ nhĩpêx pyrək o
amnhĩ nhĩpêx.

Jakamã nhũm mẽ kot tanhmã hipêx to htã no
nhũm arĩ mẽ kãm akryk xa. Amnhĩ nê
tanhmã mẽ kãm kapêr punuj to hkêt nẽ. ãm
arĩ mẽ kãm xa.

³³ Na prem homnuj týx nẽ ri hipêx kati rax nẽ.

Aa kot tanhmã amnhĩ tomnuj to hkêt kumrêx tã
nhũm mẽ ã hipêx anẽ nhũm mēhō yr pê
tanhmã nê mẽ kãm kapêr to hkêt nhũm
prem kupĩ.

Nhũm amnhĩ kanrêhã hkra hkêt rãhã ty. Jakamã
kot puj mẽ hkrajê nhĩxi mar kêt nẽ. Kra hkêt
rãhã htyk kênã. Anẽ.

³⁴ Nhũm pre ã Exiop nhõ xwýnh Tĩrtũm kapêr ã
kagà htũm kamã harênh anẽ. Hāmri nẽ tee ri ã
kot mēhō jarênh anhỹrja kukamã hamaxpêr nẽ hã
Firipti kukja nẽ kãm:

—Kwa aprĩ hã inhmã mēhōja jarê. Mēhō na prem
ã hipêx rax anẽ? Xà kot kagà xwýnhhta na prem ã
hipêx anẽ nà xà nhãm mēhō na prem ã hipêx anẽ?
E kwa aprĩ hã inhmã harê pa ã mẽ kot hipêx anhỹr
xwýnh kôt omu. Anẽ.

³⁵ Hāmri nhũm kãm:

—Tôe kot paj amã harê. Nà Jejus na prem ã hipêx
anẽ nhũm prem hã kagà. Anẽ.

Hāmri nē hprī hã kãm kot kamã harēnh xwỳnh ta jarē. Jejus kot tanhmã mẽ panê amnhĩ nhĩpêx toja nhũm hprī hã kãm harēnh o hkôt mō.

³⁶ Hāmri nhũm wa kormã mō nē pry htã himô hãnh mō nhũm Exiop nhõ xwỳnh omu nē Firipti mã kãm:

—E mũj gô mũj nō. Xà kot kaj kamã ixkrã kumrã nà? Anē.

³⁷ Nhũm kãm:

—Nà kot kaj amnhĩ kaxyw Jejus Kris kôt aja-maxpēr nē hkôt amnhĩ xãm hã kot paj akrã kumrãr kurê kumrêx. Anē.

Hāmri nhũm kãm:

—Tỳ. Kêp Tĩrtũm Kra kênã kot paj kêt amnhĩ kaxyw hkôt ijamaxpēr kêt. Anē.

³⁸ Hāmri nē pàr o mrar xwỳnh mã anē nhũm pàr o nō nhũm wa kato nē himô hwỳr wrỳ nhũm Firipti hkrã kumrã. Kot Jejus kôt amnhĩ xãm ã hkrã kumrã.

³⁹ Hāmri nē wa akupỹm api nhũm Tĩrtũm Karõ Firipti mỳ nē ma nhỹhỹm o mō nhũm Exiop nhõ xwỳnhja axte omunh kêt nē. Hāmri nē ma akupỹm papxà hwỳr mō. Ra kot Jejus kôt amnhĩ xãm jakamã hkĩnh nē ma akupỹm mō.

⁴⁰ Rôm nhũm Firipti krĩ pê Ajôt kamã pôj. Tĩrtũm Karõ kot Exiop nhõ xwỳnh pê kator nē tanhmã ho nē Ajôt wỳr o mō hãmri nē kamã kumê. Hāmri nhũm mẽ kãm Jejus kot tanhmã mẽ panê amnhĩ nhĩpêx to hã harēnh pê ma krĩ hõ hwỳr mẽ kãm ujarēnh anhỹr o pa rãhã krĩ pê Sejarej wỳr mō nē pôj.

9

Sawti kot Jejus kôt amnhĩ xãm ã harēnh
Atre 22.6-11, 26.12-18

¹ Rôm nhũm Sawtija xatã Jerujarē kamã Pahihti Jejus kôt mẽ kot amnhĩ xunhwỳr xwỳnhjaja tanhmã mẽ homnuj tỳx to ho ri mẽ hkôt pa. Kãm mẽ himex par prãm jakamã na pre hte ã amnhĩ nhĩpêx anhỳr pix o pa. Tã ra hamaxpêr nê ma patre maati hwỳr tē nê mẽ hã amnhĩ jarē nê kãm:

² —E ot pa awỳr tē. Kwa inhmã kagà nhĩpêx pa kupy nê ma krĩ pê Tamas kãm mẽ pahpê Ijaew xàptàr tũmrejê hwỳr o mō nê mẽ kãm kugō. Kê mẽ kamã harē nê omu hãmri nê hkôt inhĩkra kamã Jejus kôt mẽ kot amnhĩ nhĩpêx xwỳnhjê jagjê. Mēnijaja nê mēmyjaja. Hãmri pa mẽ unê nê man akupỳn awỳr mẽ o mō ka mẽ omu nê kam tanhmã mẽ hipêx to. Anê.

Hãmri nhũm kuma nhũm ja kãm mex nê. Hãmri nhũm kãm kagà nhĩpêx nê kugō nhũm kupy nê hkôt mẽ pa xwỳnhjê mẽ ro hã ma Tamas wỳr mẽ hwỳr mōr kurê kumrêx.

³ Mōõ mẽ ra hpôx o mōr mẽ nhũm puh kaxkwa rũm hirã rax kumrêx wrỳ nê hã ajêt nhũm hipôk ri xa.

⁴ Hãmri nê tee ri omu nê kãm ma xàj pykap tēm nê akryk nō. Hãmri nhũm kaxkwa rũm mēhō kãm kapêr nê kãm:

—Pa Sawti? Hêxta waa nê. Kwa mon ka hte ixtomnuj tỳx o ri apa? Anê.

⁵ Hãmri nhũm amnhĩ jaêr pê kuma nê kãm:

—Kwa mẽ atō na ka ã inhmã akapêr anê pahihti? Anê.

Hãmri nhũm kãm:

—Kwa nhũm ixpê Jejus ixte amã ixkapër kênã. Pa na ka hte ixpê ixkôt mẽ kot amnhĩ xunhwỳr xwỳnhjê nhĩpêx kati ho apa. Jao te pa ate ixtomnuj tỳx pyràk.

⁶ Nom kot kaj axte ã amnhĩ nhĩpêx anhỳr kêt kumrêx. E kànhmã xa nẽ mãmri ma krĩ hwỳr tẽ. Kot kaj hwỳr pøj nhũm mễhõ awỳr tẽ nẽ mẽmoj tã amã karõ ka ama nẽ hkôt amnhĩ nhĩpêx. Anẽ.

⁷ Nhũm pre ã Jejus Sawti mã kapër anẽ. Nhũm hkôt mẽ pa xwỳnhjaja mẽmoja ma no ãm hprĩ mar nẽ mẽmoj pumunh kêt nẽ. Hãmri nẽ tee ri hamaxpër nẽ kãm ma xàj akryk kapër kêt kumrêx nẽ kuhê.

⁸ Hãmri nhũm Sawti kànhmã xa nom rĩt kêt nẽ tee ri rĩt mã nhũm mẽ hpa hã kupy nẽ ma krĩm o mỗ.

⁹ Nẽ Tamas wỳr o pøj nẽ nhỹri mễhõ nhõrkwỹ hwỳr ho axà nhũm kamã nohkre nẽ arĩ hkrĩ. Tee ri amnhĩ kukamã hamaxpër o hkrĩ. Nẽ apkur kêt nẽ hkõm kêt o ra hã apkati axkrunêpxi.

¹⁰ Tamas kamã na pre mễhõ my pê Ananĩsja pa. Kot Jejus kôt amnhĩ xunhwỳr xwỳnhjê hõ na pre. Jakamã nhũm Jejus hwỳr kato nẽ kãm kapër. Te hpimtir kãm hwỳr kator nẽ kãm kapër pyrà nẽ kãm:

—Pa Ananĩs? Anẽ.

Nhũm kãm:

—Ỗ? Ot pa xa. Mo na Pahihti? Anẽ.

¹¹ Nhũm Jejus kãm:

—E kêt ka akato nẽ ma mẽ kot kãm: “Pry katàt” anhỳr xwỳnhta wỳr tẽ. Hãmri nẽ kamã Jut nhõrkwỹ japêr. Kamã na Tas nhõ xwỳnh pê Sawtija hkrĩ. Na no hkre nẽ inhmã amnhĩ jarênh o hkrĩ. Ka hwỳr axà nẽ omu.

12 Ate hwỳr atēm nē inhỹ hã hã anhĩhkra xir nhũm akupỹm rĩt mex kaxyw na ato amỹti. Jakamã e ma hwỳr tẽ nẽ ã hipêx anẽ. Anẽ.

13 Hãmri nhũm Ananĩs tee ri kuma nẽ kãm Sawti puma ho amnhĩ kamã kahak nẽ. Hãmri nẽ kãm:

—Kwa nà Pahihti. Tãm na xep hte Jerujarẽ kamã mẽ kot amnhĩ kaxyw akôt mẽ hamaxpěr xwỳnhjê nhĩpêx kati ho pa. Pa ra mẽ hã harênh ma.

14 Tã na xep ra jar Tamas wỳr pøj. Patre krãhtũm kapêr nhỹ hã kot mẽ ixpê akôt amnhĩ xunhwỳr xwỳnhjê pynênh nẽ ma akupỹm hwỳr mẽ ixto mõi kaxyw. Tãn ka ri hwỳr ijanõ. Kwa nà ri ixto anhỹr kêt nẽ Pahihti. Anẽ.

15 Nhũm Jejus kãm:

—Nà mamrĩ ma hwỳr tẽ. Ra ixte amnhĩ kaxyw ãm kênã. Jakamã koja ã mẽ anhĩpêx anhỹrta hpãnhã ma mẽ piitã mẽ kãm ixkapêr jarênh o pa. Mẽ apê Ijaew mã nẽ mẽ anhõ pahi hkwỳjê mã nẽ mẽ kêp Ijaew kêt xwỳnhjê mã. Koja mẽ piitã mẽ kãm ixkapêr jarênh mex o ri mẽ hkôt pa.

16 Koja mẽ ixtã homnuj tỳx nẽ nhũm amnhĩ xà htỳx kamã hamak o pa. Nom kot paj ixprĩ hã mẽ kot tanhmã ixtã hipêx to hkukamã kãm ixujarênh pa nhũm amnhĩ kukamã amnhĩ jarênh ma. E tokyx mãmrĩ ma axãmnhĩx hwỳr tẽ. Anẽ.

17 Hãmri nhũm kuma nẽ kato nẽ ma Sawti hwỳr htēm kurê kumrêx. Hãmri nẽ ixkre hwỳr axà nẽ omu nẽ hkrã hã ĩhkra xi nẽ kãm:

—Pa Jejus kôt ixtõ Sawti? E na Pahihti Jejus awỳr inhmẽ pa awỳr tẽ. Pry kahti ri kot awỳr kator xwỳnhta. Tã akupỹm arĩt nhũm Tĩrtũm Karõ kot akarõ mã àr kaxyw na awỳr inhmẽ pa tẽ. Anẽ.

¹⁸ Hāmri nhũm mẽmoj te tep kà pyràkja Sawti no rūm hapôj nê rôrôk nhũm akupỹm rīt mex kurê kumrẽx. Hāmri nê kànhmã xa nhũm Ananĩs hkrã kumrã. Ra amnhĩ kaxyw Jejus kôt hamaxpêr ã hkrã kumrã.

¹⁹ Hāmri nhũm nhỹ nê apku nê akupỹm hihtỳx.

*Sawti kot Tamas kamã Jejus kapêr jarênh
Sikũn Korĩt 11.22-23*

Nhũm Sawti Tamas kãm mẽ kot Jejus kôt amnhĩ xunhwỳr xwỳnhjê hkôt amnhĩ xãm nê mẽ hkôt ri pa nê tokyx ma akupỹm mõi kêt nê.

²⁰ Kormã mẽ hkôt ri pa nê Ijaew nhõ Tĩrtũm kapêr o mẽ ahkre xà hã ixkre hwỳr mra nê kamã mẽ kãm Jejus kapêr jarê. Kêp Tĩrtũm Kra hã harênh o kuhê.

²¹ Hāmri nhũm mẽ amnhĩ jaêr pê ã harênh anhỹrja ma nê tee ri hamaxpêr nê xepn mã:

–Kokỹỹ. Kwa tãm na xep pre Jerujarê kamã amnhĩ kaxyw Jejus kôt mẽ kot amnhĩ xunhwỳr xwỳnhjê homnuj tỳx o pa. Tã xep jar kot mẽ hkwyjê pynênh nê ma mẽ o mõi nê Jerujarê kamã patre krãhtũmjê mã mẽ õr kaxyw na pre man mẽ pahwỳr mõi. Tã ra tanhmã hamaxpêr to nê axtem nê mẽ pamã Jejus kapêr jarênh o mẽ pajahkre ho pa. Anê.

²² Hāmri nhũm Sawti arĩ Tamas kãm Ijaew mã tanhmã Jejus jarênh to kamã hihtỳx o mẽ hkôt pa nê mẽ kãm:

–Nà Jejus Krisja na pre Tĩrtũm mẽ pakaxyw ãm nê mẽ pahwỳr kumê. ãm hāmri na pa mẽ amã ja jarê. Anê.

Hāmri nhũm mẽ kuma nê tee ri kutã tanhmã kapêr to hkukamã hamaxpêr.

23 Tã ra hã apkati xohtô nê nhũm Tamas kãm Ijaew kwỳjaja kot Sawti pĩr kaxyw hã axpẽn ma.

24 Hãmri nhũm mễhõja hã ama nê Sawti hwỳr tẽ nê kãm mễ harẽ nê kãm:

—Kwa Sawti kêr ka axkãm ajamak rom. Na mễ pahkwỳjaja atã amỹnê. Na mễ ra krĩ puhã kahê xà hã hakwakre piitã hamãr ho kuhê. Kot kaj nhỹhỹm akato nhũm mễ apumu nê apynê nê apĩ. Anẽ.

25 Jakamã nhũm kamàt nhũm Sawti hkôt ri mễ pa xwỳnhjaja kawà rax õ mỳ nê hwỳr o tẽ nê kãm ãm nhũm hwỳr axà nê nhỹ. Hãmri nhũm mễ hkagrĩ nê kẽn o krĩ puhã kahêja nhĩrô pê ho wrỳ nhũm mễ kêp kato nê ma mỗ.

*Sawti kot Jejus kwỳjê hkôt pikamẽn ã harẽn
Karatas 1.15-24*

26 Tã nhũm Sawti krĩ pê Tamas rũm kato nê ma akupỹm Jerujarẽ hwỳr mỗ hãmri nê hwỳr pỏj. Hãmri nê mễ kot Jejus kôt amnhĩ xunhwỳr xwỳnhjê hkôt amnhĩ jarẽn kaxyw mễ hwỳr tẽ. Hãmri nhũm mễ tee ri amnhĩ wỳr omu nê kot Jejus kôt amnhĩ xãm ã amnhĩ to hêx ã hkamnhĩx hãmri nê amnhĩ kamã kahak o amnhĩ nê hkurê nê mễ piitã kãm uma nê.

27 ãm Panãpe pix ãm hãmri kot Jejus kôt amnhĩ xãm kôt hamaxpêr. Hãmri nê ma hwỳr tẽ nê haprô nê ma Jejus nhỹ hã mễ ahkre xwỳnh maatijê hwỳr o tẽ nê yr pê mễ kãm kapêr nê mễ kãm:

—Kwa ãm hãmri na Sawti amnhĩ jarẽ. Na ra mễ pahpyrà nê Jejus kôt amnhĩ xãm. Na xep pre Tamas wỳr pry hã kormã mỗ nhũm xep Pahihti Jejus hwỳr kato nê kaxkwa rũm kãm kapêr nhũm kuma nê hkôt amnhĩ xãm. Jakamã nhũm xep ra axtem kot amnhĩ nhĩpêx nyw o Tamas nhỗ

xwýnhjê mã Jejus kapêr jarênh o ri mẽ hkôt pa. Ra amnhĩ kamã kãm mẽ uma hkêt nê àmnhĩx ri mẽ kãm harênh o ri mẽ hkôt pa. Anê.

²⁸ Hãmri nhũm mẽ kuma nê amnhĩ kôt Sawti mẽ nhũm mẽ hkôt ri pa. Hãmri nê Jerujarê kamã mẽ piitã mẽ kãm Jejus kapêr jarênh o pa. Kãm Jejus kôt amnhĩ xunhwýr kêt xwýnhjê puma hkêt nê àmnhĩx ri mẽ kãm kapêr jarênh o ri mẽ hkôt pa.

²⁹ Nê Ijaew kwý pê Gresjê kapêr o mẽ kapêr xwýnhjê mã nhũm xatã mẽ kãm Jejus jarênh o ri mẽ hkôt pa. Kêp Tirtũm kot mẽ pakaxyw ãm xwýnh ã harênh rãhã ho ri mẽ hkôt pa. No nhũm mẽ kãm mar prãm kêt nê ra kot Jejus ã hpĩr mã.

³⁰ Hãmri nhũm mẽ kot Jejus kôt amnhĩ xunhwýr xwýnh kwýjaja mẽ harênh ma nê mẽ kêp ho kato nê ma krĩ pê Sejarej wýr o mõ. Hãmri nê kurũm ma akupým õ krĩ pê Tas wýr kumê nhũm ma akupým mõ.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurê xwýnhjaja axte Jejus ã tanhmã hkwyjê hto hkêt nhũm mẽ piitã hamakêtkati nê àmnhĩx ri pa. Pika pê Jutej kamã nê Garirej kamã nê Samar kamã nhũm mẽ piitã hamakêtkati nê àmnhĩx ri pa. Hãmri nê Tirtũm mã mex o mex ã harênh o ri pa. Nhũm Tirtũm Karõ tanhmã mẽ hkrã hto nhũm mẽ ra kapêr kôt amnhĩ nhĩpêx mex o mõ. Hãmri nhũm mẽ ohtô rax nê mẽ uràk nê Jejus kôt amnhĩ xunhwý nê hkwyjê hkôt axkamê.

Enejti akupým mex ã harênh

Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ xunhwýr xwýnhjê mã Tirtũm kapêr jarênh

o mẽ ahkre kaxyw ma krĩ piitã hkôt pa. Jakamã krĩ pê Rit wỳr mỗ

³³ nẽ hwỳr pỏj nẽ kamã Enejti pumu. Nhũm ỉ kamã htyk pa nẽ kupỉp kãm hikwỳ rãhã hã amgrà pê 8.

³⁴ Hãmri nhũm Simãw Pêtre omu nẽ Jejus nhỹ hã kãm kapêr nẽ kãm:

—Pa Enejti? E na Jejus Kris akupỹm ato mex. Jakamã e kànhmã xa nẽ akupỉpta py. Anẽ.

Hãmri nhũm akupỹm mex nẽ kànhmã xa nẽ amnhĩ pumu nẽ hkĩnh o hkĩnh.

³⁵ Hãmri nhũm krĩja kamã nẽ krĩ hỏ pê Sarõ kamã mẽ piitã harẽnh ma nẽ mẽ kot amnhĩ tomnuj kaga hpa nẽ hpãnhã Jejus kôt amnhĩ xunhwỳ nẽ hkôt amnhĩ nhĩpêx o pa.

Tapitre akupỹm htữ ã harẽnh

Rukre 8.49-56; Atre 20.7-12

³⁶ Nhũm Tapitreja krĩ pê Jope kamã na pre pa. Gres kapêr kãm hixi pê Nokre. Mẽ kapêr kãm Nokreja te kêp “karà” anhỹr jarẽnh pyràk. Na pre ra Tapitre pê Nokreja Jejus kôt amnhĩ xãm nẽ mẽ piitã mẽ ho mex o ri mẽ hkôt pa. Nẽ mẽ kêp amrakati xwỳnhjê kamã ukapỉ ho ri mẽmoj to mẽ kutã nojarêt o ri mẽ hkôt pa.

³⁷ Tã ra à htỳx nẽ hãmri ty. Hãmri nhũm mẽ tee ri omu nẽ hkapỉ nẽ mỳr rax nẽ. Nẽ kumỳ nẽ kuhõ hãmri nẽ kormã haxàr kêt ri kỳx pê ixkre kamã kuxi nẽ kuri mỳr o hkrĩ.

³⁸ Nhũm Simãw Pêtre kormã krĩ hỏ pê Rit kamã ri pa. Rit rũm Jope hwỳr jawỳ jakamã nhũm Jope kamã mẽ kot Jejus kôt amnhĩ xunhwỳr xwỳnhjaja Simãw Pêtre jarẽnh ma hãmri nẽ hwỳr ja wa ho

hamẽxkrut nẽ wa kumẽ. Nhũm wa ma hwỳr tẽ nẽ hwỳr pøj nẽ omu nẽ kãm:

—Pa? E jar na pa wa awỳr tẽ. Na Jejus kôt mẽ pahțõx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwỳr tẽn omu nà? Anẽ.

³⁹ Hãmri nhũm wa kuma nẽ ma wa hkôt htẽm kurê kumrẽx. Hãmri nẽ Jope hwỳr pøj nẽ mẽ hwỳr tẽ nhũm mẽ kỳx pê htyk nẽ nõi xwỳnhja wỳr ho api nhũm hwỳr axà. Nhũm kuri mẽ kệp mẽ mjên htyk xwỳnhjaja hkaprĩ nẽ mỳr o hkrĩ. Hãmri nhũm Simãw Pêtre mẽ hwỳr axà nhũm mẽ omu nẽ kãm Tapitre kormã htĩr ri kot tanhmã mẽ ho mex to hã harẽ. Nẽ mẽ ê hkwy jamỳ nẽ kãm kupẽ nẽ kãm:

—Ga ja pumu. Tyk xwỳnhta na pre mẽ inhmã hkay nẽ kugõ. Na pre hte mẽ ixto mex o pa. Tã mẽ ixpê ty. Hêxta gàa nẽ. Na pa mẽ ixkaprĩ htỳx kumrẽx. Anẽ.

⁴⁰ Hãmri nhũm mẽ kuma nẽ mẽ kator pa hãmri nẽ htyk xwỳnhta ri hkõn krã ho nhỹ nẽ ho Tĩrtũm wỳ. Hãmri nẽ htyk xwỳnhta mã kapêr nẽ kãm:

—Pa Tapitre? E kwa kànhmã nhỹ. Anẽ.

Pu nhũm no amra nẽ Simãw Pêtre pumu nẽ kànhmã nhỹ.

⁴¹ Hãmri nhũm hpa hã kupy nẽ kànhmã ãm nẽ kapôt ã mẽ kuhê xwỳnhjê mã anẽ nhũm mẽ akupỹm wa hwỳr agjê nhũm mẽ kãm:

—E ota. Na Tĩrtũm akupỹm mẽ amã ho htĩr. Anẽ.

Hãmri nhũm mẽ amnhĩ jaêr pê omu nẽ hkĩnh tỳx nẽ.

⁴² Hãmri nhũm Jope kamã mẽ piitã harẽnh ma nẽ mẽ ohtô nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ.

⁴³ Hāmri nhũm Simāw Pêtre Jope kamã ri pa hã apkati xohtô nê tokyx mẽ kurũm kato nê ma krĩ hõ hwỳr mōr kêt nê. Na pre mry kà ho mẽmoj nhĩpêx o pa xwỳnh pê Simāw ri pōj nê kuri pa hã apkati xohtô nê.

10

Koněre kot Simāw Pêtre hã karõ hã harěnh Rukre 7.1-10

¹ Tã nhũm Ijaew kêt xwỳnh Koněre. Kêp Rōmjê nhõ pōristi krãhtũm na pre. Õ pōristija pika pê Itar nhõ xwỳnh na pre mẽ nhũm Koněre kêp mẽ hkrãhtũm. Krĩ pê Sejarej kamã.

² Koněreja kot amnhĩ to mex o pa xwỳnh na pre. Kêp Ijaew kêt tã na pre hte òrkwỹ kamã hkwỳjê mẽ Tĩrtũm ã hpijaàm nê kãm mex o mex ã harěnh o pa. Apkati mẽ kãm amnhĩ jarẽ. Nê mẽ kêp amrakati xwỳnhjê mã kàxpore hkwỳ nhõr o pa.

³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrà nê kaxkwa kamã Tĩrtũm kapêr o wrỳk xwỳnh pumu. Nhũm hwỳr wrỳ nê tanhmã kãm kapêr to nê kãm:

—Pa Koněre? Anẽ.

⁴ Nhũm tee ri omu nê kãm ma htỳx kumrêx. Hāmri nê kãm:

—Mo na? Anẽ.

Hāmri nhũm kãm:

—Nà ate amnhĩ to Tĩrtũm wỳr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwỳnhjê mã kàxpore hkwỳ nhõr o apaja nhũm ja mãăněn kãm mex nê.

⁵ —Jakamã e inhma. Kêr ka ma Jope hwÿr amã mē àpênh xwÿnh kwÿ rē kē mē ma hwÿr mra nē kamã mēhō pê Simãw Pêtre japrô nē man akupÿn awÿr o mō.

⁶ Simãw kot mry kà ho mēmoj nhÿpêx o pa xwÿnhhta nhōrkwÿ kamã na hte pa. Ōrkwÿja gô mÿ ri na. E hwÿr mē arē kē mē ma hwÿr mō nē haprô nē man awÿr o mō kē amã mēmoj mex jarē ka ama. Anē.

⁷ Nhÿm pre ã Tÿrtÿm kapêr o wrÿk xwÿnhja Konêre mã kapêr anē hãmri nē kato nē ma akupÿm api. Hãmri nhÿm kot mar xà hkôt jajê rē nē Simãw Pêtre hwÿr mē kurē. Kãm àpênh xwÿnhjê ho hamēxkrut nē kaxyw ò pōristi hō. Pōristija na pre hte Konêre pyrà nē Tÿrtÿm ã hpijaàm o pa.

⁸ Jakamã nhÿm mē kurē nē mē kãm kapêr hãmri nē ma Jope hwÿr Simãw Pêtre hwÿr mē kurē nhÿm mē kato nē ma hwÿr mō.

⁹ Hãmri nhÿm apkati nhÿm kaxkwa nhÿpôk ri myt nhÿ nhÿm mē hwÿr hpôx o mō.

*Simãw Pêtre tanhmã hpimtir to hã harēnh
Atre 11.5; Karatas 2.11-21*

Rôm nhÿm Simãw Pêtre kot Tÿrtÿm mã amnhÿ jarēnh kaxyw ixkre nhÿmōk ã api nē himōk po hã kãm amnhÿ jarēnh o nhÿ.

¹⁰ Hãmri nē ra kãm prãm nē nom nhÿm mē kormã kãm ò hã àpênh jakamã nhÿm arÿ ixkre nhÿmōk ã Tÿrtÿm mã amnhÿ jarē.

Hãmri nē Konêre pyrà nē te hpimtir kãm kot mēmoj pumunh pyrà nē mēmoj pumu nhÿm Tÿrtÿm Konêre hkukamã tanhmã kãm mēmoj to amnhÿrÿt to. No ãm hã kuxi nē kãm harēnh jakamã

nhũm Simãw Pêtre te hpimtir kãm kot mẽmoj pumunh pyrà nẽ mẽmoj pumu.

¹¹ Nhũm kaxkwa katêr nhũm kurũm mẽmoj te kot mẽ hpiipro xà pyràk xwýnhja pyka hwýr wrýk o mō. Nẽ hatur xà piitã axpẽn tã akuprō nẽ ajêr nẽ wrýk o mō nhũm omu.

¹² Mẽ hpiipro xàta kamã mẽmo mry piitã hikwỹ. Mẽmo mry hpar o ri pa xwýnhjaja nẽ htu mýr pê ri pa xwýnhjaja nẽ mẽmo àk kýx pê htor o ri mrar xwýnh piitã mẽ hpiipro xàja kamã hikwỹ nhũm omu.

¹³ Hãmri nhũm Tĩrtũm kãm:

—Pa Simãw Pêtre? Mãn ka ra amã prãm nẽ nà? E kànhmã xa nẽ axàmnhĩx mãmri mryta ò kapi nẽ apĩ nẽ ho anẽ nẽ aku. Piitã mẽ ate hkur mã mex. Anẽ.

¹⁴ Hãmri nhũm tee ri kuma nẽ kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwy pix na pa htem kuku. No mry jaja aa mẽ ixte hõ hkwy hkrêr kêt. Anẽ.

¹⁵ Hãmri nhũm Tĩrtũm kãm:

—Nà kot anhýr tã kot paj pam amã mẽmoj jarẽ ka kamã anhõkre kahak kêt nẽ. Mãmri amnhĩm hõ kapi nẽ apĩ nẽ ho anẽ nẽ axàmnhĩx hkwy hkre. Anẽ.

¹⁶ Nhũm pre ã kãm mry hã karō anhýr o axkrunẽpxi. Simãw Pêtre kot mãmri Ijaew kêt xwýnhjê hkôt pa nẽ àmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harênh anhýr o axkrunẽpxi. Hãmri nhũm mẽ hpiipro xàja ma akupým kaxkwa hwýr àpir o mō nẽ akunok.

¹⁷ Hãmri nhũm Pêtre te hkrākator pyràk jao tee ri hpimtir kukamã hamaxpêr o nhỹ nẽ hamaxpêr o:

—Kwa mo kaxyw na Tirtũm ã inhmã ja hã karõ anẽ? Anẽ.

Rõm nhũm Konẽre kot hwỳr mẽ rẽnh xwỳnhjaja ra hwỳr hpõx o mõi. Ijaew kêt xwỳnhjtaja Simãw nhõrkwỹ hã mẽ hkukjêr o mõi nẽ hwỳr põi nẽ hakwakrem kuhê.

¹⁸ Hãmri nẽ õrkwỹ nhõ xwỳnhjê mã kãm:

—Pa na ka mẽ arĩ akrĩ? E Simãw Pêtre hwỳr na pa mẽ mõi. Xà jar na hte pa na? Anẽ.

Hãmri nhũm mẽ kãm: —Tỳ. Omũj kỳx pẽ ixkre nhĩmõk ã na nhỹ. Anẽ.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhỹ nhũm Tirtũm Karõ kãm mẽ hpõx xwỳnhjê jarẽ nẽ kãm:

—E Simãw Pêtre. Ota Ijaew kêt xwỳnhjaja axkrunẽpxi nẽ ajapêr o mõi nẽ ra anhõrkwỹ hwỳr põi.

²⁰ Mẽ hwỳr wrỳ nẽ mẽ kot amã mẽmoj jarẽnh ma nẽ mãmri axãmnhĩx ma mẽ hkõt mõi. Tanhmã ajamaxpêr to hkêt nẽ. Pa na pa awỳr mẽ kumẽ nhũm mẽ mõi. Anẽ.

²¹ Hãmri nhũm kuma nẽ mẽ hwỳr wrỳ nẽ mẽ omu nẽ mẽ kãm:

—Pa? Xà pa na ka mẽ ijapêr o mõi? E ot pa xa. Kam nẽ mẽ inhmã mẽmoj jarẽ pa mẽ ama. Mẽmo kaxyw na ka mẽ ixwỳr mõi? Anẽ.

²² Hãmri nhũm mẽ kãm:

—Nà mẽ inhõ patrãw Konẽre na awỳr mẽ inhmẽ pa mẽ mõi. Na hte tãm amnhĩ nhĩpêx o pa. Nẽ Tirtũm ã hpijaam nẽ kãm mex o mex ã harẽnh o pa. Nhũm mẽ inhõ krĩ kamã Ijaew kãm hkĩnh nẽ. Tã na Tirtũm kapêr o wrỳk xwỳnhja ham hwỳr wrỳ nẽ kãm ajarẽ. Kot amnhĩ wỳr atã karõ nhũm ate hwỳr amõr nẽ kãm axujarẽnh kaxyw kãm ajarẽnh

jakamã nhũm mẽ ixte ajaprôr kaxyw awỳr mẽ inhmẽ pa mẽ man awỳr mỗ. Anẽ.

²³ Hãmri nhũm mẽ kuma nẽ mẽ kãm:

—Tõe nà na pa mẽ ama. E mẽ agjê nẽ akrĩ nẽ jar mẽ ixri nỗ kê apkati pu mẽ rĩ ma akupỹm mỗ. Anẽ.

Hãmri nhũm mẽ kuma nẽ mẽ hwỳr agjê.

Tã nhũm apkati nhũm mẽ akupỹm nojarêr nhũm Simãw Pêtre ma mẽ hkôt mỗ. Nhũm Jope kamã mẽ kot Jesus kôt amnhĩ xunhwỳr xwỳnh kwỳjaja ma mẽ hkôt mỗ. Nhũm mẽ mỗr o kamàt.

²⁴ Hãmri nhũm apkati nhũm mẽ Sejarej wỳr hpôx o mỗ. Nhũm ra Konẽre mẽ kutêp amnhĩ wỳr hkwỳjê ho akuprô nhũm mẽ Simãw Pêtre kutêp ôrkwỹ kamã akuprô nẽ hkrĩ.

²⁵ Hãmri nhũm mẽ hwỳr pôj nẽ mẽ hwỳr àr kaxyw nhũm Konẽre amnhĩ wỳr omu nẽ kànhmã xa nẽ kutã tẽ nẽ hpar pê hkônkrã ho tẽm nẽ nhỹ.

²⁶ Hãmri nhũm tee ri ja hã omu nẽ pa hã kupy nẽ kànhmã ãm nẽ kãm:

—Kwa kànhmã xa. Ixpê Tĩrtũm kêt tã ka ri ã inhĩpêx anẽ. Anẽ.

²⁷ Hãmri nẽ hkôt ôrkwỹ hwỳr axà nẽ kutêp mẽ pikuprôn nh xwỳnhjê pumu nẽ mẽ kãm:

²⁸ —Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhỗ xwỳnhjê hkôt ri ixpa hkêt nẽ. Nẽ mẽ anhôrkwỹ hwỳr inhgjêx kêt nẽ. Tã ham Tĩrtũm inhmã mẽ ixte ã amnhĩ nhĩpêx anhỹr o ixpaja nẽ ixkurê nẽ inhmã: “Kot paj pam mẽ hkwỳjaja mex ã mẽ harẽ ka mẽ kamã anhôkre kahak kêt nẽ.”

²⁹ —Anhỹr jakamã ka xep pre ixtã karõ pa inhĩtôt kêt nẽ man mẽ awỳr inhmỗr kurê kumrêx. E mẽ

inhmã mẽmoj jarẽ pa mẽ ama. Mẽmo kaxyw na ka mẽ ixtã karõ? Anẽ.

³⁰ Hãmri nhũm Konẽre kãm:

—Nà jãã na pa pre jar inhõrkwỹ kamã Tĩrtũm mã amnhĩ jarẽnh o nhỹ. Ra myt xàpanh grire pa kãm amnhĩ jarẽ. Hãmri nhũm Tĩrtũm kapẽr o wrỹk xwỹnh ixwỳr wrỳ nẽ hirã rax kãm xa.

³¹ Hãmri nẽ inhmã: “Pa Konẽre? E na hte Tĩrtũm ate kãm amnhĩ jarẽnh ta mar o hkrĩ. Nẽ ate mẽ kęp amrakati xwỹnhjê ho mex o apaja nhũm hã apumu.

³² Jakamã e ma Jope hwỳr amã mẽ àpênh xwỹnh kwỳ rẽ kê mẽ ma hwỳr mõ nẽ kamã Simãw Pêtre japrõ nẽ man akupỹn awỳr o mõ. Mry kà ho mẽmoj nhĩpêx o pa xwỹnh Simãw nhõrkwỹ kamã na hte pa. Õrkwỹja gõ mỳ ri na.” Anẽ.

³³ —Ã kot inhmã kapẽr anhỹr jakamã na pa kuma hãmri nẽ awỳr jajê rẽnh kurê kumrêx. Tã ka mẽ hkõt man mẽ ixwỳr mõ nẽ ã apõx anẽ. ãm hãmri na ka mẽ hkõt mõ. Mẽ apê Ijaew kot amnhĩ nhĩpêx kuhpa hã amnhĩ nhĩpêx nẽ axãmnhĩx man mẽ ixwỳr mõ. Tã ot pa mẽ Tĩrtũm noo mã ixkrĩ. Kam nẽ mãmri ÿ hã mẽ inhmã mẽmoj jarẽ pa mẽ ama. Anẽ.

Simãw Pêtre kot Konẽre mã ujarẽnh

³⁴ Hãmri nhũm Simãw Pêtre Konẽre kot kãm amnhĩ jarẽnhja ma nẽ mẽ kãm awjarẽ nẽ mẽ kãm:

—Nà ãm hãmri na Tĩrtũm mẽ akukamã tanhmã inhmã kapẽr to. Xep kãm mẽ ixpê Ijaew pix japê hkêt. Kãm mẽ pahpiitã mẽ pajapê nẽ mẽ panhĩpêx o axpẽn pyræk.

³⁵ Koja ahpỹnhã pyka piitã hkõt mẽhõ mẽ ixpyrà nẽ kęp Ijaew kêt tãã hkõt amnhĩ xãm nẽ hã hpijaàm

pê kãm mex o mex ã harẽ nẽ tãm amnhĩ nhĩpêx. Hãmri nhũm Tĩrtũm ja hã omu nhũm ja kãm mex nẽ.

³⁶ —Na pre ra mẽ ixpê Ijaew mã tanhmã Kra Jejus Kris jarẽnh to. Jejus kot mẽ panê htyk kukwak ri na hte mẽ ixte hkôt amnhĩ xunhwỳr xwỳnhjê ho hkra. Tã ra mããnẽn ã mẽ apê Ijaew kêt xwỳnhjê mã ã amnhĩ jarẽnh anẽ nẽ Jejus htyk kukwak ri mẽ ate mẽ ixpyrà nẽ hkôt amnhĩ xunhwỳr xwỳnhjê ho hkra. Jakamã Jejus Krisja kêp mẽ pahpiitã mẽ panhõ Pahihtĩ.

³⁷⁻³⁸ —Mãn ka prem ra harẽnh ma. Mẽ ixpê Ijaew nhõ pika pê Jutej kumrêx kãm na pre Juãw Paxisja Jejus kukamã mẽ kãm harẽ nẽ mẽ hkrã kumrãr o pa. Mẽ piitã mẽ kot amnhĩ tomnuj kaga nẽ Tĩrtũm kôt amnhĩ xunhwỳr ã mẽ omunh xà hkôt mẽ hkrã kumrã. Jejusja krĩ pê Najare kamã na pre hprêk. Tã hwỳr na pre Tĩrtũm amnhĩ Karõ mẽ nhũm wrỳ nẽ hkarõ mã axà nẽ hkôt pa ho pa. Jakamã nhũm àhpumunh o àhpumunh nẽ ma krĩ piitã hkôt tanhmã mẽ ho mex to ho ri mẽ hkôt pa. Pika pê Garirej kumrêx kamã mẽ piitã ri mẽ kãm Tĩrtũm kapêr jarẽnh o pa. Nẽ mẽkarõmnuti kot Satanasti nhỹ hã tanhmã mẽ ho xwỳnhjaja nhũm mẽ nê mẽkarõmnuti japôx o pa. ã na pre Tĩrtũm nhỹ hã amnhĩ nhĩpêx anhỹr o pa.

³⁹ —Tã Jejus nhỹ hã hkrajê jahkre ho mẽ ixpa xwỳnhjaja na pa prem kot ri tanhmã amnhĩ to ho pa hã omunh par o ri hkôt ixpa. Mẽ ixpê Ijaew nhõ pyka kamã nẽ mẽ inhõ krĩ pê Jerujarê kamã kot ri tanhmã amnhĩ nhĩpêx to ho paja pa prem piitã omunh o hkôt ri ixpa. Tã nhũm prem axtem nẽ mẽ ixpê pĩ kahpa hã kunhõ nẽ kupĩ.

⁴⁰ Hāmri nhūm htyk o apkati axkrunēpxi nhūm Tirtūm akupỹm ho htīr nē akupỹm mē ixwỳr kumē pa prem akupỹm htīr kām omu.

⁴¹ No nhūm mē piitā akupỹm htīr kām omunh kēt nē. Ām mē ixwỳr pix na pre kato nē mē ixkutā apku pa mē papxipixjaja akupỹm htīr ā omu. Hāmri nhūm Tirtūm mē ixte ma mē piitā mē kām akupỹm htīr ā harēnh o ri ixpa kaxyw mē ixrē.

⁴²⁻⁴³ Amnepēm Tirtūm nhỹ hā kapēr jarēnh o mē pa xwỳnhjaja na prem Jejus kukamā tanhmā hā kagà hto nē mē kām harēnh o pa. Nē mē kām:

Koja nhỹrmā mēhōja man mē pahwỳr wrỳ nē mē panē tanhmā amnhī nhīpêx to. Ka mē atō amnhī kaxyw hkôt ajamaxpēr nē hkôt amnhī xām hā koja Tirtūm ja hā apumu nē mēhō kot tanhmā mē panē amnhī nhīpêx to xwỳnhhta kukwak ri amnhī katut kôt ate amnhī tomnuj rēnh pa nē axte kām hamaxpēr kēt nē. Anē.

Na pre Tirtūm nhỹ hā kapēr jarēnh o mē pa xwỳnhjaja Jejus kukamā ā harēnh nē hā kagà anē. Tā koja Jejus nhỹrmā akupỹn wrỳ hāmri nē mē htyk xwỳnhjê nē arī mē htīr xwỳnhjê mē pahto pim-ràatā tanhmā mē pajarēnh to. Mē pahte tanhmā amnhī nhīpêx to ho papa hā mē pahpumunh kôt tanhmā mē pajarēnh to. Hāmri nē Tirtūm mē wa kuri mē pahtīr tūm nē mē papa ho papa mā xwỳnhjê jarē nē määnēn wa kuri mē htīr tūm kēt xwỳnhjê jarē. Mē pahpiitā tanhmā mē pajarēnh to kaxyw na pre Tirtūm mē pakaxyw Jejus xām. Tā ā kot mē pajarēnh anhỹrja kukamā na pre mē ixte mē amā tanhmā harēnh to ho ixpa kaxyw mē

awỳr mẽ ixrẽ. Mẽ ate kapêr mar nẽ tokyx Jejus kôt amnhĩ xunhwỳr kaxyw. Anẽ.

⁴⁴ Nhũm Simãw Pêtre ã mẽ kãm ujarênh anhỳr rôm nhũm Tĩrtũm mẽ kot mar o hkrĩ xwỳnhjê hwỳr amnhĩ Karõ rẽ nhũm mẽ hwỳr wrỳ nẽ mẽ hkarõ mã gjêx pa.

⁴⁵⁻⁴⁶ Hãmri nhũm mẽ Tĩrtũm mã mex o mex ã harênh o hkrĩ. No ãm mẽ kapêr kãm harênh kêt nẽ. Mẽ kapêr kwỳ hõ ho kãm mex o mex ã harẽ. Aa mẽ kot mẽ kapêr mar kêt tã ra ho kapêr mex nẽ. Jakamã nhũm Jope rũm mẽ kot Simãw Pêtre hkôt mẽ mõi xwỳnhjaja. Ijaew kwỳ kot ra Jejus kôt amnhĩ xunhwỳr xwỳnhjaja amnhĩ jaêr pẽ ja hã mẽ omu nẽ axpẽn mã:

—Hêxta waa nẽ. Mẽ kêp Ijaew kêt tã nhũm Tĩrtũm kot mẽ panhĩpêx pahpyrà nẽ mẽ hwỳr amnhĩ Karõ rẽ nhũm mẽ hwỳr wrỳ nẽ mẽ kãm agjê. Nà ãm hãmri na mẽ pahpyrà nẽ ã mẽ hipêx anẽ. Anẽ.

Hãmri nhũm Simãw Pêtre mẽ kuma nẽ mẽ kãm:

⁴⁷ —Kwa pu mẽ hkrã kumrãr kurê kumrêx. Ra Tĩrtũm Karõ kot mẽ pahpyrà nẽ mẽ hkarõ mã gjêx kênã kot kêt mễhõ mẽ nê tanhmã mẽ pahpê àmnàr to. Ra mẽ kot mẽ pahpyrà nẽ Jejus kôt amnhĩ xunhwỳr kênã. Anẽ.

⁴⁸ Hãmri nẽ Konêre mẽ hkwỳjê mã kãm:

—E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anẽ.

Hãmri nẽ mẽ hkrã kumrãr pa nhũm mẽ Simãw Pêtre mã kãm:

—Kwa kormã anojarêt kêt nẽ. Kritpêm ri mẽ ixkôt ri apa hã atã apkati grêre nẽ kormã ma akupỹm mõi. Anẽ.

Hāmri nhũm mẽ kuma nẽ mẽ hkôt ri pa hã apkati grêre hāmri nẽ nojarêr nẽ ma akupỹm mỗ.

11

Simãw Pêtre kot hkwỳjê mã Konêre jarênh

Atre 10.1-48

¹⁻² Hāmri nhũm Simãw Pêtre ma akupỹm mỗ. Jutej kamã krĩ pê Jerujarê wỳr ma akupỹm mỗ hāmri nẽ pỏj. Hāmri nhũm Jutej kamã Jejus nhỹ hã mẽ ahkre xwỳnh maatijê mẽ mẽ kot Jejus kôt amnhĩ xunhwỳr xwỳnhjaja Ijaew kêt xwỳnhjê jarênh ma. Konêre mẽ hkwỳ kot mẽ uràk nẽ Jejus kôt amnhĩ xunhwỳr ã mẽ harênh ma. Jakamã nhũm Simãw Pêtre akupỹm mẽ hwỳr pỏj nhũm mẽ omu nẽ mẽ hã àhkukjêr kurê kumrêx. Hāmri nhũm mẽ hkwỳjaja mẽ hã kãm akir nẽ kãm:

³ –Kwa mẽ pahpê Ijaew pyrà nẽ mẽ kot amnhĩ my kwrỳt kà jakàr kêt tã ka mẽmo hwỳr mẽ hwỳr mỗ mẽ kuri pỏj nẽ mẽ kutã apku. Anê.

⁴ Hāmri nhũm Pêtre tee ri mẽ kuma hāmri nẽ hprĩ hã mẽ kãm amnhĩ jarê. Nẽ tanhmã Tĩrtũm kot kãm Ijaew kêt xwỳnhjê jarênh to hã mẽ kãm harê nẽ mẽ kãm:

⁵ –Kwa mẽ ã ri ajamaxpêr anhỳr kêt nẽ. E pa mẽ amã amnhĩ jarê ka mẽ inhma mãn. Nà na pa pre jãã Jope kamã Tĩrtũm mã amnhĩ jarênh o nhỹ nẽ te ixpimtir kãm mẽmoj pumunh pyràk. Nhũm mẽmojja te mẽ hpiro xà pyrà nẽ kaxkwa rũm ixwỳr wrỳk o mỗ pa ixprĩ hã omu.

⁶ Nhũm kamã mry piitãã. Mry xoprê nẽ mry xuwapô nẽ mry hpar o ri pa xwỳnhjaja nẽ mry htu mỳr pê ri pa xwỳnhjaja nẽ àk. Nẽ mẽ pahte hkur xwỳnhjaja nẽ mẽ pahte hkur kêt xwỳnhjaja.

⁷ Kamã mry piitã pa omu. Hãmri nhũm Tĩrtũm inhmã: “Pa Simãw Pêtre? Mãn ka ra amã prãm nẽ nà? E kànhmã xa nẽ axàmnhĩx mãmri mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex.” Anẽ.

⁸ —Pa tee ri kuma nẽ kãm: “Kwa Pahi Maati. Mẽ ixpê Ijaewjaja mẽ ixte mryja piitã hkur kêt. Âm hkwỳ hpix na pa htem kuku. No ja hkwỳ aa mẽ ixte hõ hkwỳ hkrêr kêt.” Anẽ.

⁹ Nhũm inhmã: “Nà nom kot anhÿr tãã. Kot paj pam amã mẽmoj jarẽ ka kamã anhõkre kahak kêt nẽ. Jakamã e mãmri amnhĩm hõ kapi nẽ apĩ nẽ ho anẽ nẽ axàmnhĩx hkwỳ hkrẽ.” Anẽ.

¹⁰ —Na pre ã Ijaew kêt xwÿnhjê hwÿr inhmõr kukamã inhmã karõ ho axkrunẽpxi anẽ. Nom hã kuxi nẽ inhmã mẽ pahte mry kur kêeta jarẽ. Hãmri nhũm mẽ hpipro xàja ma akupÿm kaxkwa hwÿr api nẽ kakrãm axà nẽ akunok.

¹¹ Hãmri nhũm Ijaew kêt xwÿnhjaja mẽ ixwÿr axkrunẽpxi nẽ mra nẽ pøj. Konẽreja Sejarej rùm ixwÿr mẽ rênh xwÿnhjaja nhũm mẽ mra nẽ ixwÿr pøj.

¹² Hãmri nhũm Tĩrtũm Karõ ma mẽ hkõt inhmẽ. Mẽ kệp Ijaew kêt tã nhũm ixàmnhĩx ma mẽ hkõt ixpa kaxyw mẽ hkõt inhmẽ pa ma mẽ hkõt mõ. Nhũm Jope kamã mẽ kot Jejus kõt amnhĩ xunhwÿr xwÿnh kwÿjaja kệp 6ja ma mẽ ixkõt mõ. Pa mẽ mõ nẽ Sejarej kamã Konẽreja wÿr pøj.

¹³ Hãmri nhũm mẽ ixpumu nẽ mẽ inhmã amnhĩ jarẽ. Tĩrtũm kapêr o wrÿk xwÿnh kot hwÿr wrÿk nẽ õrkwÿ hwÿr àr nẽ tanhmã kãm kapêr toja nhũm inhmã harẽ. Na xep pre kãm: “E kêr ka ma Jope hwÿr amã mẽ àpênh xwÿnh kwÿjê rẽ kê mẽ

ma hwÿr mō. Hāmri nē kamã Simãw Pêtre japrô nē man akupÿn awÿr o mō kê tanhmã mē amã ujarēnh to.

¹⁴ Koja mē amã tanhmã mē apê Tirtûm kra hprãm xaj tanhmã mē ate amnhĩ nhĩpêx to hã mē amã karô ka mē ama nē mar tÿx nē hkôt amnhĩ nhĩpêx. Ka mē anhörkwÿ kamã akwÿjê mē apimràatã ama nē mar tÿx nē. Hāmri nē kot mē amã hã karô xà hkôt amnhĩ nhĩpêx nhũm Jejus mē ate amnhĩ tomnuj pê mē apytãr pa.” Anē.

—Na xep pre ã Tirtûm kapêr o wrÿk xwÿnhja kãm ijarēnh anē. Jakamã nhũm ixwÿr jajê rē pa ma mē hkôt mō.

¹⁵ Hāmri nē kormã mē kãm tanhmã Jejus jarēnh to. Tanhmã kot mē panê amnhĩ nhĩpêx to hã harê. Nē kormã mē kãm ixujarēnh o ixãm rôm nhũm Tirtûm Karô te wam kot mē panhĩpêxta pyrã nē mē hwÿr wrÿ nē mē hkarô mã gjêx pa.

¹⁶ Pa ja hã mē omu nē Pahihti Jejus kot akupÿm kaxkwa hwÿr nojarêt nē tanhmã mē pamã kapêr tota mã ijamxpêr kurê kumrêx. Na pre mē pamã: “Finat Juãw Paxis na pre hte gô ho mē hkrã kumrãr o pa. Tã koja Tirtûm ta hpãnhã mē awÿr amnhĩ Karô rē nhũm mē akarô mã agjê.” Anē.

—Ã na pre Pahihti Jejus akupÿm nojarêt nē mē pamã kapêr anē. Jakamã pa ã kot mē hipêx anhÿr ã mē omu nē ã kapêr anhÿrja mã ijamxpêr kurê kumrêx.

¹⁷ Na pu prem Pahihti Jejus Kris kôt amnhĩ xunhwÿ nhũm Tirtûm ja hã mē pahpumu nē mē pahwÿr amnhĩ Karô rē. Tã te kot mē panhĩpêxta pyrã nē mããnēn Ijaew kêt xwÿnhtajê hwÿr kurê nhũm mē hkarô mã agjê. Mē kêp Ijaew kêt tã nhũm

mẽ pahpyrà nẽ mẽ hwỳr kurẽ nhũm mẽ hkarõ mã agjê. Tĩrtũm tãm kot amnhĩ krã hkôt mẽ hwỳr rãnh kẽnã kot pa kêt mẽ nê tanhmã kệp ixàmnr to. Anẽ.

¹⁸ Nhũm pre ã Simãw Pêtre mẽ kãm amnhĩ jarênh anẽ nhũm mẽ kuma nẽ tãm hamaxpêr nẽ hkĩnh nẽ. Nẽ axte mẽ hã tanhmã kãm nẽ hkêt nẽ. ãm mẽ hã Tĩrtũm mã mex o mex ã harê. Hãmri nẽ axpên mã:

—Nà ãm hãmri. Mẽ kệp Ijaew kêt tã na prem Jejus kôt amnhĩ xunhwỳ nhũm Tĩrtũm kot mẽ panhĩpêxta pyrà nẽ amnhĩ katut kôt mẽ kot amnhĩ tomnuj rãnh pa. Nhỹrmã wa hkuri mẽ pahpyrà nẽ htĩr tũm nẽ pa ho pa kaxyw nhũm ã mẽ hipêx anẽ. Nà ãm hãmri na ã kot mẽ panhĩpêx pyrà nẽ mẽ hipêx anẽ. Anẽ.

ãxiok kamã Jejus kwỳ jarênh

Atre 4.36-37

¹⁹ Tã ra mẽ kot kẽn o Estewãw kapêr o hpĩr xwỳj ri mẽ kot ã hipêx anhỹrta pyrà nẽ mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỹnhã krĩ hkwỳ hkôt pigrãnh pa. Wẽnĩs wỳr nẽ Sipre hwỳr nẽ ãxiok hwỳr nhũm mẽ ma ahpỹnhã krĩ hkwỳ hkôt anhgrà nẽ kamã pa ho pa. Nẽ mẽ kãm tanhmã Pahihti Jejus kot mẽ panê amnhĩ nhĩpêx to hã harênh o ri mẽ hkôt pa. No ãm kormã Ijaew pix mã harênh o pa.

²⁰ Tã hãmri nhũm mẽ hkwỳjaja Sipre mẽ Sirên rũm ãxiok hwỳr pan pøj. Hãmri nẽ kamã mẽ kệp Ijaew kêt xwỳnhjê mã Pahihti Jejus kot amnhĩ nhĩpêx jarênh o pa. ã mẽ kot amnhĩ nhĩpêx anhỹr jakamã na mẽ ra ahpỹnhã ri mẽ kãm harênh o ri pa. Ijaew mã nẽ mããnẽn Ijaew kêt xwỳnhjê mã

21 nhũm mẽ ma mẽ hkôt ri Pahihti Jejus nhỹ hã mẽ kãm kapêr jarênh o ri mẽ hkôt pa. Hãmri nhũm mẽ ohtô nê amnhĩ nhĩpêx tũm kaga hpa nê hpãnhã amnhĩ kaxyw Jejus kôt hamaxpêr nê hkôt amnhĩ xunhwỳ.

22 Hãmri nhũm Jerujarê kamã Jejus kwỳjaja mẽ harênh ma nê mẽ hwỳr Panãpe mẽ. Āxiok hwỳr mẽ hwỳr kumẽ. Ma mẽ hwỳr mōr nê Jejus kôt mẽ hamaxpêr o hihtỳx kaxyw.

23 Hãmri nhũm ma mẽ hwỳr mō nê mẽ hwỳr pōj nê mẽ omu. Tĩrtũm kot mẽ ho mex ã mẽ omu hãmri nê mẽ ỹ hã hkĩnh nê. Nê mẽ kãm:

—Nà ãm hãmri na ka mẽ ra Jejus kôt amnhĩ xunhwỳ nê hkôt amnhĩ nhĩpêx mex o ri apa. Tã kêr ka mẽ ãm kapêr kôt pix mã ri amnhĩ nhĩpêx rãhã ho ri apa nê aa hkaga hkêt nê. Anê.

24 Panãpeja na pre tãm amnhĩ nhĩpêx o pa. Nê amnhĩ kaxyw Jejus kôt pix mã hamaxpêr mex o pa. Nê Tĩrtũm Karō hkôt amnhĩ nhĩpêx rãhã jakamã na pre hte ỹ hã mẽ kãm Pahihti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nê ohtô nê Jejus kôt amnhĩ xunhwỳ.

25 Tã nhũm Panãpe ãxiok rũm kato nê kot Sawti japrôr kaxyw ma krĩ pê Tas hwỳr mō.

26 Hãmri nê hwỳr pōj nê Sawti pumu nê haprô nê ma akupỹm amnhĩ kôt ãxiok hwỳr o mō. Hãmri nê kamã mẽ kot Jejus kôt amnhĩ xunhwỳr xwỳnhjê hkôt wa ri pa hã amgrà pyxi nê hapêx. Nê mẽ ho ohtô nê ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhõ xwỳnhjaja mẽ kot Jejus kôt amnhĩ nhĩpêx xwỳnhjê pumu nê mẽ hã

mê hixi rē nē mê harēnh o: “Kris tō nē htōxjaja” anhÿr o mê harē. Āxiok kumrēx kām na prem ā mê kot Jejus kôt amnhĩ xunhwÿr xwÿnhjê jarēnh anē. Jakamā nhūm mê piitā ā mê harēnh anhÿr o pa.

²⁷ Tā nhūm Panāpe mê Sawti wa kormā āxiok kamā paja rôm nhūm Tirtūm nhÿ hā kapēr jarēnh xwÿnh kwÿjaja mê hwÿr mran pōj. Jerujarē rūm mê hwÿr mran pōj.

²⁸ Hāmri nhūm mê piitā mê kot mê kapēr mar kaxyw mê hwÿr akuprō. Jakamā nhūm hō pê Akapōja kànhmā xa nē tanhmā mê kām ujarēnh to. Tirtūm Karō nhÿ hā mēmoj kukamā mê kām awjarē nē mê kām:

—Kwa okora kêr ka mê axkām ajamak rom. Koj tokyx pika piitā hkôt mê apkur xà hā mēōja mê kēp hkryre nē mê piitā mê hipêx kêr nē. Anē.

Tā nhūm gaa nē ujarēnh xàja kôt mēmoj ā amnhĩ nhĩpêx anē. Kormā Pahihti Krawti kot mê ho amnhĩptār ri nhūm mēmoj ā amnhĩ nhĩpêx anē. No nhūm kormā ā amnhĩ nhĩpêx anhÿr kêr ri nhūm Akapōja kukamā ā mê kām ujarēnh anē.

²⁹ Hāmri nhūm mê kuma nē tee ri Jutej kamā Jejus kôt mê hkwÿjê hkukamā hamaxpēr nē axpēn mā:

—E kwa pu mê Jutej kamā Jejus kôt mê pahtō nē pahtōxjê mā pahkàxpore hkwÿ gō kê mê ho amnhĩm awjaprō nē hkur o pa. Anē.

Hāmri nē mê kaxyw kàxpore hkwÿ ho akuprō. Nhūm mê hikàxpore hkryre xwÿnhjaja ām mê kām ho hkryre nē kugō nhūm mê hikàxpore rūnh xwÿnhja mê kām ho rūnh nē kugō.

³⁰ Jakamā nhūm mê ho hpikuprōnh pa nē Panāpe mê Sawti wa kot mê hwÿr o mōr nē mê kām

õr kaxyw wa kãm kugõ. Hãmri nhũm wa hamy nẽ ma Jutej kamã Jerujarẽ hwỳr mẽ hwỳr o mõ. Hãmri nẽ hwỳr pøj nẽ mẽ kot Jejus kapẽr o mẽ ahkre xwỳnhjê mã kugõ. Hãmri nhũm mẽ kãm Jejus kõt mẽ htõ nẽ htõxjê mã o anhgrà nhũm mẽ hamy nẽ hkĩnh nẽ ho amnhĩm awjaprõ.

12

Mẽ kot Simãw Pêtre pynênh nẽ haxàr ã mẽ harênh Matêwre 18.19-20

¹ Tã nhũm mẽ õ pahi Eroxa õ pôristi mã Kris kwỳjê hã amỳnê nhũm mẽ mẽ hipêx kati nẽ nhũm mẽ amnhĩ xà htỳx kamã hamak o pa.

² Juãw tõ Xiakreja nhũm mẽ pahi Erox nhỹ hã unê nẽ hkanhwỳr o kupĩ.

³ Hãmri nhũm Ijaew kãm ja mex jakamã nhũm pahi Erox hpãnhã mẽ kãm Simãw Pêtre hã amỳnê nhũm unê nẽ haxà. Mẽ kot pãwti kaxkrit kêt kur ã mẽ hkĩnh xà hã arĩgro pẽ Pasja ã nhũm prem unê.

⁴ Na pre Erox Simãw Pêtre hkukamã hamaxpẽr o:

—Nà koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anẽ.

Hãmri nhũm pôristi kot Simãw Pêtre jamãr xwỳnhjaja kệp 16. Nhũm mẽ axpẽn pãnhã kệp 4 kapẽn nẽ hamãr rãhã ho kuhê.

⁵ Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kõt htõ nẽ htõxjaja harênh ma nẽ tee ri hkukamã hamaxpẽr hãmri nẽ axpẽn wỳr akuprõ nẽ ho Tĩrtũm wỳr rãhã ho hkrĩ.

Tĩrtũm kapẽr o wrỳk xwỳnh kot Simãw Pêtre kator ã harênh

6 Tã nhũm ra mẽ hkĩnh hapêx nhũm kamàt. Hãmri nhũm pahi Erox kot tanhmã Simãw Pêtre ho xà hã arĩgroja wỳr nhũm kamàt nhũm pôristijaja arĩ mẽ hagjênh xà kamã hamãr mex o kuhê. Nhũm kuri wa hamêxkrut nê akutã hijê nê hamãr o nõ. Kàx o akutã kãm ê nê wa ho nõ nhũm wa hkaêx kãm htỳx gôr nê nõ. Nhũm ja wa hakwa krem mããnênh hamãr o xa.

7 Puh nhũm Tĩrtũm kapêr o wrỳk xwỳnhjê hõja mẽ hwỳr axà nê wrỳhtak rax kãm xa. Hãmri nê Simãw Pêtre grêk nê kumra nê kãm:

—Pa Simãw Pêtre? E kwa tokyj kànhmã xa pu mỗ. Anê.

Hãmri nhũm hkrākato nê omu nê kànhmã ãm kurê kumrêx nhũm kaxprexà hã kàxja axrê nê pykaprôrôk nê hikwỹ. No nhũm kuri pôristi wa nờr xwỳnhta wa mar kêt nê. Wa arĩ ôt tỳx nê nõ.

8 Hãmri nhũm Tĩrtũm kapêr o wrỳk xwỳnhja Simãw Pêtre mã:

—E tokyx anhõ kamĩs jaxà nê amnê ixkôt tẽ pu pakato nê ma tẽ. Anê.

9 Hãmri nhũm kamĩs nê hparkà jaxà nê ma hkôt tẽ. No ãm kormã amnhĩ pumunh mex kêt nê. Te hpimtir kãm ã kot amnhĩ nhĩpêx anhỹr pyrak ã amnhĩ kamnhĩx.

10 Hãmri nhũm wa hakwakrem pôristi wa kot hamãr o wa ãm xwỳnhja hãnh wa tẽ nê wa hakre nê hpãnhã ihõja wa hãnh wa tẽ no nhũm mẽ ôt tỳx nê hkrĩ nê wa omunh kêt nê. Nhũm wa hakwakre nhĩtep xà hkôt wa tẽn kato nê hpãnhã krĩ nê kahê xà hã hakwakreja wỳr wa tẽ. Hãmri nhũm tãm wa kãm amnhĩ kahê xà mẽ nhũm wa kato nê pry hã tẽ. Ja kôt nhũm Tĩrtũm kapêr o wrỳk xwỳnhja akunok nhũm Simãw Pêtre axte omunh kêt nê.

11 Hāmri nē hprĩ hã amnhĩ pumunh kurê kumrêx nē hamaxpêr o:

—Kwa te ixpimtir kãm ã ixte amnhĩ nhĩpêx anhÿr pyræk tâ xep ixpimtir kêt. Tĩrtũm na ixwÿr kapêr o wrÿk xwÿnhja mẽ nhũm ixwÿr wrÿ nē mẽ kêp ixkator. Pahi Erox ra kot ixpĩr nhũm ixkwÿ Ijaew kãm ja prãm tâ nhũm mẽ kêp ixkator. Nà ãm hāmri na Tĩrtũm ã mẽ kêp ixkator anê. Anê.

12 Hāmri nē Marir nhõrkwÿ hwÿr htêm kurê kumrêx. Juãw Makre katorxà Marirja nhũm õrkwÿ hwÿr tẽ nhũm mẽ ra kamã hpikuprõnh rax nē ho Tĩrtũm wÿr o hkrĩ nhũm tãm mẽ hwÿr tẽ.

13 Hāmri nē kormã kapôt ã hakwa krem mẽ kãm kahê xà tatak o xa nhũm ixkre kamã mẽ kãm ãpênh xwÿnh Rotreja kuma nē hwÿr tẽ.

14 Hāmri nhũm kãm kapêr nhũm amnhĩ jaêr pê kuma nē hkĩnh nē. Nē kormã kãm kahê xà mẽnh kêt ri ma akupÿm tẽ nē mẽ kot ho Tĩrtũm wÿr xwÿnhjê hwÿr axà nē mẽ kãm:

—Xê pêr Simãw Pêtre na tẽ nē kapôt ã hakwakrem xa nē inhmã kapêr.

15 Hāmri nhũm mẽ tee ri kuma nē kãm:

—Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atÿx ã akapêr anê. Anê.

Hāmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hāmri na pa mẽ amã harê. Mẽ kam nē mra nē omu. Anê.

Nom nhũm mẽ kuma nē ãm kuma nē kãm:

—Nà tãm kêt. Kaxkwa rũm Tĩrtũm mã hamãr o pa xwÿnh mãm amã kapêr nom tãm kêt. Anê.

16 Rôm nhũm Simãw Pêtre arĩ hakwakre tatak o xa. Hãmri nhũm mẽ jatã hwỳr mra nẽ kãm kahê xà mẽ nẽ amnhĩ jaêr pé omu nẽ hkĩnh nẽ.

17 Hãmri nhũm kànhmã mẽ kãm ìhkra hpê nẽ mẽ ho hpinhkrênh pa nẽ mẽ kãm:

—Nà Tirtũm na ixwỳr kapêr o wryk xwỳnhja mẽ nhũm ixwỳr wry nẽ pôristi pé ixkator. Anẽ.

Hãmri nẽ mẽ kãm:

—E kêr ka mẽ Xiakre nẽ Jejus kôt mẽ pahtõ nẽ pahtõxjê mã ijarê kê mẽ ijarênh mar kurê kumrêx. Nom kot paj ixkato nẽ ma krĩ hõ hwỳr mõ. Anẽ.

Hãmri nẽ mẽ kêp kato nẽ ma mõ.

18 Tã nhũm apkati nhũm pôristi kot hamãr o hkrĩ xwỳnhjaja hkrã hapôj nẽ tee hapêr nẽ nhỹri omunh kêt nẽ. Hãmri nẽ tee ri amnhĩ kukamã hamaxpêr o kãm ma htỳx kumrêx nẽ axpên mã:

—Kwa tanhmã na pre we amnhĩ to nẽ mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anẽ.

19 Hãmri nhũm pahi Erox hpikunor ã harênh ma nẽ axtem pôristi hkwyjê mã anẽ nhũm mẽ mra nẽ tee ri mẽ hagjênh xà kamã hapêr nom nhỹri omunh kêt nẽ. Hãmri nhũm Erox mẽ kot hamãr xwỳnhjê kamã gryk tỳx kumrêx nẽ amnhĩ wỳr mẽ hã karõ nẽ mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nẽ akunok. Nà kot paj mẽ anhĩmex ka mẽ rĩ amnhĩ pumu. Anẽ.

Hãmri nhũm mẽ tee ri kãm amnhĩ tã àprãr kaprỳ nhũm mẽ hã amỹnê nhũm mẽ ho kator nẽ ma mẽ o mra nẽ mẽ himex. Hãmri nhũm pahi Erox Jutej rũm kato nẽ ma Sejarej wỳr mõ nẽ hpãnhã kamã pa ho pa.

Pahi Erox tanhmã htyk to hã harënh

Wam Pêtre 1.24-25

²⁰ Krĩ pê Xir mẽ Sito wa kamã mẽ pa xwýnhjaja na pre htem pahi Erox nhõ pyka hwýr pa nẽ mẽ kêp amnhĩm apkur xà hã mẽõ japrôr o pa. Tã nhũm Erox kot mẽmoj mýrapê mẽ kamã gryk jakamã nhũm mẽ tee ri mẽ kêp ujaprôr kaxyw mẽ hwýr mra nom nhũm mẽ kãm mẽmoj kwý ho wënë hkêt nẽ. Hãmri nhũm mẽ tee ri amnhĩ kukamã hamaxpër nẽ pahi Erox nhõ kôwenatô Pratôja wýr mra nẽ kãm:

—E awýr na pa mẽ mra. Kwa mẽ ixyr pê pahi Erox mã tanhmã akapër to kê ama nẽ mẽ ixkamã gryk kêt nẽ. Pa mẽ axte mẽ awýr mra nẽ mẽ apê mẽmoj kwý japrôr o ri ixpa. Anẽ.

²¹ Hãmri nhũm mẽ kuma nẽ hwýr tẽ nẽ mẽ yr pê tanhmã kãm kapër to nhũm kuma hãmri nẽ kot tanhmã mẽ kãm kapër to kaxyw mẽ kãm arĩgro hta.

Tã nhũm ra kot arĩgro hyr xwýnhta kato nhũm Erox kêp pahi hã ê mex jaxà nẽ tẽ nẽ kêp pahi hã mẽ hkrĩ xà kamã nhỹ nẽ tanhmã mẽ kãm kapër to.

²² Mẽ kãm kapër ryy nẽ. Hãmri nhũm mẽ kuma nẽ hêx rom kãm mex o mex ã harẽ. Nẽ kýt pêê axpën mã harẽ nẽ harënh o:

—Kwa pahi Erox kêp mẽ panhĩõ hkêt. Për kaxkwa rũm Mëpahpãm na pre mẽ pahwýr wrý nẽ ã mẽ pamã kapër mex anẽ. Anẽ.

Hãmri nẽ te kêp Tĩrtũm pyræk o hipêx nẽ kãm mex o mex ã harẽ. Nom hêx rom ã harënh anẽ. Kot mẽ mar nẽ kãm mẽ hkĩnh nẽ akupým mẽ kãm mẽmoj to wënë hprãm xàj nhũm mẽ hêx rom ã axpën mã mex ã harënh anẽ.

23 Hāmri nhũm mẽ kuma nhũm ja kām mex nẽ nhũm hkĩnh nẽ mẽ mar o nhỹ nẽ kệp Tĩrtũm pyræk ã harẽnhja nẽ tanhmã mẽ kām nẽ hkêt nẽ. Jakamã nhũm tee ri amnhĩ tã omu nẽ hwỳr kapêr o wrỳk xwỳnhjê hõ mẽ nhũm hwỳr wrỳ nẽ tanhmã ho nhũm õhy kamã kutõj rax nẽ htyk tokyx anẽ.

Panãpe mẽ Sawti wa akupỹm ãxiok hwỳr mõi ã wa harẽnh

Atre 11.27-30

24 Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã harẽnh ma nẽ hkôt amnhĩ xunhwỳ.

25 Hāmri nhũm Panãpe mẽ Sawti wa ra Kris kôt htõ nẽ htõxjê mã kàxporeta jamỳ nẽ ma Jerujarẽ hwỳr o mõi nẽ mẽ kām kugõ. Hāmri nẽ ma akupỹm ãxiok hwỳr nojarêt nẽ war amnhĩ kôt Juãw Makre o mõi. Hāmri nẽ mẽ ma mõi nẽ akupỹm mẽ hwỳr pøj.

13

Tĩrtũm kot Panãpe mẽ Sawti wa hyr

Atre 9.15-16; Rõmãn 1.1

1 ãxiok kamã Kris kôt mẽ kot axpẽn to htõjaja kot Tĩrtũm nhỹ hã kapêr o mẽ ahkre ho pa xwỳnhjê nhĩxi ã kot anhỹr. Na pre Panãpe nẽ Sawti nẽ Simeãw kà htykre nẽ Rusti pê Sirẽn nhõ xwỳnh nẽ pahi Erox kràmnhwỳ Mãnahẽja.

2 Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harẽnh kaxyw apkur kêt rãhã kām amnhĩ jarẽnh o hkrĩ. Hāmri nhũm Tĩrtũm Karõ mẽ kām tanhmã kapêr o amnhĩrĩt to nẽ mẽ kām:

—E kêr ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hãmri nhũm mẽ kuma nẽ wa hyr kurê kumrẽx nẽ wa himõk ã mẽ ãhkra jaxwỳ nẽ wa ho Tĩrtũm wỳ. Hãmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mẽ.

*Wajaga kot Jejus nẽ hkràmnhwỳ kurê hã harẽnh
Atre 8.9-24*

⁴⁻⁵ Tã nhũm Tĩrtũm Karõ krĩ pê Serêw wỳr Panãpe mẽ Sawti wa kumẽ nhũm wa ma hwỳr mẽ. Nẽ amnhĩ kõt Juãw Makre ho mẽ. Kot tanhmã wa ho ajuta hto ho wa hkõt pa kaxyw. Hãmri nẽ wa mẽ mẽ Serêw wỳr pøj nẽ pàr krem axà nẽ ma gô hipòk pê Sipre hwỳr mẽ. Hãmri nẽ gô hipòk ã krĩ pê Saramĩn wỳr pøj nẽ Ijaew nhõ Tĩrtũm kapêr o mẽ ahkre xà hã ixkre hwỳr tẽ nẽ kamã Jejus kot mẽ panê tanhmã amnhĩ nhĩpêx to hã mẽ kãm harẽnh o wa xa.

⁶⁻⁸ Tã nhũm mẽ krĩja rũm kato nẽ hpãnhã gô hipòk kõt mẽ nẽ hatur xà kamã krĩ pê Papos wỳr pøj. Hãmri nẽ kamã wajaga Pajejus pumu. Gresjê kapêr kãm hixi pê Erĩm. Erĩm haxwỳja kêp Ijaew. Na pre hte hêx rom te kêp Tĩrtũm nhỹ hã kapêr jarẽnh o pa xwỳnh pyrãk o amnhĩ nhĩpêx nẽ ma mẽ kãm ujarẽnh o ri mẽ hkõt pa. No ãm mẽ kãm amnhĩ to hêx o pa. Gô hipòkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mẽ Sawti wa harẽnh ma nẽ kãm wa kapêr mar prãm nẽ wa kot kãm Tĩrtũm kapêr jarẽnh kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkĩnh kêt nẽ wa nẽ kãm kapêr kãm hihtỳx nẽ kãm:

—Kwa nà wa kapër mar kêt nê. Kot kaj war ama nê wa uràk nê amnhĩ kaxyw Jejus kôt ajamaxpër nê hkôt amnhĩ xãm. Kwarĩ wa kapër mar kêt nê. Anê.

⁹ Hãmri nhũm Sawti ra axtem pãnhã hixi. Ra hpãnhã kêp Pawre. Nhũm Tĩrtũm Karõ ra hkarõ mã àr jakamã nhũm ÿ hã wajagata pumu nê wa nê hkràmnhwỳ mã kapër ã kãm akir nê kãm:

¹⁰ —Tk. Kwa për apê Satanasti hkwy hã na ka ã wa inhnê kãm akapër anê. Na ka hte mẽmoj punuj pix kukamã ajamaxpër nê mẽmoj mex nê mẽ no kupyw o apa. Tĩrtũm kapër mex kumrêx tã ka axtem nê nê mẽ hkurê ho ri apa.

¹¹ ã ate amnhĩ nhĩpêx anhỹrja mýrapê koja Tĩrtũm tanhmã ato ka ano hkre nê arĩt kêt o atã apkati xohtõ nê kãm ga. Anê.

Hãmri nhũm no hkre kurê kumrêx nê tee ri rĩt kaxyw no pikrar pýnh o xa nom mẽmoj pumunh kêt nê. Hãmri nê mẽhõ kot hpa hã hpyr nê òrkwỹ hwỳr ho mõi kaxyw ri amnhĩ pu hã mẽ hapêr pênh o xa.

¹² Hãmri nhũm hkràmnhwỳ pahĩtija tee ri ja hã omu nê amnhĩ kaxyw Jejus kôt hamaxpër nê hkôt amnhĩ xãm kurê kumrêx. Hãmri nê Pawre mẽ Panãpe wa kot tanhmã Tĩrtũm kapër jarênh to hã wa kuma nê hamaxpër o:

—Hêxta waa nê. Aa ixte ã mẽhõ kapër kot anhỹr mar kêt tã pa jarãhã kuma. Nà ãm hãmri na Jejus jarênhja. Anê.

Pawre mẽ Panãpe ãxiok õ hwỳr wa mõi ã wa harênh

Atre 15.38

13 Tã nhũm Pawre mẽ Panãpe mẽ Juãw Makre wa mẽ krĩ pê Papos rũm kato nẽ hpãnhã ma pyka hõ hwỳr mỗ. Pàr kãm ma pyka pê Pãpir wỳr mỗ nẽ kamã krĩ pê Perke hwỳr pỏj. Hãmri nhũm Juãw Makre tanhmã hamaxpẽr to nẽ tee ri axte wa hkỏt mỏr kukamã hamaxpẽr hãmri nẽ wa hkaga nẽ awjanã nẽ ma akupỹm Jerujarẽ hwỳr ahte mỗ.

14 Jakamã nhũm Pawre mẽ Panãpe wa ahte Perke rũm kato nẽ hamũ pika pê Pisit kãm krĩ pê ãxiok wỳr mỗ nẽ hwỳr pỏj. Nhũm Ijaew nhỏ arĩgromnu pê sap kato nhũm wa Tĩrtũm kapẽr o mẽ ahkre xà hã ixkre hwỳr wa tẽ nẽ hwỳr axà nẽ nhỹ.

15 Hãmri nhũm mẽhỏ mẽ kãm Tĩrtũm kapẽr ã kagà htũm kwỳ kamã harẽnh o xa. Mojes mẽ Tĩrtũm nhỹ hã kapẽr o mẽ pa xwỳnh kot kapẽr ã kagà hkwy kamã nhũm mẽ kãm kamã harẽnh o xa. Hãmri nẽ kamã harẽnh pa nhũm mẽ ahkre xwỳnhjaja Pawreja wa omu nẽ wa hwỳr mẽhỏ mẽ nhũm wa hwỳr tẽ nẽ wa kãm:

—E na mẽ ijahkre xwỳnhjaja war ate mẽ inhmã axujarẽnh prãm nẽ mãmri mẽ inhmã mẽmoj jarẽnh kaxyw nhũm mẽ war atã anẽ. Anẽ.

16 Hãmri nhũm wa kuma nhũm Pawre kànhmã xa nẽ mẽ hpinhkrẽnh kaxyw mẽ kãm kànhmã ihkra nhũm mẽ omu nẽ hpinhkrẽnh pa nhũm mẽ kãm awjarẽ. Amnhĩ kwỳ pê Ijaewjê mẽ mẽ kệp Ijaew kêt xwỳnhjê kãm Tĩrtũm kĩnh xwỳnhjê mã nhũm mẽ kãm awjarẽ. Nẽ mẽ kãm kapẽr ryy nẽ. Tĩrtũm kot tanhmã mẽ hkukamã Ijaew nhĩgết nẽ pãmjê nhĩpêx to hã mẽ kãm awjarẽ nẽ mẽ kãm:

—E kot paj mẽ amã awjarẽ ka mẽ inhma.

17 Nà mẽ ixpê Ijaew nhỏ Tĩrtũmja amnepêm na pre mẽ ixpê Ijaew pãmjê rê. Kormã Ejit kãm mẽ pa

ri nhũm amnhĩ kaxyw mẽ kurê nẽ mẽ ho ohtô rax kumrẽx. Hãmri nẽ mẽ kaxyw hihtỳx jakamã Ejit rũm mẽ kator pa.

18 Hãmri nẽ mẽ ho mex ryy ho mẽ hkôt pa. Mẽ kot kapôt ã ri pa hã amgrà pê 40 kamã mẽ kot htỳx ri tanhmã amnhĩ nhĩpêx to ho pa htã nhũm mẽ kamã ukaprĩ ryy ho mẽ hkôt pa.

19-20 Na pre mẽ kãm pyka pê Kanaã kamã mẽ pa xwỳnhjê nhĩmex pa. Kanaã kamã mẽ pa xwỳnhjaja ahpỳnhã axpẽn kaxyw mẽõ krĩ pê 7ja nhũm mẽ kãm mẽ ho hapêx pa. Hãmri nẽ hpãnhã mẽ inhĩgêjtê mã pykaja o hpigrành pa. Mẽ ixpê Ijaew nhĩgêjtê mã ho hpigrành pa nhũm mẽ kamã pa hã amgrà xohtô nẽ. Hã amgrà pê 450. Tã nhũm Tĩrtũm hpãnhã mẽ kãm juisti hkwy rê nẽ mẽ kaxyw mẽ unhwỳ nhũm mẽ ho pa. Tã nhũm hpãnhã Sãmuew mẽ ho amnhĩptà nẽ mẽ o pa. Kêp Tĩrtũm nhỹ hã kapêr jarênh o pa xwỳnhjê hõ nhũm Tĩrtũm mẽ kaxyw ãm.

21 –Tã nhũm mẽ ixpãmjaja axpẽn ma nẽ ra te krĩ hkwy kamã mẽ urak nẽ mẽõ pahi kot Sãmuew pãnhã mẽ ho amnhĩptàr o pa hprãm xàj amnhĩ to Tĩrtũm wỳ nẽ kãm: “Pa Tĩrtũm. Kwa mẽ ixkaxyw pahi hõ xãm kê mẽ ixto amnhĩptàr o pa nà. Ja na mẽ inhmã hprãm tỳx kumrẽx.”

–Anhỹr o amnhĩ to hwỳr jakamã nhũm mẽ kuma nẽ mẽ kaxyw Sawti xãm. Kisti hkra na pre. Nẽ mẽ inhĩgêjtê Pêjamĩ kanrêhã htãmnhwỳ na pre. Hãmri nhũm Tĩrtũm mẽ kaxyw ãm nhũm kêp mẽõ pahi nẽ mẽ ho amnhĩptàr o pa hã amgrà pê 40.

22 Tã nhũm Tĩrtũm kator nẽ hpãnhã mẽ kaxyw Tawi xãm. Hãmri nẽ harênh o: “Nà Jese hkra

Tawija na hte inhmã hprãm xà hkôt amnhĩ nhĩpêx mex o pa.” Anẽ.

23 –Tã Jejus kêp Tawi hkanrêhã htàmnhwỳ na pre. Kukamã na pre Tĩrtũm mẽ ixpê Ijaew nhĩgêjtê mã harẽ nẽ harênh o: “Koja nhỹrmã Tawi hkanrêhã htàmnhwỳjê hõ mẽ ate amnhĩ tomnuj pẽ mẽ apytà.” Anhỹr o hkukamã mẽ kãm harẽ.

24 No nhũm kormã Jejus kot mẽ ixpê Ijaewjê mã amnhĩ to amnhĩrĩt kêt ri nhũm Juãw Paxis kumrêx hkukamã mẽ ixwỳr mō nẽ mẽ inhmã Tĩrtũm kapêr jarênh o ri mẽ ixkôt pa. Nẽ mẽ ixte amnhĩ tomnuj kaga nẽ hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrãr ã mẽ inhmã karõ ho pa.

25 –Tã mẽ kãm kapêr o pa ryy nẽ ra hatur xàm mênh kaxyw nẽ amnhĩ tã tanhmã mẽ inhmã kapêr to nẽ mẽ inhmã: “Na ka mẽ ixpumu nẽ atỳx Tĩrtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw ãm mã xwỳnhta kukamã na pa pre mō. Tãm kot amnhĩ to rax o ijakrenh. Nẽ kot amnhĩ to mex o kot ijakrenh. Jakamã na pa hte ãm kukwak ri ixpa nẽ amnhĩ tã hã ixpijaàm o ixpa.” Anẽ.

–Na pre ã Juãw Paxisja mẽ inhmã Jejus jarênh anhỹr o pa.

26 –Tã kwa mẽ inhma mẽ apê Apraãw kanrêhã htàmnhwỳjaja nẽ mẽ apê Ijaew kêt xwỳnh kãm Tĩrtũm kĩnh xwỳnhjaja. E mẽ apiitã ixkapêr ma nẽ kãm ajamaxpêr tỳx rãhã ho ri apa. Nà mẽ pahpiitã mẽ pakaxyw na Tĩrtũm kapêrja. Kot mẽ pahte amnhĩ tomnuj pẽ mẽ papytãr ã amnhĩ jarênhja mẽ ixpê Ijaew pix kaxyw kêt. Mẽ pahpiitã mẽ

pakaxyw na. Mě pahpiitã mě pahte ja mar nẽ hkôt amnhĩ nhĩpêxja na Tĩrtũm kãm hprãm.

²⁷ Nom Jerujarẽ nhõ xwỳnhjê mẽ mẽ àptàr tũmrejaja na prem Jejus kêp Tĩrtũm kot mẽ pakaxyw ãm xwỳnh ã harẽnh mar tã hkôt hamaxpêr kêt nẽ. Na pre htem mẽ inhõ arĩgromnu pẽ sap ã akuprõ nẽ axpẽn mã Tĩrtũm kapêr ã kagà htũm kamã ujarẽnh o hkrĩ. Kagàja kamã Tĩrtũm nhỹ hã mẽ kapêr o mẽ pa xwỳnhjaja kot hprĩ hã Jejus jarẽnh nẽ hã kagà nhũm mẽ kot mar tã hprĩ hã mar tỳx kêt nẽ. Jakamã na prem axtem nẽ mẽ kãm hã amỹnê. Tĩrtũm nhỹ hã kapêr jarẽnh xwỳnhjaja kot mẽ hkukamã mẽ harẽnh xàja kôt nhũm mẽ kot hpĩr kaxyw mẽ kãm hã amỹnê.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat wỳ. Kot mẽ kãm hã àmnênh nhũm õ pòristijaja kot hpĩr kaxyw nhũm mẽ hã kuwỳ nhũm mẽ kãm kupĩ. Ra Tĩrtũm kapêr ã kagà htũm kot mẽ hkukamã mẽ harẽnh xà hkôt. Hãmri nhũm mẽ kot hkôt pa ho pa xwỳnhjaja pĩ kahpa nẽ ho wry nẽ ma o tẽ nẽ kẽn kre kamã haxà.

³⁰ Tã nhũm Tĩrtũm akupỹm ho htĩr

³¹ nhũm xatã hkôt mẽ pa ho pa xwỳnhjê hwỳr hapôj. Kormã htyk kêt ri ra Garirej rũm Jerujarẽ hwỳr hkôt mẽ pa ho mẽ pa xwỳnhjê hwỳr xatã mẽ hwỳr hapôx o pa. Jao hã arĩgro xohtô nẽ nhũm prem piitã omu. Tã mẽ tãmjaja na htem mẽ ixpê Ijaew mã harẽnh o pa.

³²⁻³³ —Amnepêm Tĩrtũm na pre mẽ ixpê Ijaew nhĩgêjtjê mã tanhmã Kra Jejus jarẽnh to. Kormã mẽ pahwỳr wrỳk kêt ri tanhmã mẽ kãm harẽnh to. Jakamã ra kot hkukamã harẽnh xà hkôt nhũm pre mẽ pahwỳr wry nẽ tanhmã mẽ panê amnhĩ nhĩpêx

to. Tã mẽ ate harẽnh mar kaxyw na pa wa man mẽ awỳr mỗ. Amnepêm finat Tawi na pre Tĩrtũm kapẽr kwỳ hã kagà. Tĩrtũm mex ã mẽ grer xà pẽ Sam 2ja kamã hã kagà. Te Tĩrtũm tãm Jejus mã kapẽr pyràk o hã kagà nẽ hã kagà ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrẽx kaxyw na pa jarãhã mẽ kãm ato amnhĩrĩt. Anẽ.

Nhũm pre ã Tĩrtũm Jejus mã kapẽr anẽ nhũm Tawi ô ri mẽ pamã hã kagà.

³⁴ —Amnepêm na pre Tĩrtũm tanhmã Kra Jejus kukamã harẽnh to. Mẽ kot hpĩr nhũm kot akupỹm ho htĩr kukamã hã amnhĩ jarẽ. ĩ hkro pymaj kot mẽ htykjê pẽ hkaxàr nẽ akupỹm ho htĩr ã nhũm hkukamã hã amnhĩ jarẽ. Te Kraja mã amnhĩ jarẽnh pyrà nẽ amnhĩ jarẽnh o:

E kot paj ato mex rax nẽ. Ixte Tawi mã amnhĩ jarẽnh xà hkôt.

Anhỹr o hkukamã harẽnh xà hkôt akupỹm ho htĩr nhũm axte htyk kêt ã harẽ.

³⁵ —Nẽ kagàja nhãm hô hõ kot tanhmã Jejus jarẽnh kute. Te Jejus tãm Tĩrtũm mã kapẽr pyrà nẽ harẽnh o:

Ixpê Akra hã ixte akapẽr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nẽ. Anẽ.

Tĩrtũm kapẽr ã kagà htũm kot ã Jejus jarẽnh kot anhỹr.

³⁶ Nom ã Tawi jarẽnh anhỹr kêt nẽ. Tawi na pre Tĩrtũm kapẽr kôt amnhĩ nhĩpêx mex o pa hãmri nẽ ty nhũm prem mẽ panhĩgêjtjê nhĩhkô hã haxà hãmri nhũm ĩ hkro nẽ hapêx.

37 –Tã no Jejusja Tĩrtũm kot akupỹm ho htĩr jakamã nhũm Tawi pyràn ĩ hkro nẽ hapêx kêt nẽ.

38 –E mẽ inhmar tỳx nẽ ixkwỳjaja. Kra Jejus pix kukwak na hte Tĩrtũm amnhĩ katut kôt mẽ pahte amnhĩ tomnuj rẽ.

39 Jakamã kot kaj mẽ ãm Mojes kapêr kôt pix mã ri amnhĩ nhĩpêx nhũm Tĩrtũm tee ri ja hã mẽ apumu nẽ amnhĩ katut kôt mẽ ate amnhĩ tomnuj rẽnh kêt nẽ. Jejusja tapxipix na pre htyk o Tĩrtũm mã mẽ pahte amnhĩ tomnuj piĩtã hpãnhã amnhĩrer pa.

40-41 Amnepê m na pre Tĩrtũm kapêr nhỹ hã kapêr xwỳnhjê hõja mẽ kãm Tĩrtũm kapêr jarẽ nẽ hã kagà. Te Tĩrtũm tãm mẽ kot kapêr ã hpêr o pikênh xwỳnhjê mã kapêr pyrà nẽ mẽ kãm:

E kot paj aa mẽ ate mẽmoj pumunh kêt õ ho anẽ.

Nhũm mẽhõ mẽ amã harẽ ka mẽ harênh ma nẽ ãm ama.

Nhũm mẽ kot omunh mex xwỳnhjê hõ kot hprĩ hã mẽ amã harênh tã ka mẽ ãm ama nẽ hkôt ajamaxpêr kêt nẽ.

Hãmri nẽ tee ri tanhmã kãm ajamaxpêr to ho ri apa. Anẽ.

Ã Tĩrtũm mẽ kãm kapêr anhỹr jakamã kwa mẽ o kora. Apu mẽ kajaja na pre ã mẽ ajarênh anẽ rỳ ko. Anẽ.

42 Nhũm pre ã Pawre mẽ kãm ujarênh ryy anẽ. Hãmri nẽ Panãpe mẽ wa ixkreta rũm kator kaxyw nhũm mẽ kot mar o hkrĩ xwỳnhjaja tee ri ma wa mõi ã wa omu nẽ ma wa hkôt mra nẽ wa kãm:

–Kwa war axujarênhja na mex kumrêx. Mẽ inhmã axte mar prãm. Xã koja axte sap kato ka wa

akupÿn mẽ ixwÿr wa tẽ nẽ axte mẽ inhmã awjarẽ?
Anẽ.

Hãmri nhũm wa mẽ kãm:

—Tõe. Nà kot paj war anẽ. Anẽ.

⁴³ Hãmri nẽ wa ma tẽ nhũm mẽ hkwÿja ma wa hkôt mra. Ijaew kwÿjaja nẽ Ijaew kêt xwÿnh kãm Tĩrtũm kĩnh xwÿnhjaja nhũm mẽ ma wa hkôt mra. Hãmri nhũm wa pry hã mẽ kãm kapër o mō. Tĩrtũm kot mẽ kutã nojarêt rãhã ho pa nhũm mẽ kot amnhĩ tã omunh nẽ hkôt amnhĩ nhĩpêx tÿx rãhã ho pa nẽ hkaga hkêt ã mẽ kãm kapër o mō.

⁴⁴ Tã nhũm axte sap nhũm krĩ nhõ xwÿnh piitã axte Tĩrtũm kapër mar kaxyw ixkre wÿr akuprõ. Ijaewjaja nẽ Ijaew kêt xwÿnhjaja.

⁴⁵ Hãmri nhũm Ijaew kwÿjaja tee ri mẽ amnhĩ wÿr Ijaew kêt xwÿnhjê pumu nẽ mẽ hã Pawre mẽ Panãpe wa kamã gryk nẽ. Mẽ kãm Ijaew kêt xwÿnhjaja kot Tĩrtũm kapër mar prãm kêt jakamã mẽ hã wa kamã gryk nẽ. Hãmri nẽ Pawre kapër ma nẽ xatã kãm kapër punuj nẽ kãm:

—Tk. Kwa na ka Tĩrtũm kapër jarẽnh o axêx. Ja kot anhÿr kêt. Anẽ.

⁴⁶ Nom nhũm wa kãm mẽ uma hkêt nẽ. Wa ãm Tĩrtũm Karõ nhÿ hã amnhĩ to htÿx nẽ wa mẽ kãm kapër. Nẽ amnhĩ tã tanhmã mẽ kãm kapër to nẽ mẽ kãm:

—Nà wa ixpyrà nẽ mẽ apê Ijaew jakamã na pa mẽ akumrêxjê mã Tĩrtũm kot mẽ pakaxyw Jejus xãm ã harẽ. Tã ka mẽ ama nẽ ãm ama nẽ te mẽ ate hkaga pyrà nẽ ã wa inhmã akapër anẽ nẽ wa ixte kapër o ixêx ã wa ijarẽ. Për ãm mẽ ate mẽ amã Tĩrtũm mẽ Kra wa kuri mẽ atĩr tũm nẽ mẽ apa hprãm kêt. Jakamã kot paj wa mẽ apê ixkato

nē hpānhā ma Ijaew kêt xwỳnhjê mã Jesus kapēr jarēnh o ri mẽ hkôt ixpa.

⁴⁷ Tĩrtũm kapēr ā kagā htũm ā kot mẽ ixte amnhĩ nhĩpêx anhỹrja kukamā mẽ ijarē mẽ mẽ ijarēnh o:

Mẽ ate Ijaew kêt xwỳnhjê mã ixkapēr jarēnh o ri apa kaxyw na pa pre mẽ kaxyw mẽ arê.

Jakamā koja pyka piitā hkôt mẽ pa xwỳnhjaja ohtō mẽ mẽ akapēr ma mẽ ixkra hkôt amnhĩ xunhwỳ.

Koja mẽ ā amnhĩ nhĩpêx anē pa ja hā mẽ omu mẽ mẽ ho ixkra. Anē.

Tĩrtũm kot ā ja kukamā mẽ ijarēnh anhỹr jakamā kot paj wa mẽ apê ixkato mẽ mẽ apānhā ma Ijaew kêt xwỳnhjê mã Tĩrtũm kapēr jarēnh o ri mẽ hkôt ixpa. Anē.

⁴⁸ Hāmri nhũm Ijaew kêt xwỳnhjaja amnhĩ tā wa kapērja ma mẽ hkĩnh mẽ Tĩrtũm kapēr mex o mex ā harē. Hāmri nhũm ra Tĩrtũm kot nhỹrmā amnhĩ ri mẽ htĩr tũm mẽ mẽ pa ho mẽ pa kaxyw mẽ rēnh xwỳnhjaja amnhĩ kaxyw Pahihti Jesus kôt hamaxpēr mẽ hkôt amnhĩ xunhwỳ.

⁴⁹ Tā nhũm pika pē āxiok kamā mẽ piitā Tĩrtũm kapēr jarēnh ma.

⁵⁰ Nom nhũm Ijaew xàptàr tũmrejaja kām Pawre mẽ Panāpe wa hkĩnh kêt jakamā na prem krĩ hkôt mẽ kot amnhĩ to rũnh xwỳnhjê mã wa ho kapēr punuj o pa. Mẽ õ pahi mẽ mẽni kot amnhĩ to rũnh xwỳnhjaja nhũm mẽ kām tanhmā wa ho kapēr to nhũm mẽ kuma mẽ mẽ hkôt hamaxpēr. Mēnijaja kām Tĩrtũm prām tā amnhĩ kaxyw Jesus kôt hamaxpēr kêt jakamā tanhmā mẽ kot Pawre mẽ Panāpe wa ho hêx toja ma mẽ hkôt hamaxpēr

ně wa kamã gryk ně. Jakamã nhũm mẽ ohtô ně tanhmã wa hipêx to ně amnhĩ nê wa hano.

⁵¹ Hãmri nhũm wa mẽ kêp kato ně xa ně mẽ kot Tĩrtũm kapêr kaga hã amnhĩ pumunh kaxyw mẽ noo mã wa hparkà kapa ně nê awjagrô kapĩ ně ma wa tẽ. Hãmri ně ma krĩ pê Ikõn wỳr hpãnhã wa mỗ.

⁵² Hãmri nhũm ãxiok kamã mẽ kot Jejus kôt amnhĩ xunhwỳr xwỳnhjaja hkĩnh ně ri pa. Tĩrtũm Karõ kot mẽ hkarõ mã gjêx jakamã nhũm mẽ hkĩnh ně ri pa ho pa.

14

Pawre mẽ Panãpe wa kot Ikõn wỳr mỗr ã wa harẽnh

Matêwre 10.34-35

¹ Hãmri nhũm Pawre mẽ Panãpeja wa ãxiok rũm kato ně hpãnhã ma krĩ pê Ikõn wỳr wa mỗ. Hãmri ně hwỳr pøj ně Ijaew nhõ Tĩrtũm kapêr o mẽ ahkre xà hã ixkre hwỳr wa tẽ ně kamã mẽ kãm Jejus jarẽnh o nhỹ. Mẽ kãm harẽnh kãm hihtỳx jakamã nhũm mẽ hkwỳjaja wa kuma ně amnhĩ kaxyw hkôt hamaxpêr ně hkôt amnhĩ xunhwỳ. Ijaew kwỳjaja ně mẽ kêp Ijaew kêt xwỳnh kwỳjaja nhũm mẽ ohtô ně Jejus kôt amnhĩ xunhwỳ.

² Tã nhũm mẽ hkwỳjaja kãm Jejus jarẽnh mar prãm kêt ně. Hãmri ně kato ně ma Ijaew kêt xwỳnh kwỳjê hwỳr mra ně tanhmã mẽ kãm Pawre mẽ Panãpe wa ho hêx to ně wa ho kapêr punuj ně nhũm mẽ mar xà hkôt wa kamã gryk ně.

³ Nom nhũm wa tokyx kator ně ma mỗr kêt ně arĩ Tĩrtũm Karõ nhỹ hã amnhĩ to htỳx ně mẽ kãm Tĩrtũm kapêr jarẽnh o ri mẽ hkôt pa. Nẽ kêp mẽ kutã nojarêt xwỳnh ã harẽnh o pa. Nẽ ã hã mẽ kãm

aa mẽ kot mẽmoj pumunh kêt kwỳ ho anhỹr o ri mẽ hkôt pa. Jakamã nhũm mẽ hkwỳjaja ja hã wa omu nẽ wa kapẽr ma nẽ hamaxpẽr o:

—Kwa ãm hãmri na wa Tĩrtũm kêp mẽ pakamã ukaprĩ xwỳnh ã harẽ. Pẽr ỹ hã wa kot ã amnhĩ nhĩpêx anhỹr o pa kênã. Anẽ.

⁴ Hãmri nhũm Ijaew kêt xwỳnh kwỳjaja wa hkôt hamaxpẽr nẽ wa hkôt amnhĩ xunhwỳ. No nhũm mẽ hkwỳjaja wa hkôt hamaxpẽr kêt nẽ. Ra mẽ kot Ijaew kwỳ kot tanhmã wa ho kapẽr punuj toja ma nẽ mẽ hkôt hamaxpẽr jakamã nhũm krĩ nhõ xwỳnhjaja axpẽn kwỳm ri tanhmã wa hkôt hamaxpẽr to ho pa. Jao axpẽn kwỳm ri wa hkôt hamaxpẽr o pa.

⁵ Tã nhũm wa hkôt hamaxpẽr kêt xwỳnhjaja axpẽn wỳr akuprõ nẽ wa hã amỹnê. Ijaew kwỳjaja nẽ Ijaew kêt xwỳnh kwỳjaja nẽ mẽ õ pahijaja nhũm mẽ kot kên o wa htak o wa hpĩr kaxyw wa hã amỹnê.

⁶ Hãmri nhũm wa amnhĩ tã ama nẽ mẽ kêp kato nẽ hpãnhã ma pika hõ hwỳr mõ. Ma Rikõn kãm krĩ hkwỳ hwỳr hpãnhã mõ. Risti wỳr nẽ Tepe wỳr nẽ pu hã krĩ hkwỳ hwỳr wa mõ.

⁷ Wa mõ nẽ põj nẽ ma mẽ kãm Jejus kot tanhmã mẽ panê amnhĩ nhĩpêx to hã harẽnh o ri mẽ hkôt pa.

Te grà xwỳnh jarẽnh

Atre 3.1-10

⁸ Nhũm Risti kamã mẽhõ my hte grà nẽ hkrĩ xwỳnhja. Katorxà nhõxà kre rũm hte grà nẽ kator jakamã ri pa hkêt nẽ arĩ hkrĩ xà kamã hkrĩ ho hkrĩ.

⁹ Jakamã nhũm Pawre mẽ kãm ujarënh o xa nhũm kuri mar o nhỹ. Hãmri nẽ hamaxpër o:

—Nà pěr Tĩrtũm àhpumunh o àhpumunh. Mãn kot ixto mex kaxyw àhpumunh tỳx. Nà koja ixto mex. Anẽ.

Hãmri nhũm Pawre ã hamaxpër anhỹr ã omu
¹⁰ nẽ kàx pê kãm kapër nẽ kãm:

—E kwa kànhmã xa. Anẽ.

Hãmri nhũm kumã nẽ kànhmã ãm kurê kumrẽx nẽ ri mra. Nẽ amnhĩ te kamã hamak o ri mra nẽ hkĩnh tỳx kumrẽx.

¹¹ Hãmri nhũm kuri mẽ kuhê xwỳnhjaja Pawre kot ã hipêx anhỹrja ã omu nẽ htỳx wa kệp kaxkwa kamã mẽhpãm ã wa hkamnhĩx nẽ hkĩnh nẽ axpën mã:

—Kwa pěr mẽpahpãm na wa. Mẽpahpãm Jupti mẽ Měkurtija na wa panhĩ hã amnhĩ jahkre nẽ mẽ pahwỳr wrỳ. Nà ãm hãmri na wa mẽ pahwỳr wrỳ. Anẽ.

Nom mẽ kapër pê Rikaôn o axpën mã kapër jakamã nhũm Pawre mẽ Panãpe wa mẽ mar kêt nẽ. Wa kot mẽ kapër mar kêt jakamã ã mẽ kot wa harënh anhỹrja mar kêt nẽ htỳx wa xa.

¹² Nhũm mẽ ã wa kệp mẽhpãm ã wa harënh anẽ nẽ hkĩnh tỳx nẽ. Panãpeja nhũm prem kệp mẽ hpãm Jupti hã hkamnhĩx no Pawreja nhũm prem kệp mẽhpãm Měkurti hã hkamnhĩx. Pawreja Měkurti pyrà nẽ kapër japjê rũnh jakamã nhũm mẽ kệp hã hkamnhĩx.

¹³ Na prem krĩ htã mẽhpãm Juptija mã amnhĩ jarënh xà hã ixkre nhĩpêx nẽ hkarõ nhĩpêx. Hãmri nẽ hwỳr akuprõ nẽ kãm mex o mex ã harẽ nẽ amnhĩ to hwỳr o pa. Jakamã nhũm Jupti nhõ

patrejaja Pawre mẽ Panãpe wa kêp mẽhpãm ã wa harẽnh ma hãmri nẽ wa hã hkwỳjê mã kãm:

—Kwa pu mẽ wa kãm môx kwỳ hpa nẽ pixôrã hkwỳ rê. Hãmri nẽ wa kãm wa mex o wa mex ã wa harẽ nẽ wa kêp mẽpahpãm ã amnhĩ to wa kuwỳ. Wa kêp mẽpahpãm kênã. Anẽ.

Hãmri nẽ ra ã wa hipêx anhỹr kaxyw

¹⁴ nhũm wa tee ri mẽ kot amnhĩ nhĩpêx ã mẽ omu nhũm ja wa kêp omnuj tỳx nẽ. Jakamã nhũm wa amnhĩ pê hinôkà kaxônh pa nẽ mẽ kutã hprôt nẽ ã mẽ kot wa hipêx anhỹrja nê mẽ kãm kapêr kãm hihtỳx nẽ.

¹⁵ Nẽ mẽ kãm:

—Kwa mẽ ri ã wa inhĩpêx anhỹr kêt nẽ. Wa ixpê mẽapãm kêt kênã kot ka kêt mẽ ã wa inhĩpêx anẽ. Nom mẽapãmja na ka htem ãm amnhĩ to hwỳr kaprỳ nẽ kãm mex o mex ã harẽnh kaprỳ o ri apa. Tã mẽ ate ã amnhĩ nhĩpêx anhỹr kaga nẽ hpãnhã Tĩrtũm kôt amnhĩ xunhwỳr nẽ amnhĩ to pix wỳr o apa kaxyw na pa pre wa mẽ awỳr mỗ nẽ pøj. Tĩrtũmja mẽ ate mẽ apãm jarẽnhta rom htĩr o htĩr. Na pre mẽmoj piitã ho kato. Kaxkwa ho kato nẽ pyka ho kato nẽ gô xujanãr o kato. Nẽ kamã ri mẽmoj piitã ho kator pa.

¹⁶ —Amnepêm mẽ pa xwỳnhjaja na pre htem amnhĩ krã hkôt pix mã tanhmã ri amnhĩ nhĩpêx to ho pa nhũm Tĩrtũm ja hã mẽ omu nẽ ãm mẽ omu nẽ tanhmã mẽ ho hkêt nẽ.

¹⁷ Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwỳr na rê nhũm mẽ pahpur go mex nẽ. Nhũm mẽ pamã tanhmã mẽ pahpur kãm mẽmo hyja to nhũm ra mẽ pamã ô rũnh nẽ. Pu htem hamỳ nẽ ho

paxàpkur mex nê pahkĩnh nê ri papa. Tĩrtũm pix kukwak ri na pu htem ã amnhĩ nhĩpêx anhỹr o ri papa. Anê.

¹⁸ Nhũm pre ã Pawre mẽ kot wa kãm môx parja nê mẽ kãm kapêr kãm hihtỳx anê. No nhũm mẽ kuma nê ãm kuma nê wa kãm mry hkwy hpar kaxyw wa hã hihtỳx nê. Jakamã kritpê m nhỹx prem wa kãm hkwy pa. Tã tanhmã hamaxpêr to nê hkaga nê wa kãm hpar kêt nê.

*Mẽ kot Pawre pĩr ã àmnênh ã mẽ harênh
Sikũn Ximotre 3.10-11*

¹⁹ Tã nhũm Ijaew kwỳjaja mẽ hwỳr mran pøj. Krĩ pê ãxiok mẽ Ikõn rũm ma mẽ hwỳr mran pøj nê mẽ kãm Pawre ho hêx o mẽ hkôt pa nhũm mẽ kuma nê axtem nê Pawre kamã gryk kato. Hãmri nê mẽ kot hpĩr kaxyw kên runh kwỳ jamỳ nê ho htak prêprêk o kuhê. Hãmri nhũm amnhĩ xà htỳx kamã ama nê tẽm nê akryk nõ nhũm mẽ omu nê htỳx ho ra htyk ã hkamnhĩx. Hãmri nê hwỳr tẽ nê hpa hã kupy nê ma hkjênh o mỗ nê krĩ pum kumê nê ma akupỹm mra.

²⁰ Hãmri nhũm Jesus kôt mẽ kot axpên to htõjaja tee ri ã mẽ kot hipêx anhỹr ã omu nê hkaprĩ htỳx nê hwỳr hprõt nê omu nê mỳr o kuhê. Hãmri nhũm te htyk pyrà nê nõr tã Jesus nhỹ hã akupỹm hihtỳx mex nê kànhmã nhỹ hãmri nê ma akupỹm mẽ hkôt krĩm tẽ.

Tã nhũm apkati nhũm Panãpe mẽ wa krĩa rũm kato nê ma wa mỗ. Pãnhã ma krĩ pê Tepe hwỳr wa mỗ.

Pawre mẽ Panãpe akupỹm ãxiok wỳr wa mỗr ã wa harênh

21-22 Tã nhũm wa ma Tepe hwỳr mō nē pōj. Hāmri nē kamã mẽ kãm Jejus tanhmã kot mẽ panê amnhĩ nhĩpêx to hã harênh o ri mẽ hkôt wa pa nhũm mẽ wa kuma nē ohtô nē Jejus kôt amnhĩ xunhwỳ.

Tã nhũm wa kato nē awjanã nē ma akupỹm pika pê Pisit wỳr wa mō. Nē kamã krĩ hkwȳ hkôt ri ra mẽ kot Jejus kôt amnhĩ xunhwỳr xwỳnhjê jahkre ho ri mẽ hkôt pa. Krĩ pê Risti nē Ikōn nē ãxiokja kôt. Nē mẽ ahkre kamã Jejus kôt mẽ ho mẽ hihtỳx o wa pa nē mẽ kãm:

—E ra mẽ ate Jejus kôt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu nē hã tanhmã mẽ anhĩpêx to. Tã kêr ka mẽ ãm amnhĩ tâ mẽ omu nē ãm mẽ omu nē Jejus kaga hkêt nē. Nē arĩ hkôt amnhĩ nhĩpêx mex o ri apa rãhã nhỹrmã ma õ krĩ hwỳr api nē Tĩrtũm wa kuri amex kumrêx nē atĩr tũm nē apa ho apa. Anê.

23 Hāmri nē ahpỹnhã krĩ piitã hkôt ri mẽ kot pastô nhỹ hã mẽ ahkre kaxyw mẽ hkwȳjê rê nē mẽ kaxyw mẽ unhwỳ nē mẽ ho Tĩrtũm wỳ. àpkur kêt rãhã mẽ ho kuwỳ nē kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kêr ka mẽ kutã anojarêt rãhã ho ri mẽ hkôt apa. Anê.

Hāmri nē wa mẽ kêp kato nē ma hpãnhã nhỹhỹm wa mō.

24 Pyka pê Pisit kamã mō nē hpãnhã nhãm pyka pê Pãpir kôt mō. Wa ma mẽ kãm tanhmã Jejus kapêr jarênh to ho mẽ hkôt mō.

25 Hāmri nē krĩ pê Perke hwỳr wa pōj nē kamã mẽ kãm Jejus kot tanhmã amnhĩ nhĩpêx to hã harê

hāmri nē mẽ kurũm kato nē axte mō. Pānhã ma krĩ pē Atari hwỳr wa mō.

²⁶ Hāmri nē hwỳr pōj nē hpānhã kurũm akupỹm ãxiok wỳr wa mō. Pār rax kãm ma akupỹm mō. Æxiokja kamã na pre wa nojarêt nhũm Jejus kôt wa htõ nē wa htõxjaja wa ho Tĩrtũm wỳ nē ma krĩ hkwy hwỳr wa kumẽ. Wa kot ma mẽ hkôt tanhmã Jejus kot mẽ panê amnhĩ nhĩpêx to hã harēnh o wa pa kaxyw wa kumẽ. Jakamã nhũm wa ra ja ho anhỹr pa nē akupỹm mẽ hwỳr wa mō.

²⁷ Hāmri nē wa akupỹm pōj nē Jejus kôt mẽ kot axpẽn to htõ nē htõxjê ho akuprõ nē mẽ kãm amnhĩ jarẽ nē mẽ kãm:

—Nà ãm hāmri na pa wa ra ixkàhkĩnh pē akupỹn mẽ awỳr pōj. Na pre Tĩrtũm wa ixkutã nojarêt rãhã ho wa inhĩhkô hã pa. Jakamã pa pre wa ma ỹ hã Ijaew kêt xwỳnhjê mã Jejus jarēnh o ixpa nhũm mẽ hkwyjaja wa inhma nē hkôt amnhĩ xunhwỳ.

²⁸ Anhỹr o wa mẽ kãm kapēr hāmri nē wa tokyx ma nhỹhỹm krĩ hõ hwỳr axte mōr kêt nē. War arĩ ãxiok kamã Jejus kôt wa htõ nē htõxjê hkôt ri pa.

15

Jerujarẽ kamã Jejus kwỳ hpikuprõnh ã mẽ harēnh Matêwre 23.1-4; Karatas 2.1-5, 5.1-16

¹ Tã hāmri nhũm Ijaew kwỳjaja ãxiok wỳr Jejus kwỳ pē Ijaew kêt xwỳnhjê hwỳr mōn pōj. Pika pē Jutej rũm mẽ hwỳr pōj nē tanhmã mẽ ahkre hto ho pa. Nom axtem nē Tĩrtũm kapēr kuhpa hã mẽ ahkre nē mẽ kãm:

—Kot ka mẽ amã Jejus kôt amnhĩ xunhwỳr prãm hāmri nē mẽ ixpyrà nē finat Mojes kot mẽ pamã karõ xà hkôt amnhĩ my kwỳrýt kà kwỳ jakà nē rĩ

kormã hkôt amnhĩ xunhwỳ. Kot kaj mẽ ã amnhĩ nhĩpêx anhỹr kêt nê nhũm Tĩrtũm tee ri ja hã mẽ apumu nê amnhĩ katut kôt mẽ ate amnhĩ tomnuj rênh nê mẽ ato hkra hkêt nê. Anê.

² Hãmri nhũm Pawre mẽ Panãpe tee ri mẽ kapêr anhỹrja ma nhũm wa kêp ja omnuj tỳx nê. Hãmri nhũm wa mẽ kãm:

—Tk. Kwa kot anhỹr kêt. Na hte Tĩrtũm mẽ pahte amnhĩ my kwryt kà jakàr ã mẽ pahpumunh kôt mẽ pahto hkra hkêt nê. Anê.

Hãmri nê tee ri mẽ kapêrja nê mẽ kãm kapêr no nhũm mẽ ãm wa kuma nê wa hkôt hamaxpêr kêt nê. Nê arĩ ã mẽ ahkre anhỹr o mẽ hkôt pa. Jakamã nhũm mẽ ja hã axpên mã kapêr rax nê. Hãmri nhũm Jejus kwỳ pê Ijaew kêt xwỳnhjaja amnhĩ tã Pawre mẽ Panãpe wa hkukja nê wa kãm:

—Kwa xà kot paj mẽ apyrà nê amnhĩ my kwryt kà jakà nhũm Tĩrtũm kãm ja mex nê nà? Kwa wa ma akupỹm Jerujarê hwỳr mỗ nê ja hã Jejus nhỹ hã mẽ ahkre xwỳnh maatijê mẽ mẽ kot Jejus kwỳ jahkre xwỳnhjê kukja nê hã mẽ ama. Nê ota mẽ ixkwỳjaja koja ma war akôt mra. Kê mẽ tanhmã mẽ amã ja jarênh to ka mẽ ama nê man akupỹn mẽ ixwỳr mra nê tanhmã mẽ inhmã mẽ kapêr jarênh to. Anê.

Hãmri nhũm wa mẽ kãm: “Tôe. Nà kot paj mẽ anê.” Anê.

³ Hãmri nê wa mẽ ma Jerujarê hwỳr mỗ. Ma pyka pê Wẽnĩs mẽ Samar hkôt ma hwỳr mỗ. Hãmri nê nhỹri Jejus kôt mẽ htô nê htôxjê pumu nê mẽ kãm Ijaew kêt xwỳnhjê jarê. Mẽ hkwỳjaja mẽ uràk nê Jejus kôt amnhĩ xunhwỳr ã mẽ harênh o mỗ. Hãmri nhũm mẽ harênh ma nê mẽ ã hã hkĩnh nê.

⁴ Hāmri nhũm mẽ ra Jerujarẽ hwỳr Jejus kôt mẽ htõjê hwỳr mõn pøj. Hāmri nẽ mẽ ahkre xwỳnhjê mẽ Jejus nhỹ hã mẽ ahkre xwỳnh maati-jê pumu nhũm mẽ haxwỳja amnhĩ wỳr mẽ omu nẽ hkĩnh nẽ. Nẽ tanhmã mẽ ho mex to nẽ mẽ kãm kapêr mex nẽ. Hāmri nhũm Pawre mẽ Panãpe wa mẽ kãm amnhĩ jarẽ. Tĩrtũm kot wa ìhkô hã wa hkôt pa nhũm wa ỹ hã kot Ijaew kêt xwỳnhjê mã kapêr o pa nhũm mẽ hkwỳja kot wa mar nẽ Jejus kôt amnhĩ xunhwỳr ã nhũm wa mẽ kãm amnhĩ jarẽ.

⁵ Nhũm Jejus kwỳjê kamã mẽ kêp Parijew nhõ xwỳnh kwỳjaja. Mẽ kêp Parijew tã hkwỳjê rom Jejus kôt amnhĩ xunhwỳ. Jakamã nhũm mẽ tee ri Pawre mẽ Panãpe wa kot Ijaew kêt xwỳnhjê jarênh ma nẽ kànhmã kuhê nẽ wa kãm:

—Kwa kê mẽ pahpyrà nẽ amnhĩ my kwỳt kà jakà nẽ finat Mojes kot Tĩrtũm nhỹ hã mẽ pamã mẽmoj tã karõ hkôt amnhĩ nhĩpêx o pa. No kot mẽ ã amnhĩ nhĩpêx anhỳr kêt nhũm ja mẽ pahpê omnuj nẽ. Anẽ.

⁶ Hāmri nhũm Jejus nhỹ hã mẽ ahkre xwỳnh maati-jê mẽ mẽ hkwỳjê jahkre xwỳnhjaja mẽ kuma nẽ hapøj nẽ nhỹri akuprõ. Ijaew kêt xwỳnh kot Jejus kôt amnhĩ xunhwỳr xwỳnhjaja kot tanhmã amnhĩ nhĩpêx to hã axpẽn mar kaxyw nhỹri akuprõ.

⁷ Hāmri nẽ mẽ hã axpẽn mar ryy nẽ. Hāmri nhũm Simãw Pêtre tã kànhmã xa nẽ mẽ kãm:

—Nà na pre Tĩrtũm mẽ pahkapi nẽ Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa nhũm mẽ kot inhmar nẽ hkôt amnhĩ

xunhwÿr kaxyw nhũm mẽ kaxyw ixta. Ra mẽ ate ja hã ixpumunh mex.

⁸⁻⁹ Tĩrtũm kot tanhmã ri mẽ pakute hkõt mẽ pahpumunh par jakamã te kot ra mẽ panhĩpêxta pyrã nẽ mããnẽn Ijaew kêt xwÿnhjê nhĩpêx. Mẽ kot mẽ pahpyrà nẽ amnhĩ kaxyw Jejus kõt hamaxpêr jakamã nhũm Tĩrtũm te ra mẽ panhĩpêx pyrã nẽ amnhĩ katut kõt mẽ kot amnhĩ tomnuj rẽ nẽ mẽ ho hkra. Hãmri nẽ mẽ hwÿr amnhĩ Karõ rẽ nhũm mẽ hkarõ mã agjê. Tĩrtũm tãm kot amnhĩm mẽ rênh kênã.

¹⁰ –Tã xà mẽ pahpê Ijaew na pu htem wam Tĩrtũm kot finat Mojes mã kapêr kõt amnhĩ nhĩpêx mex o papa? Nà na pu htem hkõt amnhĩ nhĩpêx mex kêt nẽ. Nẽ mẽ panhĩgêttjaja na xep prem haxwÿja hkõt amnhĩ nhĩpêx mex o pa hkêt nẽ. Mẽ pahpiitã mẽ pahpê hihtÿx kênã. Tã Ijaew kêt xwÿnhjaja kot hkõt amnhĩ nhĩpêx o pa hã ka mẽ ra mẽ kãm karõ kaxyw. Kwa kot kaj mẽ anẽ nhũm Tĩrtũm tee ri ja hã mẽ apumu nhũm ja kêp omnuj nẽ. Kãm ja prãm kêt.

¹¹ Kwa mẽ ã mẽ kãm hã karõ anhyr kêt nẽ. Mẽ panhõ pahihtti Jejus na hte mẽ pahpiitã mẽ pakutã nojarêt o axpên pyræk. Jakamã Ijaew kêt xwÿnhjaja nẽ mẽ pahpê Ijaewjaja kot puj mẽ amnhĩ kaxyw hkõt pajamaxpêr nẽ hkõt amnhĩ xunhwÿ. Hãmri nhũm Tĩrtũm ja hã mẽ pahpumu nẽ mẽ panhĩpêx o axpên pyrã nẽ Jejus kukwak ri amnhĩ katut kõt mẽ pahte amnhĩ tomnuj rẽ nẽ mẽ pahto hkra. No na hte mẽ pahte amnhĩ my kwrÿt kà jakàr rÿ finat Mojes kapêr kõt amnhĩ nhĩpêx ã mẽ pahpumunh kõt mẽ pahto hkra hkêt nẽ. Anẽ.

¹² Nhũm pre ã Simãw Pêtre mẽ kãm kapêr anẽ.

Hāmri nhũm hpānhã Panāpe mẽ Pawreja mẽ kām amnhĩ jarẽ. Tĩrtũm kot tanhmã wa ho nhũm wa kot Ijaew kêt xwỳnhjê hwỳr wa mōr ã amnhĩ jarẽ. Nẽ Tĩrtũm nhỹ hã mẽ kām aa mẽ kot mẽmoj pumunh kêt kwỳ ho anhỹr o ri mẽ hkôt pa hã mẽ kām amnhĩ jarẽ nhũm mẽ piitã akryk wa mar o hkrĩ nẽ wa ujarēnhta hkukamã hamaxpēr.

¹³ Hāmri nhũm Simāw Pêtre mẽ Panāpe wa mẽ kām ujarēnh pa hāmri nhũm Xiakre wa hpānhã kànhmã xa nẽ mẽ kām kànhmã ìhkra pẽ nẽ mẽ kām:

¹⁴ —E pa ijaxwỳja mẽ amã ixkapēr ka mẽ inhma. Nà na pu mẽ ra Simāw Pêtre kapēr ma. Tĩrtũm kot wam amnhĩ kaxyw Ijaew kêt xwỳnh kwỳjê rēnh ã mẽ harēnhja pu mẽ ra kuma.

¹⁵ ãm hāmri na ã mẽ harēnh anẽ. Amnepêm Tĩrtũm kapēr nhỹ hã mẽ kapēr o mẽ pa xwỳnhjaja na prem ra ja kukamã Tĩrtũm kot tanhmã mẽ hipêx to hã amnhĩ jarēnh kukamã hã kagà. Te ho tãm kot kām kapēr pyrà nẽ hã kagà ho:

¹⁶ Amnepêm finat Tawija na pre hte inhmã amnhĩ kwỳjê ho amnhĩptàr o pa.

Mẽ kệp Ijaewjaja nhũm pre inhmã mẽ ho amnhĩptàr o pa.

Hāmri nhũm mẽ gaa nẽ axpēn pẽ anhgrà nẽ ahpỹnhã ri pa.

Tã ixpê Tĩrtũm kot paj nhỹrmã ma mẽ hwỳr wrỳ nẽ axte mẽ ho akuprō nẽ tãm mẽ unhwỳr pa.

¹⁷ Jakamã Ijaewjê kukwak ri koja Ijaew kêt xwỳnh kwỳjaja mãânēn ixkôt amnhĩ xunhwỳ.

Pa te ixte Ijaewjê nhĩpêx pyrà nẽ mẽ ho ixkra.

¹⁸ ã mẽ hkukamã ijamaxpēr anhỹr xà hkôt.

19 Anhÿr o mẽ harēnh jakamã nhũm ra mẽ hkwyjaja mẽ higêt kot amnhĩ nhĩpêx kaga hpa nẽ hpãnhã Tĩrtũm kôt amnhĩ xunhwý. Jakamã kwa kêr pu mẽ axte ja nhĩjuk ri mẽ kãm mẽmoj tâ karõ hkêt nẽ. Ja pix na mex.

20 ãm ja pix kot puj mẽ kãm hã karõ nẽ hã kagà nẽ mẽ hwÿr kumẽ:

Mẽ kot sãnti hã mẽ õ hkur nẽ kot puj mẽ hkurê.

Nẽ mẽ kot mẽmo mry hpar nẽ hkamrô runh kêt rãhã hkur nẽ mẽ hkurê.

Nẽ mẽ kot mẽmo mry kamrô kur nẽ mããnẽn mẽ hkurê.

Nẽ mẽmyjaja kot amnhĩ prõ pix tânopxar ã mẽ kãm karõ.

Nẽ mẽnijaja haxwýja kot amnhĩ mjên pix tânopxar ã mẽ kãm karõ.

—ãm ja pix kot puj mẽ kãm hã kagà nẽ mẽ kãm hã karõ.

21 Mẽ panhĩgêtjê mã finat Mojes kot ã mẽ kãm karõ anhÿrja na htem arĩ krĩ piitã hkôt ã mẽ kãm hã karõ anẽ. Mẽ panhõ arĩgromnu pê sap ã na htem arĩ ri Tĩrtũm kapêr o mẽ ahkre xà hã ixkre kamã ã mẽ kãm hã karõ anẽ. Anẽ.

Mẽ kot Ijaew kêt xwýnhjê hwÿr kagà mẽnh ã mẽ harēnh

Karatas 5.1

22 Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwýnh maatijaja nẽ mẽ kot hkwyjê jahkre xwýnhjaja nẽ Kris kwýjê piitã Xiakre kapêr ma nhũm ja mẽ kãm mex nẽ. Jakamã nhũm mẽ axpẽn mã:

—Tõe. Nà ãm hãmri na Xiakre ã Ijaew kêt xwýnhjê jarēnh anẽ. Nà ja mex. Pu mẽ ã ãxiok

nhõ xwỳnhjê mã ja hã kagà anê hãmri nê mẽ hwỳr kumẽ. Kojã Pawre mẽ Panãpeja wa kupy nê mã akupỹm mẽ hwỳr o mõi nê mẽ kãm kugõ. E mẽ pahtõ kot puj mẽ mã wa hkõt mẽ hwỳr mõi? Anê.

Hãmri nhũm mẽ kuma nê Siras mẽ Jut Pasapas wa kuta. Jejus kõt mẽ kot axpẽn to htõ nê htõxjaja kot axpẽn mã hamẽ wa kot amnhĩ to mex xwỳnh ã wa harẽnh jakamã nhũm mẽ mã Pawre mẽ Panãpe wa hkõt mõi kaxyw wa kuta.

²³ Hãmri nê ãxiok kamã Kris kwỳ pê Ijaew kêt xwỳnhjê kaxyw kagà nhĩpêx nê kamã ã mẽ kãm kapêr anê nê mẽ kãm:

Pa? ãxiok mẽ Sir mẽ Siris kamã Ijaew kêt xwỳnhjaja? Xà mẽ amex? Mẽ ixpê Jejus kõt mẽ atõjaja na pa mẽ awỳr kagàja nhĩpêx nê mẽ awỳr kumẽ. Mẽ ixpê Jejus kõt mẽ kot amnhĩ xunhwỳr xwỳnhjê jahkre ho ixpa xwỳnhjaja nê Jejus nhỹ hã mẽ ahkre ho mẽ pa xwỳnh maatijaja pa mẽ awỳr kumẽ.

²⁴ Na xep ra ja rũm mẽ ixkwỳjaja mã mẽ awỳr mõi nê mẽmoj tã tanhmã mẽ amã karõ hto. Mẽ ate amnhĩ my kwỳt kà jakàr nê amnepêm mẽ inhĩgêt Mojes kapêr kõt amnhĩ nhĩpêx o apa hã mẽ amã karõ. Ka xep mẽ tee ri ja kukamã ajamaxpêr. No mẽ pajaja na pa prem mẽ awỳr mẽ rẽnh kêt nê. Æm amnhĩ krã hkõt na prem mẽ awỳr mõi nê ã mẽ amã ja hã karõ anê.

²⁵ Tã pa tee ri mẽ harẽnh mã nhũm ja mẽ ixpê omnuj tỳx nê. Jakamã na pa mẽ jar akuprõ nê mẽ akaxyw mẽ inhĩõja wa kuta. Wa kot mã Panãpe mẽ Pawre wa hkõt mẽ awỳr wa mõi nê mẽ amã mẽ ixkapêr jarẽnh kaxyw. Panãpe mẽ

Pawreja mẽ inhmã wa hapê htỳx.

²⁶ Na hte mẽ amã Pahihti Jejus Kris kapêr jarênh o pa kaxyw wa amnhĩ grônh kôt mẽ amã harênh o pa.

²⁷ Tã pa mẽ akupỹm mẽ awỳr wa kumẽ nẽ wa hkôt mẽ pahtõ Jut mẽ Siras wa kumẽ. Mẽ ixte mẽ amã kagà kamã mẽ ixkapêrja nhũm wa kot hprĩ hã mẽ amã harênh kaxyw pa mẽ wa hkôt mẽ awỳr wa kumẽ.

²⁸⁻²⁹ E ja pix nê kot paj mẽ akurê:

Kêr ka mẽ sãnti hã mẽ õ hkur kêt nẽ.

Nẽ mẽmo mry kamrô kur kêt nẽ. Jao mẽmo mry pa nẽ hkamrô runh kêt rãhã hkur kêt nẽ. Kamrô runh pa nẽ rĩ kormã tanhmã ho nẽ aku.

Nẽ kêr ka mẽ amyjaja amnhĩ prõ pix tãnopxar o apa.

Nẽ mẽ anijaja ajaxwỳja amnhĩ mjên pix tãnopxar o apa.

E ãm ja pix kot paj mẽ amã hã karõ. Tĩrtũm Karõ kãm ja mex. Nẽ mẽ inhmã mãânên ja mex. Kot kaj mẽ ã amnhĩ nhĩpêx anhỳr o ri apa nẽ amex nẽ apa.

Tã ãm ja pix. Mẽ ixpê Jejus kwỳjê jahkre xwỳnhjê mẽ Jejus nhỹ hã mẽ ahkre xwỳnh maatijê mẽ pa mẽ mẽ awỳr kagàja nhĩpêx nẽ kumẽ. E kêr ka mẽ amex nẽ akĩnh nẽ ri axpên kôt apa. ãm ja pix na hapêx. Anẽ.

Nhũm prem ã kagà kamã mẽ kãm mẽmoj tã karõ anẽ.

³⁰ Hãmri nẽ Jut wa mẽ kãm kugõ nẽ ma ãxiok wỳr wa mẽ kumẽ nhũm wa mẽ ma akupỹm hwỳr o mỗ. Jut nẽ Siras nẽ Pawre nẽ Panãpeja nhũm wa mẽ ma akupỹm mẽ hwỳr o mẽ mỗ. Mỗõ hãmri nẽ mẽ hwỳr

pôj. Hāmri nē Jejus kwỳjê ho akuprō nē mẽ kām kagàja gō

³¹ nhũm mẽ kupy nē kamã harê nē kuma. Kamã mẽ kot mẽ kām mẽmoj tâ karō kamã harê nē kuma nē ỹ hã hkĩnh nē akupỹm tãm hamaxpêr.

³² Jut mẽ Siras wa kêp Tĩrtũm nhỹ hã kapêr o pa xwỳnh na pre wa. Jakamã na prem mẽ hwỳr mōn pôj hāmri mẽ kām tanhmã ujarênh to ho pa. Mẽ kot Jejus kôt pix mã hamaxpêr o pa kaxyw mẽ kām ujarênh o pa nē mẽ kām:

—E kêr ka mẽ mãmri Jejus kôt amnhĩ nhĩpêx mex rãhã ho ri apa nē aa hkaga hkêt nê. Anê.

³³ Hāmri nē mẽ hkôt ri pa hã apkati xohtô nê. Hāmri nē wa akupỹm Jerujarê hwỳr nojarêr nê mẽ kām amnhĩ jarê nhũm mẽ wa kuma nê wa kãm:

—Tôe. Nà wa mãmri ma akupỹm mō. Kojã Tĩrtũm war apumunh mex nê ka wa ma akupỹm amex nê akà hkĩnh pê akwỳjê hwỳr akato. Anê.

³⁴ Hāmri nhũm wa nojarêr tâ nhũm Siras tanhmã hamaxpêr to nê hitôt nê mẽ kuri arĩk nhũm Jut Pasapas pix ma akupỹm hkwỳjê kot mẽ hwỳr wa mẽnh xwỳnhjê hwỳr mō.

³⁵ Hāmri nhũm Pawre mẽ Panãpe wa Siras pyrã nê kormã ãxiok kamã pa. Hāmri nê Jejus kôt mẽ htô hkwỳjê mẽ pimràatã mẽ ahkre ho pa. Tĩrtũm kapêr o mẽ hkôt mẽ ahkre ho pa.

Pawre mẽ Panãpe wa kot axpêr pê pikjêr ã wa harênh

Atre 13.13; Korosê 4.10

³⁶ Hāmri nhũm Pawre mẽ Panãpe war arĩ mẽ hkôt ri pa hã apkati xohtô nê. Tãm nhũm Pawre hamaxpêr nê Panãpe mã:

—Kwa ma pu ma akupỹm ra pahte krĩ hkwỳ hkõt mẽ kãm Jejus jarẽnh o papa xwỳnhjê hkõt akupỹm mō. Pu ma mẽ hwỳr mō nẽ Jejus kõt pahtō nẽ pahtōxjê kot tanhmã ri amnhĩ nhĩpêx to hã mẽ omu. Anẽ.

³⁷ Hãmri nhũm kuma nẽ kãm:

—Tõe. Nà pu ma mō. Nom kêr pu ma amnhĩ kõt Juãw Makre ho mō kê axte pahto ajuta ho pahkõt mō. Anẽ.

³⁸ Hãmri nhũm Pawre tee ri kuma nhũm ja kêp omnuj nẽ nhũm kãm:

—Tk. Kwa na pre pahkõt pa htã Pãpir kamã tanhmã hamaxpêr to nẽ pahkaga nẽ ma akupỹm Jerujarê hwỳr mō. Jakamã kwarĩ koja axte pahkõt mōr kêt nẽ. Anẽ.

³⁹ Hãmri nhũm Panãpe tee ri hã hihtỳx no nhũm kêp hkaga kumrêx. Jakamã nhũm wa ja hã axpên pê axkjê nẽ ma ahpỳnhã mō. Nhũm Panãpe amnhĩ kõt Juãw Makre ho mō nẽ wa ma pàr kãm gô hipôk pê Sipre hwỳr wa mō.

⁴⁰ Nhũm Pawre axtem amnhĩ kõt Siras wỳ nẽ ma wa mō. Hãmri nẽ wa nojarêt nhũm Jejus kõt wa htōjaja wa ho Tĩrtũm wỳ nẽ kãm:

—Pa Tĩrtũm. E koja Pawre mẽ Siras wa ma krĩ hkwỳ hkõt mẽ kãm akapêr jarẽnh o ri wa pa. Jakamã kêr ka wa htãnopxar o ri wa hkõt apa. Anẽ.

Hãmri nhũm wa kato nẽ ma krĩ hkõt ri Jejus kapêr o mẽ ahkre ho wa pa.

⁴¹ Wa ma pyka pê Sir mẽ Siris kõt Jejus kõt mẽ htō nẽ mẽ htōxjê pumunh nẽ Jejus kõt mẽ ho mẽ hihtỳx o wa pa kaxyw.

16

Ximotre kot Pawre mẽ Siras wa hkôt ri pa hã harênh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupỹm krĩ pê Tepe hwỳr wa mō nẽ hwỳr pøj nẽ hpãnhã kurũm ma Risti hwỳr mō. Hãmri nẽ wa hwỳr pøj nẽ kamã Ximotre pumu. Ximotre na pre ra katorxà pyrà nẽ Jejus kôt amnhĩ xãm nhũm mẽ kot Jejus kôt axpẽn to htō xwỳnhjaja kãm hapê nẽ. Nẽ kot Jejus kapêr kôt amnhĩ nhĩpêx mex o pa hã axpẽn mã harê.

Krĩ pê Risti mẽ Ikõn kamã nhũm prem ã axpẽn mã Ximotre jarênh anhỹr o pa. Jakamã nhũm Pawre mẽ Siras wa mō nẽ mẽ hwỳr pøj nẽ Ximotre kot amnhĩ nhĩpêx ã omu nhũm Pawre kãm war amnhĩ kôt o mōr prãm nẽ. Nom Ximotre hkamrô pihkàr na pre. Katorxà kêp Ijaew nhũm hipêêxà kêp Gres jakamã nhũm ã Ximotre hkamrô pihkàr anê. Nhũm Ijaew kot katorxà hkôt kêp Ijaew ã omunh jakamã nhũm Pawre hamaxpêr nẽ mẽ kaxyw kêp my kwryt kà krãhta nẽ arĩ kormã mẽ hwỳr amnhĩ kôt o mō.

⁴ Hãmri nẽ mẽ ma krĩ hkwy hkôt mō. Mōõ nẽ Ijaew kêt xwỳnhjaja ra kot amnhĩ kaxyw Jejus kôt hamaxpêr xwỳnhjê jahkre ho mẽ hkôt pa. Ra Jeru-jarê kãm mẽ kot Jejus kwỳjê jahkre ho pa xwỳnhjê mẽ Jejus nhỹ hã mẽ ahkre xwỳnh maatijaja mẽ kot mẽ kãm mêmoj tã karõta nhũm mẽ ma mẽ kãm harênh o ri mẽ hkôt pa.

⁵ Hãmri nhũm mẽ kuma nẽ ra Jejus kôt amnhĩ nhĩpêx mex o mō. Hãmri nhũm apkati mẽ krĩ

nhõ xwỳnh kwỳjaja mẽ uràk nẽ Jejus kôt amnhĩ xunhwỳ. Jakamã nhũm mẽ ra ohtô rax o mỗ.

Pawre tanhmã hpimtir to hã harẽnh

Rõmãn 15.18-21

⁶ Tã nhũm Pawre mẽ Siras mẽ Ximotre mẽ ma pyka pê As wỳr nojarê. Mẽ kot mẽ kãm tanhmã Jejus jarẽnh to ho pa kaxyw mẽ hwỳr nojarê tã nhũm Tĩrtũm Karõ kormã mẽ nê mẽ hkurê. Jakamã nhũm mẽ hpãnhã ma pyka hkwyỳ pê Prik mẽ Karatas wa hkôt pa. Ixpê Rukre na pa pre mẽ hã ajêt nẽ ma mẽ hkôt ixpa ho ixpa.

⁷ Hãmri nẽ mẽ pyka pê Mĩs ã mỗ nẽ hpãnhã ma Pitĩn wỳr inhmõr mã tã no nhũm Tĩrtũm Karõ axte kê mẽ nê mẽ ixkurê.

⁸ Jakamã pa mẽ arĩ Mĩs jakàr ã mỗ nẽ gô xujanãr mỳ ri krĩ pê Tôx wỳr pôj.

⁹ Tã nhũm kamàt pa mẽ ixpiitã gõr nẽ inhĩkwỳ nhũm Pawre tanhmã hpimtir to. Nhũm xep pika pê Masetõn nhõ xwỳnhja mẽ amnhĩ wỳr hwỳr kãm hihtỳx o xa nhũm hprĩ hã omu nẽ kapẽr ma. Nhũm xep pre kãm:

—Pa Pawre? Kwa amnẽ Masetõn wỳr mẽ ixwỳr mỗ nẽ tanhmã mẽ ijahkre hto. Anẽ.

¹⁰ Hãmri nhũm Pawre hkrãkato nẽ mẽ inhmã hpimtir jarẽ. Pa mẽ kuma nẽ axpẽn mã:

—Tô kwa tokyx pu mẽ hwỳr. Tĩrtũm kot mẽ hwỳr mẽ parẽnh kẽnã. E pu mẽ ma mẽ hwỳr mỗ nẽ mẽ kãm Jejus jarẽnh o mẽ ahkre. Anẽ.

Hãmri nẽ amnhĩ to akuprõ nẽ mẽ hwỳr inhnojarê kurê kumrẽx.

Ritre kot Jejus kôt amnhĩ xãm ã harẽnh

Piripos 1.1

¹¹ Hāmri pa mẽ ma Masetõn wỳr mỗ. Tôx rũm ma pàr kãm hwỳr mỗ. Hāmri nẽ gô nhĩpôk pê Samõtas wỳr pôj nhũm mẽ hã pàr nhô. Hāmri nhũm apkati pa mẽ axte mỗ nẽ Masetõn kamã krĩ pê Nēap wỳr pôj.

¹² Hāmri nẽ pàr rũm ijapôj nẽ hpãnhã kurũm hamũ krĩ pê Pìripõs wỳr ixpar o mỗ. Pìripõsja Masetõn kamã krĩ maati na. Rõm nhõ xwỳnhjaja na prem ho kato. Jakamã pa prem ma hwỳr mỗ nẽ pôj nẽ tokyx axte kurũm nhỹhỹm inhmõr kêt nẽ.

¹³ Hāmri nhũm sap kato pa mẽ axpẽn mã:

—Kwa pyhti mỳri mãn hte Ijaewjaja axpẽn wỳr akuprõ nẽ Tĩrtũm mã amnhĩ jarẽnh o hkrĩ nà. E kwa pu mẽ hwỳr nẽ gô mỳri mẽ hapêr o ri papa. Anẽ.

Hāmri nẽ ma hwỳr mra nẽ mẽ hapêr o ri ixpa nhũm ãm mẽni pixjaja axpẽn wỳr akuprõ. Pa mẽ omu nẽ mẽ kuri ixkrĩ nẽ mẽ kãm Jejus kapêr jarẽnh o mẽ ahkre o ixkrĩ.

¹⁴ Nhũm mẽ kot mẽ inhmar o hkrĩ xwỳnhjê hõ pê Ritreja. Krĩ pê Xijaxir nhõ xwỳnh na pre. Nẽ kêp kupêxê mex o wẽnê xwỳnh. Na pre hte kãm Tĩrtũm prãm o pa. Jakamã nhũm Pawre kot mẽ ahkre ho ỳrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tỳx nẽ.

¹⁵ Hāmri nẽ amnhĩ kaxyw Jejus kôt hamaxpêr nẽ hkôt amnhĩ xãm kurê kumrêx. Õrkwỹ kamã hkwỳjê mẽ nhũm mẽ hkôt amnhĩ xunhwỳr pa. Jakamã pa mẽ kêp Jejus kwỳ hã mẽ hkrã kumrã. Mẽ piitã mẽ kot mẽ kêp Tĩrtũm kra hã mẽ omunh kaxyw. Hāmri nhũm Ritre amnhĩ kôt mẽ ixwỳ nẽ mẽ inhmã:

—An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mỗ nễ hpãnhã inhôrkwỹ kamã pôj nễ apa. Anễ.

Pa mẽ kuma nễ ma hkôt mỗ.

*Mẽ kot Pawre mẽ Siras wa haxàr ã mẽ harênh
Makre 1.23-26, 1.34*

¹⁶ Tã nhũm arĩgro hõ hã pa mẽ Tĩrtũm mã amnhĩ jarênh kaxyw axte pyhti mỳri mẽ pikuprõnh xàja wỳr mỗ. Hãmri nễ pry kamã mẽ kãm àpênh xwỳnh nija pumu. Ra mẽkarõmnuti kot tanhmã hkrã hto nhũm ỹ hã àhpumunh tỳx xwỳnhja. Nhũm hte mẽkarõmnuti nhỹ hã mẽ kãm mẽmo hkukamã tanhmã ujarênh to ho pa. Jakamã nhũm õ pa-trãwjaja kukwak ri ujamỳnh rũnh pê hkĩnh nễ pa.

¹⁷ Jakamã pa mẽ mỗ nhũm nija mẽ ixpumu nễ mẽ ixtã ajêt nễ ma mẽ ixkôt mỗ. Hãmri nễ mẽ kãm mẽ ijarênh o mẽ ixkôt mỗ nễ mẽ kãm:

—Xê mẽ mran jajê pumu. Na htem Tĩrtũm maati mã tanhmã amnhĩ nhĩpêx mex to ho pa. Tĩrtũm kot mẽ ate amnhĩ tomnuj pê tanhmã mẽ apytàr to hã mẽ amã ujarênh kaxyw na mẽ awỳr mra. Anễ.

¹⁸ Nễ ãm xatã mẽ kãm mẽ ijarênh o mẽ ixkôt paja o ra hã apkati xohtô nễ. Tã nhũm Pawre ra kãm mar kaga nễ nễ mẽkarõmnuti mã kapêr nễ kãm:

—Tk. Kwa kêp akato nễ ma tễ. Pa Jejus Kris nhỹ hã amã ixkapêr ka inhma nễ kêp akato nễ ma atêm kurê kumrêx. Anễ.

Hãmri nhũm kuma nễ kêp kato nhũm akupỳm tãm hkrã.

¹⁹ Jakamã nhũm õ patrãwjaja tee ri ja hã omu nễ gryk tỳx nễ axpên mã:

—Kwa ra mēkarōmnutijaja kēp kator jakamā koja axte mēmoj kukamā tanhmā ujarēnh to hkēt nē. Pu mē kukwak ri axte paxujamýnh kēt nē. Anē.

Hāmri nē Pawre mē Siras wa kamā gryk tỳx nē. Hāmri nē wa unē nē ma mē kot axpēn mar xà hã ixkre hwỳr wa hkjēnh o tē

²⁰ nē mē kot mē ho amnhĩptàr xwýnhjê mã tanhmā wa ho hêx to nē mē kām:

—Kwa mē amnē Ijaewja wa omu. Na hte wa mē panhō krĩ kamā hêx pix o pa nhũm mē tee ri wa kapēr ma nē wa kamā gryk tỳx nē.

²¹ Mē ixte amnhĩ nhĩpêx te kot axpēn pyràk kēt tã nhũm wa mē kot amnhĩ nhĩpêx o mē pajahkre kaxyw nhỹhỹnh mē pahwỳr mō. Nom mē pahpê Rōm nhō xwýnhjaja axtem mē pahte amnhĩ nhĩpêx kēnã kot pu kēt wa kuma nē wa kapēr kôt amnhĩ nhĩpêx. Anē.

²² Hāmri nhũm mē kuma nē piitã wa kamā gryk tỳx nē. Hāmri nhũm mē ho amnhĩptàr xwýnhjaja wa kēp wa ê kaxônh o hkapa nē wa hã mē õ pôristi mã amýnê nē mē kām:

—E mē ma wa o tē nē mē htak xà ho wa htak. Anē.

²³ Hāmri nhũm mē kuma nē ma wa o tē nē wa htak rax nē. Hāmri nē wa haxà nē mē hagiēnh xà jamār xwýnh mã kām:

—E kēr ka ja wa omunh mex nē kê wa kator kēt nē. Anē.

²⁴ Hāmri nhũm mē kuma nē wa o tē nē ixkre jatur xà kamā wa haxà nē wa kator pymaj hamē wa htem pĩ jaxà nē ho htỳx nhũm wa arĩ hte tỳx nē nhỹ.

²⁵ Tã nhũm kamàt. Nē kôt ã kamàt nhũm wa Tĩrtũm mã amnhĩ jarē nē mex o mex ã wa grer o

wa nhỹ nhũm wa uràk nẽ mẽ hagjênh xwỳnhjaja wa mar o hkrĩ.

²⁶ Puh nhũm pyka mẽ kãm htertet tỳx nẽ nhũm mẽ hã ixkreja amnhĩ to àpêr tỳx nẽ amnhĩ kahê xà rênh pa. Nhũm mẽ hagjênh xwỳnhjê kaxpre xà piitã mẽ nê pirênh pa.

²⁷ Hãmri nhũm mẽ hamãr o kuhê xwỳnhja pika tertet kamã ama nẽ hkrākato. Hãmri nẽ mẽ hã ixkre jakwakre kahê xà rênh parja pumu nẽ mẽ hagjênh xwỳnhjaja hapôx par ã mẽ hkamnhĩx nẽ tee ri amnhĩ kukamã hamaxpêr. Hãmri nẽ pahì kot mẽ hã hpĩr pymaj õ wapo kapa nẽ ra tãm kot ho amnhĩ pĩr kaxyw.

²⁸ Hãmri nhũm Pawre tee ri ja hã omu nẽ kàx pê kãm amỹra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhê. Na pa mẽ ixtõ ixkator nẽ ixprõt kêt nẽ. Anẽ.

²⁹ Hãmri nhũm kuma nẽ kanê hã ahwỳ nẽ kuwy nẽ mẽ hwỳr axà nẽ mẽ piitã mẽ omu. Hãmri nẽ Pawre mẽ Sirasja wa omu nẽ wa hwỳr kãm ma ho htertet o tẽ. Hãmri nẽ wa hã hpijaãm kaxyw wa kutã tẽm nẽ hkõnkrã ho nhỹ.

³⁰ Hãmri nẽ kànhmã xa nẽ wa ho kato nẽ ixkre kapem wa o xa nẽ wa kãm:

—Kwa tanhmã kot pa amnhĩ nhĩpêx to kê Tĩrtũm war apyrà nẽ ixte amnhĩ tomnuj pê ixpytà? Anẽ.

³¹ Hãmri nhũm wa kãm:

—Nà kot kaj amnhĩ kaxyw Jejus Kris kôt ajamaxpêr nẽ hkôt amnhĩ xãm nhũm Tĩrtũm ja hã apumu nẽ amnhĩ katut kôt ate amnhĩ tomnuj piitã rênh pa. Nhũm anhõrkwỹ kamã akwỳjaja apyrà nẽ

Jejus kôt amnhĩ xunhwỳ nhũm ã mẽ hipêx anẽ.
Anẽ.

³² Hãmri nẽ wa ma hkôt òrkwỹ hwỳr tẽ nẽ hprĩ hã mẽ kãm Tĩrtũm kapêr jarẽ nhũm mẽ wa mar o hkrĩ.

³³ Hãmri nhũm mẽ hagjênh xà jamãr xwỳnhja wa kãm wa htak xà kuhõ. Kormã kamàt kô hkwy kamã wa kãm kuhõ nẽ hkane. Hãmri nhũm wa mẽ kot Jejus kôt amnhĩ xunhwỳr par ã mẽ omu nẽ mẽ hkrã kumrã. Mẽ hamãr xwỳnh mẽ hkwyjê mẽ hkrã kumrãr pa.

³⁴ Hãmri nhũm mẽ kot amnhĩ kaxyw Tĩrtũm kôt hamaxpêr jakamã piitã hkĩnh nẽ. Hãmri nhũm mẽ hamãr xwỳnhja òrkwỹ hwỳr Pawre mẽ Siras wa o tẽ nẽ wa kãm õ nhũm wa apku nhũm ma akupỹm mẽ hagjênh xà hwỳr wa o tẽ nẽ akupỹm wa haxà.

*Mẽ kot Pawre mẽ Siras wa kãm urer ã mẽ harênh
Atre 22.25-29*

³⁵ Hãmri nhũm apkati nhũm krĩ pytãr xwỳnhjaja mẽ õ pòristi mã anẽ nhũm mẽ hagjênh jamãr xwỳnh wỳr tẽ nẽ kãm:

—E na mẽ papytãr xwỳnhjaja ate Pawre mẽ Siras wa kãm anhũrer nhũm wa mãmrĩ ma akupỹm htẽm kaxyw hã karõ. Anẽ.

³⁶ Hãmri nhũm mẽ kuma nẽ wa hwỳr axà nẽ wa kãm:

—E na krĩ pytãr xwỳnhjaja ixte war akator kaxyw war atã inhmã karõ. Jakamã e wa mãmrĩ axãmnhĩx ma mõi. Anẽ.

³⁷ Hãmri nhũm Pawre kãm:

—Nà wa ixte tanhmã amnhĩ tomnuj to hkêt tã nhũm mẽ kot wa ixpynênh nẽ wa ixtak. Wa ijaxwỳja wa ixpê Rõm nhõ xwỳnh tã nhũm prem axtem nẽ mẽ piitã mẽ noo mã wa ixtak nẽ wa ijaxà.

Mě kot amarĩ Rõm nhõ xwỳnh tak nẽ mẽ hagjênh kêt tã nhũm mẽ ã mẽ noo mã ã wa inhĩpêx anẽ. Kormã wa ixte tanhmã amnhĩ tã ixàprãr to hkêt tã nhũm mẽ ã wa inhĩpêx anẽ. Jakamã kwarĩ kot kaj mẽ no hkàx ã wa ixkator kêt nẽ. Kê mẽ kot wa ijaxàr xwỳnhjaja tãm man mra nẽ wa ixkator pa war arĩ ma mõi. Anẽ.

³⁸ Hãmri nhũm pôristija kuma nẽ ma akupỹm mẽ hwỳr mra nẽ mẽ kãm wa kapêr jarẽ. Hãmri nhũm mẽ tee ri mẽ uràn wa kêp Rõm nhõ xwỳnh ã wa harênh ma nẽ kãm ma htỳx nẽ.

³⁹ Hãmri nẽ ma wa hwỳr tẽ nẽ wa hwỳr axà nẽ wa kãm:

—Pa? E mãmrĩ war akato nẽ axàmnhĩx ma mõi. Na pa prem war anhĩpêx kati rax nẽ. Tã kêr ka wa axte ja mã ajamaxpêr hkêt nẽ. Kê ja ãm jar mẽ pakamã hapêx. Anẽ.

Hãmri nẽ wa kator nẽ wa kãm:

—E kwa wa mẽ inhõ krĩ pê akato nẽ ma nhỹhỹm mõi. Anẽ.

⁴⁰ Hãmri nhũm wa kuma nẽ kato nẽ ma akupỹm Ritre nhõrkwỹ hwỳr wa tẽ. Hãmri nẽ Jejus kôt wa mẽ htõjê pumu nẽ wa mẽ kãm amnhĩ jarẽ nẽ mẽ kãm:

—E kot paj hãmri wa mã mõi. Nom kêr ka mẽ arĩ Jejus Kris kôt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

Hãmri nẽ wa mẽ kurũm kato nẽ ma krĩ hõ hwỳr wa mõi.

17

*Tesarõn kamã mẽ kot wa kamã gryk ã mẽ harênh
Wam Tesarõn 1.1, 2.13-14*

1-2 Tã nhũm Pawre mẽ Sirasja wa ma krĩ hwỳ
 hkôt pa. Piripos rũm ma Apiporip mẽ Apôrõn kôt
 wa mõi hãmri nẽ ra Tesarõn wỳr wa pøj. Na pre
 hte Pawre nhỹri pøj nẽ Ijaew nhõ Tĩrtũm kapẽr o
 mẽ ahkre xà hã ixkre hwỳr agjẽ nẽ kamã mẽ kãm
 Jejus kapẽr jarẽnh o kuhê. Jakamã nhũm wa mõi
 nẽ Tesarõn wỳr pøj nẽ ixkre hwỳr mẽ hwỳr tẽ nẽ
 mẽ kãm ujarẽnh o xa. Nẽ mẽ kãm ujarẽnh o hã
 arĩgromnu pẽ sap o axkrunẽpxi.

³ Nẽ hprĩ hã mẽ kãm tanhmã Tĩrtũm kapẽr jarẽnh
 to nẽ mẽ kãm:

—Nà Tĩrtũm kapẽr ã kagà htũm kot mẽ pakaxyw
 ãm xwỳnh jarẽnh. Amnhĩ xà htỳx kamã hamak
 kãm htyk hãmri nẽ akupỹm htĩr ã nhũm kot
 hkukamã harẽnh. Tã na pre Jejusja ã amnhĩ
 nhĩpêx anẽ. Tãm kêp Krisja. Tĩrtũm kot mẽ
 pakaxyw ãm xwỳnhhta na. Anẽ.

⁴ Hãmri nhũm mẽ hwỳja kuma nẽ wa hkôt
 hamaxpẽr nẽ wa uràk nẽ Jejus kôt amnhĩ xunhwỳ.
 Ijaew kwỳjẽ nẽ Ijaew kêt xwỳnh kwỳjaja nẽ mẽni
 kot amnhĩ to rũnh xwỳnh kwỳjaja nhũm mẽ ohtõ nẽ
 amnhĩ kaxyw Jejus kôt hamaxpẽr nẽ hkôt amnhĩ
 xunhwỳ.

⁵ Tã nhũm Ijaew kwỳjaja tee ri hwỳ kot wa hkôt
 amnhĩ xunhwỳr ã mẽ omu nẽ mẽ hã Pawre mẽ
 Siras wa kamã gryk tỳx nẽ. Hãmri nẽ ma mra nẽ
 wa kaxyw mẽ kot amnhĩ tomnuj tỳx xwỳnh kwỳjẽ
 ho akuprõ nẽ mẽ kãm wa hã amỹnẽ. Jakamã nhũm
 mẽ ma kapẽr punuj pẽ wa hapêr o ri mra nhũm
 mẽ piitã mẽ omu nẽ mẽ kuma. Hãmri nhũm mẽ
 wa hapêr o ra Jasaw nhõrkwỹ hwỳr mra. Nẽ mẽ
 kot Pawre mẽ Siras pynênh nẽ ma mẽ utàr xwỳnhjẽ

hwÿr wa o htēm kaxyw mẽ kēp kahê xà mẽ nē mẽ hwÿr agjê.

⁶ Hāmri nē tee ri ōrkwÿ kamā wa hapêr nhũm wa kamā amrakati. Jakamā nhũm mẽ Jasāw mẽ kot Jejus kôt axpēn to htō xwÿnh kwÿjê pynê nē ma mẽ kot mẽ ho amnhĩptàr xwÿnhjê hwÿr mẽ o mra. Hāmri nē mẽ kām tanhmā Pawre mẽ Siras wa ho hêx to. Am kapêr punuj kām kàx pē mẽ kām wa harē nē mẽ kām:

—Kwa na hte Pawre mẽ Siras wa pyka piitā hkôt mẽ kām ri mẽmoj to hêx o pa. Tā wa ra mẽ panhō krī hwÿr pōj nē jar mẽ pamā ri tanhmā hêx to ho ri mẽ pahkôt pa.

⁷ Jasāw nhōrkwÿ kamā na pre wa pōj nhũm amnhĩ wÿr wa kuwÿ. Na hte wa hkôt mẽ hamaxpêr xwÿnhjaja pahihti Sesti kapêr kwÿm ri kuhpa hā kapêr o pa nē axtem nē mẽō pahi pē “Jesús” anhÿr xwÿnhja kapêr kôt amnhĩ nhĩpêx o pa. Anē.

⁸ Hāmri nhũm mẽ kot mẽ ho amnhĩptàr xwÿnhjê mẽ krī nhō xwÿnhjaja mẽ kuma nē gryk tÿx kumrêx.

⁹ Hāmri nē Jasāw mā kām:

—E kot paj mẽ apê mẽ akàxpore hkwÿ jamÿ. Ka mẽ ajapōj nē ma mẽ panê Pawre mẽ Siras wa hano nhũm wa kato nē ma mō pa rĩ akupÿm mẽ amā kugō. Anē.

Hāmri nē mẽ kēp mẽ hikàxpore hkwÿ jamÿ.

Pawre mẽ Siras kot Perej wÿr mōr ā wa harēnh

¹⁰ Tā nhũm ra kamàt nhũm mẽ kot Jejus kôt axpēn to htōjaja hāmri Pawre mẽ Sirasja wa ma krī pē Perej wÿr wa kumē. Hāmri nhũm wa kato nē ma hwÿr mō nē hwÿr pōj. Hāmri nē Ijaew nhō

Tĩrtũm kapẽr o mẽ ahkre xà hã ixkre hwỳr htẽm kurê kumrẽx nẽ wa axà.

¹¹ Perej kamã Ijaew na pre te mẽ kot Tesarõn kamã Ijaew pyræk kêt nẽ. Mẽ kurom mẽ kãm Tĩrtũm kapẽr mar prãm nẽ. Jakamã nhũm pre Pawre mẽ Siras Tĩrtũm kapẽr o mẽ ahkre ho pa. Apkati mẽ mẽ ahkre mex o pa nhũm mẽ wa kuma nẽ hkĩnh nẽ. Nẽ Tĩrtũm kapẽr ã kagà htũm kamã wa kot mẽ ahkreta japêr nẽ kamã omu nẽ axpẽn mã wa harẽnh o:

—Nà ãm hãmri na wa ã Tĩrtũm kapẽr o mẽ pajahkre anẽ. Tĩrtũm kapẽr ã kagà htũm hkôt na hte wa mẽ pajahkre. Anẽ.

¹² Hãmri nẽ ohtô nẽ Jejus kôt amnhĩ xunhwỳ. Ijaew kwỳ nẽ Ijaew kêt xwỳnh kwỳ nẽ mẽni kot amnhĩ to rũnh xwỳnhjaja nhũm mẽ ohtô nẽ Jejus kôt amnhĩ xunhwỳ.

¹³ Tã nhũm Tesarõn kãm Ijaewjaja Pawre jarẽnh ma. Kot Perej nhõ xwỳnhjê mã Tĩrtũm kapẽr jarẽnh o pa hã harẽnh ma. Hãmri nẽ ma mẽ hwỳr mra nẽ mẽ kãm tanhmã ho hêx to nhũm krĩ nhõ xwỳnhjaja mẽ kuma nẽ ra Pawre kamã gryk tỳx nẽ.

¹⁴ Jakamã nhũm Jejus kôt mẽ htõjaja mẽ harẽnh ma nẽ mẽ umaj Pawre kator nẽ ma gô xujanãr wỳr o mõi. No nhũm Siras mẽ Ximotre wa Perej kamã mẽ kuri arĩk.

¹⁵ Hãmri nhũm mẽ hkwỳjaja ma Pawre o mõi. Ma krĩ pê Atenas wỳr o mõi. Hãmri nẽ hwỳr o pøj nẽ kamã kure. Hãmri nẽ ra akupỹm Perej wỳr nojarêt nhũm Pawre mẽ kãm:

—E kêr ka mẽ ma akupỹm mõi nẽ Siras mẽ Ximotre wa kãm ijarẽ kê war amnhĩm nojarêt nẽ tokyx man ixkôt wa mõi. Anẽ.

Pawre kot Atenas nhõ xwỳnhjê mã kapêr ã harênh

Rõmãn 1.18-20

¹⁶ Tã nhũm Pawreja kormã Atenas kamã pa. Siras mẽ Ximotre wa kamã hamak o ri kormã kamã mẽ kot amnhĩ nhĩpêx ã mẽ omunh o pa. Na pre Atenas nhõ xwỳnhjaja sãnti ho ohtô rax nẽ mẽ õ krĩ kamã unhwỳ nhũm Pawre ri omunh o ri kuhê ho pa. Na pre htem ahpỳnhã mẽmo karõ nhĩpêxja o te Tĩrtũm nhĩpêx pyrà nẽ kutã hkõn krã ho rôrõk nẽ hkrĩ nẽ kãm mex o mex ã harênh o pa. Hãmri nhũm Pawre tee ri ja hã mẽ omunh o ri mẽ hkõt pa nẽ hkaprĩ nẽ.

¹⁷ Hãmri nẽ ma amnhĩ kwỳjê nhõ Tĩrtũm kapêr o mẽ ahkre xà hã ixkre hwỳr pa nẽ kamã mẽ ahkre ho kuhê. Ijaewjê mẽ Ijaew kêt xwỳnh kot Tĩrtũm ã hpijaàm xwỳnhjê mã nhũm Tĩrtũm kapêr jarênh o kuhê. Nẽ apkati mẽ mẽ kot mẽmoj tó wênê xà hwỳr mra nẽ mẽ ujaaprõr xwỳnhjê mã Tĩrtũm kapêr jarênh o kuhê.

¹⁸ Hãmri nhũm mẽ mar o pa. Atenas nhõ xwỳnhjaja na prem axpẽn kõt amnhĩ nhĩpêx o pa hkết nẽ. Mẽ hkwỳjaja kêp Epikure hkõt amnhĩ nhĩpêx xwỳnh. Nẽ mẽ hkwỳjaja axtem kêp Etok kõt amnhĩ nhĩpêx xwỳnh. Hãmri nhũm Pawre mẽ kãm Jesus kot tanhmã mẽ panê amnhĩ nhĩpêx to hã harênh o pa nẽ akupỹm hĩr ã harênh o pa. Hãmri nhũm mẽ tee ri kuma nẽ hã axpẽn kukjêr o kuhê nẽ axpẽn mã:

—Tk. Kwa mo na hte myti ata harênh o pa? Anẽ.

Nhũm mẽ hkwỳja mẽ kãm:

—Ko. Axtem mẽpahpãm õ na hte tanhmã harênh to. Anẽ.

19-21 Atenas nhõ xwỳnhjê mẽ axtem krĩ hõ nhõ xwỳnhjaja na prem kãm mẽ ujarẽnh nyw mar prãm nẽ. Jakamã nhũm prem mẽmojarẽnh nyw ma hãmri nẽ ãm axpẽn mã harẽnh pix o ri pa. Tã ra Pawre xujarẽnh nyw ma nẽ ma amnhĩ kôt mẽ kot axpẽn mar xà hã ixkre hwỳr o tẽ. Ixkre pê Areopja wỳr nhũm prem amnhĩ kôt o tẽ nẽ kãm:

—E kwa aprĩ hã mẽ inhmã ate mẽmojarẽnh nywta jarẽ pa mẽ ama. Mẽ inhmã mar prãm. Anẽ.

22 Hãmri nhũm mẽ kuma nẽ mẽ kãm ujarẽnh o xa. Mẽ kot axpẽn mar xà hã ixkre kamã Atenas nhõ xwỳnhjê mã awjarẽ nẽ mẽ kãm:

—E nà na ka htem anhõ mẽmo karõ nhĩpêx xohõtõta ã apijaàm pê kãm amnhĩ jagrer o ri apa. Pa hte ja hã mẽ apumunh o mẽ akôt ixpa.

23 Na pa ra mẽ anhõ sãnti piitã hkôt omunh o ri ixpa nẽ o mũj hõ kuhê xà kaprỳja wỳr ixkato. Nhũm himõk ã mẽmo karõ nhĩpêx amrakati nom à hã kagà kot:

MËPAHPÃM PUMUNH KÊT KUHÊ XÀ NA JA

Ã mẽ ate hã kagà kot anhỳr. Mẽ ate omunh kêt tã ka htem arĩ hã apijaàm o ri apa. No pa na ixte mẽhõja jarẽnh mar mex. Tã kot paj mẽ amã harẽ ka mẽ inhma.

24 —Mëpahpãm mẽ ate omunh kêt ã amnhĩ jarẽnhhta Tĩrtũm na. Tãm na pre pyka ho kato nẽ kamã mẽmojarẽnh ho kator pa. Gõ ho kato nẽ mry ho kato nẽ panhĩ ho kato. ãm mẽmojarẽnh ho kator par kumrêx. Na hte pika kamã nẽ kaxkwa kamã mẽmojarẽnh ho amnhĩptàr mex rãhã ho pa. Jakamã mẽmo kaxyw kot puj mẽ jar kãm õrkwỹ nhĩpêx?

Tām kêp mēmoj piitā ho kator xwýnh jakamā kot mēmoj to presija hkêt.

²⁵ Kêp mēmoj piitā hpām jakamā mēmoj piitā ò na. Jakamā tanhmā kot pu wem amnhĩ to nē kām mēmoj gō? Tām kot mēmoj piitā ho kator nē ho htĩr nē kot mēmoj piitā òr kênā kot puj kêt mē amnhĩ pyrà nē kām mēmoj gō.

²⁶ Na pre mē pahkukamā ahpýnhā mē pahpiitā mē papapxà jarē nē mē pakator hā arĩgro jarē. Na pre mē pahpām kot wa Atāwja nhĩpêx. Jakamā nhũm Atāw kêp mē pahpiitā mē pahpàr krax.

²⁷ —Tā mēmo kaxyw na pre ā Tĩrtũm mē panhĩpêx mex anē? Nā ām mē pahte amnhĩ kaxyw hkôt pajamaxpêr nē hkôt amnhĩ xunhwýr kaxyw na pre mē panhĩpêx. Ja mē pahpê hihtýx kêt. Koja mēhō kām Tĩrtũm prām nhũm amnhĩ tā omunh kurê kumrêx.

²⁸ —Nē Tĩrtũm pix kukwak ri na pu htem pahtĩr nē tanhmā amnhĩ nhĩpêx to ho ri papa. Mē akwý kot kagà jahkre xwýnhja na pre ja hā kagà nē hā kagà ho: “Mē pahpê mēpahpām kra na pu htem papa.” Anē. Ā hā kagà kot anhýr.

²⁹ —Tā ka prem amnhĩm mēmo karō nhĩpêx. ôr o hkwy nhĩpêx nē prat o hkwy nhĩpêx nē kên o hkwy nhĩpêx. Hāmri nē hipêx pa nē ho mēpahpām ā harē nē ri hā apijaàm o apa. No mē ām amnhĩ krā hkôt mē ate hipêx. Tĩrtũm te kot ja pyràk kêt.

³⁰ —Amnepêm mē pa xwýnhjaja na prem mē apyrà nē ā mēmoj nhĩpêx anhýr o pa nhũm Tĩrtũm ja hā mē omu nē ām mē omu nē hā tanhmā mē hipêx to hkêt nē. Kormā mē kot kapêr mar kêt jakamā nhũm pre ja hā mē omu nē ām mē omu. Tā

na ra mẽ pahte mẽmo karõ nhĩpêx o mẽpahpãm nê mẽ pamã kapêr. Mẽ pahte hpãnhã amnhĩ kaxyw ãm kôt pix mã pajamaxpêr o papaja na kãm hprãm.

³¹ Koja nhỹrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nẽ amnhĩ ri mẽ htĩr tũm nẽ mẽ pa ho pa xwỳnhjê jarẽ nẽ amnhĩ ri mẽ pa hkêt xwỳnhjê jarẽ. Na pre ra ã mẽ harênh anhỹr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupỹm ho htĩr. Nẽ akupỹm ho htĩr jao kot nhỹrmã kãm tanhmã mẽ pajarênh to xwỳnh ã ho amnhĩrĩt. Anẽ.

³² Nhũm pre ã Pawre mẽ kãm Tĩrtũm kapêr jarênh anẽ nhũm mẽ mar o kuhê. Kot mẽ kãm Jejus tyk nẽ akupỹm htĩr ã harê nhũm mẽ mar o kuhê. Nhũm mẽ hkwyjaja kuma nẽ ãm kuma nẽ axtem nẽ ri hã akunha. Nom nhũm mẽ hkwyjaja mẽ kurom mar tỳx nẽ Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarẽ pa mẽ ixprĩ hã mar mex nẽ. Anẽ.

³³ Hãmri nhũm Pawre akupỹm nhỹri hpôx xà hã ixkre hwỳr ma tẽ.

³⁴ Hãmri nhũm Xiônĩs pê Areop kãm mẽ kãm kapêr xwỳnh nẽ mẽhõ ni pê Tãmariis nẽ mẽ hkwyjaja kapêr mar tỳx nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. Hãmri nẽ Pawre kôt pa.

18

*Pawre Korĩt wỳr mõi ã harênh
Wam Korĩt 1.1-3*

¹ Tã nhũm Pawre krĩ pê Atenas rũm kato nẽ ma krĩ pê Korĩt wỳr mỗ nẽ pỏj.

² Hãmri nẽ nhỹri Akirti pumu. Haxwỳja kêp Ijaew. Krĩ pê Pỏt kamã na pre kato. Tã ma pyka pê Itar wỳr mỗ nẽ Itar kamã krĩ pê Rỏm kamã hpãnũa pa. Pa ho pa htã nhũm mẽ õ pahшти Krawti tanhmã hamaxpêr to hãmri nẽ mẽ amnhĩ nê Ijaew piitã mẽ hanor pa. Jakamã nhũm Akirti kato nẽ hprỏ Prisire mẽ wa ma Korĩt wỳr mỗ. Hãmri nẽ hwỳr pỏj nẽ kamã pa ho pa. Jakamã nhũm Pawre Korĩt wỳr pỏj nẽ wa omu

³ nẽ wa kuri pỏj nẽ wa hkỏt ri pa. Nẽ Siras mẽ Ximotre wa kamã hamak pê wa ãhkỏ hã àpênh o pa. Wa urỏk nẽ kupêxê pytĩ ho ixkre nhĩpêx nẽ ho wênhê ho ri wa hkỏt pa.

⁴ Hãmri nhũm sap kato nhũm ma Tĩrtũm kapêr o mẽ ahkre xỏ hã ixkre hwỳr pa nẽ kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwỳnhjê mã nhũm mẽ kãm ujarênh o hkrĩ. Nẽ mẽ kãm Jejus kot mẽ panê tanhmã amnhĩ nhĩpêx to hã harẽ.

⁵ Tã nhũm Siras mẽ Ximotre wa ma Masetỏn rũm Pawre wỳr mỗn pỏj. Jakamã nhũm Pawre axte ixkre nhĩpêx ã àpênh kêt nẽ. Pãnũa apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkỏt pa. Kêp Tĩrtũm kot mẽ pakaxyw ãm xwỳnh ã harênh o ri mẽ hkỏt pa. Xatã mẽ kãm ujarênh o pa.

⁶ Nom nhũm mẽ kãm mar prãm kêt nẽ kamã gryk kato nẽ kãm kapêr punuj nẽ. Nhũm Pawre tee ri amnhĩ tã mẽ kuma nẽ mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm

kêt nê. Nà mẽ kam nê mẽ mãmrĩ ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mẽ ate Tirtũm kapêr kaga kênã. Nà kot paj mẽ akaga nê ma hpãnhã Ijaew kêt xwýnhjê hkôt ri mẽ kãm ja jarênh o ri ixpa. Anê.

Hãmri nê kànhmã xa nê hinôkà kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê.

⁷ Hãmri nê ixkre rũm kato nê hijuk ri Ijaew kêt xwýnh pê Xijutre nhõrkwỹ hwýr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tirtũm mã hamaxpêr rãhã ho pa.

⁸ Tã nhũm Ijaew õ pê Kriptija hkwyjê rom amnhĩ kaxyw Pahihti Jejus kôt hamaxpêr nê hkôt amnhĩ xãm. Kêp Ijaew nhõ Tirtũm kapêr o mẽ ahkre xà hã ixkre kamã mẽ ahkre xwýnh na pre. Jakamã õrkwỹ kamã hkwyjê mẽ mẽ hpimràatã Pahihti Jejus kôt amnhĩ xunhwýr pa. Nê krĩja kamã ra Ijaew kêt xwýnh ohtô nê Kripti pyrã nê amnhĩ kaxyw Jejus kôt hamaxpêr nê hkôt amnhĩ xunhwý. Jakamã nhũm Pawre mẽ kêp Jejus kwýhã mẽ piitã mẽ hkrã kumrã.

⁹ Tã nhũm kamàt nhũm Pawre gõr nê nõ nê amýti nhũm kêwe Pahihti Jejus axte hwýr kato nê kãm kapêr nê kãm:

—Pa Pawre? E kwa kêr ka mãmrĩ axãmnhĩx ri atar mẽ kãm ijarênh rãhã ho ri apa nê amnhĩ kamã akahak o ri mẽ hkôt apa hkêt nê.

¹⁰ Kot paj atãnopxa nhũm mēhõ tanhmã ato hkêt nê. Krĩ ja kamã koja mẽ ohtô nê ixkôt amnhĩ xunhwý. Anê.

¹¹ Nhũm pre ã Pahihti Jejus Pawre hpimtir kãm kãm kapër anê. Jakamã nhũm Korît kãm arĩ ri mẽ hkôt pa ryy nê. Arĩ mẽ hkôt pa hã amgrà pyxi nê hkôt mytwrý kêp 6. Jao Tĩrtũm kapër o mẽ ahkre ho ri mẽ hkôt pa.

¹² Tã nhũm Korît nhõ xwýnhjê nhõ pika pê Gres kamã mẽ ho amnhĩptàr xwýnh nyw Gartija. Korît kãm pa jakamã nhũm Ijaew xàptàr tũmrejaja Pawre pynê nê ma hwýr o tẽ nê kãm tanhmã ho hêx to.

¹³ Jakamã nhũm Ijaew pikuprõnh xà hã ixkre kamã mẽ kãm kapër xwýnh Sostenesja Garti mã Pawre o hêx nê kãm:

—Kwa jahti na hte mẽ ixpê Ijaew kot amnhĩ nhĩpêx kwým ri mẽ ahkre ho pa. Jao mẽ ixte axtem nê tanhmã Tĩrtũm kôt ri amnhĩ nhĩpêx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anê.

¹⁴ Hãmri nhũm ra Pawre kot Garti mã amnhĩ jarênh mã tã nhũm Garti amnhĩ to wa nê hã mẽ kãm kapër nê mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harênh ronhỹx pa arĩ mẽ ama nê tanhmã mẽ amã hipêx to.

¹⁵ No xep ãm kot mẽ axàptàr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mẽ ate mẽ ahkre kuhpa hã kot ri mẽ ahkreja pix mýrapê na ka mẽ kamã agryk nê ã inhmã ho akapër anê. Nà kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xà hkôt tanhmã ho. Anê.

¹⁶ Hãmri nê amnhĩ nê mẽ hano.

17 Hāmri nhũm mẽ tee ri kuma nẽ ra Sostenes kamã gryk nẽ. Kot Garti mã tanhmã Pawre jarẽnh to htã nhũm kuma nẽ ãm mar jakamã nhũm mẽ hã Sostenes kamã gryk. Hāmri nẽ unê nẽ Garti noo mã htak o xa. Nẽ htak rax nẽ. Nom nhũm hã mẽ omu nẽ ãm mẽ omu nẽ nê tanhmã mẽ kãm nẽ hkêt nẽ.

Pawre kot akupỹm ãxiok wỳr mõi ã harẽnh

18 Tã nhũm Pawre arĩ Korĩt kamã mẽ hkôt pa nẽ gaa nẽ nojarêt nẽ Jejus kôt htõjê mã amnhĩ jarẽ nẽ mẽ kãm:

—E kot paj ma akupỹm pika pê Sir wỳr mõi. Anẽ.

Hāmri nẽ mẽ kêp kato nẽ ma hwỳr mõi. Nẽ ma amnhĩ kôt Akirti mẽ hprõ Prisire wa o mõi. Mõi nẽ krĩ pê Sẽnkrej wỳr pøj. Nhũm Pawre amnhĩ kukamã mẽmoj tã tanhmã Tĩrtũm mã amnhĩ jarẽnh to nẽ amnhĩ jarẽnh xà hkôt amnhĩ krã hkênh pa. Ijaew kot amnhĩ nhĩpêx xà hkôt ã amnhĩ nhĩpêx anẽ. Hāmri nẽ mẽ pàr wỳr agjê nẽ Sẽnkrej rũm kato nẽ ma Sir wỳr mõi.

19-21 Mõi nẽ krĩ pê Epes wỳr pøj. Hāmri nhũm Pawre mẽ hkwỳjaja pàr rũm hapøj nẽ krĩ hwỳr agjê nẽ Ijaew nhõ Tĩrtũm kapêr o mẽ ahkre xà hã ixkre hwỳr mra nẽ hwỳr agjê nhũm Pawre mẽ kãm Tĩrtũm kapêr jarẽnh o nhỹ. Hāmri nhũm mẽ kuma nẽ kãm mar prãm nẽ. Nẽ kãm:

—Kwa anojarêt kêt nẽ. Kritpêm mẽ ixkôt ri apa ryre nẽ Tĩrtũm kapêr o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

—Nà kot paj ma mõi. Nom koja Tĩrtũm nhỹrmã akupỹn mẽ awỳr inhmẽ pa man akupỹn mẽ awỳr mõi nẽ axte kapêr o mẽ ajahkre. Anẽ.

Hāmri nē ma mō. Ma Epes rūm pàr kām mō. Nom nhūm Akirti mē Prisireja wa Epes kamā arīk nē hpānhã kamā pa ho pa.

²² Tã nhūm Pawre krī pē Sejarej wỳr pōj. Hāmri nē hpānhã kurūm ma akupỹm Jerujarē hwỳr mō. Kot Jejus kôt htōjê pumunh mã ma mē hwỳr mō. Hāmri nē mē hwỳr pōj nē mē omu nē tanhmã mē kām amnhĩ jarēnh to nē mē kēp kato nē ma akupỹm ãxiok wỳr mō.

²³ Hāmri nē hwỳr pōj nē kamā mē hkôt ri pa ryy nē mē kurūm kato nē hpānhã ma akupỹm pyka pē Prik mē Karatas wa hwỳr mō. Nē kamā mē kot Jejus kôt amnhĩ xunhwỳr xwỳnhjê jahkre ho pa. Mē kot Jejus kôt amnhĩ nhĩpêx tỳx rãhã ho pa kaxyw mē hkôt mē ahkre mex o ri mē hkôt pa.

*Apor kot Epes kām Tĩrtũm kapēr jarēnh
Epes 1.1-2; Wam Korĩt 3.6-9*

²⁴ Tã nhūm Epes wỳr Ijaew õ pē Aporja mō nē hwỳr pōj. Krī pē Aresãn kamā na pre kato. Na pre hte amnhĩ kaxyw Tĩrtũm kôt pix mã hamaxpēr nē kapēr ã kagà htũm mar tỳx nē. Jakamã mē kām harēnh mex o pa nhūm mē piitã kām mar prãm nē.

²⁵ Nom kormã Jejus jarēnh jatur xà mar kêt jakamã ãm mē kām hkrax pix jarēnh o pa. Juãw Paxis kot tanhmã mē ahkre htoja nhūm mar tỳx nē. Nē tanhmã kot mē hkrã kumrãr to ho paja nhūm mããnēn mar tỳx nē. Jakamã na pre hte mē kām ja pix jarēnh o pa. No Jejus kēp Tĩrtũm kot mē pahwỳr mēnh xwỳnh ã harēnhja nhūm kormã mar kêt nē. Tã Epes wỳr mō nē pōj.

²⁶ Hāmri nē Ijaew nhõ Tĩrtũm kapēr o mē ahkre xà hã ixkre hwỳr axà nē kamā mē kām ujarēnh o

nhỹ. Amnhĩ kamã kahak kêt nẽ àmnhĩx ri mẽ kãm ujarẽnh mex nẽ. Hãmri nhũm Prisire mẽ Akirti wa kot mẽ kãm ujarẽnh ã kuma nẽ war axpẽn mã:

—Kwa mãn kormã Jejus jarẽnh piitã mar kêt. E pu amnhĩ kôt panhõrkwỹ hwỳr o tẽ nẽ pahprĩ hã kãm harẽnh jatur xàm kumẽ kê hprĩ hã mar pa. Anẽ.

Hãmri nẽ war amnhĩ kôt kuwỳ nẽ hprĩ hã kãm ujarẽnh jatur xàm kumẽ nhũm hprĩ hã harẽnh piitã mar tỳx nẽ.

²⁷ Tã ra pyka pê Gres wỳr nojarêt nẽ Jejus kôt htõjẽ mã amnhĩ jarẽ nhũm mẽ kuma nhũm ja mẽ kãm mex nẽ. Hãmri nẽ Gres kamã Jejus kôt mẽ htõjẽ mã kagà nhĩpêx. Apor kot mẽ hwỳr amnhĩ kôt o mõi nẽ mẽ kãm õr nhũm mẽ kot omunh nẽ kamã harẽnh nẽ ho mex kaxyw mẽ kãm hipêx. Hãmri nẽ hipêx pa nẽ kãm kugõ nhũm kupy nẽ mẽ kurũm kato nẽ ma mẽ hwỳr mõi. Hãmri nẽ mẽ hwỳr pøj. Gres nhõ xwỳnh kwỳjaja na prem ra Jejus kôt amnhĩ xunhwỳ. Tĩrtũm kot mẽ kutã nojarêt jakamã nhũm mẽ ra hkôt amnhĩ xunhwỳ. Jakamã nhũm Apor mẽ hwỳr pøj hãmri nẽ mẽ ãhkõ hã tanhmã mẽ ho ajuta hto ho pa.

²⁸ Nẽ xatã Ijaew mã tanhmã Jejus jarẽnh to kamã hihtỳx o mẽ hkôt pa nẽ mẽ kãm:

—Nà Jejusja tãm na pre Tĩrtũm mẽ pakaxyw ãm. Tĩrtũm kapêr ã kagà htũm kamã ã harẽnh kot anhỹr. Anẽ.

19

*Pawre akupỹm Epes wỳr mõi ã harẽnh
Rukre 3.15-16*

¹ Tã nhũm Apor kormã Korĩt kãm pa ri nhũm Pawre ma akupỹm Epes wỳr mō. Ma krãhakỳx kôt akupỹm hwỳr mō. Hãmri nẽ hwỳr pōj nẽ mẽ kot Jejus kôt amnhĩ nhĩpêx o mẽ pa xwỳnhjê pumu. Nhũm mẽ kormã Jejus jarẽnh jatur xà mar kêt nẽ.

² Jakamã nhũm Pawre mẽ hwỳr mō nẽ mẽ omu nẽ Tĩrtũm Karō hã mẽ hkukja nẽ mẽ kãm:

—Kwa mẽ ate Jejus kôt amnhĩ xunhwỳr xà hã arĩgrota ã xà na pre Tĩrtũm Karō mẽ akarō mã agjê? Anẽ.

Hãmri nhũm mẽ kuma nẽ kãm:

—Nà mẽ ixte Tĩrtũm Karō jarẽnh mar kêt. Anẽ.

³ Hãmri nhũm mẽ kãm:

—No mẽmoj kôt na prem mẽ akrã kumrã? Anẽ.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẽ.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapêr o: “Kot kaj mẽ mẽ ate amnhĩ tomnuj kaga nẽ hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapêr o pa. Nẽ mẽ kãm Jejus jarẽnh o: “Koja tokyx mẽhō ixkôt hapu hã mẽ pahwỳr kato nẽ tanhmã amnhĩ nhĩpêx to ho pa. Ka mẽ omu nẽ amnhĩ kaxyw hkôt ajamaxpêr nẽ hkôt amnhĩ xunhwỳ.” Anẽ. Tã Jejusja na pre ã mẽ kãm harẽnh anhỹr o pa. Anẽ.

⁵ Nhũm pre ã Pawre mẽ kãm Juãw Paxis mẽ Jejus wa harẽnh anẽ nẽ hpãnhã Jejus nhỹ hã mẽ hkrã kumrã.

⁶ Hãmri nẽ hpãnhã mẽ hã ìhkra jaxwỳ nhũm Tĩrtũm Karō mẽ hwỳr wrỳ nẽ mẽ hkarō mã gjêx pa. Hãmri nhũm mẽ ỹ hã ahpỹnhã axtem mẽ kapêr

kwỳ ho kapër nē ŷ hã Tĩrtũm mex o mex ã harēnh o kuhê.

⁷ Æ mẽ kot amnhĩ nhĩpêx anhỹr xwỳnhjaja kêp 12.

⁸ Tã nhũm Pawre Epes kãm Ijaew nhõ Tĩrtũm kapër o mẽ ahkre xà hã ixkre hwỳr mrrar ã mytwrỳ axkrunêpxi. Amnhĩ kamã kahak kêt nē hprĩ hã Ijaew mã hprĩ hã Jejus jarē nē mẽ kãm:

—E pa mẽ amã Jejus jarē ka mẽ inhma. Nà Tĩrtũm kot mẽ pahwỳr mēnh xwỳnhhta na. Nē mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamaxpër nē hkôt amnhĩ xunhwỳ nhũm Tĩrtũm ja hã mẽ apumu nē mẽ ato hkra. Anē.

Hãmri nhũm mẽ hkwỳjaja kuma nē hkôt hamaxpër kurê kumrêx.

⁹ Nom nhũm mẽ hkwỳjaja kuma nē ãm kuma nē Jejus o kapër punuj nē. Mẽ piitã mẽ noo mã kuhê nē ho kapër punuj tỳx nē. Nhũm Pawre tee ri ja mẽ omu hãmri nē mẽ kurũm kato. Mẽ pikuprõnh xà hã ixkreta rũm kato nē hpãnhã nhãm mẽ kot kãm “Xirãn kot mẽ ahkre xà hã ixkre” anhỹr xwỳnhja wỳr hpãnhã mō. Nē amnhĩ kôt mẽ kot Jejus kôt amnhĩ xunhwỳr xwỳnhjê ho pa nē hpãnhã ixkreta kamã mẽ ahkre ho pa. Apkati mẽ hwỳr mra nē mẽ ahkre.

¹⁰ Jao hã amgrà axkrut. Jakamã nhũm pyka pē As kamã mẽ piitã Pahihti Jejus jarēnh ma. Ijaew nē Ijaew kêt xwỳnhjaja nhũm mẽ piitã harēnh ma.

Wajaga hkwỳ jarēnh

¹¹ Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa.

12 Jakamã nhũm pre htem hwỳr mra nẽ kệp ê hkwỳ jamỳ nẽ ma mẽ à xwỳnhjê hwỳr o mra nẽ mẽ hã haxwỳ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỳnhjê hã nhũm prem mãânẽn mẽ hã ê kwỳ jaxwỳ nhũm mẽkarõmnutija mẽ kurũm hapôj nẽ ma mrrar kurê kumrêx nhũm mẽ akupỹm tãm hkrã.

13-14 Tã nhũm mẽõ patre maati Sewahtija hkra my kệp 7 nẽ piitã kệp wajaga. Hãmri nẽ mẽ kãm Pawre pyrã nẽ mẽ nê mẽkarõmnuti japôx o pa hprãm nẽ. Jakamã kormã Jejus kôt amnhĩ xunhwỳr kêt tã mẽ kot ỹ hã Pawre pyrã nẽ mẽhõ nê hkwỳ janor kaxyw nẽ kãm:

—E Pawre kot Jejus jarênh o ri pa xwỳnhta nhỹ hã kot paj amã ixkapêr. Jakamã e kwa tokyx myta rũm akato nẽ ma tẽ. Anẽ.

15 Hãmri nhũm mẽkarõmnutija mẽ kuma nẽ ãm mẽ kuma nẽ mẽ kãm:

—Tk. Mẽ apê Jejus mẽ Pawre wa hkwỳ hkêt tã mẽ nê ã mẽ inhmã akapêr anhỹr o apa. Nà Jejus mẽ hkwỳ pixjaja na htem Tĩrtũm nhỹ hã mẽ kệp mẽ ijapôx o pa. Mẽ apê mẽ hkwỳ hkêt kênã. Nà pa ixkatoore kaxyw ã. Anẽ.

16 Hãmri nhũm mẽkarõmnuti kot tanhmã ho xwỳnhta mẽkarõmnuti nhỹ hã wajagajê pynê nẽ mẽ htak rax o kệp mẽ ê kaxônh pa nhũm mẽ tee ri amnhĩ nhĩpêx. Hãmri nẽ hkênh nẽ õrkwỹ rũm hapôj nẽ ma umaj hprõt nẽ mra.

17 Hãmri nhũm Epes kamã mẽ piitã ã kot mẽ hipêx anhỹr ã mẽ harênh ma nẽ tee ri hamaxpêr nẽ kãm ma nẽ. Ijaew nẽ Ijaew kêt xwỳnhjaja nhũm mẽ piitã tee ri kãm hamaxpêr o pa. Nẽ Pahihti Jejus mã mex o mex ã harẽ.

18 Jakamã nhũm mẽ kot Jejus kôt amnhĩ xunhwỳr nyw xwỳnhjaja piitã tanhmã amnhĩ jarēnh to. Nē mẽ hkwỳjaja amnhĩ jarēnh o:

—Nà kormã ixte Jejus kôt amnhĩ xãm kêt ri na pa pre ã amnhĩ tomnuj anhỹr o ri ixpa. Tã Jejus kôt amnhĩ xãm hãmri nē axte ã amnhĩ nhĩpêx anhỹr kêt nē. Anē.

Nhũm mẽ hkwỳjaja kêp wajaga htã mẽ uràk nē Jejus kôt amnhĩ xunhwỳ hãmri nē amnhĩ jarēnh o:

—Nà ijaxwỳja kormã Jejus kôt amnhĩ xãm kêt ri na pa pre hte nē mẽ no kupy r nē mẽ y pix o ri mẽ hkôt ixpa. Tã Jejus kôt amnhĩ xãm hãmri nē axte ã amnhĩ nhĩpêx anhỹr kêt nē. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anē.

19 Hãmri mẽ õ wajaga xàhpumunh xà hã kagà jamỳ nē ma o mra nē kaxyw kuto nē kamã rēnh pa nē mẽ piitã mẽ noo mã ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhũm mẽ Jejus gryk ã hamỳ nē o mra nē ho hxêt pa nhũm hapêx.

20 Hãmri nhũm krĩ nhõ xwỳnhjaja ã mẽ kot amnhĩ nhĩpêx anhỹr ã mẽ omu nē ohtô rax nē mẽ uràk nē Jejus kôt amnhĩ xunhwỳ.

Pawre kot Rôm wỳr hkrà hã harēnh

Rõmã 1.13-15, 15.22-29

21 Tã nhũm Pawre ra akupỹm Jerujarē hwỳr nojarêt nē hamaxpêr o:

—E kot paj ixkato nē hpãnhã ma Masetõn mẽ Gres wa hkôt ma akupỹm Jerujarē hwỳr mō. Ma mẽ kot Jejus kôt amnhĩ xunhwỳr xwỳnhjê pumunh o mẽ hkôt mō. Hãmri nē Jerujarē hwỳr pôj nē kamã

tanhmã amnhĩ to hpa hãmri nẽ hpãnhã ma Rõm wỳr mỗ. Anẽ.

²² Hãmri nẽ hkôt ho ajuta ho wa pa xwỳnh Xi-motre mẽ Eras wa kãm amnhĩ jarẽ nẽ wa kãm:

—E kêr ka wa ma ixkukamã Masetõn wỳr wa mỗ. Kot paj kormã jar As kamã ixpa grire hãmri nẽ ma war akôt mỗ pu mẽ hamũ ma Jerujarẽ hwỳr mỗ. Anẽ.

Hãmri nhũm wa kuma nẽ kato nẽ ma hkukamã Masetõn wỳr mỗ.

*Mẽ kot sãnti hã Pawre mã àkjêr ã mẽ harẽnh
Sikũn Korĩt 1.8-9*

²³ Rõm nhũm Epes nhõ xwỳnhjaja tee ri Pawre kot tanhmã Pahihti Jejus jarẽnh to hã kuma nhũm ja mẽ kêp omnuj nẽ. Nhũm mẽ Jejus ã kamã gryk tỳx nẽ.

²⁴ Na prem amnhĩ kaxyw Tĩrtũm kôt hamaxpěr kêt nẽ. Na prem axtem sãnti ho mẽ hpãm nẽ amnhĩ to hwỳr pẽ hã hpijaàm nẽ kãm mex o mex ã harẽnh o pa. Mẽ õ sãntija ni Xiãnre na pre. Nhũm mẽ kãm ixkre nhĩpêx nẽ kamã hkarõ nhĩpêx xãm. Hãmri nẽ hwỳr akuprõ nẽ hã hkĩnh nẽ hkarõ hã hpijaàm nẽ kãm mex o mex ã harẽ. Nhũm pre hte Temếtja Xiãnre nhõrkwỹ karõ hkryre hkwỹ nhĩpêx nẽ mẽ kãm ho wẽnê ho pa. Prat o hipêx nẽ ho wẽnê ho pa. Jao ra hã mẽ àpênh xwỳnhjê mẽ nhũm mẽ kot haprõr xwỳnhjê kukwak ri kàxpore jamỳnh rũnh o pa.

²⁵ —Jakamã nhũm Pawre mẽ hwỳr mỗ nẽ pøj nẽ mẽ kãm Mẽpahpãm Tĩrtũm jarẽnh o ri mẽ hkôt pa nhũm Temết tee ri kuma nhũm ja kêp omnuj nẽ. Hãmri nhũm hamaxpěr nẽ mẽ kot urak nẽ Xiãnre

nhõrkwỹ karõ hkryre nhĩpêx nẽ ho wẽnê ho pa xwỳnhjê ho akuprõ nẽ mẽ kãm:

—E kwa mẽ inhma. Na pu htem mẽpanã Xiãre nhõrkwỹ karõ hkryre pãnhã kàxpore jamỳnh rũnh o papa.

²⁶ Tã mãn ka mẽ ra ham hpõx xwỳnh Pawreja pumu nẽ kapêr ma. Na hte jar mẽ panhõ krĩ kamã nẽ As piitã hkõt mẽ kãm mẽpanã Xiãre karõ nẽ mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhũm xep mẽ ohtô nẽ kuma nẽ ra hkõt hamaxpêr.

²⁷ —Kwa ja mex kêt. Koja mẽ kapêr ma nẽ hkõt amnhĩ nhĩpêx hãmri nẽ axte mẽ pahte ixkre karõ hkryre nhĩpêx xwỳnhhta japrõr kêt nẽ. Hãmri nẽ mẽ paxapênh o kapêr punuj nẽ. No ãm ja pix omnuj kêt. Koja mẽpanã Xiãre mã amnhĩ jarênh xà hã ixkreja kaga hpa. Nẽ haxwỳja karõja kaga. Mẽ piitã kãm hapê kênã. As kamã nẽ pyka piitã hkõt mẽ piitã kãm hapê nẽ hwỳr mra nẽ amnhĩ to hwỳr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nẽ axte kãm hamaxpêr kêt nẽ. Hãmri pu mẽ axte mẽ kukwak ri pakàxpore rax nẽ papa hkêt nẽ. Kwa tanhmã kot puj mẽ amnhĩ nhĩpêx to? Anẽ.

²⁸ Hãmri nhũm mẽ tee ri ã kapêr anhỹr ã kuma nẽ Pawre kamã gryk tỳx kumrêx. Nẽ gryk xàj kàx pêê kapêr nẽ xatã kapêr tỳx kãm kapêr punuj nẽ. Nẽ kapêr o:

—Xiãre na mex kumrêx. Kêp mẽ pahpê Epes nhõ xwỳnhjê nã maati na.

Anhỹr o kàxpêê kapêr o kuhê.

²⁹ Hãmri nhũm krĩ nhõ xwỳnh piitã mẽ kuma nẽ mẽ hwỳr hprõt nẽ haxwỳja gryk nẽ kàxpêê mẽ hkõt

ã harēnh anhÿr o kuhê. Hãmri nē gryk xàj Pawre hkôt ri wa pa xwÿnhja wa unê nē ma mẽ kot axpēn mar xà hã ixkre hwÿr wa hkjēnh o tē. Masetōn nhō xwÿnh wa kēp Gajore mẽ Aristakja nhūm mẽ wa unê.

³⁰ Hãmri nhūm Pawre mẽ kot wa unēnh ã mẽ omu nē tee ri wa hkukamã hamaxpēr nē mẽ hkôt hprôt nē mẽ kãm tanhmã kapēr to kaxyw nom nhūm mẽ kot Jejus kôt amnhĩ xunhwÿr xwÿnhjaja ja nē kãm kapēr kãm hihtÿx nē.

³¹ Hãmri nhūm As kamã mẽ kot mẽ ho amnhĩptār xwÿnh kwÿjaja ã mẽ kot amnhĩ nhĩpēx anhÿr ã mẽ omu nē Pawre hwÿr hpēr mẽ. Mẽ kãm hkĩnh jakamã kot mẽ hkôt htēm nhūm mẽ kot hpĩr pymaj hwÿr hpēr mẽ nē mẽ hkôt htēm nē hkurê kamã hihtÿx nē.

³² Rôm nhūm mẽ piitã mẽ kot axpēn mar xà hã ixkre hwÿr pikuprōnh pa nē kàx pē kapēr punuj o kuhê. Nom axpēn kôt kapēr kêt nē. Æm axpēn kwÿm ri kàx pē tanhmã kapēr punuj to ho. Nhūm mẽ hkwyjaja hprĩ hã mẽ mar kêt tã amarĩ amnhĩ krã hkôt kàx pē kapēr punuj nē.

³³ Nhūm Ijaew kwÿjaja tee ri ja hã mẽ omu nē axpēn mã:

—Tk. Kwa okora. Koja mẽ nã Xiānre hã gryk hãmri nē tanhmã mẽ pahpê Ijaew to nà? Anē.

Hãmri nē hamaxpēr nē mẽ hwÿr amnhĩō pē Aresānja mẽ nē kãm:

—Kwa ma mẽ hwÿr tē nē mẽ kãm tanhmã mẽ pahtã axàprār to. Pawre kēp mẽ pahkwÿ htã tām na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nē. Anē.

Hāmri nhũm mẽ kuma nẽ mẽ hwỳr tẽ nẽ xa nẽ tee ri kot mẽ ho hpinhkrênh kaxyw kànhmã mẽ kãm ìhkra pěr kaprỳ.

³⁴ Nhũm mẽ omu nom hpinhkrênh kêt nẽ arĩ kàx pêu kapěr punuj ã 2 or. Nẽ kàx pêu kapěr o:

—Mẽpanã Xiănreja mex o mex. Kêp mẽ pahpê Epes nhõ xwỳnhjê nã mex na. Anẽ.

³⁵ Tã nhũm mẽ õ pahi nhõ kôwenatô jatã tanhmã Epes nhõ xwỳnhjê ho hpinhkrênh to hāmri nẽ ja nẽ mẽ kãm kapěr nẽ mẽ kãm:

—Kwa mẽ anhĩkrê. Mẽ piitã kot Xiănre mex o mex ã omunh kênã. Nẽ mẽ pahpê kãm amnhĩ jarênh xà hã ixkre jamār xwỳnh ã mẽ kot mẽ pahpumunh mex. Nẽ kaxkwa rũm karõ kot mẽ pahwỳr tẽm nhũm mẽ pahpê hamār o papa xwỳnh ã nhũm mẽ kot mẽ pahpumunh mex.

³⁶ Jakamã mēhõ kot kêt we mẽ pahpê hamār xwỳnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhĩkrê nẽ ri ã akapěr anhỹr kêt nẽ.

³⁷ No mẽ ate wa unênh nẽ amnhĩ kôt wa ho atẽm xwỳnhhta wa. Wa kot tanhmã mẽpanã Xiănre ho kapěr punuj to rỳ kêp õ ixkre kamã àhkĩnh kêt tã ka mẽ amarĩ wa unê nẽ amnẽ amnhĩ kôt wa o tẽ.

³⁸ —Kwa kê Temêt mẽ hkwyjaja kãm tanhmã wa ho kapěr to hprãm nẽ ma pahihti hwỳr wa o tẽ nẽ kumã măn tanhmã wa ho kapěr to. Mẽmoj tã axpẽn mã mẽ kapěr xà hã arĩgrota ãã.

³⁹ Rỳ ka mẽ amã mẽmoj jarênh prãm nẽ arĩgroja ã măn rĩ kormã mẽmoj jarê.

⁴⁰ No jarãhã mẽ ate amnhĩ nhĩpêxja te mẽ ate pahihti kutã amnhĩ xunhwỳr nẽ ho akapěr punuj pyræk. Kojã Rõm nhõ xwỳnhjê nhõ pahi mẽ ajarênh

ma hãmri nẽ mẽ ate kamã agryk ã amnhĩ kamnhĩx. Hãmri nẽ mẽ atã ixkukja pa tanhmã kãm mẽ ajarẽnh to? Mẽhõ nhỹ hã na ka mẽ ã apikuprõnh nẽ amnhĩ nhĩpêx anẽ? Nà amnhĩ krã hkõt na ka mẽ akuprõ nẽ ã amnhĩ nhĩpêx anẽ. Anẽ.

⁴¹ Hãmri nẽ mẽ kãm kapêr pa nẽ mẽ hano nhũm mẽ anhgrà nẽ ma akupỹm õrkwỹ hwỳr hapêx.

20

Pawre ma Masetõn mẽ Gres wa hwỳr mõi ã harẽnh

¹ Hãmri nhũm Pawre ra nojarêt. Jerujarẽ hwỳr mõi mã nom kormã pika pê Masetõn kumrêx wỳr mõi nẽ kurũm ma akupỹm Jerujarẽ hwỳr mõi mã. Hãmri nẽ nojarêt nẽ mẽ kot Jejus kõt amnhĩ xunhwỳr xwỳnhjê ho akuprõ nẽ mẽ kãm amnhĩ jarẽ nẽ mẽ kãm:

—E kot paj ma mõi. Nom kêr ka mẽ arĩ ixwakre kamã Tĩrtũm kapêr kõt amnhĩ nhĩpêx mex rãhã ho ri apa nẽ aa hkaga hkêt nẽ. Anẽ.

Hãmri nẽ mẽ kãm:

—E mẽ mãmrĩ ixwa kre kamã axãmnhĩx aja-makêtkati nẽ ri apa. Anẽ.

Hãmri nẽ kato nẽ ma Masetõn wỳr mõi.

² Nẽ hwỳr pøj nẽ kamã krĩ hkwy hkõt mõi nẽ nhỹri mẽ kot Jejus kõt amnhĩ xunhwỳr xwỳnhjê pumu nẽ Tĩrtũm kapêr o mẽ ahkre. Mẽ kot hkõt amnhĩ nhĩpêx mex nẽ kãm hprãm xà hkõt pix mã amnhĩ nhĩpêx kaxyw mẽ kãm kapêr o ri mẽ hkõt pa. Hãmri nẽ kato nẽ ma mõi nẽ pyka pê Gres wỳr pøj.

³ Nẽ kamã mẽ hkõt pa hã mytwrỳ axkrunẽpxi hãmri nẽ akupỹm pyka pê Sir wỳr nojarêt. Nẽ ma

pàr kãm hwỳr mōr kaxyw nē amnhĩ tã Sir kamã ljaew kwỳ kot tanhmã harēnh to hã amnhĩ jarēnh ma. Na prem ra hã axpēn mã amỹnē nē axpēn mã:

—E koja amnē mẽ pahwỳr mō pu mẽ nhỹri omu nē hpĩr kurê kumrēx. Anē.

Hãmri nhũm Pawre amnhĩ tã mẽ kapēr ma nē pàr kaga nē mẽ hwỳr mōr kêt nē. Hãmri nē awjanã nē Jerujarē hwỳr Masetōn kamã pa.

⁴ Nhũm Jejus kôt htō hkwỳjaja ma hkôt mō. ã mẽ hixi kot anhỹr.

Perej nhõ xwỳnh Sopatōja. Piro hkra na pre.

Nē Tesarōn nhõ xwỳnh Aristak mẽ Sikũn wa.

Nē Tepe nhõ xwỳnh Gajoreja.

Nē As nhõ xwỳnh Xikitre mẽ Torow wa.

Nē Ximotreja.

Jajaja na prem ma Pawre hkôt Jerujarē hwỳr mō.

⁵ Nē pa ixpê Rukre ixte mẽ amã ja jarēnh nē hã kagà xwỳnhja na pa axte Pawre hã ajêt nē hkôt mō. Jakamã nhũm jajaja piitã ma wa ixkukamã Tôx wỳr mō nē kamã wa ixkãm hamak o pa.

⁶ Tã pa wa ma krĩ pê Piripos rũm ixkato nē pàr kãm ma mẽ hkôt mō. Arĩgro pê Pas jakành mê ma mẽ hkôt mō.

Tã wa ixtã arĩgro pê 5 nē mẽ hkôt Tôx wỳr pøj nē kamã mẽ omu nē mẽ hkôt ixpa hã ixtã ù semãn.

Pawre kot akupỹm Exik o htĩr ã harēnh

Juãw 5.21; Atre 9.36-43

⁷ Tã nhũm sap nē kamàt pa mẽ kot Jejus kôt amnhĩ xunhwỳr xwỳnhjê hkôt akuprõ nē axpēn kutã apku nhũm Pawre mẽ kãm kapēr. Ra apkati hkôt mẽ inhnojaret kaxyw jakamã nhũm mẽ kãm

Tĩrtũm kapẽr jarẽnh ryy nẽ. Ra kõt ã kamàt nhũm arĩ mẽ kãm harẽnh o nhỹ.

8-9 Ixkre hprêk axpẽn nhĩpy axkrunẽpxi nhĩtep xà kamã na pa prem akuprõ nẽ mar o ixkrĩ. Ixkreja kamã kanê ohtõ nẽ hpõk o harir. Jakamã nhũm Pawre arĩ mẽ kãm ujarẽnh o nhỹ nhũm mẽhõ xàptàr nyw Exikja ra õtxwa htỳx nẽ mẽ ixkuri õt o nhỹ. Janere hã õt o nhỹ. Tã ra gõr nẽ janere pẽ kato nẽ ahparmã tẽ nẽ pykap tẽm. Pa mẽ tee ri omu nẽ ahparmã hwỳr ixprõt nẽ wrỳ nẽ omu nhũm htyk mex nẽ nõ. Kỳj rũm ahpar mã htẽm ryy jakamã htyk mex nẽ nõ. Hãmri nhũm hkwyjaja tee ri omu nẽ hkaprĩ htỳx nẽ kumỳ nẽ mỳr o hkrĩ.

10 Hãmri nhũm Pawre mẽ ixkõt wrỳ nẽ hwỳr tẽ nẽ htyk ã omu nẽ kumỳ nẽ mẽ kãm:

—E mẽ amỳr kêt nẽ. Ra htyk tã koja Tĩrtũm akupỹm mẽ pamã ho htĩr.

Anhỹrja kõt nhũm akupỹm htĩr.

11-12 Hãmri nhũm mẽ akupỹm htĩr ã omu nẽ hkĩnh tỳx kumrẽx. Hãmri pa mẽ akupỹm kỳx pẽ ixkre hwỳr api nhũm Pawre mẽ inhmã pãwti hkwy nhĩrẽ nẽ mẽ inhmã kugõ pa mẽ Jesus kot mẽ panê htyk mã ijamaxpẽr pẽ kuku. Hãmri nhũm Pawre axte mẽ kãm kapẽr o ỳr rãhã nhũm myt kato pa mẽ kęp anhrã nẽ ma ixpa.

Pawre Mĩrêt wỳr mõi ã harẽnh

13 Hãmri pa mẽ inhnojarêt nhũm Pawre mẽ ixte hkõt mẽ inhmõi xwỳnhjẽ mã:

—E kër ka mẽ ma pàr kãm ixkukamã mõi. Kot paj ahte ma kỳx pẽ mẽ akõt ixpar o Asõt wỳr mõi. Hãmri nẽ hwỳr põi nẽ mẽ anhõ pàr mã axà pu mẽ ma pahpimràatã ma hamũ mõi. Anẽ.

14 Hāmri pa mẽ kuma nẽ ma mō nẽ mẽmo arĩgro hã Asôt kamã axpẽn wỳr pøj. Hāmri nhũm Pawre mẽ ixkôt pàr wỳr axà pa mẽ ma krĩ pê Mĩtirẽn wỳr mō.

15 Nẽ hwỳr pøj nẽ kurũm kormã mō nhũm apkati pa mẽ gô hipôk pê Kiw jakrenh o mō. Nẽ hakre nẽ mō nhũm apkati pa mẽ gô hipôk pê Sãm wỳr pøj nẽ hã pàr nhô. Hāmri nhũm apkati pa mẽ axte mō nẽ Mĩrêt wỳr pøj.

16 Nom nhũm ra Pawre nojarêt nẽ. Kãm tokyx As rũm kator nẽ Jerujarê hwỳr mōr nẽ tokyx hpôx prãm nẽ. Kãm mẽ hkĩnh pê Pêtekos xwỳj ri hwỳr hpôx prãm jakamã nojarêt tỳx pa mẽ Epes wỳr inhmōr kêt nẽ.

Pawre kot Epes kamã Kris kwỳjê mã amnhĩ jarẽn

17 Tã pa mẽ Mĩrêt wỳr pøj nhũm Pawre amnhĩ wỳr Epes wỳr Jejus kwỳ jahkre ho mẽ pa xwỳnhjê hã karō.

18 Hāmri nhũm mẽ man mẽ ixwỳr mō nhũm Pawre mẽ omu nẽ mẽ kãm amnhĩ jarẽ nẽ mẽ kãm:

—Nà ixte mẽ amã amnhĩ jarẽnh kaxyw na pa mẽ atã karō. Ra mẽ ate tanhmã ixte amnhĩ nhĩpêx to hã ixpumunh mex. Wam mẽ awỳr As wỳr ixpôxta ã ka prem aprĩ hã ixpumunh mex nẽ.

19 Na pa pre mẽ akôt ri mẽ amã tanhmã amnhĩ nhĩpêx to ho ri ixpa. Te ixpê mẽ amã ixàpênh xwỳnh pyràk. Nẽ Pahihti Jejus mã tanhmã amnhĩ nhĩpêx to ho ri mẽ akôt ixpa. Nẽ ixkwỳ Ijaew kwỳ kot Jejus kapêr kaga hã mẽ omu nẽ ixkaprĩ nẽ inhmỳr o ixpa. Nhũm prem Jejus ã ixtomnuj pa amnhĩ xà htỳx kamã ijamak o ri mẽ hkôt ixpa.

20 Nom arĩ ri Tĩrtũm kapēr o mẽ ajahkre ho ri mẽ akõt ixpa rãhã nẽ aa hkaga hkêt nẽ. Mẽ anhõrkwỹ kamã nẽ mẽ ahkre xà hã ixkre kamã. Mẽ ate tãm amnhĩ nhĩpêx prãm xàj pa pre ã mẽ ajahkre mex anhỹr rãhã ho ri mẽ akõt ixpa.

21 —Nẽ mẽ ixpê Ijaewjê mẽ mẽ apê Ijaew kêt xwỳnhjê mẽ pa pre mẽ ajahkre ho xypên pyræk. Mẽ apiitã mẽ ate amnhĩ tomnuj kaga nẽ hpãnhã Tĩrtũm kõt amnhĩ nhĩpêx kaxyw. Nẽ amnhĩ kaxyw mẽ panhõ Pahihti Jejus Kris kõt ajamaxpêr kaxyw na pa pre mẽ akõt ri mẽ ajahkre rãhã ho ri ixpa.

22 —Tã ra Tĩrtũm Karõ kot akupỹm Jerujarẽ hwỳr inhmẽnh jakamã pa kormã hwỳr mõi. Kot paj hwỳr pøj nhũm krĩ nhõ xwỳnhjaja Jejus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt.

23 Ja pix na ixte omunh. Na pa hte nhỹri pøj nhũm htem Jejus ã ixpynê nẽ mẽ hægjênh xà kamã ijagjê nẽ tanhmã inhĩpêx to. Tĩrtũm Karõ na pre ra ã mẽ kot inhĩpêx anhỹrja kukamã inhmã mẽ harẽ. Jakamã ixte amnhĩ kukamã amnhĩ tã ixàhpumunh mex. Kot paj xep akupỹm Jerujarẽ hwỳr pøj nhũm mẽ ixpumũ nẽ Jejus ã tanhmã inhĩpêx to.

24 Tã no pa amnhĩ kamã ixkahak kêt o inhmã mẽ uma hkêt nẽ. Kojã mẽ kãm ixpĩr prãm nẽ mãmrĩ ixpĩ. Inhmã ixyk pyma hkêt. ãm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tĩrtũm kãm mẽ pajapê hã kot mẽ pahto mex prãm xàj mẽ pahwỳr Kra Jejus mẽnh nhũm mẽ panê tanhmã amnhĩ nhĩpêx to hã harẽnhja na inhmã mẽ piitã mẽ kãm harẽnh jatur xàm mẽnh prãm.

25 —Tã e ixkràmnhwỳjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhĩ nhĩpêx mex rãhã ho ri apa kaxyw. Tã kot puj pẽr mẽ axte axpẽn pumunh kêt nẽ.

26-27 —Na pa pre ra mẽ amã Tĩrtũm kapẽr piitã harẽn pa. Mẽ ate mar tỳx nẽ hkôt pix mã amnhĩ nhĩpêx o apa kaxyw. Jakamã koja mẽ anhõ krĩ nhõ xwỳnhjê hõ amnhĩ kaxyw Jejus kôt hamaxpẽr prãm kêt nẽ rĩ tãm. Kwãr mãmri kot amnhĩ tomnuj kamã ty nẽ arĩ tãm amnhĩ pumu no ãm kê amnhĩ tã tanhmã inhmã nẽ hkêt nẽ.

28 —E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nẽ mẽ kot Jejus kôt amnhĩ xunhwỳr xwỳnhjê jamãr mex o ri apa. Ja kaxyw na pre Tĩrtũm Karõ mẽ kaxyw mẽ axunhwỳ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwỳnh kot ôwêhti jamãr mex o ri pata pyrãk.

29 —Kot paj ma mỗ nhũm mẽmojjaja ixpãnhã mẽ awỳr pỏj nẽ mẽ ate Jejus kaga hprãm xỏj tanhmã mẽ amã hêx to ho ri mẽ akôt pa.

30 Nẽ mẽ akwỳjaja mẽ urà nẽ tanhmã hamaxpẽr punuj to nẽ mẽ ate Jejus kaga hprãm xỏj hêx rom tanhmã mẽ amã kapẽr to ho ri mẽ akôt pa.

31 Jakamã kwa mẽ o kora. Kêr ka mẽ axkãm ajamak rom nẽ ri apa. Kê jajaja nhỹrmã ã mẽ amã kapẽr anê ka mẽ ama nẽ mẽ hkôt ajamaxpẽr kêt nẽ. Mẽ ate mẽ mar nẽ mẽ hkôt ajamaxpẽr pymaj na pa pre mẽ akôt ri mẽ ajahkre ho ri ixpa hã ixtã amgrà axkrunêpxi. Arĩgro hã nẽ kamàt kãm mẽ ajahkre rũnh o ri ixpa. Nẽ mẽ ate mẽ amã mẽ hêx

xwÿnhjê hkôt amnhĩ xunhwÿr pymaj mẽ ajahkre pê te inhmÿr pyrək o ri mẽ akôt ixpa.

32 —E kot paj Tĩrtũm nhĩhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã nojarêt rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nê. Hãmri nhũm nhỹrmã Tĩrtũm mẽ pahpê hkrajê piitã tanhmã mẽ pahto mex to.

33 —Na pa pre mẽ akôt ixpa ry htã no ãm aa mẽmoj tã mẽ awÿr kêt nê. Mẽ axê hkwÿ hã mẽ awÿ rÿ mẽ akàxpore hã mẽ awÿr o ri ixpa hkêt nê.

34 Na pa pre amnhĩ pa kukwak ri amnhĩm ixu-japrôr pê ixàpkur o ri mẽ akôt ixpa. Nê ixkôt mẽ pa xwÿnhjê mã ixujaprôr o ri ixpa. Ra mẽ ate ja hã ixpumunh mex.

35 —Tã mẽmo kaxyw na pa pre ã mẽ akôt amnhĩ nhĩpêx anhÿr o ri ixpa? Nà mẽ ate ja hã ixpumunh nê ixpyrà nê ã amnhĩ nhĩpêx anhÿr o ri apa kaxyw. Nê ixpyrà nê tanhmã mẽ kute xwÿnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhĩm apy nê akĩnh nê. Nom kot kaj kam nhãm mẽhõ mã mẽmoj gõ hãmri nê akĩnh tÿx o ate mẽhõ mã mẽmoj nhõrta jakre.” Anê.

36 Na pre ã Pawre mẽ kãm ujarênh anhÿr pa hãmri pa mẽ ra inhnojarêt. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wÿ.

37-38 Hãmri nhũm mẽ piitã kãm Pawre hkĩnh tÿx jakamã mÿr rax o kuhê. Tee ri kot axte mẽ kot axpên pumunh kêt ã mẽ kãm amnhĩ jarênhja ma nê hkaprĩ htÿx nê. Nê hkaprĩ xà kahti hkôt hamÿ nê

mur. Hāmri nē ma Jerujarē hwỳr hkujaêk kaxyw mē ixkôt pàr wỳr hkaprĩ nē mē ixkôt mỳr o mō.

21

Pawre kot Jerujarē hwỳr hpôx ã harēnh

¹ Tã pa mē gô mỳri Jejus kôt mē ixtôjê re nē pàr krem agjê nē axte mō. Ma gô hipôk pē Kosti hwỳr ixkatàt kôt mō nē hã ajêt. Hāmri nhũm apkati pa mē axte hamũ mō nē hpãnhã gô hipôk pē Roxti hwỳr mō nē hwỳr pôj nē hã pàr xi. Hāmri nē hpãnhã axte krĩ pē Patar wỳr mō.

² Hāmri nē hwỳr pôj nē pàr rũm ijapôj nē pàr õ pumu. Nhũm ra pyka pē Wēnĩs wỳr nojarêt pa mē hwỳr agjê nē ma kamã axte mō.

³ Mõõ nē amỳm amnhĩ kukamã gô hipôk pē Sipre pumu. Hāmri nē upôk rũm hakrenh mã mō nē pyka pē Sir wỳr mō nē kamã Xir hwỳr pôj nē hã pàr nhô. Pàr pãm kot krĩ kamã pàr kukrêx rer kaxyw pa mē kormã hã ajêt nē tokyx axte nhãm inhmõr kêt nē.

⁴ Hāmri pa mē kutêp api nē krĩ kamã mē kot Jejus kôt axpên to htõ nē htõx xwỳnhjê japêr o mō. Hāmri nē nhỹri mē omu nē mē hkôt ri ixpa ho ixtã ù semãn. Nhũm prem Tĩrtũm Karõ nhỹ hã Pawre mã kapêr nē kãm:

—Kwa Pawre mē inhma. Kot ka Jerujarē hwỳr pôj nhũm xep mē kãm akurê xwỳnhjaja tanhmã anhĩpêx to. Tĩrtũm Karõ na ã akukamã mē inhmã ajarēnh anê. Jakamã kwa hwỳr amõr kêt nē. Na pa mē tee ri akukamã ijamaxpêr. Anê.

⁵ Hāmri nhũm amnhĩ tã mē kuma nē ãm mē kuma nē Jerujarē wỳr hkrà kamã hihtỳx nē.

Jakamã nhũm semãn hapêx pa mẽ axte inhnojarê. Axte Jerujarê hwÿr kormã inhmõr kaxyw inhnojarê. Nhũm Jejus kôt mẽ ixtõjaja mẽ kot mẽ ixkujaêk kaxyw piitã pàr wÿr mẽ ixkõt mõi. Mẽ hprõ nẽ mẽ hkrajê mẽ nhũm mẽ pimràatã mẽ ixkõt mõi. Hãmri pa mẽ pàr wÿr pøj nẽ gõi mÿ ri ixpiitã ixkõnkrã ho ixkrĩ hpa nẽ amnhĩ to Tĩrtũm wÿ.

⁶ Hãmri nẽ mẽ kãm amnhĩ jarẽnh pa nẽ mẽ noo mã pàr krem agjê nẽ ma axte mõi nhũm mẽ awjanã nẽ ma akupÿm õrkwÿ hwÿr hapêx. Hãmri pa mẽ kurũm kormã ma Jerujarê hwÿr mõi.

⁷ Mõi nẽ krĩ pẽ Poremax wÿr pøj nẽ hã ajê. Hãmri nẽ pàr rũm ijapøj nẽ axte krĩ kamã Jejus kôt mẽ ixtõ nẽ mẽ ixtõxjê japêr o mõi nẽ nhÿri mẽ omu nẽ mẽ kuri amnhĩm hikra.

⁸ Tã nhũm apkati pa mẽ axte mõi. Pãnhã ma krĩ pẽ Sejarej wÿr mõi. Hãmri nẽ hwÿr pøj nẽ Firipti kuri pøj. Firiptija kormã nyw ri mẽ kot Jerujarê kamã mẽ mjên htyk xwÿnhjê mã mẽ apkur xà nhõr ho pa kaxyw mẽ ho 7 nẽ mẽ unhwÿr xwÿnhtajê hõ na pre. Tã hpãnhã kêp Tĩrtũm kapêr jarẽnh o pa xwÿnh.

⁹ Nhũm hkra nijaja kêp kwat. Piitã mjên kêt nẽ hkukrit rãhã pa. Mẽ kêp Tĩrtũm nhÿ hã kapêr o mẽ pa xwÿnh na pre mẽ. Jakamã pa mẽ mẽ kuri pøj.

¹⁰ Hãmri nẽ mẽ hkõt ri ixpa hã ixtã apkati grêre nhũm Akapõ Jutej rũm man mẽ ixwÿr mõi pøj. Kêp Tĩrtũm nhÿ hã kapêr jarẽnh o pa xwÿnh na pre.

¹¹ Hãmri nẽ mẽ ixwÿr pøj nẽ Pawre pumu nẽ hkukamã kot tanhmã harẽnh to kaxyw hwÿr tẽn kêp hprexà kapa nẽ ho amnhĩ te hpre nẽ ho amnhĩ pa hpre nẽ xa. Hãmri nẽ mẽ inhnoo mã Tĩrtũm

Karõ nhỹ hã mẽ kot tanhmã hipêx to hkukamã kãm awjarẽ nẽ kãm:

—E kot kaj Jerujarẽ hwỳr pøj nhũm Ijaew xàptàr tũmjaja apumu nẽ ã anhĩpêx anẽ nẽ apa hpre nẽ ate hpre hãmri nẽ Ijaew kêt xwỳnhjê nhĩhkram ajaxà. Koja mẽ ã anhĩpêx anẽ. Anẽ.

¹² Hãmri pa mẽ tee ri ã ujarẽnh anhỹrja ma nẽ Pawre kamã ixkahak tỳx nẽ ixkaprĩ nẽ inhmỳr o ixkrĩ. Nẽ xatã kot mẽ hwỳr mõi nê kãm ixkapẽr kãm ixihitỳx nẽ kãm:

—Kwa mẽ ixkapẽr ma Pawre. Mẽ hwỳr amõi kêt o mẽ hwỳr amõi kêt. Anẽ.

¹³ Hãmri nhũm mẽ inhmã:

—Tk. Kwa mẽ amỳr kêt nẽ. Na pa mẽ apumu nẽ ixkaprĩ nẽ. Nà kot paj ma mẽ hwỳr mõi. Kwãr mẽ mãmri Pahilti Jejus ã tanhmã ixto rỳ hã ixpĩ. Ixte amnhĩ kamã ixkahak kêt. Anẽ.

¹⁴ Hãmri pa mẽ tee ri mẽ hwỳr mõi nê hkurê kaprỳ nẽ kãm:

—Tõe. Nà kam nẽ Tĩrtũm kãm hprãm xà hkõt mãmri mẽ hwỳr mõi rỳ mẽ hwỳr amõi kêt nẽ. Anẽ.

¹⁵ Tã pa mẽ ra inhnojarêt nẽ amnhĩ to ix-pikuprõnh pa nẽ ma Pawre hkõt Jerujarẽ hwỳr tã ma mõi.

¹⁶ Hãmri nhũm Sejarej kamã Jejus kêt mẽ ixtõ hkwỳjaja ma mẽ ixkõt mõi. Pa mẽ mõi nẽ Jerujarẽ hwỳr pøj. Hãmri nhũm mẽ ixkõt mẽ mõi xwỳnhjaja mẽ ixto mõi nẽ Mẽnasõ nhõrkwy hwỳr mẽ ixto pøj. Mẽnasõja Sipre kamã na pre kato. Tã hpãnhã Jerujarẽ hwỳr ahpa nẽ kamã ri pa ho pa. Na pre ra Jejus kêt amnhĩ xãm ã hã amgrà xohtõ nẽ. Tã pa mẽ kuri pøj.

Pawre mẽ Xiakre wa harēnh
Atre 15.3-21; Wam Korīt 9.19-22, 10.32-33

¹⁷ Tã pa mẽ Jerujarē hwỳr pøj nhũm Jejus kôt mẽ ixtõjaja mẽ ixpumu nẽ hkĩnh nẽ.

¹⁸ Hãmri nhũm apkati pa mẽ ma Pawre hkõt Xiakre hwỳr mō. Nhũm mẽ kot Tĩrtũm kapēr o mẽ ahkre xwỳnh piitã ra kuri akuprō nẽ mẽ ixkutēp hkrĩ.

¹⁹ Jakamã nhũm Pawre mẽ hwỳr axà nẽ mẽ kãm tanhmã amnhĩ nhĩpêx to ho pa hã amnhĩ jarē nẽ mẽ kãm:

—Pa na ka mẽ rĩ akrĩ. E ot pa axte mẽ apumunh mã mō. Ixte mẽ amã amnhĩ jarēnh ã amnhĩ jarēnh kaxyw. Nà na pa pre ma Ijaew kêt xwỳnhjê hkõt ixpa nẽ mẽ kãm Jejus kot mẽ panê tanhmã amnhĩ nhĩpêx to jarēnh o ri mẽ hkõt ixpa. Nhũm Tĩrtũm inhĩhkô hã ixkutã nojarêt mex jakamã nhũm prem inhma nẽ ohtô rax nẽ mẽ pahpyrà nẽ Jejus kôt amnhĩ xunhwỳ. Anẽ.

²⁰⁻²⁵ Hãmri nhũm mẽ Ijaew kêt xwỳnh kwỳjaja kot Jejus kôt amnhĩ xunhwỳr ã mẽ harēnh ma nẽ mẽ ý hã hkĩnh nẽ mẽ hã Tĩrtũm mã mex o mex ã harē. Hãmri nẽ Pawre mã kãm:

—Nà na pa prem ra mẽ harēnh ma. Hãmri nẽ mẽ kãm kagà nhĩpêx nẽ mẽmoj tã mẽ kãm karō nẽ mẽ hwỳr kumẽ. Mẽ kot omunh nẽ kamã harēnh nẽ hkõt amnhĩ nhĩpêx o pa kaxyw.

Na pa prem kagaja kamã mẽ kot sãnti nhõ hkur nẽ mẽ hkurê.

Nẽ mry kamrō hkur nẽ mẽ hkurê.

Nẽ mẽmo mry hpar nẽ hkamrō runh kêt rãhã hkur nẽ mẽ hkurê.

Nẽ mẽ kot amnhĩ prõ pix tãnopxar kaxyw mẽ kãm hã karō.

Ně mēnijaja kot amnhĩ mjên pix tãnopxar kaxyw mẽ
kãm hã karõ.

Ně nhãm mẽ kot axpẽn to amnhĩkati nê mẽ hkurê.
Ã na pa prem ja hã kagà nẽ mẽ hwýr mēnh anẽ.
Jakamã e mẽ inhma. Na ra mẽ pahpê Ijaew
kwýjaja ohtô rax kumrêx nẽ mẽ pahpyrà nẽ Jejus
kôt amnhĩ xunhwý. Mãn ka pre mẽ harēnh ma.
Na htem Jejus kôt amnhĩ nhĩpêx o pa jao mǎānēn
Tĩrtũm nhỹ hã Mojes kapēr kôt amnhĩ nhĩpêx mex
o pa. Tã nhỹri mẽ kot tanhmã ato hêx to hã ajarēnh
ma. Na ka xep hte Ijaew kêt xwýnhjê nhõ krĩ kamã
pøj hãmri nẽ mẽ õ krĩ kamã Ijaew kwýjê pumu
nẽ mẽmoj nê tanhmã mẽ kãm akapēr to ho ri apa.
Nom Ijaew kêt xwýnhjê mã ka xep hte ã mẽmoj nê
akapēr anhỹr kêt nẽ. ãm Ijaew mã pix mã ka xep
hte mẽ kot finat Mojes kapēr kôt amnhĩ nhĩpêx nê
mẽ hkurê ho ri apa. Nẽ mẽ panhĩgêt kot amnhĩ
nhĩpêx kuhpa hã mẽ kot mẽ hkra my kwryt kà
jakàr nê ka xep hte mẽ hkurê ho ri apa. Nẽ mẽ
kot mẽ panhĩgêt kôt amnhĩ nhĩpêx nê ka xep hte
mǎānēn mẽ hkurê ho ri apa. Mẽ kệp Ijaew tã ka
xep pre hte ã mẽmoj nê mẽ hkurê anhỹr ho ri apa.
Na prem jar ã Ijaewjê mã ato hêx o pa anẽ nhũm
mẽ kuma nẽ mẽ hkôt hamaxpēr kurê kumrêx. Jao
ra ate mẽ pahpê Ijaew kot amnhĩ nhĩpêx kôt amnhĩ
nhĩpêx kêt ã akamnhĩx.

—Tã ra mẽ kot apõx ã ajarēnh mar jakamã
tanhmã kot kaj we mẽ kãm amnhĩ tã axaprār
to? Nẽ tanhmã kot kaj we mẽ noo mã amnhĩ
nhĩpêx to kê mẽ arĩ mẽ pahte amnhĩ nhĩpêx kôt
ate amnhĩ nhĩpêx o apa hã apumu? E na pa mẽ
ra ijamaxpēr. Kot ka ã amnhĩ nhĩpêx anẽ. Na ra

jar mẽ pahkwỳjaja kệp kwat nễ Tĩrtũm mã tanhmã amnhĩ jarẽnh to jatur xàm mẽnh kaxyw amnhĩ krã hkênh mã. Jakamã e kêr ka ma mẽ hkôt tễ nễ mẽ uràk nễ amnhĩ krã hkênh nễ kam nễ mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anễ hãmri nhũm mẽ pahkwỳjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nễ mẽ kot ato hêx ã apumunh kurê kumrêx. Nễ arĩ ate finat Mojes kapêr kôt amnhĩ nhĩpêx o ri apa hã apumu. Anễ.

²⁶ Hãmri nhũm Pawre mẽ kuma nễ mẽ kãm:

—Tôe. Nà ãm hãmri na ka mẽ inhmã awjarẽ. Nà kot paj ã amnhĩ nhĩpêx anễ. Anễ.

Jakamã nhũm apkati nhũm ma mẽ kệp 4tajê o mỗ nễ mẽ mex kaxyw tanhmã amnhĩ nhĩpêx to. Hãmri nễ Tĩrtũm mã amnhĩ jarẽnh xà hã ixkre hwỳr mra nễ agjê nễ mẽ õ patre mã mẽ amnhĩ jarẽ nễ kãm:

—E ot pa mẽ awỳr mra. Na pa prem ra mẽmoj tã tanhmã Tĩrtũm mã amnhĩ jarẽnh to. Tã kot paj mẽ axte ixtã ù semãn hãmri nễ hatur xàm mẽnh kaxyw akupỹn awỳr mra nễ amã mẽmoj gõ ka mẽ inhmã Tĩrtũm mã agõ nễ hkôt kãm mẽ ijarẽ. Nễ pa kot paj mẽ ixpiitã hpãnhã amã amnhĩre. Anễ.

Mẽ kot Pawre pynênh ã mẽ harênh

Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwỳjaja ma mra nễ Tĩrtũm mã amnhĩ jarẽnh xà hã ixkre hwỳr agjê. Hãmri nễ kamã Pawre pumu nễ kamã gryk tỳx nễ hwỳr hprôt nễ unê nễ tanhmã hkwỳjê mã ho hêx to nễ ho kapêr punuj nễ. Nễ mẽ kãm:

28 –E mẽ amnẽ mra nẽ jahti pumu. Na hte krĩ piitã hkõt ri mẽ pahkwỳjẽ mã tanhmã ri hẽx to ho pa. Tĩrtũm nhỹ hã finat Mojes kapẽr nhũm mẽ kãm ho kapẽr punuj o pa. Nẽ mẽ pahte Tĩrtũm mã amnhĩ jarẽnh xà hã ixkreja nhũm hte mããnẽn tanhmã mẽ kãm ho kapẽr punuj to. Mẽ pahpyrà nẽ kęp Ijaew tã mẽ pahpê hkwỳ ho kapẽr o pa. Tã ra axtem nẽ amnhĩ kõt Tĩrtũm nhõ ixkre hwỳr Ijaew kêt xwỳnh kwỳjẽ ho agjẽ. Mẽ kot hwỳr gjẽx kêt kumrẽx tã nhũm axtem nẽ amnhĩ kõt mẽ ho agjẽ. Anẽ.

29 Na pre krĩja kamã Ijaew kêt xwỳnh Topĩja Pawre hkõt pa nhũm mẽ omu. Kęp Epes nhõ xwỳnh nhũm mẽ kot pry ã Pawre hkõt pa hã omu. Tã hã ahtũm nẽ Tĩrtũm mã amnhĩ jarẽnh xà hã ixkre kamã Pawre pumu nẽ htỳx amnhĩ kõt Topĩ ho àr ã hkamnhĩx nẽ ã mẽ kãm harẽnh anẽ.

30 Hãmri nhũm mẽ kuma nẽ Pawre kamã gryk tỳx nẽ. Nẽ hwỳr hprõt nẽ unẽ nẽ ixkre rũm ho kato nẽ kęp hakwa kre kahê.

31-32 Hãmri nẽ ma o tẽ nẽ htak rax nẽ. Ra mẽ kot htak o hpĩr mã tã nhũm mẽhõja pòristi krãhtũm wỳr hprõt nẽ kãm awjarẽ nẽ kãm:

–Kwa o mũj mẽ ra kot axpẽn nhĩmex kaxyw pijapu ho kuhê. Anẽ.

Hãmri nhũm tee ri kuma nẽ pòristi hkwỳjẽ mã anẽ nẽ mẽ ma mẽ hwỳr hprõt kurê kumrẽx. Nhũm mẽ arĩ Pawre htak tã amnhĩ wỳr mẽ omu nẽ mẽ umaj kãm ure.

33 Hãmri nhũm pòristi krãhtũm Pawre hã amỹnẽ nhũm pòristijaja unẽ nẽ kàx o mẽ hkaxprexà ho axkrut nẽ ho hkaxpre pa. Hãmri nhũm mẽ hkrãhtũm Pawre hã mẽ hkukja nẽ mẽ kãm:

—Kwa mẽ atõ inhmã jahti jarẽ. Tanhmã na hixi te? Tanhmã na we amnhĩ tomnuj to hã na ka mẽ ã hipêx anẽ? Anẽ.

³⁴ Hãmri nhũm mẽ kuma nẽ piitã anhĩpê kàxpê kãm tanhmã harẽnh to. Nom axpẽn kwým tanhmã ri kãm harẽnh to. Hãmri nhũm tee ri hprĩ hã kot mẽ mar kaxyw hãmri nẽ pôristi mã anẽ nhũm mẽ kêp Pawre ho kato nẽ ma mẽ àpênh xà hã ixkre hwýr o tẽ.

³⁵⁻³⁶ Hãmri nhũm Ijaew kwý ohtô nẽ pry hã axpẽn nhĩgãnh o hkôt mra. Nẽ gryk xàj kapêr punuj tỳx o mẽ hkôt mō nẽ kàx pê pôristi mã kapêr nẽ mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anẽ.

Jakamã nhũm pôristija tee ri mẽ kuma hãmri nẽ mẽ kot tanhmã ho pymaj kumý nẽ kỳx pê mẽ kêp kupê nẽ o mō. Jao ixkreja wýr mẽ àpir xà hã ho àpir o mō.

³⁷ Nẽ kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarẽ ka inhma. Anẽ.

Mẽ kapêr o kãm kapêr hãmri nhũm amnhĩ jaêr pê kuma nẽ kãm:

—Kwa xà na ka mẽ ixpyrà nẽ Gresjê kapêr o akapêr?

³⁸ Na pa ixtỳx apê Ejit nhõ xwýnh pê mẽ hpar o apa xwýnhhta ã akamnhĩx. Ham na pre mẽ inhõ pahihtu kutã amnhĩ xãm nẽ kot hkurê kaxàr kaxyw mẽ ho ajuta xwýnhjê ho 4.000 nẽ mẽ hkurê nẽ ma kapôt ã mẽ o pa. Nom tãm na xep Gresjê kapêr o kapêr kêt nẽ. Anẽ.

³⁹ Hãmri nhũm Pawre kãm:

—Nà ixpê Ejit nhõ xwỳnhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mõi xwỳnh něj mã ixkapër nà? Aně.

⁴⁰ Hãmri nhũm kãm:

—Tõe. Kam nẽ mãmri tanhmã mẽ kãm akapër to. Aně.

Hãmri nhũm mẽ àpir xàta ã kỳx pê mẽ mỳri xa nẽ kànhmã mẽ kãm ìhkra pẽ nhũm mẽ omu nẽ hpinhkrênh pa nhũm mẽ kãm amnhĩ jarẽ.

22

Pawre kot kãm hkuré xwỳnhjê mã amnhĩ jarěnh
Atre 9.1-19, 26.1-23

¹⁻² Nhũm Pawre amnhĩ kwỳ Ijaew kapër o mẽ kãm kapër nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Aně.

Hãmri nhũm kot mẽ kapër o kapër ma nẽ hpinhkrênh pa nẽ akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxwỳja ixpê Ijaew. Pyka pê Siris kamã krĩ pê Tas kamã na pa pre ixkato no ãm jar Jerujarẽ kamã na pa pre ixàptàr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêjtjê mã kapërja nhũm pre hprĩ hã ho ijahkre ho pa. Na pa pre mẽ apyrà nẽ inhmã Tĩrtũm kôt amnhĩ nhĩpêx prãm nẽ.

⁴ —Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nẽ nhỹri mẽ kãm ixkato nẽ mẽ unê. Měmyjê pynê nẽ mēnijê pynê. Hãmri nẽ mẽ kot mẽ hpar kaxyw mẽ hagjênh o ri ixpa.

5 Na pa pre ã mẽ hipêx o ri ixpa anê. Mẽ panhõ patre maati nê mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pê Tamas kãm mẽ pahkwỳjê kaxyw kagà nhĩpêx nê inhmã kugõ pa kupy nê ma mẽ hwỳr o mỗ. Ixte mẽ õ krĩ kamã Jejus kwỳjê pynênh par nê man akupỹn Jerujarẽ hwỳr mẽ ho inhmõr nhũm mẽ kot tanhmã mẽ ho kaxyw.

6—Tã ra myt apha pa mẽ hwỳr ixàhtêp o mỗ. Puh nhũm kaxkwa rũm hirã rax kumrêxja ixwỳr wrỳ nê ixtã ajêt pa hipòk ri xa.

7 Hãmri nê umaj pykap tẽm nhũm mẽhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê.

8 Hãmri pa kãm: “Kwa mẽ atõ na ka ri ã inhmã akapêr anê pahĩti?” Anê nhũm inhmã: “Ixpê Najare nhõ xwỳnh Jejus. Pa na ka hte ixpê ixkõt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyràk.”

9 —Anhỳr o inhmã kapêr nhũm ixkõt mẽ pa xwỳnhjaja kuma no ãm hprĩ hã mar mex kêt nê. ãm hirã raxta pix pumu.

10 Tã pa kãm: “No tanhmã kot pa we amnhĩ to Pahĩti?” Anê nhũm inhmã: “E kànhmã xa nê mãmri ma Tamas wỳr mỗ. Kot kaj hwỳr pỏj nhũm mẽhõ awỳr tẽ nê mẽmoj tã amã karõ ka ama nê hkõt amnhĩ nhĩpêx.” Anê.

11 —Nhũm pre ã inhmã kapêr anê. Hãmri pa hirã rax pumunh o ixãm kurê ra inhno hkre nê ixrĩt kêt nhũm ixkõt mẽ pa xwỳnhjaja ixpa hã ixpy nê ma Tamas wỳr ixto mỗ nê ixto pỏj.

12 —Tã nhũm Tamas nhõ xwỳnh pê ãnãnĩsti ixwỳr tẽ. Na pre hte Tĩrtũm kapêr ã kagà htũm kõt amnhĩ

nhĩpêx mex nhũm Tamas kamã Ijaew piitã kãm hkĩnh nê axpên mã mex ã harê.

¹³ Jakamã nhũm ixwỳr tẽ nê inhmã: “Pa Jejus kôt ixtõ Sawti? E akupỳm rĩt.” Anhỳrja kôt pa akupỳm ixrĩt mex kurê kumrêx nê omu.

¹⁴ Hãmri nhũm inhmã: “Nà mẽ panhĩgêjtê nhõ Tĩrtũm na amnhĩ kaxyw ata. Ate kapêr mar nê hkôt tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma.

¹⁵ Jakamã kêr ka ma mẽ piitã mẽ kãm ate omunh xwỳnhja jarênh o ari mẽ hkôt apa. Nê mẽ kãm kapêr jarênh o mẽ ahkre ho ri apa.

¹⁶ E tokyx kànhmã xa nê Jejus mã amnhĩ jarê nê hkôt amnhĩ xãm kê anê ate amnhĩ tomnuj rênh pa. Hãmri pa apê hkwy hã akrã kumrã ka ma mẽ kãm kapêr jarênh o ri apa.” Anê.

—Nhũm pre ã ãnãnĩsti inhmã kapêr anê.

¹⁷ —Tã pa man akupỳn jar Jerujarê hwỳr mẽ awỳr mỗ. Hãmri nê jar Tĩrtũm mã amnhĩ jarênh xà hã ixkre kamã kãm amnhĩ jarênh o ixãm rôm axte mẽmoj pumu.

¹⁸ Nhũm Jejus axte ixwỳr kato nê xa nê inhmã kapêr nê inhmã: “E inhma. Jerujarê nhõ xwỳnhjaja kãm ixkapêr mar prãm kêt jakamã kot kaj mẽ kãm ixkapêr jarê nhũm mẽ amar kêt nê. Jakamã kwa tokyx akato nê hpãnhã ma nhỹhỹm mỗ.” Anê.

—Hãmri pa tee ri ã kapêr anhỳrja ã kuma nê kãm:

¹⁹ “Kwa nà koja mẽ inhma Pahihti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kôt mẽ kot ixpumunh mex. Na pa pre hte krĩ piitã hkôt mra nê Tĩrtũm kapêr o

mě ahkre xà hã ixkre kamã mẽ kot akôt amnhĩ kaxyw hamaxpěr xwỳnhjê pynê nẽ mẽ htak nẽ mẽ hagiênh xà kamã mẽ hagiê nhũm mẽ kot ja hã ixpumunh mex.

²⁰ Nhũm mẽ kot akapěr jarênh o pa xwỳnh Estewâw pĩrta pa pre hã mẽ omu nhũm ja inhmã mex pa mẽ kãm mẽ hinôkà jamỳnh o hã mẽ omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hãmri nẽ akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarênh ma nẽ kãm ixkapěr mar prãm nẽ.” Anẽ.

²¹ —Pa pre ã Jejus mã amnhĩ jarênh anẽ nhũm inhmã: “Nà. Kêr ka mãmri krĩja rũm akato nẽ ma nhỹhỹm mỗ. Kot paj hpãnhã ma Ijaew kêt xwỳnhjê hwỳr amẽ ka hpãnhã ma mẽ hwỳr mỗ nẽ mẽ hkôt mẽ kãm ixkapěr jarênh o ri apa.” Anẽ.

²² Nhũm pre Pawre ã amnhĩ hkwỳjê mã amnhĩ jarênh anẽ nhũm mẽ arĩ mar o kuhê rãhã Ijaew kêt xwỳnhjê jarênh ma nẽ kamã gryk tỳx nẽ. Ijaew kêt xwỳnhjaja kot mẽ uràk nẽ Tĩrtũm kapěr marja nhũm mẽ kãm hprãm kêt jakamã nhũm Pawre ã mẽ harênh anẽ nhũm mẽ kuma nẽ kamã gryk tỳx kumrêx. Nẽ gryk xàj kapěr punuj nẽ kapěr o:

—Kwa mẽ mãmri apĩhti ri. ãm hpĩr mã htãmti kênã. Anẽ.

²³ Hãmri nẽ gryk xàj amnhĩ nhĩnôkà hkwỳr nẽ ho apê nẽ pyka jamỳ nẽ kànhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

²⁴ Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nẽ mẽ kapěr ma nẽ pôristijê mã kapěr nẽ mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỳx anẽ? E mẽ tokyx ixkre hwỳr ho axà nẽ mẽ htak xà ho htak kê mẽ pamã tanhmã amnhĩ jarēnh to. Anẽ.

²⁵ Hãmri nhũm mẽ kuma nẽ ho axà nẽ htak kaxyw kormã hpre ho xa. Hãmri nhũm pōristi krãhtũm nhõ kōwenatōja mẽ hkôt axà nẽ hã mẽ omunh o xa nhũm Pawre omu nẽ amnhĩ tã kãm kapēr nẽ kãm:

—Kwa kormã ixte tanhmã mẽ amã amnhĩ jarēnh to hkêt tã ka mẽ ixtak kaxyw. Ixpê Ijaew tã mãnēn ixpê Rõm nhõ xwỳnh kênã. Xà na htem ã Rõm nhõ xwỳnhjê nhĩpêx anẽ? Anẽ.

²⁶ Hãmri nhũm tee ri ã amnhĩ jarēnh anhỹrja ã kuma nẽ pōristi krãhtũmja wỳr hprôt nẽ kãm:

—Kwa taxy pu mẽ tanhmã ho hkêt nẽ. Xep kęp Rõm nhõ xwỳnh kênã. Anẽ.

²⁷ Hãmri nhũm tee ri kuma nẽ Pawre hwỳr axà nẽ kãm:

—Kwa xà ãm hãmri na ka amnhĩ jarē? Xà apê Rõm nhõ xwỳnh na ka? Anẽ.

Hãmri nhũm kãm:

—Tỳ. ãm hãmri ixte mẽ amã amnhĩ jarēnh kênã. Ixpê Rõm nhõ xwỳnh na pa. Anẽ.

²⁸ Hãmri nhũm kãm:

—Kwa pa na pa pre amnhĩ to Rõm nhõ xwỳnh prãm xaj amnhĩ pãnhã mẽ kãm amnhĩrer rax nẽ. Anẽ.

Nhũm Pawre kãm:

—Tỳ nom pa na pa pre amnhĩ pãnhã mẽ kãm amnhĩrer kêt nẽ. Inhĩpêêxà hkôt ixpê Rõm nhõ xwỳnh na pa. Anẽ.

²⁹ Hãmri nhũm mẽ kuma nẽ tee ri hamaxpēr o kãm ma nẽ. Nẽ kãm ma ho hkaga kurê kumrêx.

Nhũm mẽ hkrãhtũm nhõ pahija mããnẽn kãm ma nẽ. Kêp Rõm nhõ xwýnh tã nhũm mẽ axtem nẽ kot unênh nẽ kàx o hkaxpreja mã hamaxpêr nẽ kãm ma nẽ. Na htem ã Rõm nhõ xwýnhjê nhĩpêx anhỹr kêt nẽ. Na htem tanhmã mẽ hkukjêr to nẽ hprĩ hã mẽ kuma nẽ rĩ kormã tanhmã mẽ hipêx to.

*Pawre kot Ijaew xàptàr tũmrejê mã amnhĩ jarênh
Matêwre 23.27-28*

³⁰ Tã nhũm apkati nhũm pôristi krãhtũmja Ijaew kwý ho akuprõ. Mẽõ patre maati nẽ patre krãhtũmjaja nẽ mẽ àptàr tũmrejaja nhũm kot mẽ kãm tanhmã Pawre jarênh to kaxyw mẽ ho hpikuprõnh pa. Hãmri nẽ Pawre pê hkaxpre xà rê nẽ ma mẽ hwýr o tẽ nẽ mẽ kutã ýr.

23

¹ Hãmri nhũm mẽ omu nẽ mẽ kãm amnhĩ jarê nẽ mẽ kãm:

—E ixkwýjaja. Pa mẽ amã amnhĩ jarê ka mẽ inhma. Na pa hte Tĩrtũm nom tãm amnhĩ nhĩpêx o ixpa nẽ mẽ pahpê Ijaew mẽ pahte amnhĩ nhĩpêx kwým ri tanhmã amnhĩ nhĩpêx to hkêt nẽ. Anẽ.

² Hãmri nhũm mẽ õ patre maati ãnãñĩsti kuma nẽ kamã gryk nẽ. Axtem ãnãñĩsti hõ na pre. Hãmri nẽ ã Pawre kot amnhĩ jarênh anhỹrja ã kuma nẽ kamã gryk nẽ. Hãmri nẽ mẽ kot mar o kuhê xwýnhjê mã kãm:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anẽ.

³ Hãmri nhũm Pawre kuma nẽ hwýr rĩt nẽ omu nẽ kãm:

—Nà ka koja Tĩrtũm akura kãm ga. Te ate finat Mojes kot ÿ hã kapër kôt amnhĩ nhĩpêx pyræk tã ri axtem nẽ ri mẽ kot ijakwap ixkuranh kaxyw ri mẽ kãm ixtã amÿnê. Anê.

⁴Hãmri nhũm kuri mẽ kuhê xwÿnhja tee ri ã kãm kapër anhÿrja ã kuma nẽ kãm:

—Kwa kêp patre maati kênã kot ka kêt ri ã kãm akapër anê. Anê.

⁵Hãmri nhũm amnhĩ jaêr pê ja hã kuma nẽ kãm:

—Kwa ixte ja hã omunh kêt jakamã na pa ã ixtÿx kãm ixkapër anê. Ixte kêp patre maati hã omunh ronhÿx pa ã kãm ixkapër anhÿr kêt nẽ. Tĩrtũm kapër ã kagà htũm kot ja nê mẽ pamã kapër kênã. Mẽ pahte tanhmã mẽ panhõ pahi ho pakapër punuj to nê mẽ pamã kapër. Tã pa ãm ixtÿx ã kãm ixkapër anê. Anê.

⁶⁻⁸Hãmri nẽ hprĩ hã mẽ kot mar o hkrĩ xwÿnhjê pumu. Nhũm mẽ kamã Satusew nhõ xwÿnh kwÿ nẽ Parijew nhõ xwÿnh kwÿ. Satusew mẽ Parijew nhõ xwÿnhjaja na htem axpẽn kwÿm ri tanhmã mẽ htykjê jarênh to. Satusew nhõ xwÿnhjaja na htem mẽ htyk nẽ mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nê Tĩrtũm kapër o mẽ wrÿk xwÿnh kêt ã mẽ harênh o pa. No Parijewjaja na hte mẽ kurom mẽ htyk nẽ akupÿm mẽ htĩr ã mẽ hkamnhĩx nẽ Tĩrtũm kapër o mẽ wrÿk xwÿnh ã mẽ hkamnhĩx. Nhũm Pawre kot ja hã mẽ omunh jakamã tanhmã hamaxpër to hãmri nẽ mẽ kãm kapër. Na pre Parijew nhõ xwÿnhjê pyrã nẽ mẽ htyk nẽ akupÿm mẽ htĩr kôt hamaxpër nẽ Tĩrtũm kapër o mẽ wrÿk xwÿnh kôt hamaxpër. Jakamã mẽ omu nẽ kàx pê mẽ kãm kapër nẽ mẽ kãm:

—Nà ijaxwỳja ixpê Parijew nhõ xwỳnh. Nhũm inhĩpêxà haxwỳja kêp Parijew nhõ xwỳnh. Jakamã na pa hte mẽ apê Parijew nhõ xwỳnhjê pyrà nê mẽ htyk nê akupỹm mẽ htĩr kôt ijamaxpêr. Tã ãm ja pix mỳrapê na ka mẽ ixpynê nê ã inhĩpêx anê. Anê.

Hãmri nhũm Parijew mẽ Satusew nhõ xwỳnhjaja kuma nê ja hã axpên kãm gryk nê. Nê hã axpên mã akir.

⁹Hãmri nê ra axpên mã àkjêr rax nê. Hãmri nhũm Parijew kwỳ pê Mojes kapêr o mẽ ahkre ho mẽ pa xwỳnhjaja kãnhmã kuhê nê mẽ kãm Pawre hã àprãr kãm hihtỳx nê mẽ kãm:

—Kwa pêr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mẽmoj mar anê. Rỳ apu Tĩrtũm kapêr o wryk xwỳnh kãm tanhmã kapêr to nhũm pre Tamas wỳr pry kamã mar o xa rỳ ko. Anê.

¹⁰Hãmri nhũm Satusew nhõ xwỳnhjaja tee ri Tĩrtũm kapêr o mẽ wryk xwỳnh kot kãm kapêr ã harênhja ma nê hã axpên mã àkjêr rax nê. Hãmri nhũm pôristi krãhtũmja tee ri mẽ kot axpên mã àkjêr ã mẽ omu hãmri nê pôristi mã kãm:

—Kwa mẽ Pawre hwỳr tẽ nê mẽ kêp utà nê ma akupỹm o tẽ nê haxà. Kot ka mẽ ho anhỹr kêt nhũm mẽ tanhmã hamaxpêr to nê gryk xàj axpên nhĩhkra kamã hkaxôn pa. Anê.

Hãmri nhũm mẽ kuma nê hwỳr tẽ nê mẽ kêp utà nê akupỹm o tẽ nê ixkre hwỳr ho axà.

Jejus kot Pawre jamaxpêr o hihtỳx ã harênh

Atre 18.9-10

¹¹Tã nhũm kamàt nhũm Jejus tãm Pawre hwỳr kato nê kãm:

—Pa Pawre? Kwa tee ri amnhĩ kukamã aja-maxpěr o amnhĩ kamã akahak kêt nẽ. Kot kaj te ra ate jar Jerujarẽ kamã mẽ kãm ijarẽnh̄ta pyrà nẽ ma krĩ pê Rõm wỳr mō nẽ krĩ nhõ xwỳnhjê mã ijarẽ. Anẽ.

*Mẽ kot Pawre hã àmnênh ã mẽ harênh
Sikũn Ximotre 4.18*

¹²⁻¹³ Tã nhũm apkati nhũm Ijaew kwỳjaja axpẽn wỳr akuprõ. Mẽmyjaja kệp 40 nẽ axte hkõt mẽ hkwỳjaja axpẽn wỳr akuprõ. Mẽ kot Pawre pĩr kaxyw hã axpẽn mar kaxyw hã akuprõ nẽ hã axpẽn mã amỳnê nẽ axpẽn mã:

—Tõe. Nà kot puj mẽ hpĩr kaxyw amnhĩ jagri htỳx o paxàpkur kêt rãhã kupĩ nẽ rĩ kormã apku nẽ ixkõ. Nà kot puj mẽ ho anẽ. Ra Tĩrtũm noo mã mẽ pahte ja hã amnhĩ jarênh kênã. Anẽ.

¹⁴ Hãmri nẽ mẽ ma mẽ õ patre krãhtũmjê mẽ mẽ àptàr tũmrejê hwỳr mra nẽ mẽ kãm hã amnhĩ jarẽ nẽ mẽ kãm:

—Ot pa mẽ amã amnhĩ jarênh mã mra. Nà kot paj mẽ tã Pawre pĩ. Kot paj mẽ kormã hpĩr kêt ri ixàpkur kêt rãhã kupĩ. Ra mẽ ixte Tĩrtũm noo mã ja hã amnhĩ jarênh xà hkõt.

¹⁵ Jakamã e mẽ inhma. Kêr ka mẽ axêx rom pôristi krãhtũm mã anẽ kê apkati kê man mẽ awỳr Pawre ho tẽ. Te mẽ ate aprĩ hã hkukjêr kaxyw pyràk o kãm axêx. Kojã mẽ kormã mẽ awỳr ho hpôx kêt ri pa mẽ unên kupĩ. Anẽ.

¹⁶ Hãmri nhũm Pawre tàmnhwỳ mẽ kot ã hã amnhĩ jarênh anhỳrja ma hãmri nẽ ma pôristi xàpênh xà hã ixkrej wỳr Pawre hwỳr hprõt nẽ kãm mẽ harẽ.

17 Hāmri nhūm kuma nē amnhĩ wỳr pōristi krāhtūm nhỹ hã mẽ hamār xwỳnh ã karõ nē kãm:

—Kwa ma mẽ akrāhtūm wỳr ixtàmnhwỳta o tẽ kẽ kãm mẽmoj jarẽ nà? Anẽ.

18 Hāmri nhūm kuma nē ma hwỳr o tẽ nē kãm:

—E Pawre na inhmã anẽ pa awỳr htàmnhwỳ ho tẽ. Kot tanhmã amã ujarẽnh to kaxyw. Anẽ.

19 Hāmri nhūm omu nē hpa hã kupy nē o tẽ nē ahte mẽ hkàx ã o xa nē kãm:

—E māmri inhmã mẽmoj jarẽ pa ama. Mẽmo na ka te inhmã harẽnh kaxyw? Anẽ.

20-21 Hāmri nhūm kãm:

—Nà Ijaew xàptàr tūmrejaja na mẽ kot inhĩgêt Pawre pĩr kaxyw hã amnhĩ jarẽ pa amã harẽnh o tẽ. Koja xep mẽ hã awỳ. Xep apkati nhūm ate ma mẽ hwỳr mẽ hkukjêr xà hã ixkre hwỳr ho amõr nhūm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ ãm amã amnhĩ to hêx. Koja xep mẽ kêp 40 nẽ pry kamã kutêp amũxu nẽ kuhê. Na mẽ ra hã axpên mar pa nẽ axpên mã: “Kot puj mẽ paxàpkur kêt rãhã Pawre pĩ nẽ rĩ kormã apku nẽ ixkõ.” Anhỹr o amnhĩ jarẽ pa mẽ kuma. Jakamã na mẽ kormã ate mẽ hwỳr mẽnh kaxyw akãm ama. Kwa mẽ hwỳr ho amõr kêt nẽ. Anẽ.

22 Hāmri nhūm kuma nē kãm:

—Tõe. Nà na pa ra ama. Māmri ma akupỹm tẽ. Nom kêr ka inhmar kumrêx. Kêr ka nhãm mẽhõ mã ja jarẽnh kêt kumrêx. ãm kwarĩ ho kwarĩ. Anẽ.

Hāmri nhūm kuma nẽ kato nẽ ma akupỹm tẽ.

Mẽ kot Ijaew pymaj nhỹhỹm Pawre mẽnh ã mẽ harẽnh

23-24 Tã nhũm pôristi krãhtũmja amnhĩ wỳr ỹ hã pôristi jamãr o mẽ pa xwỳnh wa ho hamẽxkrut nẽ wa hã karõ nẽ wa kãm:

—E wa inhma. Koja kôt ã kamàt ka wa ma krĩ pẽ Sejarej wỳr Pawre ho mỗ kê hkà hkĩnh pẽ pahihiti Peris wỳr pỏj.

Nẽ amnhĩ kôt pôristi ho 200 nẽ o mỗ.

Nẽ kê mẽ kệp 70 nẽ kawar ã hkrĩ nẽ mẽ akôt mỗ.

Nẽ kê mẽ kệp 200 nẽ wapo jamỳ nẽ mẽ akôt o mỗ.

Kê mẽ ã ohtô rax anẽ.

Nẽ Pawre kot kawar ã ỹr nẽ mỗr kaxyw ka mẽ kãm hỏ ho mỗ.

E kêr ka mẽ ã axohtô nẽ hkôt amỗr anẽ kê hkà hkĩnh pẽ pahihiti Peris wỳr pỏj. Anẽ.

25 Hãmri nẽ pahihiti Peris mã kagà nhĩpêx nẽ kamã kãm Pawre jarẽ nẽ kãm:

26 Pa pahihiti Peris? Xà amex? Ixpê Kraw Risas na pa awỳr kagà mẽ.

27 E ot pa awỳr Ijaew pẽ Pawre mẽ. Na pre hkwỳja kot hpĩr kaxyw unênh tã pa mããnẽn kệp Rõm nhỏ xwỳnh ã harênh ma hãmri nẽ hwỳr inhỏ pôristi rẽ nhũm mẽ hwỳr hprõt nẽ mẽ kệp utà.

28 Hãmri nẽ Ijaew xàptàr tũmrejê hwỳr o tẽ. Mẽ kot inhmã tanhmã kot amnhĩ tomnuj to hã harênh kaxyw.

29 Tanhmã kot amnhĩ tomnuj to nhũm mẽ kot haxàr rỳ hpĩr ronhỹx ja mex nẽ. No xep ãm kot mẽ higêtjê kot amnhĩ nhĩpêx kôt amnhĩ nhĩpêx kêt pix mỳrapê na mẽ kamã gryk.

30 Tã pa mẽ kot hpĩr kaxyw hã mẽ harênh ma nẽ mẽ umaj awỳr kumẽ. Hãmri nẽ kamã mẽ gryk xwỳnhjê mã ajarẽ. Jakamã koja mẽ mẽmo arĩgro

hã awÿr pøj nẽ tanhmã kot amnhĩ nhĩpêx to hã amã harẽ ka kam ja hã mẽ ama nẽ tanhmã ho.

Tã ãm ja pix na pa amã harẽ. Ixpê Kraw Risas na pa awÿr kagàja mẽ. Tã mãn ka arĩ ixte amã harẽnhja ma. Anẽ.

³¹ Tã nhũm kamàt nhũm mẽ hkrãhtũm kot mẽ kãm karõ xà hkôt nhũm pòristijaja ma Pawre o mỗ. Hãmri nẽ krĩ pẽ ãxipat wÿr pøj nẽ kamã amnhĩm hikra.

³² Nhũm apkati nhũm mẽ kot mẽ hkôt pykap mỗr xwÿnhjaja mẽ õ pahi kot mẽ kãm hã karõ xà hkôt awjanã nẽ ma akupÿm mỗ nhũm kawar ã mẽ mỗr xwÿnh pixjaja ma Pawre ho mỗ.

³³ Hãmri nẽ mỗ nẽ Sejarej wÿr pøj nẽ pahihti Peris nhĩhkram Pawre jaxà nẽ kãm kagàja gõ nẽ awjanã nẽ ma akupÿm hapêx.

³⁴ Hãmri nhũm Perisa kagàja py nẽ omu. Nẽ omunh pa nẽ Pawre mã kãm:

—E inhmã amnhĩ jarẽ. Tanhmã na anhõ pyka hixi te? Anẽ.

Nhũm kãm:

—Kêp Siris. Anẽ.

³⁵ Nhũm kãm:

—Tôe. Kê mẽ kot ato kapêr xwÿnhjaja pøj pa kormã ixprĩ hã mẽ kot tanhmã ajarẽnh to ma mãn. Anẽ.

Hãmri nẽ õ pòristi mã anẽ nhũm mẽ ma Pawre o tẽ. Ma pahi Eroxy htyk xwÿnh nhõrkwÿ hwÿr o tẽ nẽ kamã haxà nhũm hkrĩ ho hkrĩ.

24

Ijaew kot tanhmã Pawre ho kapêr punuj to hã mẽ harẽnh

Rukre 21.12-13; Atre 25.7

1 Tã nhũm arĩgro kêp 5 nê hapêx nhũm Ijaew kwỳjaja Sejarej wỳr pôj. Mẽ õ patre maati ãnãñisti nê Tetur nê kaxyw mẽ ãptàr tũmrejaja nhũm mẽ ma hwỳr mō nê pōj. Tetur kêp axiwôkat ã mẽ yr pê kapêr xwỳnh jakamã nhũm mẽ kot tanhmã Pawre o kapêr punuj to kaxyw pahi Peris wỳr amnhĩ kôt o mō.

2 Hãmri nhũm mẽ amnhĩ wỳr Pawre hã karō nhũm pôristi haprô nê mẽ hwỳr o tẽn ho axà. Hãmri nhũm Teturja pahihti Peris mã Pawre kot tanhmã amnhĩ tomnuj to hã harê nê kãm:

—E pahihti inhma. Nà na ka hte tãm mẽ inhĩpêx nê mẽ ixto mex o apa. Jakamã nhũm hte nhãm pika hkwỳ nhõ xwỳnhjaja mẽ ixkurê kaxàr kaxyw mẽ ixwỳr hprôt kêt nê. Pa htem ixpiitã akukwak ri ijamakêtkati nê ixàmnhĩx inhmex nê ixpa.

3 Nê mẽ ixkĩnh rãhã ho ixpa. Hêxta waa nê. Mẽ ixpiitã inhmã akĩnh.

4 E kot paj amã awjarê ka inhma. Kot paj ixu-jarênh o hakotre ka inhma nê tokyx ma akupỹm tẽ.

5 Nà Pawre na hte amnhĩ tomnuj pix o pa. Kêp Jejus pê Najare nhõ xwỳnhhta kôt amnhĩ nhĩpêx o mẽ pa xwỳnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpên kaxyw mẽ ixkryx to ho pa.

6 Jãã na pre Tĩrtũm mã amnhĩ jarênh xà hã ixkre hwỳr amnhĩ kôt mẽ kêp Ijaew kêt xwỳnh kwỳjê ho agjê nê mẽ ixpê ixkreja omnu kaxyw mã tã pa mẽ omu nê unê.

7 Tã nhũm pôristi krãhtũm Risasja mẽ ixpê utà

8 nê awỳr mẽ ixte tanhmã amã harênh to xwỳnhjê rẽ. Tã ot pa mẽ ixkrĩ. Nê ota Pawre nhỹ. Kam kot amnhĩ nhĩpêx ã hkukja kê tanhmã amã

amnhĩ jarēnh to ka ama nē ixte amã harēnh xà hkôt tanhmã mar to. Anē.

⁹ Hãmri nhũm Ijaew hkwy haxwýja kãm:

—Nà ãm hãmri na ã amã harēnh anē pahihiti. Anē.

Pawre kot pahihiti mã amnhĩ jarēnh

Rukre 21.14-19

¹⁰ Hãmri nhũm pahihiti Peris Pawre mã anē nhũm kot kãm amnhĩ tã àprãr kaxyw kànhmã xa nē kãm:

—Nà na ka ra inhõ pyka kamã mẽ ixto amnhĩptàr mex o atã amgrà xohtô nē pahihiti. Jakamã na pa pre ate ixkapēr mar kaxyw ã ajarēnh ma nē ixkĩnh nē.

¹¹ —E kot paj amã amnhĩ jarē ka inhma. Ham na pa pre Jerujarē hwýr mō nē pōj. Na pa hwýr ixpōx ã ixtã arĩgro pē 12 pix. Kam nē ixtã ixkwýjê kukja nē mẽ ama. Ixte Tĩrtũm mã amnhĩ jarēnh xà hã ixkre kamã Tĩrtũm mã mex o mex ã harēnh kaxyw na pa pre hwýr mō.

¹² Nò na pa pre nhýri axpēn kaxyw tanhmã ri mẽ hkryx to hkêt nē. Nē mẽ ixte Tĩrtũm mã amnhĩ jarēnh xà hã ixkre kamã rý kapēr o mẽ ahkre xà hã ixkre kamã rý nhýri pry kamã tanhmã axpēn kaxyw ri mẽ hkryx to hkêt nē. ãm amrakati ho amrakati.

¹³ Mē kot ã ri ijarēnh anhýrja amrakati kumrēx. Mēhõ kot ã ixte amnhĩ nhĩpēx anhýr ã ixpumunh kêt tã na htem amnhĩ krã hkôt amã ijarēnh o hêx.

¹⁴ Na htem mẽ ixte Jejus kôt amnhĩ nhĩpēx xwýnhjaja mẽ ixte amnhĩ nhĩpēx mex kêt ã mẽ ijarē nom kot anhýr kêt. ãm mẽ inhĩgêtjê nhõ Tĩrtũm kapēr nywja kôt na pa hte amnhĩ nhĩpēx mex o ri

ixpa rāhā nē. Nhũm ixkwỳjaja htỳx axtem kapēr ò hkôt ixte amnhĩ nhĩpêx o ixpa hã ixkamnhĩx no ãm kapēr ò hkêt. Ijaxwỳja na pa hte mẽ uràk nē finat Mojes kapēr ã kagà mar o ixpa. Nē Tĩrtũm nhỹ hã mẽ kapēr o mẽ pa xwỳnh kot kapēr ã kagàja pa hte mẽ uràk nē hkôt amnhĩ nhĩpêx mex o ri ixpa.

15 Nē mẽ uràk nē Tĩrtũm kot nhỹrmã akupỹm mẽ ho htĩr kôt pa hte ijaxwỳja ijamaxpēr tỳx nē. Mẽ htyk xwỳnh piitãã. Mẽ kot amnhĩ to mex xwỳnhjê mẽ mẽ kot amnhĩ tomnuj xwỳnhjê mẽ mẽ ho hpimràatã akupỹm mẽ ho htĩrja kôt pa hte mẽ uràk nē ijamaxpēr tỳx o ri ixpa.

16 Jakamã na pa hte tãm amnhĩ nhĩpêx rāhā nē. Tĩrtũm noo mã nē mẽ piitã mẽ noo mã tãm ri amnhĩ nhĩpêx mex rāhā nē.

17 –Tã na pa pre pyka hkwỳ hkôt ri ixpa hã ixtã amgrà xohtô nē. Hãmri nē ma akupỹm Jeru-jarē hwỳr ixkwỳjê hwỳr mō. Amarĩ ixte mẽ kãm kàxpore hkwỳ nhõr kaxyw pa akupỹm mẽ hwỳr mō. Nē mãănēn Tĩrtũm mã mẽmoj nhõr kaxyw.

18 Hãmri nē mẽ ixte amnhĩ nhĩpêx xà hkôt pa mẽ amnhĩ to mex pa nē ma tẽn Tĩrtũm mã amnhĩ jarēnh xà hã ixkre hwỳr axà nhũm mẽ kamã ix-pumu. Nom na pa pre ri ixkreja kamã tanhmã amnhĩ tomnuj to hkêt nē. Rỳ tanhmã ixkapēr punuj to hkêt nē. Na pa prem ãm inhgrêre nē akryk ixkuhê nhũm mẽ ixpumu.

19 Pika pê As rũm Ijaew kwỳjaja na prem ixkre kamã ixpumu. Nar mẽ tãmjaja mãn awỳr mra nē tanhmã amã ijarēnh to.

20 –Nē jar mẽ kot ixto kapēr xwỳnhjaja. Na pa pre mẽ àptàr tũmrejê mã amnhĩ jarēnh pa nhũm mẽ

inhma nẽ tanhmã inhmã nẽ hkêt nẽ. Kam nẽ ja hã mẽ hkukja nẽ mẽ ama.

²¹ Rỳ ko. Koja apu mẽ amã ãm ja pix ã ijarẽnh japêr. Na pa pre mẽ kãm ixkapêr nẽ mẽ kãm: “Na pa hte mẽ htyk nẽ akupỹm mẽ htĩr kôt ijamaxpêr tỳx nẽ. Tã ja pix mỳrapê na ka prem ixpynê nẽ ã inhĩpêx anẽ.” Anhỹr o mẽ kãm ixujarẽnh jakamã nhũm apu mẽ hkwỳjaja kêp ja omnuj nẽ. Jakamã koja apu mẽ amã ja hã ijarẽnh japêr. Nom ja pix jarẽ. Anẽ.

Ã na pre Pawreja pahi Peris mã amnhĩ jarẽnh anẽ.

Peris mẽ hprõ wa kot Pawre mar ã wa harẽnh

²² Tã nhũm pahihti Peris kot mẽ kot Jejus kôt amnhĩ xunhwỳr xwỳnhjê kot amnhĩ nhĩpêx ã mẽ omunh mex jakamã hãmri Pawre mar pa nẽ ho kapêr xwỳnhjê mã kãm:

—Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mỗ nẽ pôi pa wa ixprĩ hã mẽ ate tanhmã harẽnh toja ma nẽ rĩ kormã tanhmã Pawre jarẽnh to. Anẽ.

²³ Hãmri nẽ hpãnhã pôristi pytàr xwỳnh mã Pawre jarẽ nẽ kãm:

—E mẽ ma akupỹm ixkre hwỳr o tẽ nẽ kamã hamãr o apa. No ãm kwãr mãmrĩ àmnhĩx ri ixkre kamã tanhmã amnhĩ to ho ri pa. Nẽ kê hkrãmnhwỳjaja mãmrĩ hwỳr mẽmoj to mra kê kuku. Anẽ.

Hãmri nhũm mẽ kuma nẽ ma o tẽ nẽ akupỹm ixkre hwỳr ho axà nhũm kamã pa ho pa.

²⁴ Tã ra hã apkati grêre nhũm Peris mẽ hprõ wa ma Pawre hwỳr tẽ. Prõ haxwỳja kêp Ijaew.

Hixi pê na pre Turujire. Jakamã nhũm wa ma Pawre nhõrkwÿ hwÿr wa tẽ. Nhũm Peris Pawre hã karõ nhũm kato nẽ wa hwÿr tẽ nẽ wa kãm awjarẽ. Tanhmã wa kot amnhĩ to nẽ amnhĩ kaxyw Jejus Kris kõt hamaxpêr nẽ hkõt amnhĩ xãm prãm xaj hprĩ hã wa kãm harẽ.

²⁵ Nẽ wa kãm:

—Nà na htem Jejus Kris kõt amnhĩ nhĩpêx nẽ tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhÿr kêt nẽ. Nẽ arĩ Jejus kot amnhĩ nhĩpêx kõt amnhĩ nhĩpêx o pa. Koja Tĩrtũm nhÿrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkõt tanhmã mẽ pajarẽnh to. Mẽ pahte tãm amnhĩ nhĩpêx xwÿnh ã mẽ pajarẽ rÿ mẽ pahte amnhĩ tomnuj xwÿnh ã mẽ pajarẽ. Anẽ.

Nhũm pre ã Pawre Peris mẽ Turujire wa kãm kapêr anẽ. Hãmri nhũm Peris tee ri ujarẽnhja ma nẽ kãm ma nẽ. Kot amnhĩ tomnuj o pa xwÿnh ã amnhĩ pumu nẽ ã kãm kapêr anhÿrja mar puma nẽ. Hãmri nẽ Pawre mã kãm:

—E hãmri. Nà na pa wa ra ama. Mamrĩ ma akupÿm tẽn axà. Kot paj mẽmo arĩgro hã mẽmoj to anhÿr kêt nẽ axte amnhĩ wÿr atã karõ ka axte tanhmã wa inhmã axujarẽnh to. Anẽ.

²⁶ Nẽ htÿx hamaxpêr o:

—Nà kot paj mẽmo arĩgro hã axte amnhĩ wÿr hã karõ kê ixwÿr tẽ nẽ ixte kator prãm xaj inhmã amnhĩrer japêr. Anẽ.

Hãmri nẽ xatã amnhĩ wÿr hã karõ htã no nhũm aa kot kator kaxyw tanhmã kãm nẽ hkêt nẽ.

²⁷ Tã nhũm amgrà axkrut nẽ hapêx nhũm Pos Pesti pahi Peristi hpãnhã kêp mẽ õ pahi nẽ mẽ ho

amnhĩptà. Jakamã nhũm Peris akupỹm ò krĩ hwỳr nojarêt nẽ Pawre mã ìhkra karo hkêt rãhã ma mỗ. Na pre hamaxpěr o:

—Nà kot paj Pawre kator nhũm Ijaew ja hã ijarẽnh ma nẽ ixkamã gryk nẽ. Nà kwār mẽ hagjênh xà hã ixkre kamã hkrĩ ho hkrĩ. Kot paj kator kêt nẽ. Anẽ.

Hãmri nẽ kãm ìhkra karo hkêt rãhã ma akupỹm ò krĩ hwỳr mỗ. Jakamã nhũm Pawre arĩ ixkre kamã kệp prês nẽ hkrĩ ho hkrĩ.

25

Pawre Rõm wỳr hkrà ã harẽnh

¹ Tã nhũm pahi nyw Pos Pesti krĩ pê Sejarej wỳr mỗn pỏj. Hãmri nẽ kamã ri pa hã apkati axkrunẽpxi pix nẽ ma Jerujarẽ hwỳr mỗ.

² Hãmri nẽ hwỳr pỏj nhũm Ijaew kwỳjaja omu nẽ hwỳr mra nẽ kãm Pawre ho kapěr nẽ hã hwỳr kurê kumrẽx. Mẽõ patre krãhtũmjê mẽ Ijaew xàptàr tũmrejaja nhũm mẽ hwỳr mra nẽ kãm:

³ —Pa pahihti? E ot pa mẽ awỳr mra. Kwa xà kot ka Pawre hã karõ kê man awỳr mỗ ka jar kot tanhmã amnhĩ tomnuj to hã hkukja nẽ ama? Anẽ.

No ãm hêx rom ã hã kãm kapěr anẽ. Kot hã karõ nhũm mẽ kot pry hã hpĩr kaxyw nhũm mẽ hêx rom ã kãm kapěr anẽ.

⁴ Hãmri nhũm mẽ kuma nẽ mẽ kãm:

—Tk. Kwa ra Sejarej kamã kệp prês nẽ hkrĩ kênã kot pa kêt amnhĩ wỳr hã karõ. Kot pa tokyx ma akupỹm hwỳr mỗ.

⁵ Jakamã kêt ka mẽ axàptàr tũmjaja ma ixkôt mra. Hãmri nẽ Sejarej kamã inhmã tanhmã kot

amnhĩ tomnuj to hã harēnh to pa mẽ ama nẽ rĩ kormã tanhmã harēnh to. Anẽ.

⁶ Hãmri nẽ mẽ kamã pa hã apkati grêre nẽ ma akupỹm Sejarej wỳr mỗ. Hãmri nẽ hwỳr pỏj nhũm apkati nhũm mẽ hkukjêr xà hã ixkre hwỳr tẽ nẽ mẽ kot mẽ mar xà hã mẽ hkrĩ xà kamã nhỹ nẽ amnhĩ wỳr Pawre hã karỗ.

⁷ Nhũm mẽ hwỳr o tẽ nẽ ỹr nhũm hkwỹ kot Jerujarẽ rũm mẽ mỗr xwỳnhjaja kãm hipỏk nẽ pahi Pos Pesti mã tanhmã ho kapêr to nẽ ho kapêr punuj tỳx nẽ. Kot tanhmã amnhĩ tomnuj to ho pa hã ho kapêr o kuhê. Nom mẽ kot ã kot amnhĩ nhĩpêx anhỹr ã omunh kêt tã ãm amnhĩ hkrã hkôt ri tanhmã ho hêx to.

⁸ Jakamã nhũm Pawre tee ri amnhĩ tã mẽ kot ho hêxja ma nẽ kànhmã xa nẽ Pos Pesti mã amnhĩ tã aprã nẽ mẽ kãm:

—Nà aa ixte ã amnhĩ nhĩpêx anhỹr kêt. Na pa finat Mojes kot Tĩrtũm nhỹ hã kapêr nhĩrỏp ixãm nẽ hkwỹm ri tanhmã amnhĩ nhĩpêx to hkêt nẽ. Nẽ mẽ ixte Tĩrtũm mã amnhĩ jarēnh xà hã ixkre kamã ri tanhmã ixtỳx ri amnhĩ nhĩpêx to hkêt. Nẽ pahihti Sesti kapêrja pa pre hirỏp ixãm nẽ tanhmã amnhĩ tomnuj to hkêt nẽ. Aa ixte ã amnhĩ nhĩpêx anhỹr kêt kumrêx. Anẽ.

⁹ Hãmri nhũm Pos Pesti kuma nẽ tanhmã hkukamã hamaxpêr to nẽ hamaxpêr o:

—Kwa nhỹ krĩ kamã kot pa we Pawre kot inhmã tanhmã amnhĩ jarēnh toja ma nhũm Ijaew ja hã kãm ixkĩnh japêr? Nà mẽỗ krĩ pê Jerujarẽ hwỳr kot paj akupỹm mẽ hwỳr o mỗ nẽ kamã mãn hkukja nẽ kuma. Nà ja na mex. Nà kot paj anẽ. Anẽ.

Hãmri nẽ Pawre mã kãm:

—E xà kot puj ma akupÿm Jerujarē hwÿr mō pa kamā axte mē kot ajarēnh ma nē tanhmā ajarēnh to nà? Anē.

¹⁰ Hāmri nhūm kām:

—Nà jar ixte pahihiti Sesti nhÿ hā mē kot mē hkukjêr xà hā ixkre kamā inhÿr nē amnhÿ jarēnh kênā. Jar na htem mē hkukja nē tanhmā ri mē mar to. Na pa pre tanhmā ixkwÿjê ho hkêt nē. Mēmo kaxyw kot pa akupÿm mē hwÿr mō nē axte mē kām amnhÿ jarē?

¹¹ Kop apu pa tanhmā ixte amnhÿ tomnuj to ronhÿx mē māmri ja hā ixpÿ pa mē kêp tanhmā ri amnhÿ to hkêt nē. Nom mē kot ixto hêx pix o ã ijarēnh anhÿr kênā. Jakamā mēmo mÿrapê kot kaj mē ïhkram ijaxà? E Rôm kām pahi maati Sesti hwÿr măn inhmē pa kumā măn amnhÿ jarē. Anē.

Pahi Sesti kêp pyka piitā hkôt mē ho amnhÿptâr xwÿnh maati jakamā nhūm Pawre kot mar kaxyw hwÿr hkrà.

¹² Hāmri nhūm Pos Pesti kuma nē ma tē nē hā ò kôwenatôjê ma. Hāmri nē hā xspên mar pa nē akupÿm hwÿr tē nē kām:

—Tôe. Nà kot paj pahi maati Sesti wÿr amē. Ra hwÿr akrà kênā. Anē.

Pos Pesti kot Akrip mã Pawre jarēnh

¹³ Tā nhūm apkati grêre nē hapêx nhūm pahi hō pê Akripja ma Pos Pesti hwÿr mō. Tōx Perênÿs mē wa mō.

¹⁴ Hāmri nē wa hwÿr pôj nē kuri wa pa hā apkati grêre nhūm Pos Pesti wa kām Pawre jarē nē wa kām:

—E pa war amā mēhō jarē. Na pre pahi Perisja mē hagjênh xà kamā mēhō jaxà nē kormā kator

kêt ri nhũm mẽ àpênh nê kator pa hpãnhã àpênh o amnhĩptà.

15 Tã ra ma Jerujarẽ hwỳr mỗ nhũm Ijaew nhõ patre krãhtũmjê mẽ mẽ àptàr tũmrejaja inhmã ho kapêr punuj rax nê. Nê ixte mẽ kãm hpĩr kaxyw inhmã hã àmnênh kãm hihtỳx nê.

16 Nom pa mẽ kêp ja kaga nê mẽ kãm: “Nà mẽ ixpê Rõm nhõ xwỳnhjaja na pa htem ã mẽ hipêx anhỹr kêt nê. Na pa htem mẽ kot ho kapêr xwỳnh noo mã tanhmã hkukjêr to nhũm tanhmã amnhĩ tã àprãr to pa htem kuma nê rĩ kormã tanhmã mẽ ho. No na pa htem kormã mẽ kot tanhmã amnhĩ jarênh to hkêt ri tanhmã mẽ ho hkêt nê.” Anê.

17 –Jakamã nhũm prem kaxyw Sejarej wỳr pøj nhũm apkati pa hã mẽ hkukjêr kurê kumrêx. Nê mẽ kot mẽ hkukjêr xà hã mẽ hkrĩ xà kamã nhỹ nê ixte hkukjêr kaxyw amnhĩ wỳr Pawre hã karõ.

18 Na pa pre ijamaxpêr o: “Mãn pre tanhmã amnhĩ tomnuj tỳx to hã na mẽ inhmã harênh kaxyw.”

19 Anhỹr ã hkamnhĩx tã te kot amnhĩ to mex xwỳnh pyræk. ãm kot mẽ hkôt amnhĩ nhĩpêx kêt pix ã nhũm mẽ inhmã harê. Nê kaxyw mẽhõ htyk xwỳnh jarê. Mẽ kot kãm “Jejus” anhỹr xwỳnhja na xep hte mẽ kãm akupỹm htĩr ã harênh o pa. ãm ja pix na prem inhmã harê.

20 Pa tee ri ixte nhỹri ixprĩ hã tanhmã mẽ kot harênh to hã mẽ mar kaxyw hkukamã ijamaxpêr. Hãmri nê hã Pawre kukja nê kãm: “Xà kot puj ma akupỹm Jerujarẽ hwỳr mỗ pa axte akwỳ kot tanhmã ajarênh to ma nê rĩ kormã tanhmã ajarênh to nà?”

²¹ Anhÿr tã no nhũm akupÿm Jerujarẽ hwÿr mõr kaga kumrẽx nẽ amnhĩm Rõm kãm pahi maati Sesti jarẽ. Ixte ma hwÿr mẽn̄h nhũm kot kãm amnhĩ jarẽnh nhũm kot mar nẽ tãm tanhmã harẽnh to kaxyw. Jakamã pa kormã ixte hwÿr mẽn̄h kaxyw amnhĩ xa hã akupÿm mẽ hagjênh xà kamã haxà nhũm arĩ hkrĩ ho hkrĩ. Anẽ.

²² Hãmri nhũm Akrip kuma nẽ kãm:

—Xõwehe? Kwa na pa inhmã tanhmã kapër to mar prãm nẽ. Anẽ.

Hãmri nhũm kãm:

—Tõe. Nà kê apkati pa hã karõ ka tanhmã kapër mar to. Anẽ.

²³ Jakamã nhũm apkati nhũm Akrip mẽ htõx Perênĩs wa pahi hã mẽ ê mex jagjê nẽ ma mẽ hkukjêr xà hã ixkre hwÿr wa tẽ. Põristi krãhtũm kwÿjê mẽ Sejarej kamã mẽ kot amnhĩ to rũnh xwÿnh kwÿjê mẽ nhũm mẽ hwÿr akuprõ. Nhũm mẽ piitã Akrip mẽ htõx wa kêp pahi hã wa ê mex ã wa omu nẽ wa kamã no pyma nẽ. Hãmri nhũm Pos Pesti Pawre hã karõ nhũm mẽ haprõ nẽ ma mẽ hwÿr o tẽ.

²⁴ Hãmri nhũm Pos Pesti omu nẽ Akrip mẽ htõx mẽ mẽ kot mar o hkrĩ xwÿnhjê mã kãm:

—E pahihti Akrip mẽ mẽ apikuprõnh xwÿnhjaja. Ota Pawre xa. Jerujarẽ kamã nẽ jar Sejarej kamã na pre hkwyjaja inhmã ho kapër rax nẽ. Hãmri nẽ ixte hpĩr kaxyw inhmã hã àmnênh kãm hihtÿx nẽ.

²⁵ Nom mẽmoj mÿrapê kot pa kêt kupĩ? Tã nhũm amnhĩm pahi maati Sesti jarẽ pa ma hwÿr mẽn̄h kaxyw.

²⁶⁻²⁷ Nom na htem amarĩ pahi maati Sesti hwÿr mẽ rẽn̄h kêt nẽ. Na htem kãm mẽ kot tanhmã

amnhĩ tomnuj to hã kagà nẽ hwỳr kagà mẽ ro hã mẽ kurẽ. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyræk. Jakamã na pa mẽ awỳr o tẽ. Mẽ ate kapēr mar nẽ kot tanhmã amnhĩ tomnuj to hã inhmã harēnh nhũm ixte hã kagà nẽ pahi Sesti hwỳr mẽnh kaxyw. Jakamã e mẽ kam nẽ hkukja nẽ ama nẽ tanhmã mar to. Anẽ.

26

*Pawre kot pahihti Akrip mã amnhĩ jarēnh
Atre 8.3, 9.1-19, 22.1-21*

¹ Hãmri nhũm Akrip Pos Pesti kot tanhmã Pawre jarēnh toja ma nẽ Pawre mã kãm:

—E mãmrĩ mẽ inhmã amnhĩ jarē pa mẽ ama. Anẽ.

Hãmri nhũm kuma nẽ kãm amnhĩ jarēnh kaxyw kànhmã kãm ìhkra pẽ nẽ kãm:

²⁻³ —Hêxta waa nẽ. Nà na pa amã amnhĩ jarēnh kaxyw nẽ ixkĩnh nẽ pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nẽ mẽ ixte tanhmã amnhĩ nhĩpêx to hã mẽ ixte axpēn kukjêrta ate hã mẽ ixpumunh mex. Jakamã na pa amã amnhĩ jarēnh kaxyw nẽ ixkĩnh nẽ. E tokyx anojarēt kêt nẽ inhma. Pa amã ixujarēnh jatur xàm kumẽ ka aprĩ hã inhma.

⁴ Nà ixkwỳjaja ra mẽ kot ixte amnhĩ nhĩpêx ã ixpumunh mex. Ixprĩre rũm ixpapxà kamã nẽ mããnēn Jerujarē kamã ixte tanhmã amnhĩ nhĩpêx to ho ixpaja mẽ kot hã ixpumunh mex.

⁵ Ixpê mẽ hkwȳ pê Parijew nhõ xwỳnh kwỳjê hã mẽ kot ixpumunh. Kojã mẽ apu ja hã amã ijarēnh japêr rỳ ko. Mẽ ixpê Parijew nhõ xwỳnhjaja na pa

htem amnepêm finat Mojes kot Tirtûm nhỹ hã mẽ inhĩgêjtê mã mẽmoj tã karõ xà hkôt amnhĩ nhĩpêx mex o ixkwỳjê jakre.

⁶ –Amnepêm na pre Tirtûm mẽ inhĩgêjtê mã tanhmã amnhĩ jarênh to. Kot nhỹrmã mẽ piitã akupỹm mẽ ho htĩr ã amnhĩ jarê. Tã ixte ja kôt ijamaxpêr pix mỳrapê na prem kot hã amã ixto kapêr kaxyw awỳr ixto mỗ.

⁷ Mẽ ixpê Ijaew nhĩgêjtê piitã na prem Tirtûm kapêr kôt hamaxpêr o ri pa. Kot nhỹrmã akupỹm mẽ ho htĩr ã amnhĩ jarênh kôt hamaxpêr tỳx o pa. Amnepêm finat Jako mẽ hkra pê 12jaja na prem hkôt hamaxpêr. Nẽ ixpê mẽ hkanrêhã mẽ htàmnhwỳ na pa hte ijaxwỳja ja kôt ijamaxpêr tỳx rãhã ho ri ixpa. Tã ãm mẽmoj pixi mỳrapê na ixkwỳjjaja ã amã ixto kapêr punuj anê.

⁸ Mẽ kot ixpyrà nẽ ja kôt hamaxpêr ã amnhĩ jarênh tã nhũm pre Tirtûm akupỹm Kra Jejus o htĩr nom nhũm mẽ ixkĩnhã ja kôt hamaxpêr kêt. Nom Tirtûm kêp akupỹm mẽ pahto pahtĩr xwỳnh kênã.

⁹ –Amnepêm kormã Jejus kôt ijamaxpêr kêt ri na pa pre ijaxwỳja mẽ uràk nẽ akupỹm htĩr kôt ijamaxpêr kêt nẽ. Nẽ ixtỳx ijamaxpêr o: “Kot paj Jejus pê Najare nhõ xwỳnh kôt mẽ kot amnhĩ xunhwỳr xwỳnhjê nhĩpêx kati ho ixpa nhũm Tirtûm ja hã ixpumu nhũm ja kãm mex nẽ.”

¹⁰ –Anhỹr jakamã pa pre hte tanhmã mẽ homnũj tỳx to ho ri ixpa. Jao Jerujarê kamã mẽ inhõ patre krãhtũmjê nhỹ hã mẽ unê nẽ mẽ hagiênh xà kamã mẽ hagiênh o ixpa nhũm mẽ kot mẽ himex kaxyw mẽ hã inhmã amnhĩ jarê nhũm ja inhmã mex nẽ. Pa mẽ harênh ma nẽ ixkĩnh nẽ.

11 Pa pre hte xatã tanhmã mẽ hipêx to nẽ mẽ kot Jejus kaga hprãm xàj mẽ hipêx kati rũnh nẽ. Tĩrtũm kapêr o mẽ ahkre xà hã ixkre piitã kamã pa pre hte ã mẽ hipêx anẽ. Nẽ mẽ kamã inhgryk tỳx jakamã ma krĩ hkwỳ hkôt mẽ hapêr o ri ixpa. ã na pa pre mẽ hipêx anhỹr o ri ixpa.

12 –Tã axte ixte mẽ hkwỳjê pynênh nẽ mẽ hagjênh kaxyw ma Tamas wỳr mỗ. Mẽ inhỗ patre krãhtũmjê nhỹ hã ma mẽ hwỳr mỗ.

13 Hãmri nhũm ra kaxkwa nhĩpôk ri myt nhỹ pa kormã pry hã inhmôr ri kaxkwa rũm mẽmo nhĩrãja pumu. Nhũm hirã htỳx o myt jakre nẽ ixtã ajêt pa ixkôt ri mẽ pa xwỳnhjê mẽ hipôk ri ixkuhê.

14 Hãmri nẽ mẽ inhmã ma xàj pykap ixrôrôk pa nhũm kaxkwa rũm mẽhõj inhmã kapêr. Mẽ ixpê Ijaew kapêr o kapêr nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj tỳx o ri apa? Nom na ka tee ri ã amnhĩ nhĩpêx anhỹr kaprỳ.” Anẽ.

15 Hãmri pa tee ri kuma nẽ kãm: “Kwa mẽ atõ na ka ã inhmã akapêr anẽ?” Anẽ.

–Hãmri nhũm inhmã: “Ixpê Jejus na pa amã ixkapêr. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o apa ho te pa ixtomnuj tỳx pyràk.

16 E kànhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrĩt. Jarãhã ate ixpumunh xà hkôt ate mẽ kãm ma ijarênh nẽ mẽ kãm ixkapêr jarênh o mẽ ahkre ho ri mẽ hkôt apa kaxyw na pa amnhĩ kaxyw ata. Kot paj nhỹrmã axte awỳr ixkato nẽ tanhmã amã ixkapêr to ka inhma nẽ ma mẽ kãm

ixkapēr jarēnh o ri mē hkôt apa. Ja kaxyw na pa amnhīm ata.” Anhÿr o inhmã kapēr.

17 Hāmri nē inhmã: “E kot paj Ijaew mē Ijaew kêt xwÿnhjê hwÿr amē nē anē mē omunh mex nē nhūm mēhō apīr kêt nē.

18 Kêr ka ma mē hkôt mē kām ixkapēr jarēnh o ri apa kê mēhprī hã kuma. Mē kot amnhī tomnuj kaga nē amnhī kaxyw ixkôt hamaxpēr nē ixkôt amnhī xunhwÿr kaxyw. Hāmri nhūm Tīrtūm ja hã mē omu nē ixkukwak ri amnhī katut kôt mē kot amnhī tomnuj piitã rēnh pa nē axte kām hamaxpēr kêt nē. Hāmri nē mē ho hkra. Koja mē ã amnhī nhīpêx anē hāmri nē axte Satanasti nhÿ hã tanhmã amnhī nhīpêx to hkêt nē. Pãnhã Tīrtūm kôt pix mã amnhī nhīpêx o pa.” Anē.

19 —Ã na pre Pahihti Jejus inhmã kapēr anē. Tã kot kaxkwa rūm inhmã ixapēnh jarēnh ã karōja pa pre mar tÿx nē hkôt amnhī nhīpêx rãhã ho ri ixpa pahi Akrip.

20 Jakamã na pa pre ma mē hkôt mē kām kapēr jarēnh o ri ixpa. Tamas kumrêx hwÿr nē hpãnhã Jerujarē hwÿr nē hpãnhã pika pê Jutej piitã hkôt Ijaew mã kapēr jarēnh o ri ixpa. Tã hpãnhã Ijaew kêt xwÿnhjê mã harē. Na pa hte mē kām ixkapēr o: “Kwa mē ate amnhī tomnuj kaga nē hpãnhã Tīrtūm kôt amnhī xunhwÿ. Hāmri nē hkôt pix mã amnhī nhīpêx o ri apa. Mē piitã mē kot apê hkwy hã mē apumunh kaxyw.” Anē.

21 —Ãm ja pix mÿrapê na pre ixkwÿjaja ixpynê. Tīrtūm mã amnhī jarēnh xà hã ixkre kamã ixpynê nē ra mē kot ixpīr kaxyw.

22-23 Nom na hte Tīrtūm ixtãnopxa nē ixto ixihtÿx

mex rāhā ho pa pa arī mẽ kām harēnh o ri ixpa. Mẽ kot amnhĩ to rũnh xwỳnhjê mã nẽ mẽ kêp amrakati xwỳnhjê mã nẽ mẽ piitā mẽ kām harēnh o ri ixpa. Finat Mojes mẽ Tĩrtũm nhỹ hā kapēr jarēnh o mẽ pa xwỳnhjaja kot ra hkukamā tanhmā harēnh to xà hkôt pa hte mẽ kām harēnh o ri ixpa. Nẽ mẽ kām: “Tĩrtũm kot mẽ pakaxyw ãm xwỳnhhta na pre amnhĩ xà htỳx kamā hamak kām ty. Tā nhũm Tĩrtũm akupỹm ho htĩr. Kumrēx na pre akupỹm ho htĩr jakamā kumrēx na pre tanhmā mẽ kām kapēr to ho ri mẽ hkôt pa. Mẽ kot amnhĩ kaxyw hkôt hamaxpēr nẽ hkôt amnhĩ xunhwỳr xwỳnh piitā uràk nẽ nhỹrmā Tĩrtũm mẽ wa õ krĩ kamā htĩr tũm nẽ pa ho pa hprām xàj mẽ harēnh o pa. Mẽ ixpê Ijaew nẽ mãānēn mẽ apê Ijaew kêt xwỳnhjaja nhũm pre ã mẽ pajarēnh anē.” Anhỹr o pa hte mẽ kām harēnh o ri mẽ hkôt ixpa pahi Akrip. Anē.

²⁴ Nhũm Pawre kormā kot mẽ kām amnhĩ jarēnh par kêt ri nhũm Pos Pesti tee ri tanhmā Jejus jarēnh to hā kuma nẽ kàx pē kām kapēr nẽ kām:

—Kwa na ka akrā axpā nà? Pēr ate kagà pumunh tỳx kurê akrā pipānh pyràk o ri atỳx ã ri mẽ inhmā axujarēnh anē. Anē.

²⁵ Hāmri nhũm kām:

—Nà ixkrā pipānh kêt. ãm hāmri na pa mẽ amā awjarē.

²⁶ Jerujarē kamā na prem Jejus pĩ nhũm mẽ piitā omu. Tā nhũm akupỹm htĩr hāmri nẽ hpimxur pē ri pa hkêt nẽ. Na pre mẽ ohtô nẽ akupỹm htĩr kām omu. Pahi Akrip ra kot ja mar mex jakamā na pa ixamnhĩx ã mẽ amā harēnh anē.

²⁷ Anhỹr o kām kapēr hāmri nẽ pahi Akrip wỳr rĩt nẽ kām:

—Kwa pahi Akrip. Xà Tirtũm nhỹ hã kapêr jarênh o mẽ pa xwýnhjaja kot Jejus kukamã tanhmã harênh toja kôt na ka hte ajamaxpêr? Nà ra hkôt ajamaxpêr kênã. Ra ixte ajamaxpêr kôt apumunh mex. Anê.

²⁸ Hãmri nhũm tee ri kuma nê kãm:

—Tk. Kwa xà kot kaj ã inhmã akapêr anê pa ama nê apyrà nê amnhĩ kaxyw Jejus kôt ijamaxpêr? Nà na ka ixte ã ate Jejus jarênh anhỹrja kôt ijamaxpêr ã ixkamnhĩx kaprý. Anê.

²⁹ Hãmri nhũm Pawre kãm:

—Ko. Kot kaj ixpyrà nê amnhĩ kaxyw hkôt ajamaxpêr pa ixkĩnh nê. Nom kaxipix kêt. Mẽ apiitã mẽ ate inhmar o akrĩ xwýnhjaja mãânên. Mẽ ate mẽ ixpyrà nê Jejus kôt amnhĩ xunhwýr na inhmã hprãm. ãm ixpyrà nê mẽ apê prês pix na inhmã hprãm kêt. Anê.

³⁰ Hãmri nhũm pahi Akrip nê htõx Perênĩs nê pahi Pox Pesti nê mẽ hkôt mẽ mõi xwýnhjaja kànhmã kuhê nê ma mrar kaxyw.

³¹ Nê nojarêt nê Pawre hã axpên mã:

—Kwa tanhmã kot amnhĩ tomnuj to hkêt kênã kot kêt mẽ haxà rý kupĩ. Anê.

³² Hãmri nhũm Akripja Pos Pesti mã kãm:

—Kwa kop apu kot amnhĩ kaxyw pahi maati Sesti hwýr hkrã hkêt ronhỹx pu mẽ ra kator. Anê.

27

Mẽ kot Rõm wýr Pawre mẽnh ã mẽ harênh

Atre 23.11, 25.12

¹ Tã nhũm mẽ pyka pê Itar wýr pahi maati Sesti hwýr Pawre mẽnh kaxyw. Itar kamã mẽ õ krĩ maati na pre kêp Rõm. Jakamã nhũm Pawre mẽ

mě kot mě hagjênh xà kamã mě hkrĩ xwỳnh mẽ ho hpimràatã ma mẽ o mra nẽ pôristi krãhtũm Jurti nhĩhkram mẽ haxàr pa. Kot ma Rõm wỳr mẽ o mõi kaxyw. Jurtija kệp Itar kamã mẽ õ pahi maati hã pôristi krãhtũm nhũm prem ma mẽ kãm mẽ o mõi kaxyw ãhkram mẽ hagjênh pa. Ixpê Rukre na pa pre inhmã Pawre hkôt inhmõi prãm nẽ mẽ hã ajêt nẽ mẽ hkôt mõi.

² Tã pa mẽ ra inhnojarêt nhũm Aristak haxwỳja ma mẽ ixkôt mõi. Pyka pê Masetõn nhõ xwỳnh na pre. Õ krĩ pê na pre Tesarõn. Jakamã nhũm ma wa ixkôt mõi. Hãmri nhũm pàrja nojarêt. Atamĩx rũm pàr nhũm ra As wỳr nojarêt pa mẽ hwỳr inhgjêx pa nẽ ma kamã mõi.

³ Hãmri nhũm apkati pa mẽ krĩ pê Sito hwỳr pøj nẽ hã pàr xi. Nhũm pôristi krãhtũm Jurtija Pawre ho mex jakamã pa mẽ Sito hwỳr pøj nhũm Pawre mã anẽ pa mẽ ixkato nẽ ma ixkrãmnhwỳjê hwỳr mra nẽ mẽ kutã apku nẽ ma akupỹm pàr wỳr mra.

⁴ Tã pa mẽ axte mõi. Nom nhũm kôk mẽ ixkutã àpêr tỳx jakamã pa mẽ umaj juk nẽ gô hipôk kupu ho mõi. Gô hipôk pê Sipreja pa mẽ upôk rũm ma hkupu ho mõi nhũm mẽ inhnê kôk pê àmnàr mex nẽ.

⁵ Hãmri pa mẽ mõi nẽ pyka pê Siris mẽ Pãpir wa hakrenh õ mõi nẽ pyka pê Ris kamã Mira hwỳr pøj nẽ hã pàr xi nẽ ijàpôx pa.

⁶ Hãmri nhũm pôristi krãhtũmja Aresãnrir rũm pàr pumu nhũm ra Itar wỳr nojarêt. Pa mẽ hwỳr inhgjêx kurê kumrêx hãmri nẽ ma kamã axte mõi.

⁷ Hãmri nhũm pàrja kôk kutã tee ri mõi prêprêk kaxyw nẽ ãm amnhĩm hprĩ nẽ mõi ã apkati xohtô nẽ pa mẽ tokyx ixpôx kêt nẽ. Tã Sito hwỳr ixàhtêp

o mō nom nhũm kôk mẽ ixkutã hihtỳx rax kumrêx. Jakamã pa mẽ juk nê gô hipôk pê Kret jatur xà jahpa nê ma kape hã mō nhũm mẽ inhnê kôk pê àmnâr mex nê. Hãmri pa mẽ ma Sarmôn jakrenh o mō

⁸ nhũm pàr kôk kutã amnhĩm hprĩ nê kape hã mō. Pa mẽ mō nê jatã Rasej tã pàr nhĩkwỹ xà mex wỳr pôj nê kamã pàr xi.

⁹ Nom pàr kot amnhĩm hprĩ nê mōr jakamã nhũm ra kôk xàpêr tỳx nê kamã kry htỳx ã mytwrỳ mẽ ixtã kato. Mytwrỳja ã mẽ kot kôk xàpêr tỳx pymaj nhỹhỹm pàr kãm mrar kêt. Jakamã nhũm Pawre tokyx mẽ inhmōr nê pàr nhõ xwỳnhjê mã kapêr kãm hihtỳx nê mẽ kãm:

¹⁰ —Kwa pu mẽ jar kôk xàpêr tỳx jamãr o ri papa nà. Kê kôk mẽ kry htỳxja hapêx pu mẽ rĩ kormã axte mō. Kot puj mẽ anhỹr kêt nê kôk xàpêr tỳx kãm mō nhũm nhỹri pàrja mẽ pahpê axà nhũm gô mẽ apê mẽ akukrêx o hapêx pa. Pu mẽ pajaxwỳja axkaprã.

¹¹ Anhỹr o mẽ kãm kapêr tã no nhũm mẽ kuma nê ãm kuma. Pàr pãm mẽ pàr o mrar xwỳnh wa nojarêt tỳx nê kapêr ma nê ãm kuma. Nhũm pôristi krãhtũm wa nojarêt ã wa kuma nê haxwỳja Pawre mar kêt nê.

¹² Nhũm mẽ kot pàr nhĩkwỹ xà mex jarênhja mẽ kot mex ã harênh tã mẽ kêp omnuj nê. Hã na wrỳk nê kôk xàpêr tỳx nhũm mẽ kêp omnuj tỳx nê. Jakamã nhũm mẽ piitã Pawre rom ra nojarêt nê. Mẽ kãm tokyx krĩ pê Wênĩs wỳr hpôx prãm jakamã nojarêt tỳx nê. Gô hipôk pê Kret kamã na Wênĩsja. Nê kamã kôk xàpêr tỳx kêt jakamã nhũm mẽ hwỳr nojarêt nê axpên mã:

—E kwa pu mẽ tokyx Wẽnĩs wỳr mỗ nẽ kamã mãn kôk xàpêr tỳx japêx jamãr o papa. Anẽ.

Hãmri nẽ piitã hwỳr nojarêt.

Kôk kot pàr o àpêr tỳx ã harênh

¹³ Tã nhũm kahpa hkôt kôk xàpêrja katàt kôt kawax pê apê nhũm mẽ kamã ama nẽ axpẽn mã:

—E hãmri. Tokyx pu mẽ mỗ. Anẽ.

Jakamã pa mẽ pàr o htỳx xà ho api nẽ axte mỗ. Ma gô hipôk pê Kret jakàr ã mỗ.

¹⁴ Puh nhũm na wrỳ nẽ kôk àpêr tỳx kumrêx. Mẽ kot kãm “kôk xàpêr tỳx maati” anhỳr xwỳnhja gô hipôk rũm mẽ ixto àpêr tỳx kumrêx o mỗ.

¹⁵ Hãmri nẽ mẽ ixkutã àpêr tỳx nhũm pàr tee ri kutã hkarôt. Pa mẽ kormã Wẽnĩs wỳr ixpôx kêt ri ra ho awjanã nhũm amnhĩ krã hkôt kôk kôt mỗ.

¹⁶⁻¹⁷ Hãmri nẽ mỗ nẽ gô hipôk pê Krawti jahpa nẽ hakàr ã mỗ nhũm mẽ inhnê kôk pê amýtã nhũm amnhĩm hprĩ nẽ kawax pê apê. Hãmri pa mẽ pàr krare kot mẽ ixkôt mỗr xwỳnhja pa mẽ kumỳ nẽ pàr rax kãm kumẽ. Ra kamã gô rax tã pa mẽ ixkarôt tỳx nẽ nê hkapĩr pa nẽ ho api nẽ pàr rax kãm kumẽ nẽ ho htỳx. Hãmri nẽ hpãnhã kôk xàpêr tỳx pymaj pàr rax kaxpre hpa. Hãmri nẽ kôk kot pykahti grã maati pê Sirteja wỳr pàr mẽnh nhũm kot amnhĩ to pykahti xãm o htêm pymaj nhũm mẽ kot ho mrar xà hã kupêxê rax o wrỳ nhũm pàr amnhĩ krã hkôt ma kôk kôt mỗ.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nẽ arĩ na wrỳk rax rãhã nẽ. Jakamã pa mẽ pàr àr pymaj nê mẽ hikukrêx kwỳ gôx kãm rênh pa. Kaxkritre nẽ àr kêt kaxyw.

19 Tã nhũm apkati pa mẽ hpãnhã pàr kre kamã ri nê hikukrêx kwý rê nê gôx kãm kurê.

20 Nhũm kôk arĩ àpêr tỳx kumrêx ã apkati xohtô nê. Nê na wrỳk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

21 Hãmri nê mẽ inhmã ma xàj ixàpkur kêt ryy nê. Hãmri nhũm Pawre tee ri ja hã mẽ ixpumu nê pàr nhõ xwỳnh wa kãm kapêr nê wa kãm:

—Kwa na pa pre tee ri Kret kãm man mẽ pamôr nê war amã ixkapêr. Kop apu mũtar mãn mẽ kuri arĩ ri mẽ hkôt mẽ papa ronhỹx pu mẽ pajamakêtkati nê paxàmnhĩx ri papa. Tã nhỹx pu mẽ ri mẽ hikukrêxja gôx kãm rênh par kêt nê.

22 Nom kwa kêr ka mẽ tee ri amnhĩ kukamã ajamaxpêr kêt nê. Kot puj mẽ pahtô pahtyk kêt nê. Âm pàrja pix koja axà nê hapêx.

23 Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nê inhmã awjarê

24 nê inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nê. Kot kaj akà hkĩnh pê ma Itar kamã Rôm wỳr mỗ nê pỏj nê pahi maati Sesti pumu nê kãm amnhĩ jarê. Jakamã koja Tĩrtũm akôt mẽ mỗr xwỳnh piitã omunh mex nê ka mẽ atõ tanhmã amnhĩ to hkêt nê.” Anê.

25 —Ã kot inhmã kapêr anhỹr jakamã kwa mẽ amnhĩ to htỳx nê tee ri amnhĩ kukamã ajamaxpêr kêt nê. Tĩrtũm kapêr o wrỳk xwỳnh kot inhmã

ujarēnh xà hkôt koja Tirtũm ã mẽ panhĩpêx anē. Ixte ja hã omunh mex kēnã.

²⁶ Koja xep kôkja nhỹri gô hipôk ã pàr krakrak pa. Nom mẽ papajaja kot puj mẽ pahkà hkĩnh pê hwỳr pahpôx pa. Anē.

²⁷ Tã pa mẽ mōõ nē ã inhmōr anhỹrja ã ixtã semãn axkrut nē ra gô rax pê Ariax kôt axà. Kamàt kãm hkôt axà nhũm kôkja arĩ pàr o apêr tỳx rãhã ho mō. Hãmri nhũm kôt ã kamàt nhũm pàr o mrar xwỳnhja ra pàr kot pykahti grà htêp ã hkamnhĩx.

²⁸ Jakamã nhũm mẽ gô xupỳm pumunh xà ho gô pumu nhũm upỳm kêp 36 met. Hãmri nhũm hã ahtũmre nē axte omu nhũm ra hpãnhã kêp 27 met pix. Jao ra pàr kot gô kokwe htêp o mōr ã omu.

²⁹ Hãmri nē kot kēn kuranh nē hã pikrakrak pymaj katē rũm ho htỳx xà ho 4 nē gôx kãm kurē nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ.

³⁰ Hãmri nhũm pàr kãm mẽ àpênh xwỳnhjaja tanhmã hamaxpêr to nē hêx rom pàr krare ho wrỳk o tē. Mẽ kot mẽ ixrer nē ahte xarmã mōr nē rêr nē tokyx gô hipôk wỳr hpôx kaxyw. No ãm hêx rom te mẽ kot axte pàr krã rũm ho htỳx xà hõ mẽnh kaxyw pyrak o amnhĩ nhĩpêx nē kaxyw ho wrỳk o tē.

³¹ Nom nhũm Pawre mẽ hamaxpêr ã mẽ omu hãmri nē pôristi mẽ mẽ hkrãhtũm mã mẽ harē nē mẽ kãm:

—Kwa koja mũjjaja mẽ pare nē ahte pàr krare kamã xarmã mōn rê ka mẽ apikaprãr pa kãm ga. Anē.

³² Hãmri nhũm mẽ tee ri kuma nē mẽ hwỳr hprôt nē mẽ kêp pàr krare pê hkaxpre xà jakà nhũm gôx

kām tēm nē ma gô hkôt hkaprÿn mō.

³³ Tā hāmri nhūm ra myt kator o mō nhūm Pawre akupÿm mē piitā mē ho mē hamaxpēr o hihtÿx kaxyw mē kām:

—Kwa na ka mē tee ri amnhī kukamā ajamaxpēr o akaprī nē axàpkur kêt o atā semān axkrut.

³⁴ E pu mē mēmoj krē nē ho amnhī xihtÿx. Kot puj mē pahtō pahtyk kêt nē. Ām hāmri na pa mē amā ixkapēr. Anē.

³⁵ Hāmri nē mēmoj py nē mē noo mā Tīrtūm mā harē nē hkur o xa

³⁶ nhūm mē ja hā omunh xà hkôt akupÿm tām hamaxpēr o mō. Hāmri nē amnhīm mēō hkwy jamÿ nē kumē kuku.

³⁷ Pār kām mē inhmōr xwÿnhjaja na pa prem ixpê 276.

³⁸ Tā pa mē ra ixàpkur pa. Hāmri nē pār kaxkrit kaxyw mē apkur xà hā mēmoj y jakrêxja gôx kām hkapīr pa.

Pār mē kêp pikrakraġ ã harēnh

³⁹ Tā nhūm ra myt kator mex nē nhūm mē amnhī kukamā gô hipôk pumu nē axpēn mā:

—Kwa nhÿ pika na mÿj wehe? Anē.

Hāmri nē nhÿri hakàx ã amnhīm nōr xà mex pumu nē hwÿr pār o mōr kaxyw hā axpēn ma.

⁴⁰ Hāmri nē kaxyw pār o htÿx xà jakà nhūm axrē nē gôx kām rôrôk pa. Nē pī ho pār o juk xà nhō xē xàja nhūm mē mǎānēn krāhta. Hāmri nē akupÿm mrrar xà hā kupêxē nhô nhūm kôk ho hikot nē ma gô jakàx wÿr o mō.

⁴¹ Nom nhūm pār kormā hakàx pê awry hā mōr ri amnhī to kokwe kura nē pyka nhīmōk ã nō nhūm

mẽ tee ri kot hkaxàr nẽ akupỹm gô xupỹm mã mẽn̄h kaxyw. Nom nhũm gô kot pàr nhĩxô htak tỳx kurê nhũm mẽ ixpê pikrakrak par o mỗ.

⁴² Jakamã nhũm pôristijaja tee ri omu hãmri nẽ ra mẽ kêp prêsjê nhĩmex kaxyw. Mẽ kot gôx kãm rôrôk nẽ gô hipôk wỳr hpa ho nana nẽ mẽ kêp pikunor pymaj kot mẽ himex kaxyw.

⁴³ Nom nhũm mẽ hkrãhtũmja kãm Pawre pĩr prãm kêt jakamã ja nê mẽ hkurê nẽ mẽ inhmã:

—E mẽ ate apa ho gô rẽn̄h mex xwỳnhjaja. Akumrêx mra nẽ mrỗ nẽ ho nana ho mra nẽ rê.

⁴⁴ No mẽ ate apa ho nana punuj xwỳnhjaja kêt ka mẽ tapti rỳ pàr kukrêx ò mỳ nẽ hã ajêt nẽ hã ma môn rê. Anẽ.

Hãmri pa mẽ ã amnhĩ nhĩpêx anẽ nẽ ixpiitã ixkà hkĩnh pê ixrêr pa.

28

Gô hipôk pê Maw kamã mẽ pa hã mẽ harẽn̄h Makre 16.17-18

¹ Tã pa mẽ ixpiitã ixkà hkĩnh pê ixrêr pa. Nhũm gô hipôk ã mẽ pa xwỳnhjaja mẽ inhmã gô hipôk nhĩxi jarẽ nhũm xep kêp Maw.

² Nhũm Maw nhỗ xwỳnhjaja mẽ ixto mex nẽ. Nhũm axte na wrỳk rax nẽ nhũm kry htỳx kumrêx nhũm mẽ ixkamã ukapĩ nẽ mẽ inhmã kuto nẽ mẽ inhmã kapêr mex nẽ.

³ Hãmri nhũm Pawre kuwy kaxyw ri pĩ kawrà ho mra nẽ kuwy hwỳr o tẽ nẽ hã haxwỳr o xa. Hãmri nhũm kagã xoprê ò wẽnên xihtỳxja kuwy kagro pymaj pĩ rũm kato nẽ ãkra hã kunha nẽ hã àpêr o ajêt.

⁴⁻⁵ Hāmri nhũm Pawre omu nẽ amnhĩ nê ho apê nẽ kuwy kamã kumẽ nhũm kamã tẽm nẽ xêt pa. Hāmri nhũm gô hipôk nhõ xwỳnhjaja tee ri ja hã omu nẽ axpẽn mã:

—Kwa ga mẽmyti mũj pumu. Mãn kêp mẽ hpar o pa xwỳnh na. Hã na kagã õ wẽnên xihtỳxta kunha. Nà koja ty nẽ rĩ amnhĩ pumu. Ra hkà hkĩnh pê gô rũm mẽ pahwỳr rêr tã koja tã ty kãm ga. Anẽ.

⁶ Hāmri nhũm mẽ tee ri kot tanhmã amnhĩ to hã hkamnhĩx nẽ hamâr o kuhê. à htỳx nẽ ìhkra hikot rỳ htyk kurê kumrêx ã hkamnhĩx tã nhũm tanhmã amnhĩ kamã hamak to hkêt nẽ. ãm htỳx ri hkĩnh nẽ kapêr nẽ hpikunhar o ri mra. Hāmri nhũm mẽ tee ri omu nẽ axpẽn mã:

—Kwa tanhmã kot amnhĩ tore hã. Kêp mẽ hpar o pa xwỳnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nẽ. Anẽ.

⁷ Nhũm gô hipôk ã mẽ õ pahihtì pê Puptija. Òrkwỹ hã jawỳ jakamã nhũm amnhĩ kôt mẽ ixwỳ pa mẽ ma hkôt mỗ nẽ kuri hkôt ixpa ho ixtã apkati axkrunêpxi nhũm mẽ ixto mex nẽ.

⁸ Nhũm ra Pupti nhĩpêêxà kêp à nẽ nõ. Kà kagro htỳx nẽ haok. Hāmri nhũm Pawre hwỳr tẽ nẽ omu nẽ hã ìhkra xi nẽ ho Tirtũm wỳ nhũm akupỹm ho mex kurê kumrêx.

⁹ Hāmri nhũm gô hipôk nhõ xwỳnhja harênh ma nẽ Pawre hwỳr mẽ à xwỳnh piitã o mra nhũm mẽ omu nẽ Tirtũm nhỹ hã akupỹm mẽ ho mex pa.

¹⁰⁻¹¹ Hāmri nhũm gô hipôk nhõ xwỳnhjaja mẽ ixto mex rax nẽ.

*Pawre axte Rõm wỳr nojarêt ã harênh
Rõmãn 1.10-12, 15.30-32*

Tã pa mẽ gô hipôôta kamã ixpa hã mytwrÿ axkrunëpxi. Hãmri nhũm kôk xàpêr tÿxta hapêx pa mẽ axte inhnojarêr nẽ ma mỗ. Pàr õ kamã hpãnhã mỗ. Aresãnrir rũm pàrja pa mẽ hpãnhã kamã mỗ. Mẽ kot kãm “sãnti pihpo” anhÿr xwÿnhnta kamã. Na pre gô hipôk kamã haxwÿja kôk xàpêr tÿx hapêx jamãr xa hã hikwÿ htã ra axte nojarêr. Hãmri nhũm gô hipôk nhõ xwÿnhja ma mẽ inhmõr xà hã mẽ inhmã mẽ ixàpkur xà hkwy nhõr rax nẽ. Hãmri pa mẽ pàr wÿr inhjêx pa nẽ ma kamã mỗ.

¹² Mỗ nẽ Sirakus wÿr pøj nẽ hã pàr xi. Hãmri nẽ krÿja kamã mẽ ixtã apkati axkrunëpxi nẽ axte mỗ.

¹³ Mỗ hãmri nẽ Rekre hwÿr pøj nẽ hã pàr xi. Hãmri nẽ kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mỗ. Nẽ mẽ ixtã apkati axkrut nẽ Potew wÿr pøj nẽ hã pàr xi.

¹⁴ Hãmri nẽ pàr rũm ijapøj nẽ krÿ kamã Jejus kôt mẽ ixtõ nẽ htõx kwÿjê pumu nhũm mẽ amnhÿ wÿr mẽ ixwÿ. Pa mẽ ma mẽ hkôt mra nẽ mẽ hkôt ri ixpa hã ixtã ù semãn. Hãmri nẽ ma Rõm wÿr hpãnhã ixpar o mỗ.

¹⁵ Hãmri nẽ kormã amÿm inhmõr ri nhũm Rõm kãm Jejus kôt mẽ ixtõ nẽ ixtõxjaja mẽ ijarênh ma nẽ man mẽ ixkutã mra. Ma krÿ pê Prasxi Apja mẽ “Wën Pijakrunëpxi” anhÿr xwÿnh jarênhja wa hwÿr mẽ ixkutã mra. Hãmri pa mẽ axpên kaxpa nhũm Pawre mẽ omu nẽ hkÿnh nẽ. Nẽ mẽ hã Tÿrtũm mã amnhÿ jarê nẽ kãm:

—Pa Tÿrtũm? Nà ãm hãmri na ka mẽ ixkutã jajê rẽ. Na pa mẽ omu nẽ ixkÿnh nẽ. Nà amex o amex Tÿrtũm. Anẽ.

¹⁶ Hãmri pa mẽ ma mẽ hkôt Rõm wÿr mỗ nẽ pøj.

Jatã Itar kãm Rõm wÿr pøj. Hãmri nhũm pôristi krãhtũm Pawre mã:

—E kot paj mẽ hagjênh xà kamã ajaxàr kêt nê. Kot kaj amã nhÿri ixkre kamã apa hprãm nê mamrĩ kamã apa. Nom koja pôristi hõ akôt pa ho pa.

Anhÿr jakamã nhũm nhÿri ixkre kamã pahihtĩ Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpêx to hã harênh

Atre 17.5-6

¹⁷ Tã nhũm Pawre Rõm kamã hã apkati axkrunêpxi nê amnhĩ wÿr Ijaew xàptàr tũmrejê hwÿ nhũm mẽ hã akuprõ nhũm mẽ kãm amnhĩ jarê nê mẽ kãm:

—E ixkwÿjaja. Pa mẽ amã amnhĩ jarê ka mẽ inhma. Nà na pa pre mẽ panhĩgêjtê kapêr nhĩrôp tanhmã ixãm to hkêt nê rÿ ixte tanhmã mẽ pahkwÿjê hõ hto hkêt tã nhũm mẽ pahkwÿjaja amarĩ ixpynê. Jerujarê kamã ixpynê nê Rõm nhõ xwÿnhjê nhĩhkram ijaxà.

¹⁸ Hãmri nhũm mẽ ixte amnhĩ nhĩpêx ã ixkukja nê tee ri mẽ kot mẽmoj mÿrapê ixpĩr kaxyw tanhmã ixkukjêr to kaprÿ. Jakamã nhũm mẽ kãm ixkator prãm nê.

¹⁹ Nom nhũm mẽ pahkwÿjaja kãm ja mex kêt jakamã pa pre jar pahi maati Sesti kot ixte kãm amnhĩ jarênh ã inhmar kaxyw amnhĩm harê nê man hwÿr mõi. Kot paj tanhmã kãm mẽ pahkwÿjê ho ixkapêr punuj to hkêt nê. ãm ixte amnhĩ tã tanhmã mar to hpix kaxyw na pa hwÿr mõi.

²⁰ —Tã pa amnhĩ wÿr mẽ awÿ. Ixte mẽ amã amnhĩ jarênh kaxyw. Mẽ pahkaprĩ xwÿnhnta. Mẽ

pahte kormã kamã pajamak o papa xwỳnh Jejusta. Ìm ixte amnhĩ kaxyw hkôt ijamaxpěr pix mỳrapê na prem ã kàx o ixkaxpre anê. Anê.

²¹ Hãmri nhũm mẽ kuma nê kãm:

—Nà jar tanhmã ajarēnh kute hkêt. Na pre Jutej kamã mẽ pahkwỳjaja tanhmã ajarēnh to hã kagà nê mẽ ixwỳr mēnh kêt nê. Nê ham mẽ kurũm mẽ hpôx xwỳnhjaja na prem tanhmã mẽ inhmã ajarēnh to hkêt nê.

²² No na xep hte pyka piitã hkôt mẽ kãm mẽ ate Jejus kôt amnhĩ xunhwỳr xwỳnhjê kurê nê. Na pa pre mẽ ajarēnh ma nê mẽ inhmã axujarēnh mar prãm nê. Anê.

²³ Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nê nhũm mẽ kãm awjarê. Mẽ kãm ujarēnh ry nê. Nê ho kamàt. Nê mẽ kãm:

—Nà mẽ pahte amnhĩ wỳr kamã pajamak o papa xwỳnh Jejusja. Kot kaj mẽ atõ amnhĩ kaxyw hkôt ajamaxpěr nê hkôt amnhĩ xãm nhũm Tĩrtũm ja hã apumu nê ato hkra. Anê.

Nhũm pre ã mẽ kãm kapěr anê. Nê finat Mojes kot Tĩrtũm nhỹ hã Jejus kukamã tanhmã hã kagà htoja nhũm mẽ kãm harê. Nê Tĩrtũm nhỹ hã kapěr jarēnh o mẽ pa xwỳnhjaja kot tanhmã hã kagà htoja nhũm mẽ kãm harê.

²⁴ Hãmri nhũm mẽ hkwỳjaja kuma nê hkôt hamaxpěr nê amnhĩ kaxyw Jejus kôt hamaxpěr nê hkôt amnhĩ xunhwỳ. No nhũm mẽ hkwỳjaja kuma nê ãm kuma nê kãm axte mar prãm kêt nê.

²⁵⁻²⁹ Jakamã kànhmã kuhê nê nojarêť nhũm Pawre mẽ kãm:

—Nà amnepễm na pre Tĩrtũm finat Ijaisti mã tanhmã kapễr to. ỹ hã kot mẽ panhĩgễtjê mã tanhmã kapễr jarễnh to kaxyw. Tĩrtũm Karõ nhỹ hã kot mẽ kãm kapễr nê tanhmã mẽ harễnh to kaxyw. Te Tĩrtũm tãm mẽ kãm kapễr pyrãk mẽ kãm kapễr. Nê ãm hãmri tanhmã mẽ pahkwỳjê jarễnh to. Na pre mẽ kãm:

E Ijaisti. Kễr ka ma akwỳjê hkôt ri mẽ kãm tanhmã ixkapễr jarễnh to ho ri apa.

Nê mẽ kãm: “Kot kaj mẽ ajamak o axumar tỳx tã aprĩ hã ixkapễr mar kêt nê.

Nê mẽ ano ho arĩt tỳx tã aprĩ hã ixte amnhĩ nhĩpễx ã ixpumunh kêt nê.

Mê amã ixkapễr mar prãm kêt jakamã te mẽ ate mar pymaj amnhĩ jamak pro pyrãk o amnhĩ nhĩpễx o ri apa.

Nê mẽ amã ixte amnhĩ nhĩpễx ã ixpumunh prãm kêt jakamã te mẽ ate ixte amnhĩ nhĩpễx ã ixpumunh pymaj te mẽ anomnhõt pyrãk o amnhĩ nhĩpễx o ri apa.

Jao amnhĩ kaxyw ixkôt ajamaxpễr kêt nê.

Kop mẽ amã ixkapễr mar prãm ronhỹx ka mẽ aprĩ hã inhmar tỳx nê.

Nê aprĩ hã ixte amnhĩ nhĩpễx ã ixpumunh mex nê.

Jao amnhĩ tomnuj kaga hpa nê ixkôt amnhĩ xunhwỳ.

Pa ja hã mẽ apumu nê mẽ ato mex nê.

Tã ka mẽ ã amnhĩ nhĩpễx anhỹr kêt nê.” Anhỹr o kễr ka mẽ kãm ixkapễr jarễnh o ri mẽ hkôt apa Ijaisti. Anê.

Na pre ã Tĩrtũm mẽ panhĩgễtjê kaxyw Ijaisti mã kapễr anê nhũm ô ri mẽ kãm ujarễnh o pa nê mẽ pamã hã kagà. Jakamã kwa mẽ okora. Kễr

ka mẽ jajê pyrà nê ã amnhĩ nhĩpêx anhÿr hkêt nê. Kwa mẽ inhma nê inhmar tÿx nê. Ijaew kêt xwÿnhjaja kot kapêr marja na ra Tĩrtũm kãm hprãm nê. Jakamã koja mẽ hwÿr mẽ kot kapêr jarênh o mẽ pa xwÿnh kwÿjê rê nhũm mẽ hkôt mẽ kãm ujarênh o pa nhũm mẽ kuma nê mẽ akurom kãm mar prãm nê. Anê.

Hãmri nhũm mẽ kuma nê hapôx pa nê ma akupÿm axpên mã tanhmã kapêr jarênh to ho mra.

³⁰ Hãmri nhũm pahĩ maati Sesti tokyx amnhĩ wÿr Pawre hwÿ nê tanhmã mar to hkêt nhũm òrkwÿ kamã kêp prês nê pa ho hã amgrà axkrut. Nê tãm òrkwÿ pãnhã mẽ kãm amnhĩre. Nhũm pre krĩ nhõ xwÿnhjaja ohtô nê hwÿr mra nhũm amnhĩ wÿr mẽ omu nê hkĩnh nê.

³¹ Na pre hte amnhĩ wÿr mẽ kuwÿ nê mẽ kãm Tĩrtũm kapêr jarênh o hkrĩ. Mẽ kot Tĩrtũm Kra Pahĩti Jejus Kris kôt amnhĩ xunhwÿr nhũm Tĩrtũm kot ja hã mẽ omunh nê amnhĩ katut kôt mẽ kot amnhĩ tomnuj rênh par nê mẽ ho hkra hã mẽ kãm ujarênh o hkrĩ. Nê mẽ kot hkôt amnhĩ xunhwÿr xwÿnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mẽhõ ja nê tanhmã kãm kapêr to hkêt nê.

Tã ãm ja pix Teopre. Ixpê Rukre na pa awÿr kagàja nhĩpêx nê kumê. Nê kamã amã tanhmã mẽ pahkwÿjê jarênh to. Tã ãm ja pix na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cc

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f